

宿雨清幾句

朝陽晨帝城

望奔人樂業

瓊上踏歌行



# 全唐詩

## 十六

中华古典精华文库

# 全 唐 诗

(第十六部)

## 第五百八十一卷

### 卷 581\_1 【送洛南李主簿】

温庭筠

想君秦塞外，因见楚山青。槲叶晓迷路，枳花春满庭。  
禄优仍侍膳，官散得专经。子敬怀愚谷，归心在翠屏。

### 卷 581\_2 【巫山神女庙】

温庭筠

黯黯闭宫殿，霏霏荫薜萝。晓峰眉上色，春水脸前波。  
古树芳菲尽，扁舟离恨多。一丛斑竹夜，环佩响如何。

### 卷 581\_3 【地肺山春日】

温庭筠

冉冉花明岸，涓涓水绕山。几时抛俗事，来共白云闲。

卷 581\_4 【题陈处士幽居】

温庭筠

松轩尘外客，高枕自萧疏。雨后苔侵井，霜来叶满渠。  
闲看镜湖画，秋得越僧书。若待前溪月，谁人伴钓鱼。

卷 581\_5 【握柘词】

温庭筠

杨柳萦桥绿，玫瑰拂地红。绣衫金骝裹，花髻玉珑璁。  
宿雨香潜润，春流水暗通。画楼初梦断，晓日照湘风。

卷 581\_6 【题卢处士山居】

温庭筠

西溪问樵客，遥识楚人家。古树老连石，急泉清露沙。  
千峰随雨暗，一径入云斜。日暮飞鸦集，满山荞麦花。

卷 581\_7 【初秋寄友人】

温庭筠

闲梦正悠悠，凉风生竹楼。夜琴知欲雨，晓簟觉新秋。  
独鸟楚山远，一蝉关树愁。凭将离别恨，江外问同游。

卷 581\_8 【题丰安里王相林亭二首】

温庭筠

花竹有薄埃，嘉游集上才。白蘋安石渚，红叶子云台。  
朱户雀罗设，黄门驭骑来。不知淮水浊，丹藕为谁开。

偶到乌衣巷，含情更惘然。西州曲堤柳，东府旧池莲。  
星坼悲元老，云归送墨仙。谁知济川楫，今作野人船。

卷 581\_9 【早秋山居】

温庭筠

山近觉寒早，草堂霜气晴。树凋窗有日，池满水无声。  
果落见猿过，叶干闻鹿行。素琴机虑静，空伴夜泉清。

卷 581\_10 【和友人盘石寺逢旧友】

温庭筠

楚寺上方宿，满堂皆旧游。月溪逢远客，烟浪有归舟。  
江馆白蘋夜，水关红叶秋。西风吹暮雨，汀草更堪愁。

卷 581\_11 【送人南游】

温庭筠

送君游楚国，江浦树苍然。沙净有波迹，岸平多草烟。  
角悲临海郡，月到渡淮船。唯以一杯酒，相思高楚天。

卷 581\_12 【赠郑处士】

温庭筠

飘然随钓艇，云水是天涯。红叶下荒井，碧梧侵古槎。  
醉收陶令菊，贫卖邵平瓜。更有相期处，南篱一树花。

卷 581\_13 【江岸即事】

温庭筠

水容侵古岸，峰影度青蘋。庙竹唯闻鸟，江帆不见人。

雀声花外暝，客思柳边春。别恨转难尽，行行汀草新。

卷 581\_14 【赠隐者】

温庭筠

茅堂对薇蕨，炉暖一裘轻。醉后楚山梦，觉来春鸟声。  
采茶溪树绿，煮药石泉清。不问人间事，忘机过此生。

卷 581\_15 【渚宫晚春寄秦地友人】

温庭筠

风华已眇然，独立思江天。鳬雁野塘水，牛羊春草烟。  
秦原晓重叠，灞浪夜潺湲。今日思归客，愁容在镜悬。

卷 581\_16 【碧涧驿晓思】

温庭筠

香灯伴残梦，楚国在天涯。月落子规歇，满庭山杏花。

卷 581\_17 【送并州郭书记】

温庭筠

宾筵得佳客，侯印有光辉。候骑不传箭，回文空上机。  
塞城收马去，烽火射雕归。惟有严家濑，回环径草微。

卷 581\_18 【赠越僧岳云二首】

温庭筠

世机消已尽，巾履亦飘然。一室故山月，满瓶秋涧泉。  
禅庵过微雪，乡寺隔寒烟。应共白莲客，相期松桂前。

兰亭旧都讲，今日意如何。有树关深院，无尘到浅莎。  
僧居随处好，人事出门多。不及新春雁，年年镜水波。

卷 581\_19 【咏山鸡】

温庭筠

万壑动晴景，山禽凌翠微。绣翎翻草去，红觜啄花归。  
巢暖碧云色，影孤清镜辉。不知春树伴，何处又分飞。



卷 581\_20 【清旦题采药翁草堂】

温庭筠

幽人寻药径，来自晓云边。衣湿术花雨，语成松岭烟。  
解藤开涧户，踏石过溪泉。林外晨光动，山昏鸟满天。

卷 581\_21 【商山早行】

温庭筠

晨起动征铎，客行悲故乡。鸡声茅店月，人迹板桥霜。  
槲叶落山路，枳花明驿墙。因思杜陵梦，凫雁满回塘。

卷 581\_22 【题竹谷神祠】

温庭筠

苍苍松竹晚，一径入荒祠。古树风吹马，虚廊日照旗。  
烟煤朝奠处，风雨夜归时。寂寞东湖客，空看蒋帝碑。

卷 581\_23 【途中有怀】

温庭筠

驱车何日闲，扰扰路岐间。岁暮自多感，客程殊未还。  
亭皋汝阳道，风雪穆陵关。腊后寒梅发，谁人在故山。

卷 581\_24 【经李处士杜城别业】

温庭筠

忆昔几游集，今来倍叹伤。百花情易老，一笑事难忘。  
白社已萧索，青楼空艳阳。不闲云雨梦，犹欲过高唐。

卷 581\_25 【登李羽士东楼】

温庭筠

经客有余音，他年终故林。高楼本危睇，凉月更伤心。  
此意竟难折，伊人成古今。流尘其可欲，非复懒鸣琴。

卷 581\_26 【题僧泰恭院二首】

温庭筠

昔岁东林下，深公识姓名。尔来辞半偈，空复叹劳生。

忧患慕禅味，寂寥遗世情。所归心自得，何事倦尘缨。

微生竟劳止，晤言犹是非。出门还有泪，看竹暂忘机。  
爽气三秋近，浮生一笑稀。故山松菊在，终欲掩荆扉。

卷 581\_27 【西游书怀】

温庭筠

渭川通野戍，有路上桑干。独鸟青天暮，惊麋赤烧残。  
高秋辞故国，昨日梦长安。客意自如此，非关行路难。

卷 581\_28 【送人东游】

温庭筠

荒戍落黄叶，浩然离故关。高风汉阳渡，初日郢门山。  
江上几人在，天涯孤棹还。何当重相见，尊酒慰离颜。

卷 581\_29 【寄山中友人】

温庭筠

惟昔有归趣，今兹固愿言。啸歌成往事，风雨坐凉轩。

时物信佳节，岁华非故园。固知春草色，何意为王孙。

卷 581\_30 【偶题】

温庭筠

孔雀眠高阁，樱桃拂短檐。画明金冉冉，筝语玉纤纤。  
细雨无妨烛，轻寒不隔帘。欲将红锦段，因梦寄江淹。

卷 581\_31 【赠考功卢郎中】

温庭筠

白首方辞满，荆扉对渚田。雪中无陋巷，醉后似当年。  
一笈负山药，两瓶携涧泉。夜来风浪起，何处认渔船。

卷 581\_32 【题萧山庙】

温庭筠

故道木阴浓，荒祠山影东。杉松一庭雨，幡盖满堂风。  
客奠晓莎湿，马嘶秋庙空。夜深池上歇，龙入古潭中。

卷 581\_33 【春日寄岳州从事李员外二首】

温庭筠

苒弱楼前柳，轻空花外窗。蝶高飞有伴，莺早语无双。  
剪胜裁春字，开屏见晓江。从来共情战，今日欲归降。

从小识宾卿，恩深若弟兄。相逢在何日，此别不胜情。  
红粉座中客，彩旂江上城。尚平婚嫁累，无路逐双旌。

卷 581\_34 【和段少常柯古】

温庭筠

称觴慚座客，怀刺即门人。素向宁知贵，清淡不厌贫。  
野梅江上晚，堤柳雨中春。未报淮南诏，何劳问白蘋。

卷 581\_35 【海榴】

温庭筠

海榴开似火，先解报春风。叶乱裁笺绿，花宜插鬓红。  
蜡珠攒作蒂，缃彩剪成丛。郑驿多归思，相期一笑同。

卷 581\_36 【李先生别墅望僧舍宝刹，因作双韵声】

温庭筠

栖息消心象，檐楹溢艳阳。帘栊兰露落，邻里柳林凉。  
高阁过空谷，孤竿隔古冈。潭庐同淡薄，仿佛复芬芳。

卷 581\_37 【敷水小桃盛开因作】

温庭筠

敷水小桥东，娟娟照露丛。所嗟非胜地，堪恨是春风。  
二月艳阳节，一枝惆怅红。定知留不住，

## 第五百八十二卷

### 卷 582\_1 【寄山中人】

温庭筠

月中一双鹤，石上千尺松。素琴入爽籁，山酒和春容。  
幽瀑有时断，片云无所从。何事苏门生，携手东南峰。

### 卷 582\_2 【送淮阴孙令之官】

温庭筠

隋堤杨柳烟，孤棹正悠然。萧寺通淮戍，芜城枕楚壖。  
鱼盐桥上市，灯火雨中船。故老青藜岸，先知儒子贤。

### 卷 582\_3 【宿辉公精舍】

温庭筠

禅房无外物，清话此宵同。林彩水烟里，涧声山月中。

橡霜诸壑霁，杉火一炉空。拥褐寒更彻，心知觉路通。

卷 582\_4 【旅泊新津却寄一二知己】

温庭筠

维舟息行役，霁景近江村。并起别离恨，似闻歌吹喧。  
高林月初上，远水雾犹昏。王粲平生感，登临几断魂。

卷 582\_5 【赠僧云栖】

温庭筠

麈尾与筇杖，几年离石坛。梵余林雪厚，棋罢岳钟残。  
开卷喜先悟，漱瓶知早寒。衡阳寺前雁，今日到长安。

卷 582\_6 【雪夜与友生同宿晓寄近邻】

温庭筠

闭门群动息，积雪透疏林。有客寒方觉，无声晓已深。  
正繁闻近雁，并落起栖禽。寂寞寒塘路，怜君独阻寻。



卷 582\_7 【题造微禅师院】

温庭筠

夜香闻偈后，岑寂掩双扉。照竹灯和雪，看松月到衣。  
草堂疏磬断，江寺故人稀。唯忆湘南雨，春风独鸟归。

卷 582\_8 【正见寺晓别生公】

温庭筠

清晓盥秋水，高窗留夕阴。初阳到古寺，宿鸟起寒林。  
香火有良愿，宦名非素心。灵山缘未绝，他日重来寻。

卷 582\_9 【旅次盱眙县】

温庭筠

离离麦擢芒，楚客意偏伤。波上旅愁起，天边归路长。  
孤桡投楚驿，残月在淮樯。外杜三千里，谁人数雁行。

卷 582\_10 【鄂郊别墅寄所知】

温庭筠

持颐望平绿，万景集所思。南塘遇新雨，百草生容姿。

幽鸟不相识，美人如何期。徒然委摇荡，惆怅春风时。

卷 582\_11【京兆公池上作】

温庭筠

稻香山色叠，平野接荒陂。莲折舟行远，萍多钓下迟。  
坏堤泉落处，凉簟雨来时。京口兵堪用，何因入梦思。

卷 582\_12【卢氏池上遇雨赠同游者】

温庭筠

簟翻凉气集，溪上润残棋。萍皱风来后，荷喧雨到时。  
寂寥闲望久，飘洒独归迟。无限松江恨，烦君解钓丝。

卷 582\_13【题薛昌之所居】

温庭筠

所得乃清旷，寂寥常掩关。独来春尚在，相得暮方还。  
花白风露晚，柳青街陌闲。翠微应有雪，窗外见南山。

卷 582\_14 【东归有怀】

温庭筠

晴川通野陂，此地昔伤离。一去迹常在，独来心自知。  
鹭眠茭叶折，鱼静蓼花垂。无限高秋泪，扁舟极路岐。

卷 582\_15 【休浣日西掖谒所知】

温庭筠

赤墀高阁自从容，玉女窗扉报曙钟。日丽九门青锁闥，  
雨晴双阙翠微峰。毫端蕙露滋仙草，琴上薰风入禁松。  
苟令凤池春婉婉，好将余润变鱼龙。

卷 582\_16 【博山】

温庭筠

博山香重欲成云，锦段机丝妒鄂君。粉蝶团飞花转影，  
彩鸳双泳水生纹。青楼二月春将半，碧瓦千家日未曛。  
见说杨朱无限泪，岂能空为路岐分。

卷 582\_17 【送卢处士游吴越】

温庭筠

羡君东去见残梅，唯有王孙独未回。吴苑夕阳明古堞，  
越宫春草上高台。波生野水雁初下，风满驿楼潮欲来。  
试逐渔舟看雪浪，几多江燕荇花开。

卷 582\_18 【过新丰】

温庭筠

一剑乘时帝业成，沛中乡里到咸京。寰区已作皇居贵，  
风月犹含白社情。泗水旧亭春草遍，千门遗瓦古苔生。  
至今留得离家恨，鸡犬相闻落照明。

卷 582\_19 【过潼关】

温庭筠

地形盘屈带河流，景气澄明是胜游。十里晓鸡关树暗，  
一行寒雁陇云愁。片时无事溪泉好，尽日凝眸岳色秋。  
麈尾角巾应旷望，更嗟芳霭隔秦楼。

卷 582\_20 【题西平王旧赐屏风】

温庭筠

曾向金扉玉砌来，百花鲜湿隔尘埃。披香殿下樱桃熟，  
结绮楼前芍药开。朱鹭已随新卤簿，黄鹂犹湿旧池台。  
世间刚有东流水，一送恩波更不回。

卷 582\_21 【河中陪帅游亭】

温庭筠

倚阑愁立独徘徊，欲赋惭非宋玉才。满座山光摇剑戟，  
绕城波色动楼台。鸟飞天外斜阳尽，人过桥心倒影来。  
添得五湖多少恨，柳花飘荡似寒梅。

卷 582\_22 【和赵嘏题岳寺】

温庭筠

疏钟细响乱鸣泉，客省高临似水天。岚翠暗来空觉润，  
涧茶余爽不成眠。越僧寒立孤灯外，岳月秋当万木前。  
张邴宦情何太薄，远公窗外有池莲。

卷 582\_23 【苏武庙】

温庭筠

苏武魂销汉使前，古祠高树两茫然。云边雁断胡天月，  
陇上羊归塞草烟。回日楼台非甲帐，去时冠剑是丁年。  
茂陵不见封侯印，空向秋波哭逝川。

卷 582\_24 【送客偶作】

温庭筠

石路荒凉接野蒿，西风吹马利如刀。小桥连驿杨柳晚，  
废寺入门禾黍高。鸡犬夕阳喧县市，凫鹭秋水曝城壕。  
故山有梦不归去，官树陌尘何太劳。

卷 582\_25 【寒食前有怀】

温庭筠

万物鲜华雨乍晴，春寒寂历近清明。残芳荏苒双飞蝶，  
晓睡朦胧百啭莺。旧侣不归成独酌，故园虽在有谁耕。  
悠然更起严滩恨，一宿东风蕙草生。

卷 582\_26 【宿云际寺】

温庭筠

白盖微云一径深，东峰弟子远相寻。苍苔路熟僧归寺，  
红叶声乾鹿在林。高阁清香生静境，夜堂疏磬发禅心。  
自从紫桂岩前别，不见南能直至今。

卷 582\_27 【寄岳州李外郎远】

温庭筠

含蘋不语坐持颐，天远楼高宋玉悲。湖上残棋人散后，  
岳阳微雨鸟来迟。早梅犹得回歌扇，春水还应理钓丝。  
独有袁宏正憔悴，一樽惆怅落花时。

卷 582\_28 【游南塘寄知者】

温庭筠

白鸟梳翎立岸莎，藻花菱刺泛微波。烟光似带侵垂柳，  
露点如珠落卷荷。楚水晓凉催客早，杜陵秋思傍蝉多。  
铦公不信归心切，听取江楼一曲歌。

卷 582\_29 【寄卢生】

温庭筠

遗业荒凉近故都，门前堤路枕平湖。绿杨阴里千家月，  
红藕香中万点珠。此地别来双鬓改，几时归去片帆孤。  
他年犹拟金貂换，寄语黄公旧酒垆。

卷 582\_30 【春日访李十四处士】

温庭筠

花深桥转水潺潺，甬里先生自闭关。看竹已知行处好，  
望云空得暂时闲。谁言有策堪经世，自是无钱可买山。  
一局残棋千点雨，绿萍池上暮方

卷 582\_31 【宿松门寺】

温庭筠

白石青崖世界分，卷帘孤坐对氛氲。林间禅室春深雪，  
潭上龙堂夜半云。落月苍凉登阁在，晓钟摇荡隔江闻。  
西山旧是经行地，愿漱寒瓶逐领军。



卷 582\_32 【咏寒宵】

温庭筠

寒宵何耿耿，良宴有余姿。宝靿徘徊处，熏炉怅望时。  
曲琼垂翡翠，斜月到罽毼。委坠金缸烬，阑珊玉局棋。  
话穷犹注睇，歌罢尚持颐。暧暧遥相属，氛氲积所思。  
秦蛾卷衣晚，胡雁度云迟。上郡归来梦，那知锦字诗。

卷 582\_33 【寄渚宫遗民弘里生】

温庭筠

柳弱湖堤曲，篱疏水巷深。酒阑初促席，歌罢欲分襟。  
波月欺华烛，汀云润故琴。镜清花并蒂，床冷簟连心。  
荷叠平桥暗，萍稀败舫沉。城头五通鼓，窗外万家砧。  
异县鱼投浪，当年鸟共林。八行香未灭，千里梦难寻。  
未肯睽良愿，空期嗣好音。他时因咏作，犹得比南金。

卷 582\_34 【春尽与友人入裴氏林探渔竿】

温庭筠

一径互纡直，茅棘亦已繁。晴阳入荒竹，暧暧和春园。

倚杖息惭倦，徘徊恋微暄。历寻婵娟节，剪破苍筤根。  
地闭修茎孤，林振余箨翻。适心在所好，非必寻湘沅。

卷 582\_35 【春日】

温庭筠

问君何所思，迢递艳阳时。门静人归晚，墙高蝶过迟。  
一双青琐燕，千万绿杨丝。屏上吴山远，楼中朔管悲。  
宝书无寄处，香毂有来期。草色将林彩，相添入黛眉。

卷 582\_36 【洛阳】

温庭筠

巩树先春雪满枝，上阳宫柳啖黄鹂。  
桓谭未便忘西笑，岂为长安有凤池。

卷 582\_37 【题贺知章故居叠韵作】

温庭筠

废砌翳薜荔，枯湖无菰蒲。老媪饱藁草，愚儒输逋租。

· 全唐诗 ·

---

卷 582\_38 【雨中与李先生期垂钓先后相失，因作叠韵】

温庭筠

隔石觅屐迹，西溪迷鸡啼。小鸟扰晓沼，犁泥齐低畦。

## 第五百八十三卷

### 卷 583\_1 【春日雨（一作细雨）】

温庭筠

细雨濛濛入绛纱，湖亭寒食孟珠家。  
南朝漫自称流品，宫体何曾为杏花。

### 卷 583\_2 【细雨】

温庭筠

凭轩望秋雨，凉入暑衣清。极目鸟频没，片时云复轻。  
沼萍开更敛，山叶动还鸣。楚客秋江上，萧萧故国情。

### 卷 583\_3 【秋雨】

温庭筠

云满鸟行灭，池凉龙气腥。斜飘看棋簟，疏洒望山亭。

细响鸣林叶，圆文破沼萍。秋阴杳无际，平野但冥冥。

卷 583\_4 【春初对暮雨】

温庭筠

淅沥生丛筱，空濛沍网轩。暝姿看远树，春意入尘根。  
点细飘风急，声轻入夜繁。雀喧争槿树，人静出蔬园。  
瓦湿光先起，房深影易昏。不应江上草，相与滞王孙。

卷 583\_5 【雪二首】

温庭筠

砚水池先冻，窗风酒易消。鸦声出山郭，人迹过村桥。  
稍急方萦转，才深未寂寥。细光穿暗隙，轻白驻寒条。  
草静封还折，松欹堕复摇。谢庄今病眼，无意坐通宵。

羸骖出更慵，林寺已疏钟。踏紧寒声涩，飞交细点重。  
圃斜人过迹，阶静鸟行踪。寂寞梁鸿病，谁人代夜舂。

卷 583\_6 【送人游淮海（一作宿友人池）】

温庭筠

背橈灯色暗，宿客梦初成。半夜竹窗雨，满池荷叶声。

簟凉秋閣思，木落故山情。明发又愁起，桂花溪水清。

卷 583\_7 【原隰萸绿柳】

温庭筠

迴野韶光早，晴川柳满堤。拂尘生嫩绿，披雪见柔荑。  
碧玉牙犹短，黄金缕未齐。腰肢弄寒吹，眉意入春闺。  
预恐狂夫折，迎牵逸客迷。新莺将出谷，应借一枝栖。

卷 583\_8 【宿秦生（一作僧）山斋】

温庭筠

衡巫路不同，结室在东峰。岁晚得支遁，夜寒逢戴颙。  
龕灯落叶寺，山雪隔林钟。行解无由发，曹溪欲施春。

卷 583\_9 【赠楚云上人】

温庭筠

松根满苔石，尽日闭禅关。有伴年年月，无家处处山。  
烟波五湖远，瓶屨一身闲。岳寺蕙兰晚，几时幽鸟还。

卷 583\_10 【宿白盖峰寺寄僧】

温庭筠

山房霜气晴，一宿遂平生。阁上见林影，月中闻涧声。  
佛灯销永夜，僧磬彻寒更。不学何居士，焚香为宦情。

卷 583\_11 【送僧东游】

温庭筠

师归旧山去，此别已凄然。灯影秋江寺，篷声夜雨船。  
鸥飞吴市外，麟卧晋陵前。若到东林社，谁人更问禅。

卷 583\_12 【盘石寺留别成公】

温庭筠

槲叶萧萧带苇风，寺前归客别支公。三秋岸雪花初白，  
一夜林霜叶尽红。山叠楚天云压塞，浪遥吴苑水连空。  
悠然旅榜频回首，无复松窗半偈同。

卷 583\_13 【题中南佛塔寺】

温庭筠

鸣泉隔翠微，千里到柴扉。地胜人无欲，林昏虎有威。

涧苔侵客屐，山雪入禅衣。桂树芳阴在，还期岁晏归。

卷 583\_14 【马嵬佛寺】

温庭筠

荒鸡夜唱战尘深，五鼓雕舆过上林。才信倾城是真语，  
直教涂地始甘心。两重秦苑成千里，一炷胡香抵万金。  
曼倩死来无绝艺，后人谁肯惜青禽。

卷 583\_15 【清凉寺】

温庭筠

黄花红树谢芳蹊，宫殿参差黛嶂西。诗閤晓窗藏雪岭，  
画堂秋水接蓝溪。松飘晚吹搥金铎，竹荫寒苔上石梯。  
妙迹奇名竟何在，下方烟暝草萋萋。

卷 583\_16 【赠卢长史】

温庭筠

移病欲成隐，扁舟归旧居。地深新事少，官散故交疏。  
道直更无侣，家贫唯有书。东门烟水梦，非独为鲈鱼。



卷 583\_17 【秋日旅舍寄义山李侍御】

温庭筠

一水悠悠隔渭城，渭城风物近柴荆。寒蛩乍响催机杼，  
旅雁初来忆弟兄。自为林泉牵晓梦，不关砧杵报秋声。  
子虚何处堪消渴，试向文园问长卿。

卷 583\_18 【晚坐寄友人】

温庭筠

九枝灯在琐窗空，希逸无聊恨不同。晓梦未离金夹膝，  
早寒先到石屏风。遗簪可惜三秋白，蜡烛犹残一寸红。  
应卷鲛帘看皓齿，镜中惆怅见梧桐。

卷 583\_19 【送渤海王子归本国】

温庭筠

疆理虽重海，车书本一家。盛勋归旧国，佳句在中华。  
定界分秋涨，开帆到曙霞。九门风月好，回首是天涯。

卷 583\_20 【送北阳袁明府】

温庭筠

楚乡千里路，君去及良晨。苇浦迎船火，茶山候吏尘。  
桑浓蚕卧晚，麦秀雉声春。莫作东篱兴，青云有故人。

卷 583\_21 【送李生归旧居】

温庭筠

一从征战后，故社几人归。薄宦离山久，高谈与世稀。  
夕阳当板槛，春日入柴扉。莫却严滩意，西溪有钓矶。

卷 583\_22 【早春浣水送友人】

温庭筠

青门烟野外，渡浣送行人。鸭卧溪沙暖，鸪鸣社树春。  
残波青有石，幽草绿无尘。杨柳东风里，相看泪满巾。

卷 583\_23 【送襄州李中丞赴从事】

温庭筠

汉庭文采有相如，天子通宵爱子虚。把钓看棋高兴尽，  
焚香起草宦情疏。楚山重叠当归路，溪月分明到直庐。  
江雨潇潇帆一片，此行谁道为鲈鱼。

卷 583\_24 【江上别友人】

温庭筠

秋色满葭菼，离人西复东。几年方暂见，一笑又难同。  
地势萧陵歇，江声禹庙空。如何暮滩上，千里逐征鸿。

卷 583\_25 【与友人别】

温庭筠

半醉别都门，含凄上古原。晚风杨叶社，寒食杏花村。  
薄暮牵离绪，伤春忆晤言。年芳本无限，何况有兰孙。

卷 583\_26 【鸿胪寺有开元中锡宴堂，楼台池沼雅为胜绝，荒凉遗址仅有存者，偶成四十韵】

温庭筠

明皇昔御极，神圣垂耿光。沈机发雷电，逸躅陵尧汤。  
西覃积石山，北至穷发乡。四凶有獬豸，一臂无螳螂。  
婵娟得神艳，郁烈闻国香。紫绦鸣羯鼓，玉管吹霓裳。  
禄山未封侯，林甫才为郎。昭融廓日月，妥帖安纪纲。  
群生到寿域，百辟趋明堂。四海正夷宴，一尘不飞扬。  
天子自犹豫，侍臣宜乐康。轧然闾阖开，赤日生扶桑。  
玉砌露盘纤，金壶漏丁当。剑佩相击触，左右随趋跄。  
玄珠十二旒，红粉三千行。顾盼生羽翼，叱嗟回雪霜。  
神霞凌云阁，春水骊山阳。盘斗九子粽，匭擎五云浆。  
双琼京兆博，七鼓邯郸娼。毵毵碧鸡斗，茱萸翠雉场。  
仗官绣蔽膝，宝马金镂锡。椒涂隔鹦鹉，柘弹惊鸳鸯。  
猗欤华国臣，鬓发俱苍苍。锡宴得幽致，车从真炜煌。  
画鹖照鱼鳖，鸣驺乱鵙鹬。飏飏荡碧波，炫煌迷横塘。  
萦盈舞回雪，宛转歌绕梁。艳带画银络，宝梳金钿筐。  
沈冥类汉相，醉倒疑楚狂。一旦紫微东，胡星森耀芒。  
凭陵逐鲸鲵，唐突驱犬羊。纵火三月赤，战尘千里黄。  
殽函与府寺，从此俱荒凉。兹地乃蔓草，故基摧坏墙。  
枯池接断岸，唧唧啼寒螿。败荷塌作泥，死竹森如枪。  
游人问老吏，相对聊感伤。岂必见麋鹿，然后堪回肠。  
幸今遇太平，令节称羽觴。谁知曲江曲，岁岁栖鸾凰。

卷 583\_27 【访知玄上人遇暴经因有赠】

温庭筠

缥帙无尘满画廊，钟山弟子静焚香。惠能未肯传心法，  
张湛徒劳与眼方。风飏檀烟销篆印，日移松影过禅床。  
客儿自有翻经处，江上秋来蕙草荒。

卷 583\_28 【寄崔先生】

温庭筠

往年江海别元卿，家近山阳古郡城。莲浦香中离席散，  
柳堤风里钓船横。星霜荏苒无音信，烟水微茫变姓名。  
菰黍正肥鱼正美，五侯门下负平生。

卷 583\_29 【敬答李先生】

温庭筠

七里滩声舜庙前，杏花初盛草芊芊。绿昏晴气春风岸，  
红漾轻纶野水天。不为伤离成极望，更因行乐惜流年。  
一瓢无事麝裘暖，手弄溪波坐钓船。

卷 583\_30 【宿沔曲僧（一作精）舍】

温庭筠

东郊和气新，芳霭远如尘。客舍停疲马，僧墙画故人。  
沃田桑景晚，平野菜花春。更想严家濑，微风荡白蘋。

卷 583\_31 【宿一公精舍】

温庭筠

夜阑黄叶寺，瓶锡两俱能。松下石桥路，雨中山殿灯。  
茶炉天姥客，棋席剡溪僧。还笑长门赋，高秋卧茂陵。

卷 583\_32 【月中宿云居寺上方】

温庭筠

虚阁披衣坐，寒阶踏叶行。众星中夜少，圆月上方明。  
霭尽无林色，暄余有涧声。只应愁恨事，还逐晓光生。

卷 583\_33 【登卢氏台】

温庭筠

胜地当通邑，前山有故居。台高秋尽出，林断野无余。  
白露鸣蛩急，晴天度雁疏。由来放怀地，非独在吾庐。

卷 583\_34 【牡丹二首】

温庭筠

轻阴隔翠帟，宿雨泣晴晖。醉后佳期在，歌余旧意非。  
蝶繁经粉住，蜂重抱香归。莫惜薰炉夜，因风到舞衣。

水漾晴红压叠波，晓来金粉覆庭莎。裁成艳思偏应巧，  
分得春光最数多。欲绽似含双靥笑，正繁疑有一声歌。  
华堂客散帘垂地，想凭阑干敛翠蛾。

卷 583\_35 【反生桃花发因题】

温庭筠

疾眼逢春四壁空，夜来山雪破东风。未知王母千年熟，  
且共刘郎一笑同。已落又开横晚翠，似无如有带朝红。  
僧虔蜡炬高三尺，莫惜连宵照露丛。

卷 583\_36 【杏花】

温庭筠

红花初绽雪花繁，重叠高低满小园。正见盛时犹怅望，  
岂堪开处已缤翻。情为世累诗千首，醉是吾乡酒一樽。  
杳杳艳歌春日午，出墙何处隔朱门。

卷 583\_37 【和太常杜少卿东都修行里有嘉莲】

温庭筠

春秋罢注直铜龙，旧宅嘉莲照水红。两处龟巢清露里，  
一时鱼跃翠茎东。同心表瑞荀池上，半面分妆乐镜中。  
应为临川多丽句，故持重艳向西风。

卷 583\_38 【题磁岭海棠花】

温庭筠

幽态竟谁赏，岁华空与期。岛回香尽处，泉照艳浓时。  
蜀彩淡摇曳，吴妆低怨思。王孙又谁恨，惆怅下山迟。



卷 583\_39 【苦楝花】

温庭筠

院里莺歌歇，墙头蝶舞孤。天香薰羽葆，宫紫晕流苏。  
暧暧迷青琐，氤氲向画图。只应春惜别，留与博山炉。

卷 583\_40 【自有扈至京师已后朱樱之期】

温庭筠

露圆霞赤数千枝，银笼谁家寄所思。秦苑飞禽谙熟早，  
杜陵游客恨来迟。空看翠幄成阴日，不见红珠满树时。  
尽日徘徊浓影下，只应重作钓鱼期。

卷 583\_41 【答段柯古见嘲】

温庭筠

彩翰殊翁金缭绕，一千二百逃飞鸟。  
尾薪桥下未为痴，暮雨朝云世间少。

卷 583\_42 【莲花】

温庭筠

绿塘摇滟接星津，轧轧兰橈入白蘋。  
应为洛神波上袜，至今莲蕊有香尘。

卷 583\_43 【过吴景帝陵】

温庭筠

王气销来水淼茫，岂能才与命相妨。  
虚开直渚三千里，青盖何曾到洛阳。

卷 583\_44 【龙尾驿妇人图】

温庭筠

慢笑开元有幸臣，直教天子到蒙尘。  
今来看画犹如此，何况亲逢绝世人。

卷 583\_45 【薛氏池垂钓】

温庭筠

池塘经雨更苍苍，万点荷珠晓气凉。  
朱璃空偷御沟水，锦鳞红尾属严光。

卷 583\_46 【简同志】

温庭筠

开济由来变盛衰，五车才得号铉基。  
留侯功业何容易，一卷兵书作帝师。

卷 583\_47 【瑟瑟钗】

温庭筠

翠染冰轻透露光，堕云孙寿有余香。  
只因七夕回天浪，添作湘妃泪两行。

卷 583\_48 【元日】

温庭筠

神耀破氛昏，新阳入晏温。绪风调玉吹，端日应铜浑。  
威凤跄瑶簪，升龙护璧门。雨旸春令煦，裘冕晬容尊。

卷 583\_49 【二月十五日樱桃盛开自所居蹑履吟玩竞名王泽章洋才】

温庭筠

晓觉笼烟重，春深染雪轻。静应留得蝶，繁欲不胜莺。  
影乱晨飙急，香多夜雨晴。似将千万恨，西北为卿卿。

卷 583\_50 【寒食节日寄楚望二首】

温庭筠

芳兰无意绿，弱柳何穷缕。心断入淮山，梦长穿楚雨。  
繁花如二八，好月当三五。愁碧竟平皋，韶红换幽圃。  
流莺隐员树，乳燕喧余哺。旷望恋曾台，离忧集环堵。  
当年不自遣，晚得终何补。郑谷有樵苏，归来要腰斧。

家乏两千万，时当一百五。飐飐杨柳风，穰穰樱桃雨。  
年芳苦沉潦，心事如摧橹。金犊近兰汀，铜龙接花坞。  
青葱建杨宅，隐辚端门鼓。彩素拂庭柯，轻球落邻圃。  
三春谢游衍，一笑牵规矩。独有恩泽侯，归来看楚舞。

卷 583\_51 【清明日】

温庭筠

清娥画扇中，春树郁金红。出犯繁花露，归穿弱柳风。  
马骄偏避幙，鸡骇乍开笼。柘弹何人发，黄鹂隔故宫。

卷 583\_52 【禁火日（第七句缺一字）】

温庭筠

骀荡清明日，储胥小苑东。舞衫萱草绿，春鬓杏花红。  
马轡轻衔雪，车衣弱向风。□愁闻百舌，残睡正朦胧。

卷 583\_53 【嘲三月十八日雪】

温庭筠

三月雪连夜，未应伤物华。只缘春欲尽，留著伴梨花。

卷 583\_54 【杨柳八首（一作杨柳枝）】

温庭筠

宜春苑外最长条，闲袅春风伴舞腰。  
正是玉人肠断处，一渠春水赤阑桥。

南内墙东御路旁，预知春色柳丝黄。  
杏花未肯无情思，何是情人最断肠。

苏小门前柳万条，毵毵金线拂平桥。  
黄莺不语东风起，深闭朱门伴细腰。

金缕毵毵碧瓦沟，六宫眉黛惹春愁。  
晚来更带龙池雨，半拂阑干半入楼。

馆娃宫外邺城西，远映征帆近拂堤。  
系得王孙归意切，不关春草绿萋萋。

两两黄鹂色似金，袅枝啼露动芳音。  
春来幸自长如线，可惜牵缠荡子心。

御柳如丝映九重，凤凰窗柱绣芙蓉。  
景阳楼畔千条露，一面新妆待晓钟。

织锦机边莺语频，停梭垂泪忆征人。

塞门三月犹萧索，纵有垂杨未觉春。

卷 583\_55 【客愁】

温庭筠

客愁看柳色，日日逐春深。荡漾春风里，谁知历乱心？

卷 583\_56 【和周繇】

温庭筠

齐马驰千驷，卢姬逞十三。玳筵方喜睐，金勒自赳赳。  
堕珥情初洽，鸣鞭战未酣。神交花冉冉，眉语柳毵毵。  
却略青鸾镜，翘翻翠凤簪。专城有佳对，宁肯顾春蚕。

卷 583\_43 【光风亭夜宴妓有醉殴者】

温庭筠

吴国初成阵，王家欲解围。拂巾双雉叫，飘瓦两鸳飞。

卷 583\_44 【南歌子词二首】

温庭筠

一尺深红胜曲尘，天生旧物不如新。  
合欢桃核终堪恨，里许元来别有人。

井底点灯深烛伊，共郎长行莫围棋。  
玲珑骰子安红豆，入骨相思知不知。

卷 583\_45 【题李卫公诗二首】

温庭筠

蒿棘深春卫国门，九年于此盗乾坤。两行密疏倾天下，  
一夜阴谋达至尊。肉视具僚忘匕箸，气吞同列削寒温。  
当时谁是承恩者，肯有余波达鬼村。

势欲凌云威触天，权倾诸夏力排山。三年骥尾有人附，  
一日龙须无路攀。画阁不开梁燕去，朱门罢扫乳鸦还。  
千岩万壑应惆怅，流水斜倾出武关。



卷 583\_46 【题谷隐兰若】

温庭筠

风带巢熊拗树声，老僧相引入云行。  
半坡新路畚才了，一谷寒烟烧不成。

卷 583\_47 【观棋（一作段成式诗）】

温庭筠

闲对楸枰倾一壺，黄华坪上几成卢。  
他时谒帝铜龙水，便赌宣城太守无。

卷 583\_48 【句】

温庭筠

春水碧于天，画船听雨眠。  
  
绿树绕村含细雨，寒潮背郭卷平沙。

## 第五百八十四卷

### 卷 584\_1 【观山灯献徐尚书】

段成式

风杪影凌乱，露轻光陆离。如霞散仙掌，似烧上峨眉。  
道树千花发，扶桑九日移。因山成众像，不复藉蟠螭。

涌出多宝塔，往来飞锡僧。分明三五月，传照百千灯。  
驯狎移高柱，庆云遮半层。夜深寒焰白，犹自缀金绳。

磊落风初定，轻明云乍妨。疏中摇月彩，繁处杂星芒。  
火树枝柯密，烛龙鳞甲张。穷愁读书者，应得假余光。

### 卷 584\_2 【和徐商贺卢员外赐绯（一作和徐相公贺襄阳徐副使加章服）】

段成式

云雨轩悬莺语新，一篇佳句占阳春。银黄年少偏欺酒，  
金紫风流不让人。连璧座中斜日满，贯珠歌里落花频。

莫辞倒载吟归去，看欲东山又吐茵。

卷 584\_3 【河出荣光】

段成式

符命自陶唐，吾君应会昌。千年清德水，九折满荣光。  
极岸浮佳气，微波照夕阳。澄辉明贝阙，散彩入龙堂。  
近带关云紫，遥连日道黄。冯夷矜海若，汉武帝宣房。  
渐没孤槎影，仍呈一苇航。抚躬悲未济，作颂喜时康。

卷 584\_4 【哭李群玉】

段成式

曾话黄陵事，今为白日催。老无儿女累，谁哭到泉台。

卷 584\_5 【寄温飞卿笺纸】

段成式

三十六鳞充使时，数番犹得裹相思。  
待将袍袄重抄了，尽写襄阳播捺词。

卷 584\_6 【题石泉兰若】

段成式

矗竹为篱松作门，石楠阴底藉芳荪。  
方袍近日少平叔，注得逍遥无处论。

卷 584\_7 【怯酒赠周繇】

段成式

大白东西飞正狂，新刍石冻杂梅香。  
诗中反语常回避，尤怯花前唤索郎。

卷 584\_8 【牛尊师宅看牡丹】

段成式

洞里仙春日更长，翠丛风翦紫霞芳。  
若为萧史通家客，情愿扛壶入醉乡。

卷 584\_9 【观棋（一作温庭筠诗）】

段成式

闲对弈楸倾一壶，黄羊枰上几成都。  
他时谒帝铜池晓，便赌宣城太守无。

卷 584\_10 【题僧壁（一本下有和韦蟾三字）】

段成式

有僧支颊燃眉毫，起就夕阳磨剃刀。  
到此既知闲最乐，俗心何啻九牛毛。

卷 584\_11 【哭房处士】

段成式

独上黄坛几度盟，印开龙渥喜丹成。  
岂同叔夜终无分，空向人间著养生。

卷 584\_12 【呈轮上人】

段成式

虎到前头心不惊，残阳择虱懒逢迎。  
东林水石未胜此，要假远公方有名。

卷 584\_13 【题谷隐兰若三首】

段成式

风惹闲云半谷阴，岩西隐者醉相寻。  
草衰乍觉径增险，叶尽却疑溪不深。

鸟啄灵雏恋落晖，村情山趣顿忘机。  
丹成道士过门数，叶尽寒猿下岭稀。

风带巢熊拗树声，老僧相引入云行。  
半陂新路畚才了，一谷寒烟烧不成。

卷 584\_14 【不赴光风亭夜饮赠周繇】

段成式

屏开屈膝见吴娃，蜜蜡同心四照花。

姹女不愁难管领，斩新铅里得黄牙。

卷 584\_15 【嘲元中丞（一作襄阳公堂赏花，为宪与妓人戏，语嘲之）】

段成式

莺里花前选孟光，东山逋客酒初狂。  
素娥毕竟难防备，烧得河车莫遣尝。

卷 584\_16 【寄（一作与）周繇（一作为）宪求人参】

段成式

少赋令才犹强作，众医多识不能呼。  
九茎仙草真难得，五叶灵根许惠无。

卷 584\_17 【嘲飞卿七首】

段成式

曾见当垆一个人，入时装束好腰身。  
少年花蒂多芳思，只向诗中写取真。

醉袂几侵鱼子缬，飘缨长冒凤凰钗。  
知君欲作闲情赋，应愿将身作锦鞋。

翠蝶密偎金叉首，青虫危泊玉钗梁。  
愁生半额不开靥，只为多情团扇郎。

柳烟梅雪隐青楼，残日黄鹂语未休。  
见说自能裁柏腹，不知谁更著帛头。

愁机懒织同心苣，闷绣先描连理枝。  
多少风流词句里，愁中空咏早环诗。

燕支山色重能轻，南阳水泽斗分明。  
不烦射雉先张翳，自有琴中威凤声。

半岁愁中镜似荷，牵环撩鬓却须磨。  
花前不复抱瓶渴，月底还应琢刺歌。

卷 584\_18 【柔卿解籍戏呈飞卿三首】

段成式

长担犊车初入门，金牙新酝盈深樽。  
良人为渍木瓜粉，遮却红腮交午痕。

最宜全幅碧蛟绡，自褰春罗等舞腰。



未有长钱求邺锦，且令裁取一团娇。

出意挑鬟一尺长，金为钿鸟簇钗梁。  
郁金种得花茸细，添入春衫领里香。

卷 584\_19 【戏高侍御七首】

段成式

百媚城中一个人，紫罗垂手见精神。  
青琴仙子长教示，自小来来号阿真。

七尺发犹三角梳，玳牛独驾长檐车。  
曾城自有三青鸟，不要莲东双鲤鱼。

花恨红腰柳妒眉，东邻墙短不曾窥。  
犹怜最小分瓜日，奈许迎春得藕时。

自等腰身尺六强，两重危鬓尽钗长。  
欲熏罗荐嫌龙脑，须为寻求石叶香。

别起青楼作几层，斜阳幔卷鹿卢绳。  
厌裁鱼子深红缬，泥觅蜻蜓浅碧绫。

诈嫌嚼贝磨衣钝，私带男钱压鬓低。  
不独邯郸新嫁女，四枝鬟上插通犀。

可羡罗敷自有夫，愁中漫捋白髭须。  
豹钱骢子能擎举，兼著连干许换无。

卷 584\_20 【送僧二首】

段成式

形神不灭论初成，爱马乘闲入帝京。  
四十三年虚过了，方知僧里有唐生。

想到头陀最上方，桂阴犹认惠宗房。  
因行恋烧归来晚，窗下犹残一字香。

卷 584\_21 【猿】

段成式

却忆书斋值晚晴，挽枝闲啸激蝉清。  
影沈巴峡夜岩色，踪绝石塘寒濑声。

卷 584\_22 【送穆郎中赴阙】

段成式

应念愁中恨索居，鹧歌声里且踟蹰。

若逢金马门前客，为说虞卿久著书。

卷 584\_23 【题商山庙】

段成式

偶出云泉谒礼闱，篇章曾沐汉皇知。  
无谋静国东归去，羞过商山四老祠。

卷 584\_24 【折杨柳七首】

段成式

枝枝交影锁长门，嫩色曾沾雨露恩。  
凤辇不来春欲尽，空留莺语到黄昏。

水殿年年占早芳，柔条偏惹御炉香。  
而今万乘多巡狩，辇路无阴绿草长。

玉楼烟薄不胜芳，金屋寒轻翠带长。  
公子骅骝往何处，绿阴堪系紫游缰。

嫩叶初齐不耐寒，风和时拂玉栏干。  
君王去日曾攀折，泣雨伤春翠黛残。

微黄才绽未成阴，绣户珠帘相映深。  
长恨早梅无赖极，先将春色出前林。

隋家堤上已成尘，汉将营边不复春。  
只向江南并塞北，酒旗相伴惹行人。

陌上河边千万枝，怕寒愁雨尽低垂。  
黄金穗短人多折，已恨东风不展眉。

卷 584\_25 【哭李群玉】

段成式

酒里诗中三十年，纵横唐突世喧喧。  
明时不作祢衡死，傲尽公卿归九泉。

卷 584\_26 【汉宫词二首】

段成式

歌舞初承恩宠时，六宫学妾画蛾眉。  
君王厌世妾头白，闻唱歌声却泪垂。

二人能歌得进名，人言选入便光荣。  
岂知妃后多娇妒，不许君前唱一声。

卷 584\_27 【醉中吟】

段成式

只爱糟床滴滴声，长愁声绝又醒醒。  
人间荣辱不常定，唯有南山依旧青。

卷 584\_28 【桃源僧舍看花】

段成式

前年帝里探春时，寺寺名花我尽知。  
今日长安已灰烬，忍能南国对芳枝。

卷 584\_29 【和周繇见嘲（一作和周为宪广阳公宴见嘲诗）】

段成式

才甘鱼目并，艺怯马蹄间。王谢初飞盖，姬姜尽下山。  
缚鸡方角逐，射雉岂开颜。乱翠移林色，狂红照座殷。  
防梭齿虽在，乞帽鬓惭斑。傥恕相如瘦，应容累骑还。

卷 584\_30 【和张希复咏宣律和尚袈裟】

段成式

南山披时寒夜中，一角不动毗岚风。  
何人见此生惭愧，断续犹应护得龙。

卷 584\_31 【句】

段成式

高谈敬风鉴，古貌怯冰棱。

虱暴妨归梦，虫喧彻曙更。

梦里思甘露，言中惜惠灯。

新破毗昙义，相期卜夜论。

随樵劫猿藏，隈石觑熊缘。

捽胡云彩落，痕面月痕消。

掷履仙凫起，撝衣蝴蝶飘。羞中含薄怒，颦里带余娇。  
醒后犹攘臂，归时更折腰。狂夫自纓绝，眉势倩人描。

· 全唐诗 ·

---

不愿石郎戴笠，难甘玉女披衣。

.

## 第五百八十五卷

### 卷 585\_1 【皎皎词】

刘驾

皎皎复皎皎，逢时即为好。高秋亦有花，不及当春草。  
班姬入后宫，飞燕舞东风。青娥中夜起，长叹月明里。

### 卷 585\_2 【长安旅舍抒情投先达（一作长安抒怀寄知己）】

刘驾

岐路不在地，马蹄徒苦辛。上国闻姓名，不如山中人。  
大宅满六街，此身入谁门。愁心日散乱，有似空中尘。  
白露下长安，百虫鸣草根。方当秋赋日，却忆归山村。  
静女头欲白，良媒况我邻。无令苦长叹，长叹销人魂。



卷 585\_3 【送友下第游雁门】

刘驾

相别灞水湄，夹水柳依依。我愿醉如死，不见君去时。  
所诣星斗北，直行到犹迟。况复挈空囊，求人悲路岐。  
北门记室贤，爱我学古诗。待君如待我，此事固不疑。  
雁门春色外，四月雁未归。主人拂金台，延客夜开扉。  
舒君郁郁怀，饮彼白玉卮。若不化女子，功名岂无期。

卷 585\_4 【读史】

刘驾

平地见天涯，登高天更远。功名及所望，岐路又满眼。  
万金买园林，千金修池馆。他人厌游览，身独恋轩冕。  
唯有汉二疏，应觉还家晚。

卷 585\_5 【反贾客乐（乐府有贾客乐，今反之）】

刘驾

无言贾客乐，贾客多无墓。行舟触风浪，尽入鱼腹去。  
农夫更苦辛，所以羡尔身。

卷 585\_6 【送李垣先辈归嵩少旧居】

刘驾

高秋灞浐路，游子多惨戚。君于此地行，独似寻春色。  
文章满人口，高第非苟得。要路在长安，归山却为客。  
□□□□□，狂歌罢叹息。我岂无故山，千里同外国。

卷 585\_7 【苦寒吟】

刘驾

百泉冻皆咽，我吟寒更切。半夜倚乔松，不觉满衣雪。  
竹竿有甘苦，我爱抱苦节。鸟声有悲欢，我爱口流血。  
潘生若解吟，更早生白发。

卷 585\_8 【上巳日】

刘驾

上巳曲江滨，喧于市朝路。相寻不见者，此地皆相遇。  
日光去此远，翠幕张如雾。何事欢娱中，易觉春城暮。  
物情重此节，不是爱芳树。明日花更多，何人肯回顾。

卷 585\_9 【春台】

刘驾

台上树阴合，台前流水多。青春不出门，坐见野田花。  
谁能学公子，走马逐香车。六街尘满衣，鼓绝方还家。

卷 585\_10 【钓台怀古】

刘驾

澄流可濯缨，严子但垂纶。孤坐九层石，远笑清渭滨。  
潜龙飞上天，四海岂无云。清气不零雨，安使洗尘氛。  
我来吟高风，仿佛见斯人。江月尚皎皎，江石亦磷磷。  
如何台下路，明日又迷津。

卷 585\_11 【励志（一作续励志）】

刘驾

白发岂有情，贵贱同日生。二轮不暂驻，似趁长安程。  
前堂吹参差，不作缑山声。后园植木槿，月照无余英。  
及时立功德，身后犹光明。仲尼亦为土，鲁人焉敢耕。

卷 585\_12 【桑妇】

刘驾

墙下桑叶尽，春蚕半未老。城南路迢迢，今日起更早。  
四邻无去伴，醉卧青楼晓。妾颜不如谁，所贵守妇道。  
一春常在树，自觉身如鸟。归来见小姑，新妆弄百草。

卷 585\_13 【上马叹】

刘驾

羸马行迟迟，顽童去我远。时时一回顾，不觉白日晚。  
路傍豪家宅，楼上红妆满。十月庭花开，花前吹玉管。  
君当未贵日，岂不常屯蹇。如何见布衣，忽若尘入眼。  
布衣岂常贱，世事车轮转。

卷 585\_14 【唐乐府十首 · 送征夫】

刘驾

昔送征夫苦，今送征夫乐。寒衣纵携去，应向归时著。  
天子待功成，别造凌烟阁。

卷 585\_15 【唐乐府十首 · 输者讴】

刘驾

挽粟上高山，高山若平地。力尽心不怨，同我家私事。  
去者不遑宁，归者唱歌行。相逢古城下，立语天未明。  
一身远出塞，十口无税征。

卷 585\_16 【唐乐府十首 · 吊西人】

刘驾

河湟父老地，尽知归明主。将军入空城，城下吊黄土。  
所愿边人耕，岁岁生禾黍。

卷 585\_17 【唐乐府十首 · 边军过】

刘驾

城前兵马过，城里人高卧。官家自供给，畏我田产破。  
健儿食肥肉，战马食新谷。食饱物有余，所恨无两腹。  
草青见军过，草白见军回。军回人更多，尽系西戎来。

卷 585\_18 【唐乐府十首 · 望归马】

刘驾

东人望归马，马归莲峰下。莲峰与地平，亦不更征兵。

卷 585\_19 【唐乐府十首 · 祝河水】

刘驾

河水清瀾瀾，照见远树枝。征人不饮马，再拜祝冯夷。  
从今亿万岁，不见河浊时。

卷 585\_20 【唐乐府十首 · 田西边】

刘驾

刀剑作锄犁，耕田古城下。高秋禾黍多，无地放羊马。

卷 585\_21 【唐乐府十首 · 昆山】

刘驾

肯时玉为宝，昆山过不得。今时玉为尘，昆山入中国。

白玉尚如尘，谁肯爱金银。

卷 585\_22 【唐乐府十首 · 乐边人】

刘驾

在乡身亦劳，在边腹亦饱。父兄若一处，任向边头老。

卷 585\_23 【唐乐府十首 · 献贺觴】

刘驾

莫但取河湟，河湟非边疆。愿今日入处，亦似天中央。  
天子寿万岁，再拜献此觴。

卷 585\_24 【且可怜行】

刘驾

园中花自早，不信外无花。良人未朝去，先出登香车。  
□□五□轮，满城闻呕哑。侍儿衣各别，头上金雀多。  
只是一家人，路人疑千家。过后香满陌，直到春日斜。  
今朝且可怜，莫问久如何。

卷 585\_25 【筑台（一作城）词（汉武筑通天台，役者苦之）】

刘驾

前杵与后杵，筑城声不住。我愿筑更高，得见秦皇墓。

卷 585\_26 【邻女】

刘驾

君嫌邻女丑，取妇他乡县。料嫁与君人，亦为邻所贱。  
菖蒲花可贵，只为人难见。

卷 585\_27 【山中夜坐】

刘驾

半夜山雨过，起来满山月。落尽醉处花，荒沟水决决。  
怆然惜春去，似与故人别。谁遣我多情，壮年无鬓发。



卷 585\_28 【秦娥】

刘驾

秦娥十四五，面白于指爪。羞人夜采桑，惊起戴胜鸟。

卷 585\_29 【牧童】

刘驾

牧童见客拜，山果怀中落。昼日驱牛归，前溪风雨恶。

卷 585\_30 【古出塞】

刘驾

胡风不开花，四气多作雪。北人尚冻死，况我本南越。  
古来犬羊地，巡狩无遗辙。九土耕不尽，武皇犹征伐。  
中天有高阁，图画何时歇。坐恐塞上山，低于沙中骨。

卷 585\_31 【寄远】

刘驾

雪花岂结子，徒满连理枝。嫁作征人妻，不得长相随。  
去年君点行，贱妾是新姬。别早见未熟，入梦无定姿。  
悄悄空闺中，蛩声绕罗帏。得书喜犹甚，况复见君时。

卷 585\_32 【下第后屏居长安，书怀寄太原从事】

刘驾

刖足岂更长，良工隔千里。故山彭蠡上，归梦向汾水。  
低摧神气尽，僮仆心亦耻。未达谁不然，达者心思此。  
行年忽已壮，去老年更几。功名生不彰，身歿岂为鬼。  
才看芳草歇，即叹凉风起。匹马未来期，嘶声尚在耳。

卷 585\_33 【早行】

刘驾

马上续残梦，马嘶时复惊。心孤多所虞，僮仆近我行。  
栖禽未分散，落月照古城。莫羨居者闲，冢边人已耕。

卷 585\_34 【青门路】

刘驾

青门有归路，坦坦高槐下。贫贱自耻归，此地谁留我。  
门开送客去，落日懒回马。旅食帝城中，不如远游者。  
舟成于陆地，风水终相假。吾道谅如斯，立身无苟且。

卷 585\_35 【效古】

刘驾

融融芳景和，杳杳春日斜。娇娆不自持，清唱嚬双蛾。  
终曲翻成泣，新人下香车。新人且莫喜，故人曾如此。  
燕赵犹生女，郎岂有终始。

卷 585\_36 【战城南】

刘驾

城南征战多，城北无饥鸦。白骨马蹄下，谁言皆有家。  
城前水声苦，倏忽流万古。莫争城外城，城里终闲土。

卷 585\_37 【曲江春霁】

刘驾

宿雨洗秦树，旧花如新开。池边草未干，日照人马来。  
马蹄踏流水，渐渐成尘埃。鸳鸯不敢下，飞绕岸东西。  
此地喧仍旧，归人亦满街。

卷 585\_38 【赠先达】

刘驾

终南苍翠好，未必如故山。心期在荣名，三载居长安。  
昔蒙大雅匠，勉我工五言。业成时不重，辛苦只自怜。  
皎皎机上丝，尽作秦筝弦。贫女皆罢织，富人岂不寒。  
惊风起长波，浩浩何时还。待君当要路，一指王化源。

卷 585\_39 【有感】

刘驾

弓剑不自行，难引河湟思。将军半夜饮，十里闻歌吹。  
高门几世宅，舞袖仍新赐。谁遣一书来，灯前问边事。

卷 585\_40 【姑苏台（一作吴中怀古）】

刘驾

勾践饮胆日，吴酒正满杯。笙歌入海云，声自姑苏来。  
西施舞初罢，侍儿整金钗。众女不敢妒，自比泉下泥。  
越鼓声腾腾，吴天隔尘埃。难将甬东地，更学会稽栖。  
霸迹一朝尽，草中棠梨开。

卷 585\_41 【豪家】

刘驾

九陌槐叶尽，青春在豪家。娇莺不出城，长宿庭上花。  
高楼登夜半，已见南山多。恩深势自然，不是爱骄奢。

卷 585\_42 【山中有招】

刘驾

朗朗山月出，尘中事由生。人心虽不闲，九陌夜无行。  
学古以求闻，有如石上耕。齐姜早作妇，岂识闺中情。  
何如此幽居，地僻人不争。嘉树自昔有，茅屋因我成。  
取薪不出门，采药于前庭。春花虽无种，枕席芙蓉馨。

君来食葵藿，天爵岂不荣。

卷 585\_43 【空城雀】

刘驾

饥啄空城土，莫近太仓粟。一粒未充肠，却入公子腹。  
且吊城上骨，几曾害尔族。不闻庄辛语，今日寒芜绿。

卷 585\_44 【冯叟居】

刘驾

天作冯叟居，山僧尚嫌僻。开门因两树，结宇倚翠壁。  
溪南有微径，时遇采芝客。往往白云生，对面千里隔。  
机忘若僮仆，常与猿鸟剧。晒药上小峰，庭深无日色。  
自忘归乡里，不见新旧戚。累累子孙墓，秋风吹古柏。

卷 585\_45 【醒后】

刘驾

醉卧芳草间，酒醒日落后。壶觞半倾覆，客去应已久。  
不记折花时，何得花在手。

卷 585\_46 【弃妇】

刘驾

回车在门前，欲上心更悲。路傍见花发，似妾初嫁时。  
养蚕已成茧，织素犹在机。新人应笑此，何如画蛾眉。  
昨日惜红颜，今日畏老迟。良媒去不远，此恨今告谁。

卷 585\_47 【送李殷游边（一作送李殷游西京）】

刘驾

十年梦相识，一觐俄远别。征驾在我傍，草草意难说。  
君居洞庭日，诗句满魏阙。如何万里来，青桂看人折。  
行装不及备，西去偶然诀。孟夏出都门，红尘客衣热。  
荒城见羊马，野馆具薇蕨。边境渐无虞，旅宿常待月。  
西园置酒地，日夕簪裾列。壮志安可留，槐花樽前发。

卷 585\_48 【江村】

刘驾

江水灌稻田，饥年稻亦熟。舟中爱桑麻，日午因成宿。  
相承几十代，居止连茅屋。四邻不相离，安肯去骨肉。

书生说太苦，客路常在目。纵使富贵还，交亲几坟绿。

卷 585\_49 【出门】

刘驾

出门羡他人，奔走如得涂。翻思他人意，与我或不殊。  
以兹聊自安，默默行九衢。生计逐羸马，每出似移居。  
客从我乡来，但得邻里书。田园几换主，梦归犹荷锄。  
进犹希万一，退复何所如。况今辟公道，安得不踟蹰。

卷 585\_50 【别道者】

刘驾

自君入城市，北邙无新坟。始信壶中药，不落白杨根。  
如何忽告归，薜华还笑人。玉笙无遗音，怅望缑岭云。

卷 585\_51 【兰昌宫】

刘驾

宫兰非瑶草，安得春长在。回首春又归，翠华不能待。  
悲风生辇路，山川寂已晦。边恨在行人，行人无尽岁。



卷 585\_52 【送友人擢第东归】

刘驾

同家楚天南，相识秦云西。古来悬弧义，岂顾子与妻。  
携手践名场，正遇公道开。君荣我虽黜，感恩同所怀。  
有马不复羸，有奴不复饥。灞岸秋草绿，却是还家时。  
青门一瓢空，分手去迟迟。期君辙未平，我车继东归。

卷 585\_53 【久客】

刘驾

久客心易足，主人有余力。如何昨宵梦，到晓家山色。  
南音入谁耳，曲尽头自白。

卷 585\_54 【秋夕】

刘驾

促织灯下吟，灯光冷于水。乡魂坐中去，倚壁身如死。  
求名为骨肉，骨肉万余里。富贵在何时，离别今如此。  
出门长叹息，月白西风起。

卷 585\_55 【效陶】

刘驾

两曜无停驭，蓬壶应有墓。何况北邙山，只近市朝路。  
大恢生死网，飞走无逃处。白发忽已新，红颜岂如故。  
我有杯中物，可以消万虑。醉舞日婆娑，谁能记朝暮。  
如求神仙药，阶下亦种黍。但使长兀然，始见天地祖。

卷 585\_56 【长门怨（一作张乔诗）】

刘驾

御泉长绕凤凰楼，只是恩波别处流。  
闲揲舞衣归未得，夜来砧杵六宫秋。

卷 585\_57 【苦寒行】

刘驾

严寒动八荒，刺刺无休时。阳乌不自暖，雪压扶桑枝。  
岁暮寒益壮，青春安得归。朔雁到南海，越禽何处飞。  
谁言贫士叹，不为身无衣。

卷 585\_58 【琪树下因吟六韵呈先达者】

刘驾

举世爱嘉树，此树何人识。清秋远山意，偶向亭际得。  
奇柯交若斗，珍叶密如织。尘中尚青葱，更想尘外色。  
所宜巢三鸟，影入瑶池碧。移根岂无时，一问紫烟客。

卷 585\_59 【送人登第东归】

刘驾

学古既到古，反求鉴者难。见诗未识君，疑生建安前。  
海畔岂无家，终难成故山。得失虽由命，世途多险艰。  
我皇追古风，文柄付大贤。此时如为君，果在甲科间。  
晚达多早贵，举世咸为然。一夕颜却少，虽病心且安。  
所居似清明，冷灶起新烟。高情懒行乐，花盛仆马前。  
归程不淹留，指期到田园。香醪四邻熟，霜橘千株繁。  
肯忆长安夜，论诗风雪寒。

卷 585\_60 【贾客词】

刘驾

贾客灯下起，犹言发已迟。高山有疾路，暗行终不疑。

寇盗伏其路，猛兽来相追。金玉四散去，空囊委路岐。  
扬州有大宅，白骨无地归。少妇当此日，对镜弄花枝。

卷 585\_61 【塞下曲】

刘驾

勒兵辽水边，风急卷旌旒。绝塞阴无草，平沙去尽天。  
下营看斗建，传号信狼烟。圣代书青史，当时破虏年。

卷 585\_62 【春夜二首（一本无二首二字，次首题作秋怀）】

刘驾

一别杜陵归未期，只凭魂梦接亲知。  
近来欲睡兼难睡，夜夜夜深闻子规。

几岁干戈阻路岐，忆山心切与心违。  
时难何处披裘抱，日日日斜空醉归。

卷 585\_63 【鄜中感怀】

刘驾

顷年曾住此中来，今日重游事可哀。

忆得几家欢宴处，家家家业尽成灰。

卷 585\_64 【晓登（一本有成都二字）迎春阁】

刘驾

未栉凭栏眺锦城，烟笼万井二江明。  
香风满阁花满树，树树树梢啼晓莺。

卷 585\_65 【白髭】

刘驾

到处逢人求至药，几回染了又成丝。  
素丝易染髭难染，墨翟当年合泣髭。

卷 585\_66 【送卢使君赴夔州】

刘驾

铙管随征旆，高秋上远巴。白波连雾雨，青壁断蒹葭。  
凭几双瞳静，登楼万井斜。政成知俗变，当应画轮车。

卷 585\_67 【望月】

刘驾

清秋新霁与君同，江上高楼倚碧空。  
酒尽露零宾客散，更更更漏月明中。

卷 585\_68 【古意】

刘驾

蒲帆出浦去，但见浦边树。不如马行郎，马迹犹在路。  
大舟不相载，买宅令委住。莫道留金多，本非爱郎富。

## 第五百八十六卷

### 卷 586\_1 【长洲怀古】

刘沧

野烧原空尽荻灰，吴王此地有楼台。千年事往人何在，  
半夜月明潮自来。白鸟影从江树没，清猿声入楚云哀。  
停车日晚荐蘋藻，风静寒塘花正开。

### 卷 586\_2 【经炀帝行宫】

刘沧

此地曾经翠辇过，浮云流水竟如何。香销南国美人尽，  
怨入东风芳草多。残柳宫前空露叶，夕阳川上浩烟波。  
行人遥起广陵思，古渡月明闻棹歌。

### 卷 586\_3 【春日游嘉陵江】

刘沧

独泛扁舟映绿杨，嘉陵江水色苍苍。行看芳草故乡远，  
坐对落花春日长。曲岸危樯移渡影，暮天栖鸟入山光。

今来谁识东归意，把酒闲吟思洛阳。

卷 586\_4 【秋日山斋书怀】

刘沧

启户清风枕簟幽，虫丝吹落挂帘钩。蝉吟高树雨初霁，  
人忆故乡山正秋。浩渺蒹葭连夕照，萧疏杨柳隔沙洲。  
空将方寸荷知己，身寄烟萝恩未酬。

卷 586\_5 【晚秋洛阳客舍】

刘沧

清洛平分两岸沙，沙边水色近人家。隋朝古陌铜驼柳，  
石氏荒原金谷花。庭叶霜浓悲远客，宫城日晚度寒鸦。  
未成归计关河阻，空望白云乡路赊。

卷 586\_6 【深愁喜友人至】

刘沧

不避驱羸道路长，青山同喜惜年光。灯前话旧阶草夜，  
月下醉吟溪树霜。落叶已经寒烧尽，衡门犹对古城荒。  
此身未遂归休计，一半生涯寄岳阳。



卷 586\_7 【秋日望西阳】

刘沧

古木苍苔坠几层，行人一望旅情增。太行山下黄河水，  
铜雀台西武帝陵。风入蒹葭秋色动，雨余杨柳暮烟凝。  
野花似泣红妆泪，寒露满枝枝不胜。

卷 586\_8 【邺都怀古】

刘沧

昔时霸业何萧索，古木唯多鸟雀声。芳草自生宫殿处，  
牧童谁识帝王城。残春杨柳长川迥，落日蒹葭远水平。  
一望青山便惆怅，西陵无主月空明。

卷 586\_9 【题龙门僧房】

刘沧

静室遥临伊水东，寂寥谁与此身同。禹门山色度寒磬，  
萧寺竹声来晚风。僧宿石龛残雪在，雁归沙渚夕阳空。  
偶将心地问高士，坐指浮生一梦中。

卷 586\_10 【秋夕山斋即事】

刘沧

衡门无事闭苍苔，篱下萧疏野菊开。半夜秋风江色动，  
满山寒叶雨声来。雁飞关塞霜初落，书寄乡闾人未回。  
独坐高窗此时节，一弹瑶瑟自成哀。

卷 586\_11 【江行书事】

刘沧

远渚蒹葭覆绿苔，姑苏南望思裴徊。空江独树楚山背，  
暮雨一舟吴苑来。人度深秋风叶落，鸟飞残照水烟开。  
寒潮欲上泛萍藻，寄荐三闾情自哀。

卷 586\_12 【过铸鼎原】

刘沧

黄帝修真万国朝，鼎成龙驾上丹霄。天风乍起鹤声远，  
海雾渐深龙节遥。仙界日长青鸟度，御衣香散紫霞飘。  
唯留古迹寒原在，碧水苍苍空寂寥。

卷 586\_13 【秋日寓怀】

刘沧

海上生涯一钓舟，偶因名利事淹留。旅涂谁见客青眼，  
故国几多人白头。霁色满川明水驿，蝉声落日隐城楼。  
如何未尽此行役，西入潼关云木秋。

卷 586\_14 【江城晚望】

刘沧

一望江城思有余，遥分野径入樵渔。青山经雨菊花尽，  
白鸟下滩芦叶疏。静听潮声寒木杪，远看风色暮帆舒。  
秋期又涉潼关路，不得年年向此居。

卷 586\_15 【宿苍谿馆】

刘沧

孤馆门开对碧岑，竹窗灯下听猿吟。巴山夜雨别离梦，  
秦塞旧山迢递心。满地莓苔生近水，几株杨柳自成阴。  
空思知己隔云岭，乡路独归春草深。

卷 586\_16 【题王母庙】

刘沧

寂寥珠翠想遗声，  
门掩烟微水殿清。  
拂曙紫霞生古壁，  
何年绛节下层城。  
鹤归辽海春光晚，  
花落闲阶夕雨晴。  
武帝无名在仙籍，  
玉坛星月夜空明。

卷 586\_17 【留别复本修古二上人】

刘沧

二远相知是昔年，  
此身长寄礼香烟。  
绿芜风晚水边寺，  
清磬月高林下禅。  
台殿虚窗山翠入，  
梧桐疏叶露光悬。  
西峰话别又须去，  
终日关山在马前。

卷 586\_18 【边思】

刘沧

汉将边方背辘轳，  
受降城北是单于。  
黄河晚冻雪风急，  
野火远烧山木枯。  
偷号甲兵冲塞色，  
衔枚战马踏寒芜。  
蛾眉一没空留怨，  
青冢月明啼夜乌。

卷 586\_19 【登龙门敬善寺阁】

刘沧

独步危梯入杳冥，天风潇洒拂檐楹。禹门烟树正春色，  
少室云屏向晚晴。花落院深清禁闭，水分川阔绿芜平。  
琐窗朱槛同仙界，半夜缑山有鹤声。

卷 586\_20 【题王校书山斋】

刘沧

猿鸟无声昼掩扉，寒原隔水到人稀。云晴古木月初上，  
雪满空庭鹤未归。药圃地连山色近，樵家路入树烟微。  
栖迟惯得沧浪思，云阁还应梦钓矶。

卷 586\_21 【浙江晚渡怀古】

刘沧

蝉噪秋风满古堤，荻花寒渡思萋萋。潮声归海鸟初下，  
草色连江人自迷。碧落晴分平楚外，青山晚出穆陵西。  
此来一见垂纶者，却忆旧居明月溪。

卷 586\_22 【及第后宴曲江】

刘沧

及第新春选胜游，杏园初宴曲江头。紫毫粉壁题仙籍，  
柳色箫声拂御楼。霁景露光明远岸，晚空山翠坠芳洲。  
归时不省花间醉，绮陌香车似水流。

卷 586\_23 【秋日山寺怀友人】

刘沧

萧寺楼台对夕阴，淡烟疏磬散空林。风生寒渚白蘋动，  
霜落秋山黄叶深。云尽独看晴塞雁，月明遥听远村砧。  
相思不见又经岁，坐向松窗弹玉琴。

卷 586\_24 【八月十五日夜玩月】

刘沧

中秋朗月静天河，乌鹊南飞客恨多。寒色满窗明枕簟，  
清光凝露拂烟萝。桂枝斜汉流灵魄，蘋叶微风动细波。  
此夜空亭闻木落，蒹葭霜碛雁初过。

卷 586\_25 【晚春宿僧院】

刘沧

萧寺春风正落花，淹留数宿惠休家。碧空云尽磬声远，  
清夜月高窗影斜。白日闲吟为道侣，青山遥指是生涯。  
微微一点寒灯在，乡梦不成闻曙鸦。

卷 586\_26 【怀汶阳兄弟】

刘沧

回看云岭思茫茫，几处关河隔汶阳。书信经年乡国远，  
弟兄无力海田荒。天高霜月砧声苦，风满寒林木叶黄。  
终日路岐归未得，秋来空羡雁成行。

卷 586\_27 【题天宫寺阁】

刘沧

丹阙凌霄壮复危，排空霞影动檐扉。城连伊水禹门近，  
烟隔上阳宫树微。天敛暮云残雨歇，路穿春草一僧归。  
此来闲望更何有，无限清风生客衣。

卷 586\_28 【游上方石窟寺】

刘沧

苔径萦回景渐分，  
脩然空界静埃氛。  
一声疏磬过寒水，  
半壁危楼隐白云。  
雪下石龕僧在定，  
日西山木鸟成群。  
几来吟啸立朱槛，  
风起天香处处闻。

卷 586\_29 【怀江南友人】

刘沧

久绝音书隔塞尘，  
路岐谁与子相亲。  
愁中独坐秦城夜，  
别后几经吴苑春。  
湘岸风来吹绿绮，  
海门潮上没青蘋。  
空劳两地望明月，  
多感断蓬千里身。

卷 586\_30 【题敬亭山庙】

刘沧

森森古木列岩隈，  
迥压寒原霁色开。  
云雨只从山上起，  
风雷多向庙中来。  
三江入海声长在，  
双鹤啼天影未回。  
花落空庭春昼晚，  
石床松殿满青苔。



卷 586\_31 【经麻姑山】

刘沧

麻姑此地炼神丹，寂寞烟霞古灶残。一自仙娥归碧落，  
几年春雨洗红兰。帆飞震泽秋江远，雨过陵阳晚树寒。  
山顶白云千万片，时间鸾鹤下仙坛。

卷 586\_32 【对残春】

刘沧

杨花漠漠暗长堤，春尽人愁鸟又啼。鬓发近来生处白，  
家园几向梦中迷。霏微远树荒郊外，牢落空城夕照西。  
唯有年光堪自惜，不胜烟草日萋萋。

卷 586\_33 【过沧浪峡】

刘沧

山叠云重一径幽，苍苔古石漱清流。出岩树色见来静，  
落涧泉声长自秋。远入虚明思白帝，寒生浩景想沧洲。  
如何地近东西路，马足车轮不暂留。

卷 586\_34 【经过建业】

刘沧

六代兴衰曾此地，西风露泣白蘋花。烟波浩渺空亡国，  
杨柳萧条有几家。楚塞秋光晴入树，浙江残雨晚生霞。  
凄凉处处渔樵路，鸟去人归山影斜。

卷 586\_35 【赠道者】

刘沧

真趣淡然居物外，忘机多是隐天台。停灯深夜看仙篆，  
拂石高秋坐钓台。卖药故人湘水别，入檐栖鸟旧山来。  
无因朝市知名姓，地僻衡门对岳开。

卷 586\_36 【题马太尉华山庄】

刘沧

别开池馆背山阴，近得幽奇物外心。竹色拂云连岳寺，  
泉声带雨出谿林。一庭杨柳春光暖，三径烟萝晚翠深。  
自是功成闲剑履，西斋长卧对瑶琴。

卷 586\_37 【秋日夜怀】

刘沧

砧杵寥寥秋色长，绕枝寒鹊客情伤。关山云尽九秋月，  
门柳叶凋三径霜。近日每思归少室，故人遥忆隔潇湘。  
如何节候变容发，明镜一看愁异常。

卷 586\_38 【题巫山庙】

刘沧

十二岚峰挂夕晖，庙门深闭雾烟微。天高木落楚人思，  
山迴月残神女归。触石晴云凝翠鬋，度江寒雨湿罗衣。  
婵娟似恨襄王梦，猿叫断岩秋藓稀。

卷 586\_39 【题吴宫苑】

刘沧

吴苑荒凉故国名，吴山月上照江明。残春碧树自留影，  
半夜子规何处声。芦叶长侵洲渚暗，蘋花开尽水烟平。  
经过此地千年恨，荏苒东风露色清。

卷 586\_40 【旅馆书怀】

刘沧

秋看庭树换风烟，兄弟飘零寄海边。客计倦行分陕路，  
家贫休种汶阳田。云低远塞鸣寒雁，雨歇空山噪暮蝉。  
落叶虫丝满窗户，秋堂独坐思悠然。

卷 586\_41 【赠天台隐者】

刘沧

静者多依猿鸟丛，衡门野色四郊通。天开宿雾海生日，  
水泛落花山有风。回望一巢悬木末，独寻危石坐岩中。  
看书饮酒余无事，自乐樵渔狎钓翁。

卷 586\_42 【洛阳月夜书怀】

刘沧

疏柳高槐古巷通，月明西照上阳宫。一声边雁塞门雪，  
几处远砧河汉风。独榻闲眠移岳影，寒窗幽思度烟空。  
孤吟此夕惊秋晚，落叶残花树色中。

卷 586\_43 【江行夜泊】

刘沧

白浪连空极渺漫，孤舟此夜泊中滩。岳阳秋霁寺钟远，  
渡口月明渔火残。绿绮韵高湘女怨，青葭色映水禽寒。  
乡遥楚国生归思，欲曙山光上木兰。

卷 586\_44 【赠颍顶山人】

刘沧

浩气含真玉片辉，著书精义入玄微。洛阳紫陌几曾醉，  
少室白云时一归。松雪月高唯鹤宿，烟岚秋霁到人稀。  
知君济世有长策，莫问沧浪隐钓矶。

卷 586\_45 【长安冬夜书情】

刘沧

上国栖迟岁欲终，此情多寄寂寥中。钟传半夜旅人馆，  
鸦叫一声疏树风。古巷月高山色静，寒芜霜落灞原空。  
今来唯问心期事，独望青云路未通。

卷 586\_46 【经古行宫】

刘沧

玉辇西归已至今，古原风景自沈沈。御沟流水长芳草，  
宫树落花空夕阴。蝴蝶翅翻残露滴，子规声尽野烟深。  
路人不记当年事，台殿寂寥山影侵。

卷 586\_47 【秋日登醴泉县楼】

刘沧

闲上高楼时一望，绿芜寒野静中分。人行直路入秦树，  
雁截斜阳背塞云。渭水自流汀岛色，汉陵空长石苔纹。  
秋风高柳出危叶，独听蝉声日欲曛。

卷 586\_48 【春日旅游】

刘沧

玄发辞家事远游，春风归雁一声愁。花开忽忆故山树，  
月上自登临水楼。浩浩晴原人独去，依依春草水分流。  
秦川楚塞烟波隔，怨别路岐何日休。

卷 586\_49 【送友人下第归吴】

刘沧

共惜年华未立名，路岐终日轸羁情。青春半是往来尽，  
白发多因离别生。楚岸帆开云树映，吴门月上水烟清。  
东归自有故山约，花落石床苔藓平。

卷 586\_50 【访友人郊居】

刘沧

登原过水访相如，竹坞莎庭似故居。空塞山当清昼晚，  
古槐人继绿阴余。休弹瑟韵伤离思，已有蝉声报夏初。  
醉唱劳歌翻自叹，钓船渔浦梦难疏。

卷 586\_51 【匡城寻薛闵秀才不遇】

刘沧

音容一别近三年，往事空思意浩然。匹马东西何处客，  
孤城杨柳晚来蝉。路长草色秋山绿，川阔晴光远水连。  
不见故人劳梦寐，独吟风月过南燕。

卷 586\_52 【与僧话旧】

刘沧

巾舄同时下翠微，旧游因话事多违。南朝古寺几僧在，  
西岭空林唯鸟归。莎径晚烟凝竹坞，石池春色染苔衣。  
此时相见又相别，即是关河朔雁飞。

卷 586\_53 【寄远】

刘沧

西园杨柳暗惊秋，宝瑟朱弦结远愁。霜落雁声来紫塞，  
月明人梦在青楼。蕙心迢递湘云暮，兰思萦回楚水流。  
锦字织成添别恨，关河万里路悠悠。

卷 586\_54 【长安逢友人】

刘沧

上国相逢尘满襟，倾杯一话昔年心。荒台共望秋山立，  
古寺多同雪夜吟。风度重城宫漏尽，月明高柳禁烟深。  
终期白日青云路，休感鬓毛霜雪侵。



卷 586\_55 【下第东归途中书事】

刘沧

峡路谁知倦此情，往来多是半年程。孤吟洛苑逢春尽，  
几向秦城见月明。高柳断烟侵岳影，古堤斜日背滩声。  
东归海上有余业，牢落田园荒草平。

卷 586\_56 【经龙门废寺】

刘沧

因思人事事无穷，几度经过感此中。山色不移楼殿尽，  
石台依旧水云空。唯余芳草滴春露，时有残花落晚风。  
杨柳覆滩清濑响，暮天沙鸟自西东。

卷 586\_57 【下第后怀旧居】

刘沧

几到青门未立名，芳时多负故乡情。雨余秦苑绿芜合，  
春尽灞原白发生。每见山泉长属意，终期身事在归耕。  
蘋花覆水曲谿暮，独坐钓舟歌月明。

卷 586\_58 【经无可旧居兼伤贾岛】

刘沧

尘室寒窗我独看，别来人事几凋残。书空萧寺一僧去，  
雪满巴山孤客寒。落叶堕巢禽自出，苍苔封砌竹成竿。  
碧云迢递长江远，向夕苦吟归思难。

卷 586\_59 【赠隐者】

刘沧

何时止此幽栖处，独掩衡门长绿苔。临水静闻灵鹤语，  
隔原时有至人来。五湖仙岛几年别，九转药炉深夜开。  
谁识无机养真性，醉眠松石枕空杯。

卷 586\_60 【题书斋】

刘沧

一日不曾离此处，风吹疏牖夕云晴。气凌霜色剑光动，  
吟对雪华诗韵清。高木宿禽来远岳，古原残雨隔重城。  
西斋瑶瑟自为侣，门掩半春苔藓生。

卷 586\_61 【题秦女楼】

刘沧

珠翠香销鸳瓦堕，神仙曾向此中游。青楼月色桂花冷，  
碧落箫声云叶愁。杳杳蓬莱人不见，苍苍苔藓路空留。  
一从凤去千年后，迢递岐山水石秋。

卷 586\_62 【题桃源处士山居留寄】

刘沧

白云深处葺茅庐，退隐衡门与俗疏。一洞晓烟留水上，  
满庭春露落花初。闲看竹屿吟新月，特酌山醪读古书。  
穷达尽为身外事，浩然元气乐樵渔。

卷 586\_63 【宿题天坛观】

刘沧

沐发清斋宿洞宫，桂花松韵满岩风。紫霞晓色秋山霁，  
碧落寒光霜月空。华表鹤声天外迥，蓬莱仙界海门通。  
冥心一悟虚无理，寂寞玄珠象罔中。

卷 586\_64 【洛神怨】

刘沧

子建东归恨思长，飘飘神女步池塘。云鬟高动水宫影，  
珠翠乍摇沙露光。心寄碧沉空婉恋，梦残春色自悠扬。  
停车绮陌傍杨柳，片月青楼落未央。

卷 586\_65 【龙门留别道友】

刘沧

一顾恩深荷道安，独垂双泪下层峦。飞鸣北雁塞云暮，  
摇落西风关树寒。春谷终期吹羽翼，萍身不定逐波澜。  
裴徊偏起旧枝恋，半夜独吟孤烛残。

卷 586\_66 【题四皓庙】

刘沧

石壁苍苔翠霭浓，驱车商洛想遗踪。天高猿叫向山月，  
露下鹤声来庙松。叶堕阴岩疏薜荔，池经秋雨老芙蓉。  
雪髯仙侣何深隐，千古寂寥云水重。

卷 586\_67 【望未央宫】

刘沧

西上秦原见未央，山岚川色晚苍苍。云楼欲动入清渭，  
鸳瓦如飞出绿杨。舞席歌尘空岁月，宫花春草满池塘。  
香风吹落天人语，彩凤五云朝汉皇。

卷 586\_68 【秋日过昭陵】

刘沧

寝庙徒悲剑与冠，翠华龙驭杳漫漫。原分山势入空塞，  
地匝松阴出晚寒。上界鼎成云缥缈，西陵舞罢泪阑干。  
那堪独立斜阳里，碧落秋光烟树残。

卷 586\_69 【夏日登慈恩寺】

刘沧

金界时来一访僧，天香飘翠琐窗凝。碧池静照寒松影，  
清昼深悬古殿灯。晚景风蝉催节候，高空云鸟度轩层。  
尘机消尽话玄理，暮磬出林疏韵澄。

卷 586\_70 【宿题金山寺】

刘沧

一点青山翠色危，云岩不掩与星期。海门烟树潮归后，  
江面山楼月照时。独鹤唳空秋露下，高僧入定夜猿知。  
萧疏水木清钟梵，颢气寒光动石池。

卷 586\_71 【送友人游蜀】

刘沧

北去西游春未半，蜀山云雪入诗情。青萝拂水花流影，  
翠靄隔岩猿有声。日出空江分远浪，鸟归高木认孤城。  
心期万里无劳倦，古石苍苔峡路清。

卷 586\_72 【题郑中丞东溪】

刘沧

一境新开雉堞西，绿苔微径露凄凄。高轩夜静竹声远，  
曲岸春深杨柳低。山霁月明常此醉，草芳花暗省曾迷。  
即随凤诏归清列，几忆风花梦小溪。

卷 586\_73 【代友人悼姬】

刘沧

罗帐香微冷锦裯，歌声永绝想梁尘。萧郎独宿落花夜，  
谢女不归明月春。青鸟罢传相寄字，碧江无复采莲人。  
满庭芳草坐成恨，迢递蓬莱入梦频。

卷 586\_74 【夏日登西林白上人楼】

刘沧

几到西林清净境，层台高视有无间。寒光远动天边水，  
碧影出空烟外山。苔点落花微萼在，叶藏幽鸟碎声闲。  
旷然多慊登楼意，永日重门深掩关。

卷 586\_75 【江楼月夜闻笛】

刘沧

南浦蒹葭疏雨后，寂寥横笛怨江楼。思飘明月浪花白，  
声入碧云枫叶秋。河汉夜阑孤雁度，潇湘水阔二妃愁。  
发寒衣湿曲初罢，露色河光生钓舟。

卷 586\_76 【送友人下第东归】

刘沧

漠漠杨花灞岸飞，几回倾酒话东归。九衢春尽生乡梦，  
千里尘多满客衣。流水雨余芳草合，空山月晚白云微。  
金门自有西来约，莫待萤光照竹扉。

卷 586\_77 【从郑郎中高州游东潭】

刘沧

烟岚晚入湿旌旗，高槛风清醉未归。夹路野花迎马首，  
出林山鸟向人飞。一谿寒水涵清浅，几处晴云度翠微。  
自是谢公心近得，登楼望月思依依。

卷 586\_78 【罢华原尉上座主尚书】

刘沧

自怜生计事悠悠，浩渺沧浪一钓舟。千里梦归清洛近，  
三年官罢杜陵秋。山连绝塞浑无色，水到平沙几处流。  
白露黄花岁时晚，不堪霜鬓镜前愁。



卷 586\_79 【雨后游南门寺】

刘沧

郭南山寺雨初晴，上界寻僧竹里行。半壁楼台秋月过，  
一川烟水夕阳平。苔封石室云含润，露滴松枝鹤有声。  
木叶萧萧动归思，西风画角汉东城。

卷 586\_80 【题古寺】

刘沧

古寺萧条偶宿期，更深霜压竹枝低。长天月影高窗过，  
疏树寒鸦半夜啼。池水竭来龙已去，老松枯处鹤犹栖。  
伤心可惜从前事，寥落朱廊堕粉泥。

卷 586\_81 【晚秋野望】

刘沧

秋尽郊原情自哀，菊花寂寞晚仍开。高风疏叶带霜落，  
一雁寒声背水来。荒垒几年经战后，故山终日望书回。  
归途休问从前事，独唱劳歌醉数杯。

卷 586\_82 【秋月望上阳宫】

刘沧

苔色轻尘锁洞房，乱鸦群鸽集残阳。青山空出禁城日，  
黄叶自飞宫树霜。御路几年香辇去，天津终日水声长。  
此时独立意难尽，正值西风砧杵凉。

卷 586\_83 【入关留别主人】

刘沧

此来多愧食鱼心，东阁将辞强一吟。羸马客程秋草合，  
晚蝉关树古槐深。风生野渡河声急，雁过寒原岳势侵。  
对酒相看自无语，几多离思入瑶琴。

卷 586\_84 【留别山中友人】

刘沧

欲辞松月恋知音，去住多同羁鸟心。秋尽书窗惊白发，  
晚冲霜叶下青岑。大河风急寒声远，高岭云开夕影深。  
别后寂寥无限意，野花门路草虫吟。

卷 586\_85 【春晚旅次有怀】

刘沧

晚出关河绿野平，依依云树动乡情。残春花尽黄莺语，  
远客愁多白发生。野水乱流临古驿，断烟凝处近孤城。  
东西未遂归田计，海上青山久废耕。

卷 586\_86 【与重幽上人话旧】

刘沧

云飞天末水空流，省与师同别异州。庭树蝉声初入夏，  
石床苔色几经秋。灯微静室生乡思，月上严城话旅游。  
自喜他年接巾舄，沧浪地近虎溪头。

卷 586\_87 【月夜闻鹤唳】

刘沧

碧落风微月正明，霜毛似怨有离情。莓苔石冷想孤立，  
杨柳叶疏闻转清。空夜露残惊堕羽，辽天秋晚忆归程。  
凤凰楼阁知犹恋，终逐烟霞上玉京。

卷 586\_88 【过北邙山】

刘沧

散漫黄埃满北原，折碑横路碾苔痕。空山夜月来松影，  
荒冢春风变木根。漠漠兔丝罗古庙，翩翩丹旆过孤村。  
白杨落日悲风起，萧索寒巢鸟独奔。

卷 586\_89 【咸阳怀古】

刘沧

经过此地无穷事，一望凄然感废兴。渭水故都秦二世，  
咸原秋草汉诸陵。天空绝塞闻边雁，叶尽孤村见夜灯。  
风景苍苍多少恨，寒山半出白云层。

卷 586\_90 【送友人罢举赴蓟门从事】

刘沧

人生行止在知己，远佐诸侯重所依。绿绶便当身是贵，  
青霄休怨志相违。晚云辽水疏残雨，寒角边城怨落晖。  
此去黄金台上客，相思应羡雁南归。

卷 586\_91 【看榜日】

刘沧

禁漏初停兰省开，列仙名目上清来。飞鸣晓日莺声远，  
变化春风鹤影回。广陌万人生喜色，曲江千树发寒梅。  
青云已是酬恩处，莫惜芳时醉酒杯。

卷 586\_92 【送李休秀才归岭中】

刘沧

南泛孤舟景自饶，蒹葭汀浦晚萧萧。秋风汉水旅愁起，  
寒木楚山归思遥。独夜猿声和落叶，晴江月色带回潮。  
故园新过重阳节，黄菊满篱应未凋。

卷 586\_93 【寓居寄友人】

刘沧

雨余虚馆竹阴清，独坐书窗軫旅情。芳草衡门无马迹，  
古槐深巷有蝉声。夕阳云尽嵩峰出，远岸烟消洛水平。  
今夜南原赏佳景，月高风定苦吟生。

卷 586\_94 【经曲阜城】

刘沧

行经阙里自堪伤，曾叹东流逝水长。萝蔓几凋荒陇树，  
莓苔多处古宫墙。三千弟子标青史，万代先生号素王。  
萧索风高洙泗上，秋山明月夜苍苍。

卷 586\_95 【汶阳客舍】

刘沧

年光自感益蹉跎，岐路东西竟若何。窗外雨来山色近，  
海边秋至雁声多。思乡每读登楼赋，对月空吟叩角歌。  
迢递旧山伊水畔，破斋荒径闭烟萝。

卷 586\_96 【留别崔澣秀才昆仲】

刘沧

汶阳离思水无穷，去住情深梦寐中。岁晚虫鸣寒露草，  
日西蝉噪古槐风。川分远岳秋光静，云尽遥天霁色空。  
对酒不能伤此别，尺书凭雁往来通。

卷 586\_97 【和友人忆洞庭旧居】

刘沧

客舍经时益苦吟，洞庭犹忆在前林。青山残月有归梦，  
碧落片云生远心。谿路烟开江月出，草堂门掩海涛深。  
因君话旧起愁思，隔水数声何处砧。

卷 586\_98 【晚归山居】

刘沧

寥落霜空木叶稀，初行郊野思依依。秋深频忆故乡事，  
日暮独寻荒径归。山影暗随云水动，钟声潜入远烟微。  
娟娟唯有西林月，不惜清光照竹扉。

卷 586\_99 【送元叙上人归上党】

刘沧

太行关路战尘收，白日思乡别沃州。薄暮焚香临野烧，  
清晨漱齿涉寒流。溪边残垒空云木，山上孤城对驿楼。  
此去寂寥寻旧迹，苍苔满径竹斋秋。

卷 586\_100 【秋日旅途即事】

刘沧

驱羸多自感，烟草远郊平。乡路几时尽，旅人终日行。  
渡边寒水驿，山下夕阳城。萧索更何有，秋风两鬓生。

卷 586\_101 【早行】

刘沧

旅途乘早景，策马独凄凄。残影郡楼月，一声关树鸡。  
听钟烟柳外，问渡水云西。当自勉行役，终期功业齐。

卷 586\_102 【句】

刘沧

海曙云浮日，江遥水合天。



## 第五百八十七卷

### 卷 587\_1 【湘口送友人】

李频

中流欲暮见湘烟，苇岸无穷接楚田。去雁远冲云梦雪，  
离人独上洞庭船。风波尽日依山转，星汉通霄向水连。  
零落梅花过残腊，故园归醉及新年。

### 卷 587\_2 【鄂州头陀寺上方】

李频

高寺上方无不见，天涯行客思迢迢。西江帆挂东风急，  
夏口城衔楚塞遥。沙渚渔归多湿网，桑林蚕后尽空条。  
感时叹物寻僧话，惟向禅心得寂寥。

### 卷 587\_3 【寄远】

李频

槐欲成阴分袂时，君期十日复金扉。槐今落叶已将尽，

君向远乡犹未归。化石早曾闻节妇，沉湘何必独灵妃。  
须知此意同生死，不学他人空寄衣。

卷 587\_4 【题张司马别墅】

李频

庭前树尽手中栽，先后花分几番开。巢鸟恋雏惊不起，  
野人思酒去还来。自抛官与青山近，谁讶身为白发催。  
门外寻常行乐处，重重履迹在莓苔。

卷 587\_5 【长安即事】

李频

长遇豪家不敢过，此身谁与取高科。故园久绝书来后，  
南国空看雁去多。中夜永怀听叠漏，先秋归梦涉层波。  
愁人白发自生早，我独少年能几何。

卷 587\_6 【汉上逢同年崔八】

李频

去岁曾游帝里春，杏花开过各离秦。偶先托质逢知己，

独未还家作旅人。世上路岐何缭绕，空中光景自逡巡。  
一回相见一回别，能得几时年少身。

卷 587\_7 【五月一日蒙替本官不得随例入阙，感怀献送相公】

李频

五月倾朝谒紫宸，一朝无分在清尘。含香已去星郎位，  
衣锦惟思婺女邻。折狱也曾为俗吏，劝农元本是耕人。  
知将何事酬公道，只养生灵似养身。

卷 587\_8 【春闺怨】

李频

红妆女儿灯下羞，画眉夫婿陇西头。  
自怨愁容长照镜，悔教征戍觅封侯。

卷 587\_9 【送边将】

李频

防秋戎马恐来奔，诏发将军出雁门。遥领短兵登陇首，  
独横长剑向河源。悠扬落日黄云动，苍莽阴风白草翻。

若纵干戈更深入，应闻收得到昆仑。

卷 587\_10 【太和公主还宫】

李频

天骄发使犯边尘，汉将推功遂夺亲。离乱应无初去貌，  
死生难有却回身。禁花半老曾攀树，宫女多非旧识人。  
重上凤楼追故事，几多愁思向青春。

卷 587\_11 【将赴黔州先寄本府中丞】

李频

八月瞿塘到底翻，孤舟上得已销魂。幕中职罢犹趋府，  
阙下官成未谢恩。丹嶂耸空无过鸟，青林覆水有垂猿。  
感知肺腑终难说，从此辞归便扫门。

卷 587\_12 【和友人下第北游感怀】

李频

圣代为儒可致身，谁知又别五陵春。青门独出空归鸟，  
紫陌相逢尽醉人。江岛去寻垂钓远，塞山来见举头频。

且须共漉边城酒，何必陶家有白纶。

卷 587\_13 【乐游原春望】

李频

五陵佳气晚氛氲，霸业雄图势自分。秦地山河连楚塞，  
汉家宫殿入青云。未央树色春中见，长乐钟声月下闻。  
无那杨华起愁思，满天飘落雪纷纷。

卷 587\_14 【黄雀行】

李频

欲窃高仓集御河，翩翩疑渡畏秋波。朱宫晚树侵莺语，  
画阁香帘夺燕窠。疏影暗栖寒露重，空城饥噪暮烟多。  
谁令不解高飞去，破宅荒庭有网罗。

卷 587\_15 【长安寓居寄柏侍郎】

李频

霜轻两鬓欲相侵，愁绪无端不可寻。秦女红妆空觅伴，  
郢郎白雪少知音。长亭古木春先老，太华青烟晚更深。

独向灞陵东北望，一封书寄万重心。

卷 587\_16 【春日思归】

李频

春情不断若连环，一夕思归鬓欲斑。壮志未酬三尺剑，  
故乡空隔万重山。音书断绝干戈后，亲友相逢梦寐间。  
却羡浮云与飞鸟，因风吹去又吹还。

卷 587\_17 【朔中即事】

李频

关门南北杂戎夷，草木秋来即出师。落日风沙长暝早，  
穷冬雨雪转春迟。山头烽火孤明后，星外行人四绝时。  
自古边功何不立，汉家中外自相疑。

卷 587\_18 【感怀献门下相公】

李频

谁云郎选不由诗，上相怜才积有时。却是龙钟到门晚，  
终非稽古致身迟。谋将郡印归难遂，读著家书坐欲痴。

日望南宫看列宿，迢迢婺女与乡比。

卷 587\_19 【赠长城庾将军】

李频

初年三十拜将军，近代英雄独未闻。向国报恩心比石，  
辞天作镇气凌云。逆风走马貂裘卷，望塞悬弧雁阵分。  
定拥节麾从此去，安西大破犬戎群。

卷 587\_20 【浙东献郑大夫】

李频

圣主东忧涨海滨，思移副相倚陶钧。楼台独坐江山月，  
舟楫先行泽国春。遥想万家开户外，近闻群盗窜诸邻。  
几时入去调元化，天下同为尧舜人。

卷 587\_21 【镜湖夜泊有怀（东晋太赛马臻所筑）】

李频

广水遥堤利物功，因思太守惠无穷。自从版筑兴农隙，  
长与耕耘致岁丰。涨接星津流荡漾，宽浮云岫动虚空。  
想当战国开时有，范蠡扁舟祗此中。

卷 587\_22 【宣州献从叔大夫】

李频

清时选地任贤明，从此观风辍尹京。日月天中辞洛邑，  
云山江上领宣城。万家閭井俱安寝，千里农桑竟起耕。  
闻说圣朝同汉代，已愁征入拜公卿。

卷 587\_23 【贺同年翰林从叔舍人知制诰】

李频

仙禁何人蹑近踪，孔门先选得真龙。别居云路抛三省，  
专掌天书在九重。五色毫挥成涣汗，百寮班下独从容。  
芳年贵盛谁为比，郁郁青青岳顶松。

卷 587\_24 【吴门别主人（一作呈门月夜与曹太尉话别）】

李频

早晚更看吴苑月，小斋长忆落西窗。  
不知明夜谁家见，应照离人隔楚江。



卷 587\_25 【自黔中归新安】

李频

朝过春关辞北阙，暮参戎幕向南巴。  
却将仙桂东归去，江月相随直到家。

卷 587\_26 【奉和郑薰相公（一本此下有七松亭三字）】

李频

三四株松匝草亭，便成彭泽柳为名。  
莲峰隐去难辞阙，浣水朝回与出城。

卷 587\_27 【及第后还家过岷岭】

李频

魏驮山前一朵花，岭西更有几千家。  
石斑鱼鲊香冲鼻，浅水沙田饭绕牙。

卷 587\_28 【春日旅舍】

李频

未识东西南北路，青春白日坐销难。  
如何一别故园后，五度花开五处看。

卷 587\_29 【过长江伤贾岛】

李频

忽从一宦远流离，无罪无人子细知。  
到得长江闻杜宇，想君魂魄也相随。

卷 587\_30 【自遣】

李频

永拟东归把钓丝，将行忽起半心疑。  
青云道是不平地，还有平人上得时。

卷 587\_31 【寄曹邨】

李频

终南山是枕前云，禁鼓无因晓夜闻。  
朝客秋来不朝日，曲江西岸去寻君。

卷 587\_32 【述怀】

李频

望月疑无得桂缘，春天又待到秋天。  
杏花开与槐花落，愁去愁来过几年。

卷 587\_33 【客洛酬刘驾】

李频

浮世总应相送老，共君偏更远行多。  
此回不似前回别，听尽离歌逐棹歌。

卷 587\_34 【题钓台障子】

李频

君家尽是我家山，严子前台枕古湾。  
却把钓竿终不可，几时入海得鱼还。

卷 587\_35 【题阳山顾炼师草堂】

李频

若到当时上升处，长生何事后无人。  
前峰自去种松子，坐见年来取茯神。

卷 587\_36 【闻金吾妓唱梁州】

李频

闻君一曲古梁州，惊起黄云塞上愁。  
秦女树前花正发，北风吹落满城秋。

卷 587\_37 【游蜀回简友人】

李频

别来十二月，去到漏天边。不是因逢闰，还应是隔年。

卷 587\_38 【赠泾州王侍御】

李频

一旦天书下紫微，三年旌旆陇云飞。  
塞门无事春空到，边草青青战马肥。

卷 587\_39 【夏日（一作秋夜）宿秘书姚监宅】

李频

贵宅多嘉树，先秋有好风。情闲离阙下，梦野在山中。  
露色浮寒瓦，萤光堕暗丛。听吟丽句尽，河汉任西东。

卷 587\_40 【过嵩阴隐者】

李频

当门看少室，倚杖复披衣。每日醒还醉，无人是与非。  
架书抽读乱，庭果摘尝稀。独有江南客，思家未得归。

卷 587\_41 【留别山家】

李频

闲门不易求，半月在林丘。已与山水别，难为花木留。  
孤怀归静夜，远会隔高秋。莫道无言去，冥心在重游。

卷 587\_42 【送人游吴】

李频

楚田开雪后，草色与君看。积水浮春气，深山滞雨寒。  
毗陵孤月出，建业一钟残。为把乡书去，因收别泪难。

卷 587\_43 【东渭桥晚眺】

李频

秦地有吴洲，千樯渭曲头。人当返照立，水彻故乡流。  
落第春难过，穷途日易愁。谁知桥上思，万里在江楼。

卷 587\_44 【送延陵韦少府】

李频

延陵称贵邑，季子有高踪。古迹传多代，仙山管几峰。  
微泉声小雨，异木色深冬。去毕三年秩，新诗篋不容。

卷 587\_45 【淮南送友人归沧州】

李频

风色忽西转，坐为千里分。高帆背楚落，寒日逆淮曛。  
断烧缘乔木，盘雕隐片云。乡关百战地，归去始休军。

卷 587\_46 【夏日题盩厔友人书斋】

李频

修竹齐高树，书斋竹树中。四时无夏气，三伏有秋风。  
黑处巢幽鸟，阴来叫候虫。窗西太白雪，万仞在遥空。

卷 587\_47 【寻山】

李频

一径入双崖，初疑有几家。行穷人不见，坐久日空斜。  
石上生灵草，泉中落异花。终须结茅屋，向此学餐霞。

卷 587\_48 【送元遂上人归钱唐】

李频

白衣游帝乡，已得事空王。却返湖山寺，高禅水月房。  
雨中过岳黑，秋后宿船凉。回顾秦人语，他生会别方。



卷 587\_49 【贻友人喻坦之】

李频

从容心自切，饮水胜衔杯。共在山中长，相随阙下来。  
修身空有道，取事各无媒。不信升平代，终遗草泽才。

卷 587\_50 【送友人往振武】

李频

风沙遥见说，道路替君愁。碛夜星垂地，云明火上楼。  
征鸿辞塞雪，战马识边秋。不共将军语，何因有去留。

卷 587\_51 【赋得长城斑竹杖】

李频

秦兴版筑时，翦伐不知谁。异代余根在，幽人得手持。  
细看生古意，闲倚动边思。莫作鸠形并，空将鹤发期。

卷 587\_52 【送德清喻明府】

李频

棹返雪溪云，仍参旧使君。州传多古迹，县记是新文。  
水栅横舟闭，湖田立木分。但如诗思苦，为政即超群。

卷 587\_53 【送薛能少府任盩厔】

李频

不才甘下第，君子蹇何重。相送昆明岸，同看太白峰。  
数瓢留顷刻，残照迫从容。好去烟霞县，仙人有旧踪。

卷 587\_54 【送许寿下第归东山】

李频

吾君设礼闱，谁合学忘机。却是高人起，难为下第归。  
出关心纵野，避世事终稀。莫更今秋夕，相思望少微。

卷 587\_55 【冬夜酬范秘书（一作九衢春日酬范秘书）】

李频

九衢行一匝，不敢入他门。累日无余事，通宵得至言。  
命嗟清世蹇，春觉闰冬暄。翻覆吟佳句，何酬国士恩。

卷 587\_56 【送陆肱尉江夏】

李频

如何执简去，便作挂帆期。泽国三春早，江天落日迟。  
县人齐候处，洲鸟欲飞时。免褐方三十，青云岂白髭。

卷 587\_57 【汉上送人西归】

李频

几作西归梦，因为怆别心。野衔天去尽，山夹汉来深。  
叠浪翻残照，高帆引片阴。空留相赠句，毕我白头吟。

卷 587\_58 【蜀中逢友人】

李频

自古有行役，谁人免别家。相欢犹陌上，一醉任天涯。  
积叠山藏蜀，潺湲水绕巴。他年复何处，共说海棠花。

卷 587\_59 【寄范评事】

李频

行坐不相遗，辕门载笔时。雅知难更遇，旧分合长思。  
梦即重寻熟，书常转达迟。山斋终拟到，何日遂心期。

卷 587\_60 【南游过湘汉即事寄友人】

李频

南去远驱逐，三湘五月行。巴山雪水下，楚泽火云生。  
向野聊中饭，乘凉探暮程。离怀不可说，已迫峡猿声。

卷 587\_61 【送许浑侍御赴润州】

李频

家山近石头，遂意恣东游。祖席离乌府，归帆转蜃楼。  
阴氛出海散，落月向潮流。别有为霖日，孤云未自由。

卷 587\_62 【喜友人厉图南及第】

李频

相忧过己切，相贺似身荣。心达无前后，神交共死生。  
承家吾子事，登第世人情。未有通儒术，明时道不行。

卷 587\_63 【送友人下第归越】

李频

归意随流水，江湖共在东。山阴何处去，草际片帆通。  
雨色春愁里，潮声晓梦中。虽为半年客，便是往来鸿。

卷 587\_64 【寄友人】

李频

一别一相见，须臾老此生。客衣寒后薄，山思夜深清。  
诗近吟何句，髭新白几茎。路岐如昨日，来往梦分明。

卷 587\_65 【送友人下第归宛陵】

李频

天涯长恋亲，阙下独伤春。拟住还求己，须归不为身。  
临岐仍犯雪，挂席始离尘。共泣东风别，同为沧海人。

卷 587\_66 【秋夜对月寄凤翔范书记】

李频

月过秋霖后，光应夜夜清。一回相忆起，几度独吟行。  
河汉东西直，山川远近明。寸心遥往处，新有雁来声。

卷 587\_67 【送孙明秀才往潘州访（一作谒）韦卿】

李频

北鸟飞不到，北人今去游。天涯浮瘴水，岭外问潘州。  
草木春冬茂，猿猱日夜愁。定知迁客泪，应只对君流。

卷 587\_68 【八月十五夜对月】

李频

阴盛此宵中，多为雨与风。坐无云雨至，看与雪霜同。  
抱湿离遥海，倾寒向迥空。年年不可值，还似命难通。

卷 587\_69 【及第后归】

李频

家临浙水傍，岸对买臣乡。纵棹随归鸟，乘潮向夕阳。  
苦吟身得雪，甘意鬓成霜。况此年犹少，酬知足自强。

卷 587\_70 【过巫峡】

李频

拥棹向惊湍，巫峰直上看。削成从水底，耸出在云端。  
暮雨晴时少，啼猿渴下难。一闻神女去，风竹扫空坛。



## 第五百八十八卷

### 卷 588\_1 【送友人往太原】

李频

离亭聊把酒，此路彻边头。草白雁来尽，时清人去游。  
汾河流晋地，塞雪满并州。别后相思夜，空看北斗愁。

### 卷 588\_2 【旅怀】

李频

万里共心论，徒言吾道存。奉亲无别业，谒帝有何门。  
水宿惊涛浦，山行落叶村。长安长梦去，欹枕即闻猿。

### 卷 588\_3 【送裴御史赴湖南】

李频

关门鸟道中，飞传复乘骢。暮雪离秦甸，春云入楚宫。

平芜天共阔，积水地多空。使府悬帆去，能消几日风。

卷 588\_4 【送姚郃先辈赴汝州辟】

李频

行李事寒天，东来聘礼全。州当定鼎处，人去偃戈年。  
雷雨依嵩岭，桑麻接楚田。遥知清夜作，不是借戎篇。

卷 588\_5 【初离黔中泊江上】

李频

去去把青桂，平生心不违。更蒙莲府辟，兼脱布衣归。  
霁岳明残雪，清波漾落晖。无穷幽鸟戏，时向棹前飞。

卷 588\_6 【黔中酬同院韦判官】

李频

平生同所为，相遇偶然迟。各著青袍后，无归白社期。  
江流来绝域，府地管诸夷。圣代都无事，从公且赋诗。

卷 588\_7【和范秘书襄阳旧游（一作和范鄴先辈话襄阳旧游）】

李频

听话扬帆兴，初从岷首还。高吟入白浪，遥坐看青山。  
枯木猿啼爽，寒汀鹤步闲。秋来关去梦，几夜度商颜。

卷 588\_8【秋夜山（一作日江）中思归送友人】

李频

萧条对秋色，相忆在云泉。木落病身起，潮平归思悬。  
凉钟山顶寺，暝火渡头船。此地非吾土，淹留又一年。

卷 588\_9【自黔中东归旅次淮上】

李频

行旅本同愁，黔吴复阻修。半年方中路，穷节到孤舟。  
夕霭垂阴野，晨光动积流。家山一夜梦，便是昔年游。

卷 588\_10 【江夏春感旧】

李频

东风出海门，处处动林园。泽国雪霜少，沙汀花木繁。  
暖鱼依水浅，晴雁入空翻。何处阳和力，生萍不驻根。

卷 588\_11 【眉州别李使君】

李频

回首雪峰前，朱门心杳然。离人自呜咽，流水莫潺湲。  
毒草通蛮徼，秋林近漏天。一生从此去，五字有谁怜。

卷 588\_12 【送许棠及第归宣州】

李频

高科终自致，志业信如神。待得逢公道，由来合贵身。  
秋归方觉好，旧梦始知真。更想青山宅，谁为后主人。

卷 588\_13 【黔中罢职将泛江东】

李频

黔中初罢职，薄俸亦无残。举目乡关远，携家旅食难。  
野梅将雪竞，江月与沙寒。两鬓愁应白，何劳把镜看。

卷 588\_14 【长安书事寄所知】

李频

帝里本无名，端居有道情。睡魂春梦断，书兴晚窗明。  
老拟归何处，闲应过此生。江湖终一日，拜别便东行。

卷 588\_15 【酬姚覃】

李频

不见又相招，何曾诉寂寥。醉眠春草长，吟坐夜灯销。  
泪堕思山切，身归转路遥。年年送别处，杨柳少垂条。

卷 588\_16 【春日鄜州赠裴居言】

李频

虽将身佐幕，出入似闲居。草色长相待，山情信不疏。  
灯前春睡足，酒后夜寒余。笔砚时时近，终非署簿书。

卷 588\_17 【送于生入蜀】

李频

家吴闻入蜀，道路颇乖离。一第何多难，都城可少知。  
江山非久适，命数未终奇。况又将冤抱，经春杜魄随。

卷 588\_18 【送许棠归泾县作尉】

李频

青桂复青袍，一归荣一高。县人齐下拜，邑宰共分曹。  
绕郭看秧插，寻街听茧缲。封侯万里者，燕颔乃徒劳。

卷 588\_19 【友人话别】

李频

论交虽不早，话别且相亲。除却栖禅客，谁非南陌人。  
半生都返性，终老拟安贫。愿入白云社，高眠自致身。

卷 588\_20 【山居】

李频

欲出穷吾道，东西自未能。卷书唯对鹤，开画独留僧。  
落叶和云扫，秋山共月登。何年石上水，夜夜滴高层。

卷 588\_21 【寄范郎中】

李频

藜杖山中出，吟诗对范家。相知从海峤，寄食向京华。  
名宦成何报，清眸未纵赊。临邛梦来往，雨雪满褒斜。

卷 588\_22 【书怀】

李频

宦途从不问，身事觉无差。华发初生女，沧洲未有家。  
却闲思洞穴，终老旷桑麻。别访栖禅侣，相期语劫沙。

卷 588\_23 【越中行】

李频

越国临沧海，芳洲复暮晴。湖通诸浦白，日隐乱峰明。  
野宿多无定，闲游免有情。天台闻不远，终到石桥行。

卷 588\_24 【春日南游寄浙东许同年】

李频

孤帆处处宿，不问是谁家。南国平芜远，东风细雨斜。  
旅怀多寄酒，寒意欲留花。更想前途去，茫茫沧海涯。



卷 588\_25 【明州江亭夜别段秀才】

李频

离亭向水开，时候复蒸梅。霹雳灯烛灭，蒹葭风雨来。  
京关虽共语，海峤不同回。莫为莼鲈美，天涯滞尔才。

卷 588\_26 【临岐留别相知】

李频

百岁竟何事，一身长远游。行行将近老，处处不离愁。  
世路多相取，权门不自投。难为此时别，欲别愿人留。

卷 588\_27 【鄂渚湖上即事】

李频

杜门聊自适，湖水在窗间。纵得沧洲去，无过白日闲。  
多慵空好道，少贱早凋颜。独有东山月，依依自往还。

卷 588\_28 【辞夏口崔尚书】

李频

一饭仍难受，依仁况一年。终期身可报，不拟骨空镌。  
城晚风高角，江春浪起船。同来栖止地，独去塞鸿前。

卷 588\_29 【秦原早望】

李频

一忝乡书荐，长安未得回。年光逐渭水，春色上秦台。  
燕掠平芜去，人冲细雨来。东风生故里，又过几花开。

卷 588\_30 【送友人之扬州（一作游淮南）】

李频

一别长安后，晨征便信鸡。河声入峡急，地势出关低。  
绿树丛垓下，青芜阔楚西。路长知不恶，随处得诗题。

卷 588\_31 【过四皓庙】

李频

东西南北人，高迹自相亲。天下已归汉，山中犹避秦。  
龙楼曾作客，鹤氅不为臣。独有千年后，青青庙木春。

卷 588\_32 【陕下怀归】

李频

故园何处在，零落五湖东。日暮无来客，天寒有去鸿。  
大河冰彻塞，高岳雪连空。独夜悬归思，迢迢永漏中。

卷 588\_33 【送徐处士归江南】

李频

行行野雪薄，寒气日通春。故国又芳草，沧江终白身。  
游归花落满，睡起鸟啼新。莫惜闲书札，西来问旅人。

卷 588\_34 【鄜州留别王从事】

李频

相识未十日，相知如十年。从来易离别，此去忽留连。  
路险行冲雨，山高度隔天。难终清夜坐，更听说安边。

卷 588\_35 【长安夜怀】

李频

匹马西游日，从吴又转荆。风雷几夜坐，山水半年行。  
梦永秋灯灭，吟余晓露明。良时不我与，白发向秦生。

卷 588\_36 【冬夜山中寻友（一作僧）】

李频

何人山雪夜，相访不相思。若得长闲日，应无暂到时。  
叶寒凋欲尽，泉冻落还迟。即此天明去，重来未有期。

卷 588\_37 【送刘山人归洞庭】

李频

君逐云山去，人间又绝踪。半湖乘早月，中路入疏钟。  
秋尽草虫急，夜深山雨重。平生心未已，岂得更相从。

卷 588\_38 【古意】

李频

白马游何处，青楼日正长。凤箫抛旧曲，鸾镜懒新妆。  
玄鸟深巢静，飞花入户香。虽非窦滔妇，锦字已成章。

卷 588\_39 【避暑】

李频

当暑忆归林，陶家借柳阴。蝉从初伏噪，客向晚凉吟。  
白日欺玄鬓，沧江负素心。神仙倘有术，引我出幽岑。

卷 588\_40 【送吴秘书归杭州】

李频

为客得从容，官清料复重。海崖归有业，天目近何峰。  
是处通春棹，无村不夜春。马卿夸贵达，还说返临邛。

卷 588\_41 【中秋对月】

李频

秋分一夜停，阴魄最晶荧。好是生沧海，徐看历杳冥。  
层空疑洗色，万怪想潜形。他夕无相类，晨鸡不可听。

卷 588\_42 【八月上峡（一作八月峡口作）】

李频

万里巴江水，秋来满峡流。乱山无陆路，行客在孤舟。  
汹汹滩声急，冥冥树色愁。免为三不吊，已白一生头。

卷 588\_43 【送狄明府赴九江】

李频

字人修祖德，清白定闻传。匹马从秦去，孤帆入楚悬。  
关中寒食雨，湖上暑衣天。四考兼重请，相知住几年。

卷 588\_44 【陕下投姚谏议】

李频

旧业在东鄙，西游从楚荆。风雷几夜坐，山水半年行。  
梦永秋灯灭，吟孤晓露明。前心若不遂，有耻却归耕。

卷 588\_45 【关东逢薛能】

李频

何处不相思，相逢还有时。交心如到老，会面未为迟。  
苦学缘明代，劳生欲白髭。唯君一度别，便似见无期。

卷 588\_46 【富春赠孙璐】

李频

天柱与天目，曾栖绝顶房。青云求禄晚，白日坐家长。  
井气通潮信，窗风引海凉。平生诗称在，老达亦何妨。

卷 588\_47 【送友人游蜀】

李频

东堂虽不捷，西去复何愁。蜀马知归路，巴山似旧游。  
星临剑阁动，花落锦江流。鼓吹青林下，时闻祭武侯。

卷 588\_48 【夏日盩厔郊居寄姚少府】

李频

古木有清阴，寒泉有下深。蝉从初伏噪，客向晚凉吟。  
白日欺玄鬓，沧江负素心。甚思中夜话，何路许相寻。



卷 588\_49 【送胡休处士归湘江（一作南）】

李频

见说湘江切，长愁有去时。江湖秋涉远，雷雨夜眠迟。  
旧业多归兴，空山尽老期。天寒一瓢酒，落日醉留谁。

卷 588\_50 【峡州送清彻上人归浙西】

李频

风涛几千里，归路半乘舟。此地难相遇，何人更共游。  
坐经嵩顶夏，行值洛阳秋。到寺安禅夕，江云满石楼。

卷 588\_51 【送僧入天台】

李频

一锡随缘赴，天台又去登。长亭旧别路，落日独行僧。  
夜烧山何处，秋帆浪几层。他时授巾拂，莫为老无能。

卷 588\_52 【回山后寄范鄴先辈】

李频

高楼会月夜，北雁向南分。留住经春雪，辞来见夏云。  
遥空江不极，绝顶日难曛。一与山僧坐，无因得议文。

卷 588\_53 【长安送友人东归】

李频

白社思归处，青门见去人。乡遥茂苑树，路入广陵尘。  
海日潮浮晓，湖山雪露春。犹期来帝里，未是得闲人。

卷 588\_54 【深秋过源宗上人房（一作方丈）】

李频

到日值摇落，相留山舍空。微寒生夜半，积雨向秋终。  
度讲多来雁，经禅少候虫。方从听话后，不省在愁中。

卷 588\_55 【秋日登山阁】

李频

苍苍山阁晚，杳杳隙尘秋。偶上多时立，翻成尽日愁。  
草平连邑动，河满逐江流。下视穷边路，行人在陇头。

卷 588\_56 【秋宿慈恩寺遂上人院】

李频

满阁终南色，清宵独倚栏。风高斜汉动，叶下曲江寒。  
帝里求名老，空门见性难。吾师无一事，不似在长安。

卷 588\_57 【题栖霞寺庆上人院】

李频

居与鸟巢邻，日将巢鸟亲。多生从此性，久集得无身。  
树老风终夜，山寒雪见春。不知诸祖后，传印是何人。

卷 588\_58 【送友人入（一作之）蜀】

李频

天际蜀门开，西看举别杯。何人不异礼，上客自怀才。  
夜润青林发，秋江绿水来。临邛行乐处，莫到白头回。

卷 588\_59 【赠同官苏明府】

李频

山中畿内邑，别觉大夫清。簿领分王事，官资寄野情。  
闲斋无狱讼，隐几向泉声。从此朝天路，门前是去程。

卷 588\_60 【送厉图南往荆州舘伯】

李频

云水入荆湘，古来鱼鸟乡。故关重隔远，春日独行长。  
山溜含清韵，江雷吐夜光。郡中词客会，游子更升堂。

卷 588\_61 【山中夜坐】

李频

归家来几夜，倏忽觉秋残。月满方塘白，风依老树寒。  
戏鱼重跃定，惊鸟却栖难。为有门前路，吾生不得安。

卷 588\_62 【送台州唐兴陈明府】

李频

见说海西隅，山川与俗殊。宦游如不到，仙分即应无。  
瀑布当公署，天台是县图。遥知为吏去，有术字惓孤。

卷 588\_63 【夏日过友人檀溪别业】

李频

暑天宜野宅，林籁爽泠泠。沙月邀开户，岩风助扫庭。  
鹭栖依绿筱，鱼跃出清萍。客抱方如醉，因来得暂醒。

卷 588\_64 【自江上入关】

李频

尽室寄沧洲，孤帆独溯流。天涯心似梦，江上雨兼秋。  
文字为人弃，田园被债收。此名如不得，何处拟将休。

卷 588\_65 【冬夜和范秘书宿秘省中作】

李频

每日得闲吟，清曹阙下深。因知遥夜坐，别有远山心。  
芸细书中气，松疏雪后阴。归时高兴足，还复插朝簪。

卷 588\_66 【送友人游太原】

李频

孤帆几日悬，楚客思飘然。水宿南湖夜，山离旧国年。  
秋风高送雁，寒雨入停蝉。此去勤书札，时常中路传。

卷 588\_67 【江上居寄山中客】

李频

山后与山前，相思隔叫猿。残云收树末，返照落江源。  
苦雨秋涛涨，狂风野火翻。朝来卖药客，遇我达无言。

.

## 第五百八十九卷

### 卷 589\_1 【送张郎中赴睦州】

李频

青山复渌水，想入富春西。夹岸清猿去，中流白日低。  
美兼华省出，荣共故乡齐。贱子遥攀送，归心逐马蹄。

### 卷 589\_2 【送鄂渚韦尚书赴镇】

李频

夏口本吴头，重城据上游。戈船转江汉，风月宿汀洲。  
执宪倾民望，衔恩赴主忧。谁知旧寮属，攀饯泪仍流。

### 卷 589\_3 【送崔侍御书记赴山北座主尚书招辟】

李频

书记向丘门，旌幢夹谷尊。从来游幕意，此去并酬恩。



雁叫嫌冰合，骢嘶喜雪繁。同为入室士，不觉别销魂。

卷 589\_4 【入朝遇雪】

李频

霜鬓持霜简，朝天向雪天。玉阶初辨色，琼树乍相鲜。  
密翳空难曙，盈征瑞不愆。谁为洛阳客，是日更高眠。

卷 589\_5 【勉力】

李频

日月不并照，升沈俱有时。自媒徒欲速，孤立却宜迟。  
尽力唯求己，公心任遇谁。人间不得意，半是鬓先衰。

卷 589\_6 【郊居寄友人】

李频

林色树还曛，何时得见君？独居度永日，相去远浮云。  
故疾随秋至，离怀觉夜分。蛩声非自苦，偏是旅人闻。

卷 589\_7 【送陆肱归吴兴】

李频

雪后江上去，风光故国新。清浑天气晓，绿动浪花春。  
劝酒提壶鸟，乘舟震泽人。谁知沧海月，取桂却来秦。

卷 589\_8 【暮秋重过山僧院】

李频

却接良宵坐，明河几转流。安禅逢小暑，抱疾入高秋。  
静室闻玄理，深山可白头。朝朝献林果，亦欲学猕猴。

卷 589\_9 【送新安少府】

李频

南浮虽六月，风水已秋凉。日乱看江树，身飞逐楚樯。  
后期谁可定，临别语空长。远宦须清苦，幽兰贵独芳。

卷 589\_10 【送人归吴】

李频

何人不归去，君去是闲人。帝里求相识，山家即近邻。  
交情吾道可，离思柳条新。未饮青门酒，先如醉梦身。

卷 589\_11 【送姚评事】

李频

儒服从戎去，须知胜事全。使君开幕日，天子偃戈年。  
风雨依嵩岭，桑麻接楚田。新诗随过客，旋满洛阳传。

卷 589\_12 【题栖云寺立上人院】

李频

是法从生有，修持历劫尘。独居岩下室，长似定中身。  
树老风终夜，山寒雪见春。不知诸祖后，传印是何人。

卷 589\_13 【黔中罢职过峡州题田使君北楼】

李频

巴中初去日，已遇使君留。及得寻东道，还陪上北楼。  
江冲巫峡出，橈过洛宫收。好是从戎罢，看山觉自由。

卷 589\_14 【江上送从兄群玉校书东游】

李频

逍遥蓬阁吏，才子复诗流。坟籍因穷览，江湖却纵游。  
眠波听戍鼓，饭浦约鱼舟。处处迎高密，先应扫郡楼。

卷 589\_15 【宛陵东峰亭与友人话别】

李频

坐举天涯目，停杯语日晡。修篁齐迥槛，列岫限平芜。  
乱水通三楚，归帆挂五湖。不知从此去，何处是前途。

卷 589\_16 【华山寻隐者】

李频

自入华山居，关东相见疏。瓢中谁寄酒，叶上我留书。  
巢鸟寒栖尽，潭泉暮冻余。长闻得药力，此说又何如。

卷 589\_17 【题荐福寺僧栖白上人院】

李频

空门有才子，得道亦吟诗。内殿频征入，孤峰久作期。  
高名何代比，密行几生持。长爱乔松院，清凉坐夏时。

卷 589\_18 【游四明山刘樊二真人祠，题山下孙氏居】

李频

久在仙坛下，全家是地仙。池塘来乳洞，禾黍接芝田。  
起看青山足，还倾白酒眠。不知尘世事，双鬓逐流年。

卷 589\_19 【和太学赵鸿博士归蔡中】

李频

得禄从高第，还乡见后生。田园休问主，词赋已垂名。  
扫壁前题出，开窗旧景清。遥知贤太守，致席日邀迎。

卷 589\_20 【送寿昌曹明府】

李频

惠人须宰邑，为政贵通经。却用清琴理，犹嫌薄俗听。  
涨江晴渐绿，春峤烧还青。若宿严陵濑，谁当是客星。

卷 589\_21 【哭贾岛】

李频

秦楼吟苦夜，南望只悲君。一宦终遐徼，千山隔旅坟。  
恨声流蜀魄，冤气入湘云。无限风骚句，时来日夜闻。

卷 589\_22 【送薛能赴镇徐方】

李频

列土人间盛，彭门属九州。山河天设险，礼乐牧分忧。  
皎日为明信，清风占早秋。虽同郤縠举，郤縠不封侯。

卷 589\_23 【送凤翔范书记】

李频

西京无暑气，夏景似清秋。天府来相辟，高人去自由。  
江山通蜀国，日月近神州。若共将军语，河兰地未收。

卷 589\_24 【岐山逢陕下故人】

李频

三秦一会面，二陕久分携。共忆黄河北，相留白日西。  
寄来书少达，别后梦多迷。早晚期于此，看花听鸟啼。

卷 589\_25 【送友人陆肱往太原】

李频

并州非故国，君去复寻谁。猱狁方为寇，嫫姚正用师。  
戍烟来自号，边雪下无时。更想经绵上，应逢禁火期。

卷 589\_26 【赠李将军】

李频

吾宗偏好武，汉代将家流。走马辞中禁，屯军向渭州。  
天心待破虏，阵面许封侯。却得河源水，方应洗国仇。

卷 589\_27 【送友人喻坦之归睦州（一作送人归新定）】

李频

归心常共知，归路不相随。彼此无依倚，东西又别离。  
山花含雨湿，江树近潮欹。莫恋渔樵兴，生涯各有为。



卷 589\_28 【寻华阳隐者】

李频

闲却白云居，行踪出去初。窗中聊取笔，架上独留书。  
日背林光冷，潭澄岳影虚。长闻得药力，此说复何如？

卷 589\_29 【长安即事（一作长安僻居酬人）】

李频

岂得有书名，徒为老帝京。关中秋气早，雨后夜凉生。  
沧海身终泛，青门梦已行。秦人纵相识，多少别离情。

卷 589\_30 【送友人游塞北】

李频

朔野正秋风，前程见碛鸿。日西身独远，山转路无穷。  
树隔高关断，沙连大漠空。君看河外将，早晚拟平戎。

卷 589\_31 【陕府上姚中丞】

李频

关东领藩镇，阙下授旌旄。觅句秋吟苦，酬恩夜坐劳。  
天开吹角出，木落上楼高。闲话钱塘郡，半年听海潮。

卷 589\_32 【送供奉喻炼师归天目山】

李频

承恩虽内殿，得道本深山。举世相看老，孤峰独自还。  
溪来青壁里，路在白云间。绝顶无人住，双峰是旧关。

卷 589\_33 【之任建安录溪亭偶作二首】

李频

入境当春务，农蚕事正殷。逢溪难饮马，度岭更劳人。  
想取烝黎泰，无过赋敛均。不知成政后，谁是得为邻。

维舟绿溪岸，绕郡白云峰。将幕连山起，人家向水重。  
短才无独见，长策未相逢。所幸分尧理，烝民悉可封。

卷 589\_34 【送侯郎中任新定二首】

李频

为郎非白头，作牧授沧洲。江界乘潮入，山川值胜游。  
暑气随转扇，凉月傍开楼。便欲归田里，抛官逐隐侯。  
罢郎东出守，半路得浮舟。大旆行当夏，桐江到未秋。  
云闲分岛寺，涛静见沙鸥。谁伴临清景，吟诗上郡楼。

卷 589\_35 【送太学吴康仁及第南归】

李频

因为太学选，志业彻春闱。首领诸生出，先登上第归。  
一荣犹未已，具庆且应稀。纵马行青草，临岐脱白衣。  
家遥楚国寄，帆对汉山飞。知己盈华省，看君再发机。

卷 589\_36 【陕州题河上亭】

李频

岸拥洪流急，亭开清兴长。当轩河草晚，入坐水风凉。  
独鸟惊来客，孤云触去樯。秋声和远雨，暮色带微阳。  
浪静澄窗影，沙明发簟光。逍遥每尽日，谁识爱沧浪。

卷 589\_37 【留题姚氏山斋】

李频

未厌栖林趣，犹怀济世才。闲眠知道在，高步会时来。  
露滴从添砚，蝉吟便送杯。乱书离缥帙，迸笋出苔莓。  
异果因僧摘，幽窗为燕开。春游何处尽，欲别几迟回。

卷 589\_38 【长安书怀投知己（一作投邢员外）】

李频

所学近雕虫，知难谒至公。徒随众人后，拟老一生中。  
间岁家书到，经荒世业空。心悬沧海断，梦与白云通。  
玉漏声连北，银河气极东。关门迢递月，禁苑寂寥鸿。  
地广身难束，时平道独穷。萧条苔长雨，淅沥叶危风。  
久愧干朝客，多惭别钓翁。因依非不忝，延荐况曾蒙。  
与善应无替，垂恩本有终。霜天摇落日，莫使逐孤蓬。

卷 589\_39 【送姚侍御充渭北掌书记】

李频

北境烽烟急，南山战伐频。抚绥初易帅，参画尽须人。

书记才偏称，朝廷意更亲。绣衣行李日，绮陌别离尘。  
报国将临虏，之藩不离秦。豸冠严在首，雄笔健随身。  
饮马河声暮，休兵塞色春。败亡仍暴骨，冤哭可伤神。  
上策何当用，边情此是真。雕阴曾久客，拜送欲沾巾。

卷 589\_40 【长安书情投知己】

李频

陕服因诗句，从容已半年。一从归阙下，罕得到门前。  
每候朝轩出，常看列宿悬。重投期见奖，数首果蒙传。  
转觉功宜倍，兼令住更坚。都忘春暂醉，少省夜曾眠。  
烦暑灯谁读，孤云业自专。精华搜未竭，骚雅琢须全。  
此事勤虽过，他谋拙莫先。槐街劳白日，桂路在青天。  
取第殊无序，还乡可有缘。旅情长越鸟，秋思几秦蝉。  
月色千楼满，砧声万井连。江山阻迢递，时节暗推迁。  
道即穷通守，才应始末怜。书绅相戒语，藏篋赠行篇。  
致主当齐圣，为郎本是仙。人心期际会，凤翼许迁延。  
毕竟良图在，何妨逸性便。幽斋中寝觉，珍木正阴圆。  
隐几闲瞻夜，临云兴渺然。五陵供丽景，六义动花笺。  
倘与潜生翼，宁非助化权。免教垂素发，归种海隅田。

卷 589\_41 【府试丹浦非乐战】

李频

自古为君道，垂衣致理难。怀仁须去杀，用武即胜残。  
毒帜诛方及，兵临衅可观。居来彭蠡固，战罢洞庭宽。  
雪国知天远，霜林是血丹。吾皇则尧典，薄伐至桑干。

卷 589\_42 【府试风雨闻鸡】

李频

不为风雨变，鸡德一何贞。在暗长先觉，临晨即自鸣。  
阴霾方见信，顷刻讵移声。向晦如相警，知时似独清。  
萧萧和断漏，喔喔报重城。欲识诗人兴，中含君子情。

卷 589\_43 【府试观兰亭图】

李频

往会人何处，遗踪事可观。林亭今日在，草木古春残。  
笔想吟中驻，杯疑饮后干。向青穿峻岭，当白认回湍。  
月影窗间夜，湖光枕上寒。不知诗酒客，谁更慕前欢。

卷 589\_44 【府试老人星见】

李频

良宵出户庭，极目向青冥。海内逢康日，天边见寿星。  
临空遥的的，竟晓独荧荧。春后先依景，秋来忽近丁。  
垂休临有道，作瑞掩前经。岂比周王梦，徒言得九龄。

卷 589\_45 【省试振鹭】

李频

有鸟生江浦，霜华作羽翰。君臣将比洁，朝野共相欢。  
月影林梢下，冰光水际残。翻飞时共乐，饮啄道皆安。  
迴翥宜高咏，群栖入静看。由来鸳鹭侣，济济列千官。

卷 589\_46 【寄辛明府】

李频

何处无苛政，东南有子男。细将朝客说，须是邑人谙。  
别业空经稔，归田独未甘。目凝烟积树，心贮月明潭。  
晓鼓愁方乱，春山睡正酣。不任啼鸟思，乡社欲桑蚕。

卷 589\_47 【苑中题友人林亭】

李频

井邑藏岩穴，幽栖趣若何。春篁抽笋密，夏鸟杂雏多。  
坐有清风至，林无暑气过。乱书还就叶，真饮不听歌。  
片影明红蕖，斜阴映绿萝。雄文终可惜，莫更弃高科。

卷 589\_48 【投京兆府试官任文学先辈】

李频

高兴每论诗，非才独见推。应当明试日，不比暗投时。  
出口人皆信，操心自可知。孤单虽有托，际会别无期。  
取舍知由己，穷通断在兹。贱身何足数，公道自难欺。  
泽国违甘旨，渔舟积梦思。长安未归去，为倚鉴妍媸。

卷 589\_49 【宋少府东溪泛舟】

李频

登岸还入舟，水禽惊笑语。晚叶低众色，湿云带繁暑。  
落日乘醉归，溪流复几许。



卷 589\_50 【闻北虏入灵州二首】

李频

河冰一夜合，虏骑入灵州。岁岁征兵去，难防塞草秋。

见说灵州战，沙中血未干。将军日告急，走马向长安。

卷 589\_51 【送友人下第归感怀】

李频

帝里春无意，归山对物华。即应来日去，九陌踏槐花。

卷 589\_52 【赠桂林友人】

李频

君家桂林住，日伐桂枝炊。何事东堂树，年年待一枝。

卷 589\_53 【长安感怀】

李频

一第知何日，全家待此身。空将灞陵酒，酌送向东人。

卷 589\_54 【题长孙桐树】

李频

一去龙门侧，千年凤影移。空余剪圭处，无复在孙枝。

卷 589\_55 【渡汉江】

李频

岭外音书绝，经年复历春。近乡情更怯，不敢问来人。

卷 589\_56 【嵩山夜还】

李频

家住东皋去，好采旧山薇。自省游泉石，何曾不夜归。

卷 589\_57 【暮秋宿清源上人院】

李频

野客愁来日，山房木落中。微风生夜半，积雨向秋终。  
证道方离法，安禅不住空。迷途将觉路，语默见西东。

卷 589\_58 【秋夜宿重本上人院】

李频

却忆凉堂坐，明河几度流。安禅逢小暑，抱疾入高秋。  
水国曾重讲，云林半旧游。此来看月落，还似道相求。

卷 589\_59 【赠立规上人】

李频

竹向空斋合，无僧在四邻。去云离坐石，斜月到禅身。  
树老风终夜，山寒雪见春。不知诸祖后，传印是何人。

卷 589\_60 【苏州寒食日送人归覲】

李频

江城寒食下，花木惨离魂。几宿投山寺，孤帆过海门。  
□声泼火雨，柳色禁烟村。定看堂高后，斑衣灭泪痕。

卷 589\_61 【即席送许□之曹南省兄】

李频

梅烂荷圆六月天，归帆高背虎丘烟。到时自见成行雁，  
别处休听满树蝉。卖剑为赍吴市酒，携家犹借洞庭船。  
待看春榜来江外，名占蓬莱第几仙。

卷 589\_62 【送罗著作两浙按狱（著作尝宰苏州吴县）】

李频

使印星车适旧游，陶潜今日在瀛洲。科条尽晓三千罪，  
圉圉应空十二州。旧绶有香笼驿马，皇华无暇狎沙鸥。  
归来重过姑苏郡，莫忘题名在虎丘。

卷 589\_63 【下第后屏居书怀寄张侍御】

李频

别足岂一生，良工隔千里。故山彭泽上，归梦向汾水。  
低催神气尽，僮仆心亦耻。未达谁不知，达者多忘此。  
行年忽已壮，去老年更几。功名如不彰，身歿岂为鬼。  
才看芳草歇，即叹凉风起。骢马未来朝，嘶声尚在耳。

卷 589\_64 【答韩中丞容不饮酒】

李频

老大成名仍足病，强听丝竹亦无欢。  
高情太守容闲坐，借与青山尽日看。

卷 589\_65 【句】

李频

只将五字句，用破一生心。

楚里八千里，槃槃此都会。巍峨数里城，远水相映带。

## 第五百九十卷

### 卷 590\_1 【冬至后西湖泛舟看断冰偶成长句】

李郢

一阳生后阴飙竭，湖上层冰看折时。云母扇摇当殿色，  
珊瑚树碎满盘枝。斜汀藻动鱼应觉，极浦波生雁未知。  
山影浅中留瓦砾，日光寒外送涟漪。崖崩苇岸纵横散，  
篙蹙兰舟片段随。曾向黄河望冲激，大鹏飞起雪风吹。

### 卷 590\_2 【阳羨春歌】

李郢

石亭梅花落如积，玉蘚斓班竹姑赤。祝陵有酒清若空，  
煮糯蒸鱼作寒食。长桥新晴好天气，两市儿郎棹船戏。  
溪头铙鼓狂杀侬，青盖红裙偶相值。风光何处最可怜，  
邵家高楼白日边。楼下游人颜色喜，溪南黄帽应羞死。  
三月未有二月残，灵龟可信淹水干。葑草青青促归去，  
短箫横笛说明年。

卷 590\_3 【茶山贡焙歌】

李郢

使君爱客情无已，客在金台价无比。春风三月贡茶时，  
尽逐红旗到山里。焙中清晓朱门开，筐箱渐见新芽来。  
陵烟触露不停探，官家赤印连帖催。朝饥暮匍谁兴哀，  
喧阗竞纳不盈掬。一时一饷还成堆，蒸之馥之香胜梅。  
研膏架动轰如雷，茶成拜表贡天子。万人争啖春山摧，  
驿骑鞭声聒流电。半夜驱夫谁复见，十日王程路四千。  
到时须及清明宴，吾君可谓纳谏君。谏官不谏何由闻，  
九重城里虽玉食。天涯吏役长纷纷，使君忧民惨容色。  
就焙尝茶坐诸客，几回到口重咨嗟。嫩绿鲜芳出何力，  
山中有酒亦有歌。乐营房户皆仙家，仙家十队酒百斛。  
金丝宴饌随经过，使君是日忧思多。客亦无言征绮罗，  
殷勤绕焙复长叹。官府例成期如何！吴民吴民莫憔悴，  
使君作相期苏尔。

卷 590\_4 【夏日登信州北楼】

李郢

高楼上长望，百里见灵山。雨歇河珠定，云开谷鸟还。  
田苗映林合，牛犢傍村闲。始得消忧处，蝉声催入关。

卷 590\_5 【游天柱观】

李郢

听钟到灵观，仙子喜相寻。茅洞几千载，水声寒至今。  
读碑丹井上，坐石涧亭阴。清兴未云尽，烟霞生夕林。

卷 590\_6 【酬刘谷除夜见寄】

李郢

坐恐三更至，流年此夜分。客心无限事，愁雨不堪闻。  
灞上家殊远，炉前酒暂醺。刘郎亦多恨，诗忆故山云。

卷 590\_7 【元日作】

李郢

锵锵华驷客，门馆贺新正。野雪江山霁，微风竹树清。  
芜庭春意晓，残枿烬烟生。忽忆王孙草，前年在帝京。



卷 590\_8 【酬刘谷立春日吏隐亭见寄】

李郢

孤亭遥带寺，静者独登临。楚霁江流慢，春归泽气阴。  
野田青牧马，幽竹暖鸣禽。日日年光尽，何堪故国心。

卷 590\_9 【宿怜（一作潞）上人房】

李郢

重公旧相识，一夕话劳生。药裹关身病，经函寄道情。  
岳寒当寺色，滩夜入楼声。不待移文诮，三年别赤城。

卷 590\_10 【园居】

李郢

暮雨扬雄宅，秋风向秀园。不闻砧杵动，时看桔槔翻。  
钓下鱼初食，船移鸭暂喧。橘寒才弄色，须带早霜繁。

卷 590\_11 【中元夜】

李郢

江南水寺中元夜，金粟栏边见月娥。红烛影回仙态近，  
翠鬟光动看人多。香飘彩殿凝兰麝，露绕轻衣杂绮罗。  
湘水夜空巫峡远，不知归路欲如何。

卷 590\_12 【赠羽林将军（一作江上逢王将军）】

李郢

虬须憔悴羽林郎，曾入甘泉侍武皇。雕没夜云知御苑，  
马随仙仗识天香。五湖归去孤舟月，六国平来两鬓霜。  
唯有桓伊江上笛，卧吹三弄送残阳。

卷 590\_13 【送人之岭南】

李郢

关山迢递古交州，岁晏怜君走马游。谢氏海边逢素女，  
越王潭上见青牛。嵩台月照啼猿曙，石室烟含古桂秋。  
回望长安五千里，刺桐花下莫淹留。

卷 590\_14 【晚泊松江驿】

李郢

片帆孤客晚夷犹，红蓼花前水驿秋。岁月方惊离别尽，  
烟波仍驻古今愁。云阴故国山川暮，潮落空江网罟收。  
还有吴娃旧歌曲，棹声遥散采菱舟。

卷 590\_15 【江亭春霁】

李郢

江蓼漠漠荇田田，江上云亭霁景鲜。蜀客帆樯背归燕，  
楚山花木怨啼鹃。春风掩映千门柳，晓色凄凉万井烟。  
金磬泠泠水南寺，上方僧室翠微连。

卷 590\_16 【早秋书怀】

李郢

高梧一叶坠凉天，宋玉悲秋泪洒然。霜拂楚山频见菊，  
雨零溪树忽无蝉。虚村暮角催残日，近寺归僧寄野泉。  
青鬓已缘多病镊，可堪风景促流年。

卷 590\_17 【为妻作生日寄意】

李郢

谢家生日好风烟，柳暖花春二月天。金凤对翘双翡翠，  
蜀琴初上七丝弦。鸳鸯交颈期千岁，琴瑟谐和愿百年。  
应恨客程归未得，绿窗红泪冷涓涓。

卷 590\_18 【重阳日寄浙东诸从事】

李郢

野人多病门长掩，荒圃重阳菊自开。愁里又闻清笛怨，  
望中难见白衣来。元瑜正及从军乐，甯戚谁怜叩角哀。  
红旆纷纷碧江暮，知君醉下望乡台。

卷 590\_19 【和湖州杜员外冬至日白蘋洲见忆】

李郢

白蘋亭上一阳生，谢朓新裁锦绣成。千嶂雪消溪影绿，  
几家梅绽海波清。已知鸥鸟长来狎，可许汀洲独有名。  
多愧龙门重招引，即抛田舍棹舟行。

卷 590\_20 【上裴晋公】

李郢

四朝忧国鬓如丝，龙马精神海鹤姿。天上玉书传诏夜，  
阵前金甲受降时。曾经庾亮三秋月，下尽羊昙两路棋。  
惆怅旧堂扃绿野，夕阳无限鸟飞迟。

卷 590\_21 【钱塘青山题李隐居西斋】

李郢

小隐西斋为客开，翠萝深处遍青苔。林间扫石安棋局，  
岩下分泉递酒杯。兰叶露光秋月上，芦花风起夜潮来。  
湖山绕屋犹嫌浅，欲棹渔舟近钓台。

卷 590\_22 【友人适越路过桐庐寄题江驿】

李郢

桐庐县前洲渚平，桐庐江上晚潮生。莫言独有山川秀，  
过日仍闻官长清。麦陇虚凉当水店，鲈鱼鲜美称莼羹。  
王孙客棹残春去，相送河桥羨此行。

卷 590\_23 【送刘谷】

李郢

村桥西路雪初晴，云暖沙干马足轻。寒涧渡头芳草色，  
新梅岭外鹧鸪声。邮亭已送轻车发，山馆谁将候火迎。  
落日千峰转迢递，知君回首望高城。

卷 590\_24 【七夕（一作赵璜诗）】

李郢

乌鹊桥头双扇开，年年一度过河来，莫嫌天上稀相见，  
犹胜人间去不回。欲减烟花饶俗世，暂烦烟月掩妆台。  
别时旧路长清浅，岂肯离情似死灰。

卷 590\_25 【秦处士移家富春发樟亭怀寄】

李郢

潮落空江洲渚生，知君已上富春亭。尝闻郭邑山多秀，  
更说官僚眼尽青。离别几宵魂耿耿，相思一座发星星。  
仙翁白石高歌调，无复松斋半夜听。

卷 590\_26 【故洛阳城】

李郢

胡兵一动朔方尘，不使銮輿此重巡。清洛但流呜咽水，  
上阳深锁寂寥春。云收少室初晴雨，柳拂中桥晚渡津。  
欲问升平无故老，凤楼回首落花频。

卷 590\_27 【紫极宫上元斋次呈诸道流】

李郢

碧简朝天章奏频，清宫仿佛降灵真。五龙金角向星斗，  
三洞玉音愁鬼神。风拂乱灯山磬□，露沾仙杏石坛春。  
明朝醺罢羽客散，尘土满城空世人。

卷 590\_28 【立春一日江村偶兴】

李郢

旧历年光看卷尽，立春何用更相催。江边野店寒无色，  
竹外孤村坐见梅。山雪乍晴岚翠起，渔家向晚笛声哀。  
南州近有秦中使，闻道胡兵索战来。

卷 590\_29 【立秋后自京归家】

李郢

篱落秋归见豆花，竹门当水岸横槎。松斋一雨宜清簟，  
佛室孤灯对绛纱。尽日抱愁跼似鼠，移时不动懒于蛇。  
西江近有鲈鱼否，张翰扁舟始到家。

卷 590\_30 【奉陪裴相公重阳日游安乐池亭】

李郢

绛霄轻霭翊三台，稽阮襟怀管乐才。莲沼昔为王俭府，  
菊篱今作孟嘉杯。宁知北阙元勋在，却引东山旧客来。  
自笑吐茵还酩酊，日斜空从绛衣回。

卷 590\_31 【淞河馆（一作暮春山行田家歌马）】

李郢

雨湿菰蒲斜日明，茅厨煮茧掉车声。青蛇上竹一种色，  
黄蝶隔溪无限情。何处樵渔将远饷，故园田土忆春耕。  
千峰万濑水湔湔，羸马此中愁独行。



卷 590\_32 【春日题山家】

李郢

偶与樵人熟，春残日日来。依冈寻紫蕨，挽树得青梅。  
燕静衔泥起，蜂喧抱蕊回。嫩茶重搅绿，新酒略炊醅。  
漠漠蚕生纸，涓涓水弄苔。丁香政堪结，留步小庭隈。

卷 590\_33 【江亭晚望】

李郢

碧天凉冷雁来疏，闲望江云思有余。秋馆池亭荷叶后，  
野人篱落豆花初。无愁自得仙人术，多病能忘太史书。  
闻说故园香稻熟，片帆归去就鲈鱼。

卷 590\_34 【长安夜访澈上人】

李郢

关西木落夜霜凝，乌帽闲寻紫阁僧。松迥月光先照鹤，  
寺寒沟水忽生冰。琤琤晓漏喧秦禁，漠漠秋烟起汉陵。  
闻说天台旧禅处，石房独有一龛灯。

卷 590\_35 【送圆鉴上人游天台】

李郢

西岭草堂留不住，独携瓶锡向天台。霜清海寺闻潮至，  
日宴江船乞食回。华顶夜寒孤月落，石桥秋尽一僧来。  
灵溪道者相逢处，阴洞泠泠竹室开。

卷 590\_36 【送僧之台州】

李郢

独寻台岭闲游去，岂觉灵溪道里赊。三井应潮通海浪，  
五峰攒寺落天花。寒潭盥漱铜瓶洁，野店安禅锡杖斜。  
到日初寻石桥路，莫教云雨湿袈裟。

卷 590\_37 【伤贾岛无可】

李郢

却到京师事事伤，惠休归寂贾生亡。何人收得文章篋，  
独我来经苔藓房。一命未沾为逐客，万缘初尽别空王。  
萧萧竹坞斜阳在，叶覆闲阶雪拥墙。

卷 590\_38 【孔雀】

李郢

越鸟青春好颜色，晴轩入户看沾衣。一身金翠画不得，  
万里山川来者稀。丝竹惯听时独舞，楼台初上欲孤飞。  
刺桐花谢芳草歇，南国同巢应望归。

卷 590\_39 【秋晚寄题陆勋校书义兴禅居时淮南从事】

李郢

禅居秋草晚，萧索异前时。莲幕青云贵，翱翔绝后期。  
藓房怪架掩，山砌石盆欹。剑戟晨趋静，笙歌夜散迟。  
谷寒霜犹静，林晚磬虫悲。惠远烟霞在，方平杖履随。  
骨清须贵达，神重有威仪。万卒千蹄马，横鞭从信骑。

卷 590\_40 【酬王舍人雪中见寄】

李郢

三日柴门拥不开，阶庭平满白皑皑。  
今朝踏作琼瑶迹，为有诗从凤沼来。

卷 590\_41 【蝉】

李郢

饮蝉惊雨落高槐，山蚁移将入石阶。  
若使秦楼美人见，还应一为拔金钗。

卷 590\_42 【自水口入茶山】

李郢

萋萋红裙好女儿，相偎相倚看人时。  
使君马上应含笑，横把金鞭为咏诗。

卷 590\_43 【重游天台】

李郢

南国天台山水奇，石桥危险古来知。  
龙潭直下一百丈，谁见生公独坐时。

卷 590\_44 【山行】

李郢

小田微雨稻苗香，田畔清溪潏潏凉。  
自忆东吴榜舟日，蓼花沟水半篙强。

卷 590\_45 【上元日寄湖杭二从事】

李郢

恋别山灯忆水灯，山光水焰百千层。  
谢公留赏山公唤，知入笙歌阿那朋。

卷 590\_46 【寒食野望（一作远望）】

李郢

旧坟新陇哭多时，流世都堪几度悲。  
乌鸟乱啼人未远，野风吹散白棠梨。

卷 590\_47 【清明日题一公禅室】

李郢

山头兰若石楠春，山下清明烟火新。  
此日何穷礼禅客，归心谁是恋禅人。

卷 590\_48 【七夕寄张氏兄弟】

李郢

新秋牛女会佳期，红粉筵开玉馔时。  
好与檀郎寄花朵，莫教清晓羨蛛丝。

卷 590\_49 【春晚与诸同舍出城迎座主侍郎】

李郢

三十骅骝一哄尘，来时不锁杏园春。  
东风柳絮轻如雪，应有偷游曲水人。

卷 590\_50 【张郎中宅戏赠二首】

李郢

薄雪燕蓂紫燕钗，钗垂麝蕊抱香怀。  
一声歌罢刘郎醉，脱取明金压绣鞋。

谢家青妓邃重关，谁省春风见玉颜。  
闻道彩鸾三十六，一双双对碧池莲。

卷 590\_51 【醉送（一作吟）】

李郢

江梅冷艳酒清光，急拍繁弦醉画堂。  
无限柳条多少雪，一将春恨付刘郎。

卷 590\_52 【晓井】

李郢

桐阴覆井月斜明，百尺寒泉古甃清。  
越女携瓶下金索，晓天初放辘轳声。

卷 590\_53 【南池】

李郢

小男供饵妇搓丝，溢榼香醪倒接<sub>罍</sub>。  
日出两竿鱼正食，一家欢笑在南池。

卷 590\_54 【偶作】

李郢

一杯正发吟哦兴，两盏还生去住愁。  
何似全家上船去，酒旗多处即淹留。

卷 590\_55 【画鼓】

李郢

尝闻画鼓动欢情，及送离人恨鼓声。  
两杖一挥行缆解，暮天空使别魂惊。



卷 590\_56 【燕蓟花】

李郢

十二街中何限草，燕蓟尽欲占残春。  
黄花扑地无穷极，愁杀江南去住人。

卷 590\_57 【邵博士溪亭】

李郢

野茶无限春风叶，溪水千重返照波。  
只去长桥三十里，谁人一解枉帆过。

卷 590\_58 【小石上见亡友题处】

李郢

笋石清琤入紫烟，陆云题处是前年。  
苔侵雨打依稀在，惆怅凉风树树蝉。

卷 590\_59 【洞灵观流泉】

李郢

石上苔芜水上烟，潺湲声在观门前。  
千岩万壑分流去，更引飞花入洞天。

卷 590\_60 【送李判官】

李郢

津市停桡送别难，荧荧蜡炬照更阑。  
东风万叠吹江月，谁伴袁褒宿夜滩。

卷 590\_61 【宿杭州虚白堂】

李郢

秋月斜明虚白堂，寒蛩唧唧树苍苍。  
江风彻晓不得睡，二十五声秋点长。

## 第五百九十一卷

### 卷 591\_1 【道林寺】

崔珣

临湘之滨麓之隅，西有松寺东岸无。松风千里摆不断，  
竹泉泻入于僧厨。宏梁大栋何足贵，山寺难有山泉俱。  
四时唯夏不敢入，烛龙安敢停斯须？远公池上种何物，  
碧罗扇底红鳞鱼。香阁朝鸣大法鼓，天宫夜转三乘书。  
野花市井栽不著，山鸡饮啄声相呼。金槛僧回步步影，  
石盆水溅联联珠。北临高处日正午，举手欲摸黄金乌。  
遥江大船小于叶，远村杂树齐如蔬。潭州城郭在何处，  
东边一片青模糊。今来古往人满地，劳生未了归丘墟。  
长卿之门久寂寞，五言七字夸规模。我吟杜诗清入骨，  
灌顶何必须醍醐。白日不照耒阳县，皇天厄死饥寒躯。  
明珠大贝采欲尽，蚌蛤空满赤沙湖。今我题诗亦无味，  
怀贤览古成长吁。不如兴罢过江去，已有好月明归途。

### 卷 591\_2 【美人尝茶行】

崔珣

云鬟枕落困春泥，玉郎为碾瑟瑟尘。闲教鹦鹉啄窗响，

和娇扶起浓睡人。银瓶贮泉水一掬，松雨声来乳花熟。  
朱唇啜破绿云时，咽入香喉爽红玉。明眸渐开横秋水，  
手拨丝簧醉心起。台时却坐推金筝，不语思量梦中事。

卷 591\_3 【门前柳】

崔珣

门前蜀柳□知春，风淡暖烟愁杀人。将谓只栽郡楼下，  
不知迢迢连南津。南津柳色连南市，南市戎州三百里。  
夷陋蛮落相连接，故乡莫道心先死。我今帝里尚有家，  
门前嫩柳插仙霞。晨沾太一坛边雨，暮宿凤凰城里鸦。  
别来三载当谁道，门前年年绿阴好。春来定解飞雪花，  
雨后还应庇烟草。忆昔当年栽柳时，新芽茁茁嫌生迟。  
如今宛转稊著地，常向绿阴劳梦思。不道彼树好，  
不道此树恶。试将此意问野人，野人尽道生处乐。  
为报门前杨柳栽，我应来岁当归来。纵令树下能攀折，  
白发如丝心似灰。

卷 591\_4 【岳阳楼晚望】

崔珣

乾坤千里水云间，钓艇如萍去复还。楼上北风斜卷席，  
湖中西日倒衔山。怀沙有恨骚人往，鼓瑟无声帝子闲。

何事黄昏尚凝睇，数行烟树接荆蛮。

卷 591\_5 【哭李商隐】

崔珏

成纪星郎字义山，适归高壤抱长叹。词林枝叶三春尽，  
学海波澜一夜干。风雨已吹灯烛灭，姓名长在齿牙寒。  
只应物外攀琪树，便著霓裳上绛坛。

虚负凌云万丈才，一生襟抱未曾开。鸟啼花落人何在，  
竹死桐枯凤不来。良马足因无主蹕，旧交心为绝弦哀。  
九泉莫叹三光隔，又送文星入夜台。

卷 591\_6 【和友人鸳鸯之什】

崔珏

翠鬣红衣舞夕晖，水禽情似此禽稀。暂分烟岛犹回首，  
只渡寒塘亦共飞。映雾乍迷珠殿瓦，逐梭齐上玉人机。  
采莲无限兰桡女，笑指中流羡尔归。

寂寂春塘烟晚时，两心和影共依依。溪头日暖眠沙稳，  
渡口风寒浴浪稀。翡翠莫夸饶彩饰，鸂鶒须美好毛衣。  
兰深芷密无人见，相逐相呼何处归。

舞鹤翔鸾俱别离，可怜生死两相随。红丝毳落眠汀处，  
白雪花成蹙浪时。琴上只闻交颈语，窗前空展共飞诗。  
何如相见长相对，肯羡人间多所思。

卷 591\_7 【有赠】

崔珣

莫道妆成断客肠，粉胸绵手白莲香。烟分顶上三层绿，  
剑截眸中一寸光。舞胜柳枝腰更软，歌嫌珠贯曲犹长。  
虽然不似王孙女，解爱临邛卖赋郎。

锦里芬芳少佩兰，风流全占似君难。心迷晓梦窗犹暗，  
粉落香肌汗未干。两脸天桃从镜发，一眸春水照人寒。  
自嗟此地非吾土，不得如花岁岁看。

卷 591\_8 【和人听歌】

崔珣

气吐幽兰出洞房，乐人先问调宫商。声和细管珠才转，  
曲度沉烟雪更香。公子不随肠万结，离人须落泪千行。  
巫山唱罢行云过，犹自微尘舞画梁。

红脸初分翠黛愁，锦筵歌板拍清秋。一楼春雪和尘落，

午夜寒泉带雨流。座上美人心尽死，尊前旅客泪难收。  
莫辞更送刘郎酒，百斛明珠异日酬。

卷 591\_9 【水晶枕】

崔珣

千年积雪万年冰，掌上初擎力不胜。南国旧知何处得，  
北方寒气此中凝。黄昏转烛萤飞沼，白日褰帘水在簷。  
蕲簟蜀琴相对好，裁诗乞与涤烦襟。

卷 591\_10 【席间咏琴客】

崔珣

七条弦上五音寒，此艺知音自古难。  
唯有河南房次律，始终怜得董庭兰。

卷 591\_11 【句】

崔珣

楚王宫地罗含宅，赖许时时听法来。

## 第五百九十二卷

### 卷 592\_1 【徒相逢】

曹邴

江边野花不须采，梁头野燕不用亲。  
西施本是越溪女，承恩不荐越溪人。

### 卷 592\_2 【杂诫】

曹邴

带香入鲍肆，香气同鲍鱼。未入犹可悟，已入当何如。

### 卷 592\_3 【捕渔谣】

曹邴

天子好征战，百姓不种桑。天子好年少，无人荐冯唐。  
天子好美女，夫妇不成双。



卷 592\_4 【四怨三愁五情诗十二首 · 一怨】

曹邴

美人如新花，许嫁还独守。岂无青铜镜，终日自疑丑。

卷 592\_5 【四怨三愁五情诗十二首 · 二怨】

曹邴

庭花已结子，岩花犹弄色。谁令生处远，用尽春风力。

卷 592\_6 【四怨三愁五情诗十二首 · 三怨】

曹邴

短鬟一如螭，长眉一如蛾。相共棹莲舟，得花不如他。

卷 592\_7 【四怨三愁五情诗十二首 · 四怨】

曹邴

手推呕哑车，朝朝暮暮耕。未曾分得谷，空得老农名。

卷 592\_8 【四怨三愁五情诗十二首 · 一愁】

曹邴

远梦如水急，白发如草新。归期待春至，春至还送人。

卷 592\_9 【四怨三愁五情诗十二首 · 二愁】

曹邴

涧草短短青，山月朗朗明。此夜目不掩，屋头乌啼声。

卷 592\_10 【四怨三愁五情诗十二首 · 三愁】

曹邴

别家鬓未生，到城鬓似发。朝朝临川望，灞水不入越。

卷 592\_11 【四怨三愁五情诗十二首 · 一情】

曹邴

东西是长江，南北是官道。牛羊不恋山，只恋山中草。

卷 592\_12 【四怨三愁五情诗十二首 · 二情】

曹邴

阿娇生汉宫，西施住南国。专房莫相妒，各自有颜色。

卷 592\_13 【四怨三愁五情诗十二首 · 三情】

曹邴

蛱蝶空中飞，夭桃庭中春。见他夫妇好，有女初嫁人。

卷 592\_14 【四怨三愁五情诗十二首 · 四情】

曹邴

槟榔自无柯，椰叶自无阴。常羡庭边竹，生笋高于林。

卷 592\_15 【四怨三愁五情诗十二首 · 五情】

曹邴

野雀空城饥，交交复飞飞。勿怪官仓粟，官仓无空时。

卷 592\_16 【寄刘驾】

曹邴

一川草色青袅袅，绕屋水声如在家。  
怅望美人不携手，墙东又发数枝花。

卷 592\_17 【风人体】

曹邴

出门行一步，形影便相失。何况大堤上，骢马如箭疾。  
夜夜如织妇，寻思待成匹。郎只不在家，在家亦如出。  
将金与卜人，谯道远行吉。念郎缘底事，不具天与日。

卷 592\_18 【杏园即席上同年】

曹邴

岐路不在天，十年行不至。一旦公道开，青云在平地。  
枕上数声鼓，衡门已如市。白日探得珠，不待骊龙睡。  
匆匆出九衢，僮仆颜色异。故衣未及换，尚有去年泪。  
晴阳照花影，落絮浮野翠。对酒时忽惊，犹疑梦中事。  
自怜孤飞鸟，得接鸾凤翅。永怀共济心，莫起胡越意。

卷 592\_19 【恃宠】

曹邴

二月树色好，昭仪正骄奢。恐君爱阳艳，斫却园中花。  
三十六宫女，髻鬟各如鸦。君王心所怜，独自不见瑕。  
台上红灯尽，未肯下金车。一笑不得所，尘中悉无家。  
飞燕身更轻，何必恃容华。

卷 592\_20 【题女郎庙】

曹邴

数点烟香出庙门，女娥飞去影中存。  
年年岭上春无主，露泣花愁断客魂。

卷 592\_21 【四望楼】

曹邴

背山见楼影，应合与山齐。座上日已出，城中未鸣鸡。  
无限燕赵女，吹笙上金梯。风起洛阳东，香过洛阳西。  
公子长夜醉，不闻子规啼。

卷 592\_22 【筑城三首】

曹邴

郎有薜萝心，妾有芙蓉质。不辞嫁与郎，筑城无休日。

呜呜啄人鸦，轧轧上城车。力尽土不尽，得归亦无家。

筑人非筑城，围秦岂围我。不知城上土，化作宫中火。

卷 592\_23 【奉命齐州推事毕寄本府尚书】

曹邴

越鸟栖不定，孤飞入齐乡。日暮天欲雨，那兼羽翎伤。  
州民言刺史，蠹物甚于蝗。受命大执法，草草是行装。  
仆隶皆分散，单车驿路长。四顾无相识，奔驰若投荒。  
重门下长锁，树影空过墙。驱囚绕廊屋，觳觫如牛羊。  
狱吏相对语，簿书堆满床。敲枷打锁声，终日在目旁。  
既舍三山侣，来余五斗粮。忍学空城雀，潜身入官仓。  
国中天子令，头上白日光。曲木用处多，不如直为梁。  
恐孤食恩地，昼夜心不遑。仲夏天气热，鬓须忽成霜。  
社鼠不可灌，城狐不易防。偶于擒纵间，尽得见否臧。  
截断奸吏舌，擘开冤人肠。明朝向西望，走马归汶阳。

卷 592\_24 【北郭闲思】

曹邴

山前山后是青草，尽日出门还掩门。  
每思骨肉在天畔，来看野翁怜子孙。

卷 592\_25 【战城南】

曹邴

千金画阵图，自为弓箭苦。杀尽田野人，将军犹爱武。  
性命换他恩，功成谁作主。凤凰楼上人，夜夜长歌舞。

卷 592\_26 【自退】

曹邴

寒女面如花，空寂常对影。况我不嫁容，甘为瓶堕井。

卷 592\_27 【早起】

曹邺

月堕沧浪西，门开树无影。此时归梦阑，立在梧桐井。

卷 592\_28 【古相送】

曹邺

行人卜去期，白发根已出。执君青松枝，空数别来日。  
心如七夕女，生死难再匹。且愿车声迫，莫使马行疾。  
巫山千丈高，亦恐梦相失。

卷 592\_29 【甲第】

曹邺

游人未入门，花影出门前。将军来此住，十里无荒田。



卷 592\_30 【望不来】

曹邴

见花忆郎面，常愿花色新。为郎容貌好，难有相似人。

卷 592\_31 【官仓鼠】

曹邴

官仓老鼠大如斗，见人开仓亦不走。  
健儿无粮百姓饥，谁遣朝朝入君口。

卷 592\_32 【题濮庙】

曹邴

晓祭瑶斋夜扣钟，鳌头风起浪重重。人间直有仙桃种，  
海上应无肉马踪。赤水梦沈迷象罔，翠华恩断泣芙蓉。  
不知皇帝三宫驻，始向人间著袞龙。

卷 592\_33 【偶题】

曹邴

白玉先生多在市，青牛道士不居山。  
但能共得丹田语，正是忙时身亦闲。

卷 592\_34 【登岳阳楼有怀寄座主相公】

曹邴

南登岳阳楼，北眺长安道。不见升平里，千山树如草。  
骨肉在南楚，沈忧起常早。白社愁成空，秋芜待谁扫。  
常闻诗人语，西子不宜老。赖识丹元君，时来语蓬岛。

卷 592\_35 【出关】

曹邴

山上黄犊走避人，山下女郎歌满野。  
我独南征恨此身，更有无成出关者。

卷 592\_36 【将赴天平职书怀寄翰林从兄】

曹邴

居处绝人事，门前雀罗施。谁遣辟书至，仆隶皆展眉。  
匹马渡河洛，西风飘路岐。手执王粲笔，闲吟向旌旗。  
香晚翠莲动，吟余红烛移。开口啖酒肉，将何报相知。  
况我魏公子，相顾不相疑。岂学官仓鼠，饱食无所为。  
白露沾碧草，芙蓉落清池。自小不到处，全家忽如归。  
吾宗处清切，立在白玉墀。方得一侍座，单车又星飞。  
愿将门底水，永托万顷陂。

卷 592\_37 【贺雪寄本府尚书】

曹邴

雨雪不顺时，阴阳失明晦。麦根半成土，农夫泣相对。  
我公诚诉天，天地忽已泰。长飙卷白云，散落群峰外。  
拂砌花影明，交宫鹤翎碎。宿鸟晨不飞，犹疑月光在。  
碧树香尽发，蠹虫声渐退。有客怀兔园，吟诗绕城内。

卷 592\_38 【寄嵩阳道人】

曹邴

三山浮海倚蓬瀛，路入真元险尽平。华表千年孤鹤语，

人间一梦晚蝉鸣。将龙逐虎神初王，积火焚心气渐清。  
见说嵩阳有仙客，欲持金简问长生。

卷 592\_39 【去不返】

曹邴

寒女不自知，嫁为公子妻。亲情未识面，明日便东西。  
但得上马了，一去头不回。双轮如鸟飞，影尽东南街。  
九重十二门，一门四扇开。君从此路去，妾向此路啼。  
但得见君面，不辞插荆钗。

卷 592\_40 【送进士下第归南海】

曹邴

数片红霞映夕阳，揽君衣袂更移觞。行人莫叹碧云晚，  
上国每年春草芳。雪过蓝关寒气薄，雁回湘浦怨声长。  
应无惆怅沧波远，十二玉楼非我乡。

卷 592\_41 【送厉图南下第归澧州】

曹邴

当春人尽归，我独无归计。送君自多感，不是缘下第。

君看山上草，尽有干云势。结根既不然，何必更掩袂。  
澧水鲈鱼贱，荆门杨柳细。勿为阳艳留，此处有月桂。  
言毕尊未干，十二门欲闭。伫立望不见，登高更流涕。  
吟君别我诗，怅望水烟际。

卷 592\_42 【思不见】

曹邴

但见出门踪，不见入门迹。却笑山头女，无端化为石。

卷 592\_43 【贵宅】

曹邴

入门又到门，到门戟相对。玉箫声尚远，疑似人不在。  
公子厌花繁，买药栽庭内。望远不上楼，窗中见天外。  
此地日烹羊，无异我食菜。自是愁人眼，见之若奢泰。

卷 592\_44 【下第寄知己】

曹邴

长安孟春至，枯树花亦发。忧人此时心，冷若松上雪。  
自知才不堪，岂敢频泣血。所痛无罪者，明时屡遭别。

故山秋草多，一卷成古辙。夜来远心起，梦见潇湘月。  
大贤冠盖高，何事怜屑屑。不令伤弓鸟，日暮飞向越。  
闻知感激语，胸中如有物。举头望青天，白日头上没。  
归来通济里，开户山鼠出。中庭广寂寥，但见薇与蕨。  
无虑数尺躯，委作泉下骨。唯愁揽清镜，不见昨日发。  
愿怜闺中女，晚嫁唯守节。勿惜四座言，女巧难自说。

卷 592\_45 【吴宫宴】

曹邴

吴宫城阙高，龙凤遥相倚。四面铿鼓钟，中央列罗绮。  
春风时一来，兰麝闻数里。三度明月落，青娥醉不起。  
江头铁剑鸣，玉座成荒垒。适来歌舞处，未知身是鬼。

卷 592\_46 【长相思】

曹邴

翦妾身上巾，赠郎伤妾神。郎车不暂停，妾貌宁长春。  
春天无停雪，沧海无停津。遣妾空床梦，夜夜随车轮。

卷 592\_47 【长城下】

曹邴

远水犹归壑，征人合忆乡。泣多盈袖血，吟苦满头霜。  
楚国连天浪，衡门到海荒。何当生燕羽，时得近雕梁。

卷 592\_48 【成名后献恩门】

曹邴

为物稍有香，心遭蠹虫啮。平人登太行，万万车轮折。  
一辞桂岭猿，九泣东门月。年年孟春时，看花不如雪。  
僻居城南隅，颜子须泣血。沉埋若九泉，谁肯开口说。  
辛勤学机杼，坐对秋灯灭。织锦花不常，见之尽云拙。  
自怜孤生竹，出土便有节。每听浮竞言，喉中似无舌。  
忽然风雷至，惊起池中物。拔上青云巅，轻如一毫发。  
珑珑金锁甲，稍稍城乌绝。名字如鸟飞，数日便到越。  
幽兰生虽晚，幽香亦难歇。何以保此身，终身事无缺。

卷 592\_49 【赠道师】

曹邴

举世皆问人，唯师独求己。一马无四蹄，顷刻行千里。

应笑北原上，丘坟乱如蚁。

卷 592\_50 【入关】

曹邴

衡门亦无路，何况入西秦。灸病不得穴，徒为采艾人。

卷 592\_51 【听刘尊师弹琴】

曹邴

曾于青海独闻蝉，又向空庭夜听泉。  
不似斋堂人静处，秋声长在七条弦。

卷 592\_52 【题山居】

曹邴

扫叶煎茶摘叶书，心闲无梦夜窗虚。  
只应光武恩波晚，岂是严君恋钓鱼。



卷 592\_53 【关试前送进士姚潜下第归南阳】

曹邴

马嘶残日没残霞，二月东风便到家。  
莫羨长安占春者，明年始见故园花。

卷 592\_54 【浚川寄进士刘驾】

曹邴

我家不背水，君身不向越。自是相忆苦，忽如经年别。  
山家草木寒，石上有残雪。美人望不见，迢迢云中月。

卷 592\_55 【翠孤至渚宫寄座主相公】

曹邴

万里一孤舟，春行夏方到。骨肉尽单羸，沉忧满怀抱。  
羁孤相对泣，性命不相保。开户山鼠惊，虫声乱秋草。  
白菌缘屋生，黄蒿拥篱倒。对此起长嗟，芳年亦须老。  
恩门为宰相，出入用天道。忽于摧落间，收得青松操。  
全家到江陵，屋虚风浩浩。中肠自相伐，日夕如寇盗。  
其下有孤侄，其上有孀嫂。黄粮贱于土，一饭常不饱。

天斜日光薄，地湿虫叫噪。惟恐道忽消，形容益枯槁。  
古人于黄雀，岂望白环报。奉答恩地恩，何惭以诚告。

卷 592\_56 【早秋宿田舍】

曹邴

涧草疏疏萤火光，山月朗朗枫树长。  
南村犊子夜声急，应是栏边新有霜。

卷 592\_57 【旅次岳阳寄京中亲故】

曹邴

君山南面浪连天，一客愁心两处悬。身逐片帆归楚泽，  
魂随流水向秦川。月回浦北千寻雪，树出湖东几点烟。  
更欲登楼向西望，北风催上洞庭船。

卷 592\_58 【题舒乡（一本有驿字）】

曹邴

功名若及鸱夷子，必拟将舟泛洞庭。  
柳色湖光好相待，我心非醉亦非醒。

卷 592\_59 【碧寻宴上有怀知己】

曹邴

荻花芦叶满溪流，一簇笙歌在水楼。金管曲长人尽醉，  
玉簪恩重独生愁。女萝力弱难逢地，桐树心孤易感秋。  
莫怪当欢却惆怅，全家欲上五湖舟。

卷 592\_60 【从天平节度使游平流园】

曹邴

池塘静于寺，俗事不到眼。下马如在山，令人忽疏散。  
明公有高思，到此遂长返。乘兴挈一壶，折荷以为盏。  
入竹藤似蛇，侵墙水成藓。幽鸟不识人，时来拂冠冕。  
沿流路若穷，及行路犹远。洞中已云夕，洞口天未晚。  
自怜不羁者，写物心常简。翻愁此兴多，引得嵇康懒。

卷 592\_61 【故人寄茶】

曹邴

剑外九华英，缄题下玉京。开时微月上，碾处乱泉声。  
半夜招僧至，孤吟对月烹。碧沈霞脚碎，香泛乳花轻。

· 全唐诗 ·

---

六腑睡神去，数朝诗思清。月余不敢费，留伴肘书行。

## 第五百九十三卷

### 卷 593\_1 【东武吟】

曹邴

心如山上虎，身若仓中鼠。惆怅倚市门，无人与之语。  
夜宴李将军，欲望心相许。何曾听我言，贪谗邯郸女。  
独上黄金台，凄凉泪如雨。

### 卷 593\_2 【蓟北门行】

曹邴

长河冻如石，征人夜中戍。但恐筋力尽，敢惮将军遇。  
古来死未歇，白骨碍官路。岂无一有功，可以高其墓。  
亲戚牵衣泣，悲号自相顾。死者虽无言，那堪生者悟。  
不如无手足，得见齿发暮。乃知七尺躯，却是速死具。

卷 593\_3 【金井怨】

曹邴

西风吹急景，美人照金井。不见面上花，却恨井中影。

卷 593\_4 【姑苏台】

曹邴

南宫酒未销，又宴姑苏台。美人和泪去，半夜阖门开。  
相对正歌舞，笑中闻鼓鼙。星散九重门，血流十二街。  
一去成万古，台尽人不回。时闻野田中，拾得黄金钗。

卷 593\_5 【夜坐有怀】

曹邴

悄悄月出树，东南若微霜。愁人不成寐，五月夜亦长。  
佳期杳天末，骨肉不在旁。年华且有恨，厥体难久康。  
人言力耕者，岁旱亦有粮。吾道固如此，安得苦低低。

卷 593\_6 【寄监察从兄】

曹邴

我祖居邴地，邴人识文星。此地星已落，兼无古时城。  
古风既无根，千载难重生。空留建安书，传说七子名。  
贱子生桂州，桂州山水清。自觉心貌古，兼合古人情。  
因为二雅诗，出语有性灵。持来向长安，时得长者惊。  
芝草不为瑞，还共木叶零。恨如辙中土，终岁填不平。  
吾宗戴豸冠，忽然入西京。怜其羽翼单，抚若亲弟兄。  
松根已坚牢，松叶岂不荣。言罢眼无泪，心中如酒醒。

卷 593\_7 【乐府体】

曹邴

莲子房房嫩，菖蒲叶叶齐。共结池中根，不厌池中泥。

卷 593\_8 【弃妇】

曹邴

嫁来未曾出，此去长别离。父母亦有家，羞言何以归。  
此日年且少，事姑常有仪。见多自成丑，不待颜色衰。

何人不识宠，所嗟无自非。将欲告此意，四邻已相疑。

卷 593\_9 【读李斯传】

曹邴

一车致三穀，本图行地速。不知驾驭难，举足成颠覆。  
欺暗尚不然，欺明当自戮。难将一人手，掩得天下目。  
不见三尺坟，云阳草空绿。

卷 593\_10 【文宗陵】

曹邴

千年尧舜心，心成身已殁。始随苍梧云，不返苍龙阙。  
宫女衣不香，黄金赐白发。留此奉天下，所以无征伐。  
至今汨罗水，不葬大夫骨。

卷 593\_11 【偶怀】

曹邴

开目不见路，常如夜中行。最贱不自勉，中涂与谁争。  
蓬为沙所危，还向沙上生。一年秋不熟，安得便废耕。



颜子命未达，亦遇时人轻。

卷 593\_12 【代罗敷诮使君】

曹邴

常言爱嵩山，别妾向东京。朝来见人说，却知在石城。  
未必菖蒲花，只向石城生。自是使君眼，见物皆有情。  
麋鹿同上山，莲藕同在泥。莫学天上日，朝东暮还西。

卷 593\_13 【怨歌行】

曹邴

丈夫好弓箭，行坐说金吾。喜闻有行役，结束不待车。  
官田赠倡妇，留妾侍舅姑。舅姑皆已死，庭花半是芜。  
中妹寻适人，生女亦嫁夫。何曾寄消息，他处却有书。  
严风厉中野，女子心易孤。贫贱又相负，封侯意何如。

卷 593\_14 【南征怨】

曹邴

万浪东不回，昭王南征早。龙舟没何处，独树江上老。

吾欲问水滨，宫殿已生草。

卷 593\_15 【和潘安仁金谷集】

曹邴

太守龙为马，将军金作车。香飘十里风，风下绿珠歌。  
莫怪坐上客，叹君庭前花。明朝此池馆，不是石崇家。

卷 593\_16 【不可见】

曹邴

常闻贫贱夫，头白终相待。自从嫁黔娄，终岁长不在。  
君梦有双影，妾梦空四邻。常思劲北风，吹折双车轮。

卷 593\_17 【秦后作】

曹邴

大道不居谦，八荒安苟得。木中不生火，高殿祸顷刻。  
谁将白帝子，践我礼义域。空持拔山志，欲夺天地德。  
轺道人不回，壮士断消息。父母骨成薪，虫蛇自相食。  
鼎乱阴阳疑，战尽鬼神力。东郊龙见血，九土玄黄色。

鼙鼓裂二景，妖星动中国。圆丘无日月，旷野失南北。  
徒流杀人血，神器终不忒。一马渡空江，始知贤者贼。

卷 593\_18 【薄命妾】

曹邴

薄命常恻恻，出门见南北。刘郎马蹄疾，何处去不得。  
泪珠不可收，虫丝不可织。知君绿桑下，更有新相识。

卷 593\_19 【放歌行】

曹邴

莫唱放歌行，此歌临楚水。人皆恶此声，唱者终不已。  
三闾有何罪，不向枕上死。

卷 593\_20 【江西送人】

曹邴

八月江上楼，西风令人愁。携酒楼上别，尽见四山秋。  
但愁今日知，莫作他时疑。郎本不住此，无人泣望归。  
何水不生波，何木不改柯。遥知明日恨，不如今日多。

将心速投人，路远人如何。

卷 593\_21 【始皇陵下作】

曹邴

千金买鱼灯，泉下照狐兔。行人上陵过，却吊扶苏墓。  
累累圯中物，多于养生具。若使山可移，应将秦国去。  
舜殁虽在前，今犹未封树。

卷 593\_22 【洛原西望】

曹邴

筑城畏不坚，城坚心自毁。秦树满平原，秦人不居此。  
犹为泣路者，无力报天子。

卷 593\_23 【赵城怀古】

曹邴

邯鄲旧公子，骑马又鸣珂。手挥白玉鞭，不避五侯车。  
闲愁春日短，沽酒入倡家。一笑千万金，醉中赠秦娥。  
如今高原上，树树白杨花。

卷 593\_24 【代班姬】

曹邴

宠极多妒容，乘车上金阶。欷然赵飞燕，不语到日西。  
手把菖蒲花，君王唤不来。常嫌鬓蝉重，乞人白玉钗。  
君心无定波，咫尺流不回。后宫门不掩，每夜黄鸟啼。  
买得千金赋，花颜已如灰。

卷 593\_25 【庭草】

曹邴

庭草根自浅，造化无遗功。低回一寸心，不敢怨春风。

卷 593\_26 【过白起墓】

曹邴

夷陵火焰灭，长平生气低。将军临老病，赐剑咸阳西。

卷 593\_27 【对酒】

曹邴

爱酒知是僻，难与性相舍。未必独醒人，便是不饮者。  
晚岁无此物，何由住田野。

卷 593\_28 【续幽愤（嵇康、吕安连罪赋此诗，邴纪李御史  
甘死封之事）】

曹邴

繁霜作阴起，朱火乘夕发。清昼冷无光，兰膏坐销歇。  
惟公执天宪，身是台中杰。一逐楚大夫，何人为君雪。  
匆匆鬼方路，不许辞双阙。过门似他乡，举趾如遗辙。  
八月黄草生，洪涛入云热。危魂没太行，客吊空骨节。  
千年瘴江水，恨声流不绝。

卷 593\_29 【古词】

曹邴

高阙碍飞鸟，人言是君家。经年不归去，爱妾面上花。  
妾面虽有花，妾心非女萝。郎妻自不重，于妾欲如何。

卷 593\_30 【和谢豫章从宋公戏马台送孔令谢病】

曹邴

碧树杳云暮，朔风自西来。佳人忆山水，置酒在高台。  
不必问流水，坐来日已西。劝君速归去，正及鹧鸪啼。

卷 593\_31 【送进士李殷下第游汾河】

曹邴

上国花照地，遣君向西征。旁人亦有恨，况复故人情。  
单车欲云去，别酒忽然醒。如何今夜梦，半作道路程。  
边士不好礼，全家住军城。城中鼓角严，旅客常夜惊。  
中有左记室，逢人眼光明。西门未归者，下马如到京。  
还应一开卷，为子心不平。殷勤说忠抱，壮志勿自轻。

卷 593\_32 【相思极（一作长相思）】

曹邴

妾颜与日空，君心与日新。三年得一书，犹在湘之滨。  
料君相轻意，知妾无至亲。况当受明礼，不令再嫁人。  
愿君从此日，化质为妾身。

卷 593\_33 【代谢玄晖新亭送范零陵】

曹邴

楚水洪无际，沧茫接天涯。相看不能语，独鸟下江蓠。  
蓬子悉有恋，蓬根却无期。车轮自不住，何必怨路岐。  
孟冬衣食薄，梦寐亦未遗。

卷 593\_34 【山中效陶】

曹邴

落第非有罪，兹山聊归止。山猿隔云住，共饮山中水。  
读书时有兴，坐石忘却起。西山忽然暮，往往遗巾履。  
经时一出门，兼候僮仆喜。常被山翁笑，求名岂如此。  
齿发老未衰，何如且求己。

卷 593\_35 【城南野居寄知己】

曹邴

奔走未到我，在城如在村。出门既无意，岂如常闭门。  
作诗二十载，阙下名不闻。无人为开口，君子独有言。  
身为苦寒士，一笑亦感恩。殷勤中途上，勿使车无轮。



卷 593\_36 【古莫买妾行】

曹邴

千扉不当路，未似开一门。若遣绿珠丑，石家应尚存。

卷 593\_37 【霁后作】

曹邴

新霁辨草木，晚塘明衣衿。乳燕不归宿，双双飞向林。  
微照露花影，轻云浮麦阴。无人可招隐，尽日登山吟。

卷 593\_38 【田家效陶】

曹邴

黑黍春来酿酒饮，青禾刈了驱牛载。  
大姑小叔常在眼，却笑长安在天外。

卷 593\_39 【寄贾驰先辈】

曹邴

游子想万里，何必登高台。闻君燕女吟，如自蓟北来。  
长安高盖多，健马东西街。尽说蒿簪古，将钱买金钗。  
我祖西园事，言之独伤怀。如今数君子，如鸟无树栖。  
济水一入河，便与清流乖。闻君欲自持，勿使吾道低。

卷 593\_40 【送友人入塞】

曹邴

乱蓬无根日，送子入青塞。苍茫万里秋，如见原野大。  
鸟雀寒不下，山川迥相对。一马没黄云，登高望犹在。  
惊风忽然起，白日黯已晦。如何恨路长，出门天涯外。

卷 593\_41 【寄阳朔友人】

曹邴

桂林须产千株桂，未解当天影日开。  
我到月中收得种，为君移向故园栽。

卷 593\_42 【题广福岩】

曹邴

未有天地先融结，方广高深无丈尺。  
书言不尽画难成，留与人间作奇特。

卷 593\_43 【送曾德迈归宁宜春】

曹邴

湘东山水有清辉，袁水词人得意归。几府争驰毛义檄，  
一乡看侍老莱衣。筵开灞岸临清浅，路去蓝关入翠微。  
想到宜阳更无事，并将欢庆奉庭闱。

卷 593\_44 【送郑谷归宜春】

曹邴

无成归故国，上马亦高歌。况是飞鸣后，殊为喜庆多。  
暑销嵩岳雨，凉吹洞庭波。莫便闲吟去，须期接盛科。

卷 593\_45 【老圃堂】

曹邴

邵平瓜地接吾庐，谷雨干时手自锄。  
昨日春风欺不在，就床吹落读残书。

## 第五百九十四卷

### 卷 594\_1 【登芜城】

储嗣宗

昔人登此地，丘垄已前悲。今日又非昔，春风能几时。

### 卷 594\_2 【沧浪峡（一作储光羲诗）】

储嗣宗

沧浪临古道，道上石成尘。自有沧浪峡，谁为无事人。

### 卷 594\_3 【垓城】

储嗣宗

百战未言非，孤军惊夜围。山河意气尽，泪湿美人衣。

卷 594\_4 【南陂远望】

储嗣宗

闲门横古塘，红树已惊霜。独立望秋草，野人耕夕阳。  
孤烟起蜗舍，飞鹭下渔梁。唯有田家事，依依似故乡。

卷 594\_5 【宿玉箫宫】

储嗣宗

尘飞不到空，露湿翠微宫。鹤影石桥月，箫声松殿风。  
绿毛辞世女，白发入壶翁。借问烧丹处，桃花几遍红。

卷 594\_6 【晚眺徐州延福寺】

储嗣宗

杉风振旅尘，晚景藉芳茵。片水明在野，万花深见人。  
静依归鹤思，远惜旧山春。今日惜携手，寄怀吟白蘋。

卷 594\_7 【宿甘棠馆】

储嗣宗

尘迹入门尽，悄然江海心。水声巫峡远，山色洞庭深。  
风桂落寒子，岚烟凝夕阴。前轩鹤归处，萝月思沈沈。

卷 594\_8 【和茅山高拾遗忆山中杂题五首 · 山泉】

储嗣宗

香味清机仙府回，萦纡乱石便流杯。  
春风莫泛桃花去，恐引凡人入洞来。

卷 594\_9 【和茅山高拾遗忆山中杂题五首 · 巢鹤】

储嗣宗

千万云间丁令威，殷勤仙骨莫先飞。  
若逢茅氏传消息，贞白先生不久归。

卷 594\_10 【和茅山高拾遗忆山中杂题五首·胡山】

储嗣宗

犬入五云音信绝，凤楼凝碧悄无声。  
焚香古洞步虚夜，露湿松花空月明。

卷 594\_11 【和茅山高拾遗忆山中杂题五首·小楼】

储嗣宗

松杉风外乱山青，曲几焚香对石屏。  
空忆去年春雨后，燕泥时污太玄经。

卷 594\_12 【和茅山高拾遗忆山中杂题五首·山邻】

储嗣宗

石桥春涧已归迟，梦入仙山山不知。  
柱史从来非俗吏，青牛道士莫相疑。



卷 594\_13 【送道士】

储嗣宗

泠然御风客，与道自浮沉。黄鹤有归语，白云无忌心。  
药炉经月净，天路入壶深。从此分杯后，相思何处寻。

卷 594\_14 【宿山馆】

储嗣宗

寂寞对衰草，地凉凝露华。蝉鸣月中树，风落客前花。  
山馆无宿伴，秋琴初别家。自怜千万里，笔砚寄生涯。

卷 594\_15 【入浮石山】

储嗣宗

斜日出门去，残花已过春。鸟声穿叶远，虎迹渡溪新。  
入洞几时路，耕田何代人。自惭非避俗，不敢问迷津。

卷 594\_16 【送人归故园】

储嗣宗

远节惨言别，况予心久违。从来忆家泪，今日送君归。  
野路正风雪，还乡犹布衣。里中耕稼者，应笑读书非。

卷 594\_17 【得越中书】

储嗣宗

芳草离离思，悠悠春梦余。池亭千里月，烟水一封书。  
诗想怀康乐，文应吊子胥。扁舟恋南越，岂独为鲈鱼。

卷 594\_18 【秋墅】

储嗣宗

欲暮候樵者，望山空翠微。虹随余雨散，鸦带夕阳归。  
穷巷长秋草，孤村时捣衣。谁知多病客，寂寞掩柴扉。

卷 594\_19 【哭彭先生】

储嗣宗

谷口溪声客自伤，那堪呜咽吊残阳。空阶鹤恋丹青影，  
秋雨苔封白石床。主祭孤儿初学语，无媒旅櫓未还乡。  
门人远赴心丧夜，月满千山旧草堂。

卷 594\_20 【和顾非熊先生题茅山处士闲居】

储嗣宗

归耕地肺绝尘喧，匣里青萍未报恩。浊酒自怜终日醉，  
古风时得野人言。鸟啼碧树闲临水，花满青山静掩门。  
唯有阶前芳草色，年年惆怅忆王孙。

卷 594\_21 【长安怀古】

储嗣宗

祸稔萧墙终不知，生人力屈尽边陲。赤龙已赴东方暗，  
黄犬徒怀上蔡悲。面缺崩城山寂寂，土埋冤骨草离离。  
秋风解怨扶苏死，露泣烟愁红树枝。

卷 594\_22 【过王右丞书堂二首】

储嗣宗

澄潭昔卧龙，章句世为宗。独步声名在，千岩水石空。  
野禽悲灌木，落日吊清风。后学攀遗址，秋山闻草虫。

万树影参差，石床藤半垂。萤光虽散草，鸟迹尚临池。  
风雅传今日，云山想昔时。感深苏属国，千载五言诗。

卷 594\_23 【孤雁】

储嗣宗

孤雁暮飞急，萧萧天地秋。关河正黄叶，消息断青楼。  
湘渚烟波远，骊山风雨愁。此时万里道，魂梦绕沧洲。

卷 594\_24 【赠隐者】

储嗣宗

尽室居幽谷，乱山为四邻。雾深知有术，窗静似无人。  
鹤语松上月，花明云里春。生涯更何许，尊酒与垂纶。

卷 594\_25 【早春怀薛公裕】

储嗣宗

幽独自成愚，柴门日渐芜。陆机初入洛，孙楚又游吴。  
失意怨杨柳，异乡闻鹧鸪。相思复相望，春草满南湖。

卷 594\_26 【村月】

储嗣宗

月午篱南道，前村半隐林。田翁独归处，荞麦露花深。

卷 594\_27 【早春】

储嗣宗

野树花初发，空山独见时。踟蹰历阳道，乡思满南枝。

卷 594\_28 【送友人游吴】

储嗣宗

吴山青楚吟，草色异乡心。一酌水边酒，数声花下琴。

登楼旧国远，探穴九疑深。更想逢秋节，那堪闻夜砧。

卷 594\_29 【赠别】

储嗣宗

兰泽伤秋色，临风远别期。东城草虽绿，南浦柳无枝。  
直道岂易枉，暗投谁不疑。因君问行役，有泪湿江蓠。

卷 594\_30 【经故人旧居】

储嗣宗

万里访遗尘，莺声泪湿巾。古书无主散，废宅与山邻。  
宿草风悲夜，荒村月吊人。凄凉问残柳，今日为谁春。

卷 594\_31 【随边使过五原】

储嗣宗

偶逐星车犯虏尘，故乡常恐到无因。  
五原西去阳关废，日漫平沙不见人。

卷 594\_32 【春怀寄秣陵知友】

储嗣宗

庐江城外柳堪攀，万里行人尚未还。  
借问景阳台下客，谢家谁更卧东山。

卷 594\_33 【宋州月夜感怀】

储嗣宗

雁池衰草露沾衣，河水东流万事微。  
寂寞青陵台上月，秋风满树鹊南飞。

卷 594\_34 【吴宫】

储嗣宗

荒台荆棘多，忠谏竟如何。细草迷宫巷，闲花误绮罗。  
前溪徒自绿，子夜不闻歌。怅望清江暮，悠悠东去波。

卷 594\_35 【春游望仙谷】

储嗣宗

清无车马尘，深洞百花春。鸡犬疑沾药，耕桑似避秦。  
登山采樵路，临水浣纱人。若得心无事，移家便卜邻。

卷 594\_36 【圣女祠】

储嗣宗

石屏苔色凉，流水绕祠堂。巢鹊疑天汉，潭花似镜妆。  
神来云雨合，神去蕙兰香。不复闻双佩，山门空夕阳。

卷 594\_37 【宿范水】

储嗣宗

行人倦游宦，秋草宿湖边。露湿芙蓉渡，月明渔网船。  
寒机深竹里，远浪到门前。何处思乡甚，歌声闻采莲。



卷 594\_38 【送顾陶校书归钱塘】

储嗣宗

清苦月偏知，南归瘦马迟。橐轻缘换酒，发白为吟诗。  
水色西陵渡，松声伍相祠。圣朝思直谏，不是挂冠时。

卷 594\_39 【题云阳高少府衙斋（一本无衙斋二字）】

储嗣宗

大隐能兼济，轩窗逐胜开。远含云水思，深得栋梁材。  
吏散山逾静，庭闲鸟自来。更怜幽砌色，秋雨长莓苔。

## 第五百九十五卷

### 卷 595\_1 【早春山行】

于武陵

江草暖初绿，雁行皆北飞。异乡那久客，野鸟尚思归。  
十载过如梦，素心应已违。行行家渐远，更苦得书稀。

### 卷 595\_2 【宿友生林居因怀贾区】

于武陵

绕屋树森森，多栖紫阁禽。暂过当永夜，微得话前心。  
入楚行应远，经湘恨必深。那堪对寒烛，更赋别离吟。

### 卷 595\_3 【赠卖松人】

于武陵

入市虽求利，怜君意独真。劬将寒涧树，卖与翠楼人。

瘦叶几经雪，淡花应少春。长安重桃李，徒染六街尘。

卷 595\_4 【友人南游不回因而有寄】

于武陵

相思春树绿，千里亦依依。鄂杜月频满，潇湘人未归。  
桂花风半落，烟草蝶双飞。一别无消息，水南车迹稀。

卷 595\_5 【送鄠县董明府之任】

于武陵

南北行已久，怜君知苦辛。万家同草木，三载得阳春。  
东道听游子，夷门歌主人。空持语相送，应怪不沾巾。

卷 595\_6 【山上树（一作桂）】

于武陵

日暖上山路，鸟啼知已春。忽逢幽隐处，如见独醒人。  
石冷开常晚，风多落亦频。樵夫应不识，岁久伐为薪。

卷 595\_7 【长信宫二首】

于武陵

簾凉秋气初，长信恨何如。拂黛月生指，解鬟云满梳。  
一从悲画扇，几度泣前鱼。坐听南宫乐，凉风摇翠裾。

一失辇前恩，绮罗生暗尘。惟应深夜月，独伴向隅人。  
长信翠蛾老，昭阳红粉新。君心似秋节，不使草长春。

卷 595\_8 【洛阳道】

于武陵

浮世若浮云，千回故复新。旋添青草冢，更有白头人。  
岁暮容将老，雪晴山欲春。行行车与马，不尽洛阳尘。

卷 595\_9 【东门路】

于武陵

东门车马路，此路在浮沉。白日若不落，红尘应更深。  
从来名利地，皆起是非心。所以青青草，年年生汉阴。

卷 595\_10 【江楼春望】

于武陵

楼下长江路，舟车昼不闲。鸟声非故国，春色是他山。  
一望云复水，几重河与关。愁心随落日，万里各西还。

卷 595\_11 【洛中晴望】

于武陵

九陌尽风尘，嚣嚣昼复昏。古今人不断，南北路长存。  
叶落上阳树，草衰金谷园。乱鸦归未已，残日半前轩。

卷 595\_12 【西归】

于武陵

不系与舟闲，悠悠吴楚间。羞将新白发，却到旧青山。  
一叶忽离树，几人同入关。长安家尚在，秋至又西还。

卷 595\_13 【南游】

于武陵

穷秋几日雨，处处生苍苔。旧国寄书后，凉天方雁来。  
露繁山草湿，洲暖水花开。去尽同行客，一帆犹未回。

卷 595\_14 【南游有感】

于武陵

杜陵无厚业，不得驻车轮。重到曾游处，多非旧主人。  
东风千岭树，西日一洲蘋。又渡湘江去，湘江水复春。

卷 595\_15 【夜泊湘江】

于武陵

北风吹楚树，此地独先秋。何事屈原恨，不随湘水流。  
凉天生片月，竟夕伴孤舟。一作南行客，无成空白头。

卷 595\_16 【客中】

于武陵

楚人歌竹枝，游子泪沾衣。异国久为客，寒宵频梦归。  
一封书未返，千树叶皆飞。南过洞庭水，更应消息稀。

卷 595\_17 【夜寻僧不遇（一作夜寻僧，僧游山未归）】

于武陵

数歇度烟水，渐非尘俗间。泉声入秋寺，月色遍寒山。  
石路几回雪，竹房犹闭关。不知双树客，何处与云闲？

卷 595\_18 【访道者不遇（一作访僧不遇）】

于武陵

人间惟此路，长得绿苔衣。及户无行迹，游方应未归。  
平生无限事，到此尽知非。独倚松门久，阴云昏翠微。

卷 595\_19 【赠王隐者山居（一作赠隐者）】

于武陵

石室扫无尘，人寰与此分。飞来南浦树，半是华山云。  
浮世几多事，先生应不闻。寒山满西日，空照雁成群。

卷 595\_20 【寄北客】

于武陵

穷边足风惨，何处醉楼台。家去几千里，月圆十二回。  
寒阡随日远，雪路向城开。游子久无信，年年空雁来。

卷 595\_21 【寄友人】

于武陵

长安清渭东，游子迹重重。此去红尘路，难寻君马踪。  
昔时轻一别，渐老贵相逢。应恋嵩阳住，嵩阳饶古松。



卷 595\_22 【夜与故人别】

于武陵

白日去难驻，故人非旧容。今宵一别后，何处更相逢。  
过楚水千里，到秦山几重。语来天又晓，月落满城钟。

卷 595\_23 【别故（一作友）人】

于武陵

行子与秋叶，各随南北风。虽非千里别，还阻一宵同。  
过尽少年日，尚如长转蓬。犹为布衣客，羞入故关中。

卷 595\_24 【送客东归】

于武陵

一听游子歌，秋计觉蹉跎。四海少平地，百川无定波。  
共惊年已暮，俱向客中多。又驾征轮去，东归事若何。

卷 595\_25 【过侯王故第】

于武陵

过此一酸辛，行人泪有痕。独残新碧树，犹拥旧朱门。  
歌歇云初散，檐空燕尚存。不知弹铗客，何处感新恩。

卷 595\_26 【孤云】

于武陵

南北各万里，有云心更闲。因风离海上，伴月到人间。  
洛浦少高树，长安无旧山。裴回不可驻，漠漠又空还。

卷 595\_27 【远水】

于武陵

悔作望南浦，望中生远愁。因知人易老，为有水东流。  
欲附故乡信，不逢归客舟。萋萋两岸草，又度一年秋。

卷 595\_28 【咏蝉（一作客中闻早蝉）】

于武陵

江头一声起，芳岁已难留。听此高林上，遥知故国秋。  
应催风落叶，似劝客回舟。不是新蝉苦，年年自有愁。

卷 595\_29 【感情】

于武陵

青山长寂寞，南望独高歌。四海故人尽，九原新垄多。  
西沉浮世日，东注逝川波。不使年华驻，此生能几何。

卷 595\_30 【早春日山居寄城郭知己】

于武陵

阳和潜发荡寒阴，便使川原景象新。入户风泉声沥沥，  
当轩云岫色沈沈。残云带雨轻飘雪，嫩柳含烟小绽金。  
虽有眼前诗酒兴，遨游争得称闲心。

卷 595\_31 【劝酒】

于武陵

劝君金屈卮，满酌不须辞。花发多风雨，人生足别离。

卷 595\_32 【感怀（一作感情，以下一本俱作于邺诗）】

于武陵

东风吹草色，空使客蹉跎。不设太平险，更应游子多。  
几伤行处泪，一曲醉中歌。尽向青门外，东随渭水波。

卷 595\_33 【友人亭松】

于武陵

俯仰不能去，如逢旧友同。曾因春雪散，见在华山中。  
何处有明月，访君听远风。相将归未得，各占石岩东。

卷 595\_34 【游中梁山】

于武陵

僻地好泉石，何人曾陆沈？不知青嶂外，更有白云深。

因此见乔木，几回思旧林。殷勤猿与鸟，惟我独何心。

卷 595\_35 【寻山】

于武陵

到此绝车轮，萋萋草树春。青山如有利，白石亦成尘。  
水阔应无路，松深不见人。如知巢与许，千载迹犹新。

卷 595\_36 【宿江口】

于武陵

南渡人来绝，喧喧雁满沙。自生江上月，长有客思家。  
半夜下霜岸，北风吹荻花。自惊归梦断，不得到天涯。

卷 595\_37 【秋夜达萧关】

于武陵

扰扰浮梁路，人忙月自闲。去年为塞客，今夜宿萧关。  
辞国几经岁，望乡空见山。不知江叶下，又作布衣还。

卷 595\_38 【斜谷道】

于武陵

乱峰连叠嶂，千里绿峨峨。蜀国路如此，游人车亦过。  
远烟当叶敛，骤雨逐风多。独忆紫芝叟，临风歌旧歌。

卷 595\_39 【过百牢关贻舟中者】

于武陵

蜀国少平地，方思京洛间。远为千里客，来度百牢关。  
帆影清江水，铃声碧草山。不因名与利，尔我各应闲。

卷 595\_40 【客中览镜】

于武陵

何当开此镜，即见发如丝。白日急于水，一年能几时。  
每逢芳草处，长返故园迟。所以多为客，蹉跎欲怨谁。

卷 595\_41 【长安逢隐者】

于武陵

征车千里至，碾遍六街尘。向此有营地，忽逢无事人。  
昔时颜未改，浮世路多新。且脱衣沽酒，终南山欲春。

卷 595\_42 【与僧话旧】

于武陵

草堂前有山，一见一相宽。处世贵僧静，青松因岁寒。  
他山逢旧侣，尽日话长安。所以闲行迹，千回绕药栏。

卷 595\_43 【赠王道士】

于武陵

日日市朝路，何时无苦辛。不随丹灶客，终作白头人。  
浮世度千载，桃源方一春。归来华表上，应笑北邙尘。

卷 595\_44 【匣中琴】

于武陵

世人无正心，虫网匣中琴。何以经时废，非为娱耳音。  
独令高韵在，谁感隙尘深。应是南风曲，声声不合今。

卷 595\_45 【过洛阳城】

于武陵

古来利与名，俱在洛阳城。九陌鼓初起，万车轮已行。  
周秦时几变，伊洛水犹清。二月中桥路，鸟啼春草生。

卷 595\_46 【望月（一作客中月）】

于武陵

离家凡几宵，一望一寥寥。新魄又将满，故乡应渐遥。  
独临彭蠡水，远忆洛阳桥。更有乘舟客，凄然亦驻桡。



卷 595\_47 【王将军宅夜听歌】

于武陵

朱槛满明月，美人歌落梅。忽惊尘起处，疑有凤飞来。  
一曲听初彻，几年愁暂开。东南正云雨，不得见阳台。

卷 595\_48 【长信（一作春）宫】

于武陵

莫问古宫名，古宫空有城。惟应东去水，不改旧时声。

卷 595\_49 【高楼】

于武陵

远天明月出，照此谁家楼。上有罗衣裳，凉风吹不休。

## 第五百九十六卷

### 卷 596\_1 【感古】

司马扎

九折无停波，三光如转烛。玄珠人不识，徒爱燕赵玉。  
祖龙已深惑，汉氏远徇欲。骊山与茂陵，相对秋草绿。

### 卷 596\_2 【赠王道士】

司马扎

玉洞秋有花，蓬山夜无鬼。岂知浮云世，生死逐流水。  
瑶台歌一曲，曲尽五烟起。悠然望虚路，玉京在海里。  
青箬秘不闻，黄鹤去不止。愿随执轻策，往结周太子。

### 卷 596\_3 【古思】

司马扎

春华惜妾态，秋草念妾心。始知井边桐，不如堂上琴。

月落却羡镜，花飞犹委苔。门前长江水，一去终不回。

卷 596\_4 【猎客】

司马扎

五陵射雕客，走马占春光。下马青楼前，华裾独煌煌。  
自言家咸京，世族如金张。击钟传鼎食，尔来八十强。  
朱门争先开，车轮满路傍。娥娥燕赵人，珠箔闭高堂。  
清歌杂妙舞，临欢度曲长。朝游园花新，夜宴池月凉。  
更以驰骤多，意气事强梁。君王正年少，终日在长杨。

卷 596\_5 【送进士苗纵归紫逻山居】

司马扎

汝上多奇山，高怀惬清境。强来干名地，冠带不能整。  
常言梦归处，泉石寒更静。鹤声夜无人，空月随松影。  
今朝抛我去，春物伤明景。怅望相送还，微阳在东岭。

卷 596\_6 【卖花者】

司马扎

少壮彼何人，种花荒苑外。不知力田苦，却笑耕耘辈。

当春卖春色，来往经几代。长安甲第多，处处花堪爱。  
良金不惜费，竞取园中最。一蕊才占烟，歌声已高会。  
自言种花地，终日拥轩盖。农夫官役时，独与花相对。  
那令卖花者，久为生人害。贵粟不贵花，生人自应泰。

卷 596\_7 【弹琴】

司马扎

凉室无外响，空桑七弦分。所弹非新声，俗耳安肯闻。  
月落未终曲，暗中泣湘君。如传我心苦，千里苍梧云。

卷 596\_8 【古边卒思归】

司马扎

有田不得耕，身卧辽阳城。梦中稻花香，觉后战血腥。  
汉武在深殿，唯思廓寰瀛。中原半烽火，比屋皆点行。  
边土无膏腴，闲地何必争。徒令执耒者，刀下死纵横。

卷 596\_9 【美刘太保】

司马扎

常爱鲁仲连，退身得其趣。不知鸱夷子，更入五湖去。

云霞恣摇曳，鸿鹄无低翥。万里天地空，清飙在平楚。  
藏名向宠节，辞疾去公务。夜尽醉弦歌，日高卧烟树。  
岂嗤生前乐，千载自垂裕。论道复论功，皆可黄金铸。

卷 596\_10 【蚕女】

司马扎

养蚕先养桑，蚕老人亦衰。苟无园中叶，安得机上丝。  
妾家非豪门，官赋日相追。鸣梭夜达晓，犹恐不及时。  
但忧蚕与桑，敢问结发期。东邻女新嫁，照镜弄蛾眉。

卷 596\_11 【效陶彭泽】

司马扎

一梦倏已尽，百年如露草。独有南山高，不与人共老。  
尊中贮灵味，无事即醉倒。何必鸣鼓钟，然后乐怀抱。  
轻波向海疾，浮云归谷早。形役良可嗟，唯能徇天道。

卷 596\_12 【锄草怨】

司马扎

种田望雨多，雨多长蓬蒿。亦念官赋急，宁知荷锄劳。

亭午霁日明，邻翁醉陶陶。乡吏不到门，禾黍苗自高。  
独有辛苦者，屡为州县徭。罢锄田又废，恋乡不忍逃。  
出门吏相促，邻家满仓谷。邻翁不可告，尽日向田哭。

卷 596\_13 【山中晚兴寄裴侍御】

司马扎

雷息疏雨散，空山夏云晴。南轩对林晚，篱落新蛩鸣。  
白酒一樽满，坐歌天地清。十年身未闲，心在人间名。  
永怀君亲恩，久贱难退情。安得蓬丘侣，提携采瑶英。

卷 596\_14 【筑台】

司马扎

魏国昔强盛，宫中金玉多。征丁筑层台，唯恐不巍峨。  
结构切星汉，跻攀横绮罗。朝观细腰舞，夜听皓齿歌。  
讵念人力劳，安问黍与禾。一朝国既倾，千仞堂亦平。  
舞模衰柳影，歌留草虫声。月照白露寒，苍苍故邺城。  
汉文有遗美，对此清飙生。

卷 596\_15 【道中早发】

司马扎

野店鸡一声，萧萧客车动。西峰带晓月，十里犹相送。  
繁弦满长道，羸马四蹄重。遥羨青楼人，锦衾方远梦。  
功名不我与，孤剑何所用。行役难自休，家山忆秋洞。

卷 596\_16 【沧浪峡】

司马扎

山下水声深，水边山色聚。月照秋自清，花名春不去。  
似非人间境，又近红尘路。乍入洞中天，更移云外步。  
我殊惺惺者，犹得沧浪趣。可以濯吾缨，斯言诚所慕。

卷 596\_17 【感萤】

司马扎

爱尔持照书，临书叹吾道。青荧一点光，曾误几人老。  
夜久独此心，环垣闭秋草。

卷 596\_18 【自渭南晚次华州】

司马扎

前楼仙鼎原，西经赤水渡。火云入村巷，余雨依驿树。  
我行伤去国，疲马屡回顾。有如无窠鸟，触热不得住。  
峨峨华峰近，城郭生夕雾。逆旅何人寻，行客暗中住。  
却思林丘卧，自惬平生素。劳役今若兹，羞吟招隐句。

卷 596\_19 【近别】

司马扎

咫尺不相见，便同天一涯。何必隔关山，乃言伤别离。  
君心与我心，脉脉无由知。谁堪近别苦，远别犹有期。

卷 596\_20 【江上秋夕】

司马扎

茂陵归路绝，谁念此淹留。极目月沈浦，苦吟霜满舟。  
孤猿啼后夜，久客病高秋。欲寄乡关恨，寒江无北流。



卷 596\_21 【送归客】

司马扎

多才与命违，末路隐柴扉。白发何人问，青山一剑归。  
晴烟独鸟没，野渡乱花飞。寂寞长亭外，依然空落晖。

卷 596\_22 【东门晚望】

司马扎

青门聊极望，何事久离群。芳草失归路，故乡空暮云。  
信回陵树老，梦断灞流分。兄弟正南北，鸿声堪独闻。

卷 596\_23 【上巳日曲江有感】

司马扎

万花明曲水，车马动秦川。此日不得意，青春徒少年。  
晴沙下鸥鹭，幽沚生兰荃。向晚积归念，江湖心渺然。

卷 596\_24 【宿寿安甘棠馆】

司马扎

行人方倦役，到此似还乡。流水来关外，青山近洛阳。  
溪云归洞鹤，松月半轩霜。坐恐晨钟动，天涯道路长。

卷 596\_25 【送友人下第东游】

司马扎

出门皆有托，君去独何亲。阙下新知少，天涯旧业贫。  
烟寒岳树暝，雪后岭梅春。圣代留昆玉，那令愧郢诃。

卷 596\_26 【山斋会别】

司马扎

春草平陵路，荷衣醉别离。将寻洛阳友，共结洞庭期。  
星月半山尽，天鸡出海迟。无轻此分手，他日重相思。

卷 596\_27 【晓过伊水寄龙门僧】

司马扎

龙门树色暗苍苍，伊水东流客恨长。病马独嘶残夜月，  
行人欲渡满船霜。几家烟火依村步，何处渔歌似故乡。  
山下禅庵老师在，愿将形役问空王。

卷 596\_28 【送孔恂入洛】

司马扎

洛阳古城秋色多，送君此去心如何。青山欲暮惜别酒，  
碧草未尽伤离歌。前朝冠带掩金谷，旧游花月经铜驼。  
行人正苦奈分手，日落远水生微波。

卷 596\_29 【观郊礼】

司马扎

钟鼓旌旗引六飞，玉皇初著画龙衣。  
泰坛烟尽星河晓，万国心随彩仗归。

卷 596\_30 【宫怨】

司马扎

柳色参差掩画楼，晓莺啼送满宫愁。  
年年花落无人见，空逐春泉出御沟。

卷 596\_31 【南徐夕眺】

司马扎

行吟向暮天，何处不凄然。岸影几家柳，笛声何处船。  
楼分瓜步月，鸟入秣陵烟。故里无人到，乡书谁为传。

卷 596\_32 【题清上人】

司马扎

古院闭松色，入门人自闲。罢经来宿鸟，支策对秋山。  
客念蓬梗外，禅心烟雾间。空怜濯缨处，阶下水潺潺。

卷 596\_33 【涂中寄薛中裕】

司马扎

贫交千里外，失路更伤离。晓泪芳草尽，夜魂明月知。  
空山连野外，寒鸟下霜枝。此景正寥落，为君玄发衰。

卷 596\_34 【白马津阻雨】

司马扎

津树萧萧旅馆空，坐看疏叶绕阶红。故乡千里楚云外，  
归雁一声烟雨中。漳浦病多愁易老，茂陵书在信难通。  
功名倘遂身无事，终向溪头伴钓翁。

卷 596\_35 【秋日怀储嗣宗】

司马扎

故人北游久不回，塞雁南渡声何哀。  
相思闻雁更惆怅，却向单于台下来。

卷 596\_36 【夜听李山人弹琴】

司马扎

瑶琴夜久弦秋清，楚客一奏湘烟生。  
曲中声尽意不尽，月照竹轩红叶明。

卷 596\_37 【隐者】

司马扎

松间开一径，秋草自相依。终日不冠带，空山无是非。  
投纶溪鸟伴，曝药谷云飞。时向邻家去，狂歌夜醉归。

卷 596\_38 【登河中鹳雀楼】

司马扎

楼中见千里，楼影入通津。烟树遥分陕，山河曲向秦。  
兴亡留白日，今古共红尘。鹳雀飞何处，城隅草自春。

卷 596\_39 【漾陂晚望】

司马扎

远客家水国，此来如到乡。何人垂白发，一叶钓残阳。  
柳暗鸟乍起，渚深兰自芳。因知帝城下，有路向沧浪。

## 第五百九十七卷

### 卷 597\_1 【贺襄阳副使节判同加章绶】

徐商

朱紫花前贺故人，兼荣此会颇关身。同年坐上联宾榻，  
宗姓亭中布锦裀。晴日照旗红灼烁，韶光入队影玢璘。  
芳菲解助今朝喜，嫩蕊青条满眼新。

### 卷 597\_2 【句】

徐商

萍聚只因今日浪，荻斜都为夜来风。

### 卷 597\_3 【和薛逢赠别】

高璩

剑外绵州第一州，尊前偏喜接君留。歌声婉转添长恨，



管色凄凉似到秋。但务欢娱思晓角，独耽云水上高楼。  
莫言此去难相见，怨别徵黄是顺流。

卷 597\_4 【句】

高璩

公斋一到人非旧，诗板重寻墨尚新。

卷 597\_5 【和李尚书命妓饯崔侍御】

高湘

谢安春渚饯袁宏，千里仁风一扇清。  
歌黛惨时方酩酊，不知公子重飞觥。

卷 597\_6 【句】

高湘

惟有高州是当家。

卷 597\_7 【报何泽】

崔安潜

四十九年前及第，同年唯有老夫存。  
今日殷勤访吾子，稳将髻鬣上龙门。

卷 597\_8 【题文翁石室】

裴铏

文翁石室有仪形，庠序千秋播德馨。古柏尚留今日翠，  
高岷犹蔼旧时青。人心未肯抛膻蚁，弟子依前学聚萤。  
更叹沱江无限水，争流只愿到沧溟。

卷 597\_9 【愤惋诗三首（一作刘禹锡诗，题作怀妓）】

刘损

宝钗分股合无缘，鱼在深渊日在天。得意紫鸾休舞镜，  
断踪青鸟罢衔笺。金杯倒覆难收水，玉轸倾欹懒续弦。  
从此蘼芜山下过，只应将泪比黄泉。

鸾辞旧伴知何止，凤得新梧想称心。红粉尚存香幕幕，

白云将散信沈沈。已休磨琢投泥玉，懒更经营买笑金。  
愿作山头似人石，丈夫衣上泪痕深。

旧尝游处遍寻看，睹物伤情死一般。买笑楼前花已谢，  
画眉窗下月空残。云归巫峡音容断，路隔星河去住难。  
莫道诗成无泪下，泪如泉滴亦须干。

卷 597\_10 【幼作】

郑愚

台山初罢雾，岐海正分流。渔浦颿来笛，鸿逵翼去舟。

卷 597\_11 【茶诗】

郑愚

嫩芽香且灵，吾谓草中英。夜臼和烟捣，寒炉对雪烹。  
惟忧碧粉散，尝见绿花生。

卷 597\_12 【郡楼望九华歌】

霍总

楼上坐见九子峰，翠云赤日光溶溶。有时朝昏变疏密，

八峰和烟一峰出。有时风卷天雨晴，聚立连连如弟兄。  
阳乌生子偶成数，丹凤养雏同此名。日日遥看机已静，  
未离尘躅思真境。子明龙驾腾九垓，陵阳相对空崔嵬。  
玉浆瑶草不可见，自有神仙风马来。

卷 597\_13 【塞下曲】

霍总

曾当一面战，频出九重围。但见争锋处，长须得胜归。  
雪沾旗尾落，风断节毛稀。岂要铭燕石，平生重武威。

卷 597\_14 【关山月】

霍总

珠珑翡翠床，白皙侍中郎。五日来花下，双童问道傍。  
到门车马狭，连夜管弦长。每笑东家子，窥他宋玉墙。

卷 597\_15 【骢马】

霍总

青骊八尺高，侠客倚雄豪。踏雪生珠汗，障泥护锦袍。

路傍看骤影，鞞底卷旋毛。岂独连钱贵，酬恩更代劳。

卷 597\_16 【雉朝飞】

霍总

五色有名翬，清晨挟两雌。群群飞自乐，步步饮相随。  
觜叶逢人处，惊媒妒宠时。绿毛春斗尽，强敌愿君知。

卷 597\_17 【木芙蓉】

霍总

本自江湖远，常开霜露余。争春候秣李，得水异红蕖。  
孤秀曾无偶，当门幸不锄。谁能政摇落，繁彩照阶除。

卷 597\_18 【采莲女】

霍总

舟中采莲女，两两催妆梳。闻早渡江去，日高来起居。

卷 597\_19 【别僧（一作留别兰若僧）】

陈琚

行若独轮车，常畏大道覆。止若员底器，常恐他物触。  
行止既如此，安得不离俗。

卷 597\_20 【早春残雪】

裴虔余

霁日雕琼彩，幽庭减夜寒。梅飘余片积，日堕晚光残。  
零落偏依桂，霏微不掩兰。阴林披雾縠，小沼破冰盘。  
曲槛霜凝砌，疏篁玉碎竿。已闻三径好，犹可访袁安。

卷 597\_21 【柳枝词咏篙水溅妓衣】

裴虔余

半额微黄金缕衣，玉搔头袅凤双飞。  
从教水溅罗裙湿，还道朝来行雨归。

卷 597\_22 【献淮南师（一作献李仆射）】

李嶠

鸡树烟含瑞气凝，凤池波待玉山澄。  
国人久倚东关望，拟筑沙堤到广陵。

卷 597\_23 【月】

袁郊

嫦娥窃药出人间，藏在蟾宫不放还。  
后羿遍寻无觅处，谁知天上却容奸。

卷 597\_24 【霜】

袁郊

古今何事不思量，尽信邹生感彼苍。  
但想燕山吹暖律，炎天岂不解飞霜。

卷 597\_25 【露】

袁郊

湛湛腾空下碧霄，地卑湿处更偏饶。  
菅茅丰草皆沾润，不道良田有旱苗。

卷 597\_26 【云】

袁郊

楚甸尝闻旱魃侵，从龙应合解为霖。  
荒淫却入阳台梦，惑乱怀襄父子心。

卷 597\_27 【游东观山】

张丛

岩岫碧孱颜，灵踪若可攀。楼台烟霭外，松竹翠微间。  
玉液寒深洞，秋光秀远山。凭君指归路，何处是人寰。



卷 597\_28 【掷卢作】

冯衮

八尺台盘照面新，千金一掷斗精神。  
合是赌时须赌取，不妨回首乞闲人。

卷 597\_29 【戏酒妓】

冯衮

醉眼从伊百度斜，是他家属是他家。  
低声向道人知也，隔坐刚抛豆蔻花。

卷 597\_30 【老僧】

郑綮

日照四山雪，老僧门未开。冻瓶粘柱础，宿火陷炉灰。  
童子病归去，鹿麕寒入来。斋钟知渐近，枝鸟下生台。

卷 597\_31 【题卢州郡斋】

郑綮

九衢尘里一书生，多达逢时拥旆旌。  
醉里眼开金使字，紫旂风动耀天明。

卷 597\_32 【别郡后寄席中三兰（三妓并以兰为名）】

郑綮

淮淝两水不相通，隔岸临流望向东。  
千颗泪珠无寄处，一时弹与渡前风。

卷 597\_33 【观山灯献徐尚书】

温庭皓

一峰当胜地，万点照严城。势异昆冈发，光疑玄圃生。  
焚书翻见字，举燧不招兵。况遇新春夜，何劳秉烛行。

九枝应并耀，午夜忽潜然。景集青山外，萤分碧草前。  
辉华侵月影，历乱写星躔。望极高楼上，摇光满绮筵。

春山收暝色，爚火集余辉。丽景饶红焰，祥光出翠微。  
白榆行自比，青桂影相依。唯有偷光客，追游欲忘归。

卷 597\_34 【梅】

温庭皓

一树寒林外，何人此地栽。春光先自暖，阳艳暗相催。  
晓觉霜添白，寒迷月借开。余香低惹袖，堕蕊逐流杯。  
零落移新暖，飘扬上故台。雪繁莺不识，风袅蝶空回。  
羌吹应愁起，征徒异渴来。莫贪题咏兴，商鼎待盐梅。

## 第五百九十八卷

### 卷 598\_1 【言怀】

高骈

恨乏平戎策，惭登拜将坛。手持金钺冷，身挂铁衣寒。  
主圣扶持易，恩深报效难。三边犹未静，何敢便休官？

### 卷 598\_2 【寄鄂杜李遂良处士】

高骈

小隐堪忘世上情，可能休梦入重城。池边写字师前辈，  
座右题铭律后生。吟社客归秦渡晚，醉乡渔去汉陂晴。  
春来不得山中信，尽日无人傍水行。

### 卷 598\_3 【和王昭符进士赠洞庭赵先生】

高骈

为爱君山景最灵，角冠秋礼一坛星。药将鸡犬云间试，

琴许鱼龙月下听。自要乘风随羽客，谁同种玉验仙经。  
烟霞淡泊无人到，唯有渔翁过洞庭。

卷 598\_4 【依韵奉酬李迪】

高骈

柳下官资颜子居，闲情入骨若为除。诗成斩将奇难敌，  
酒熟封侯快未如。只见丝纶终日降，不知功业是谁书？  
而今共饮醇滋味，消得揶揄势利疏。

卷 598\_5 【留别彰德军从事范校书】

高骈

无金寄与白头亲，节概犹夸似古人。未出尘埃真落魄，  
不趋权势正因循。桂攀明月曾观国，蓬转西风却问津。  
匹马东归羡知己，燕王台上结交新。

卷 598\_6 【途次内黄马病，寄僧舍呈诸友人】

高骈

官闲马病客深秋，肯学张衡咏四愁。红叶寺多诗景致，

白衣人尽酒交游。依违讽刺因行得，淡泊供需不在求。  
好与高阳结吟社，况无名迹达珠旒。

卷 598\_7 【遣兴】

高骈

浮世忙忙蚁子群，莫嗔头上雪纷纷。沈忧万种与千种，  
行乐十分无一分。越外险巇防俗事，就中拘检信人文。  
醉乡日月终须觅，去作先生号白云。

卷 598\_8 【南海神祠】

高骈

沧溟八千里，今古畏波涛。此日征南将，安然渡万艘。

卷 598\_9 【送春】

高骈

水浅鱼争跃，花深鸟竞啼。春光看欲尽，判却醉如泥。

卷 598\_10 【海翻】

高骈

几经人事变，又见海涛翻。徒起如山浪，何曾洗至冤？

卷 598\_11 【筇竹杖寄僧】

高骈

坚轻筇竹杖，一枝有九节。寄与沃洲人，闲步青山月。

卷 598\_12 【遣兴】

高骈

把盏非怜酒，持竿不为鱼。唯应嵇叔夜，似我性慵疏。

卷 598\_13 【叹征人】

高骈

心坚胆壮箭头亲，十载沙场受苦辛。

力尽路傍行不得，广张红旆是何人。

卷 598\_14 【湘妃庙】

高骈

帝舜南巡去不还，二妃幽怨水云间。  
当时珠泪垂多少，直到如今竹尚斑。

卷 598\_15 【赴安南却寄台司】

高骈

曾驱万马上天山，风去云回顷刻间。  
今日海门南面事，莫教还似凤林关。

卷 598\_16 【闺怨】

高骈

人世悲欢不可知，夫君初破黑山归。  
如今又献征南策，早晚催缝带号衣。



卷 598\_17 【马嵬驿】

高骈

玉颜虽掩马嵬尘，冤气和烟锁渭津。  
蝉鬓不随銮驾去，至今空感往来人。

卷 598\_18 【宴犒蕃军有感】

高骈

蜀地恩留马嵬哭，烟雨濛濛春草绿。  
满眼由来是旧人，那堪更奏梁州曲。

卷 598\_19 【寓怀】

高骈

关山万里恨难销，铁马金鞭出塞遥。  
为问昔时青海畔，几人归到凤林桥。

卷 598\_20 【步虚词】

高骈

青溪道士人不识，上天下天鹤一只。  
洞门深锁碧窗寒，滴露研朱点周易。

卷 598\_21 【赠歌者二首】

高骈

酒满金船花满枝，佳人立唱惨愁眉。  
一声直入青云去，多少悲欢起此时。

公子邀欢月满楼，双成揭调唱伊州。  
便从席上风沙起，直到阳关水尽头。

卷 598\_22 【入蜀】

高骈

万水千山音信希，空劳魂梦到京畿。  
漫天岭上频回首，不见虞封泪满衣。

卷 598\_23 【边城听角】

高骈

席箕风起雁声秋，陇水边沙满目愁。  
三会五更欲吹尽，不知凡白几人头。

卷 598\_24 【渭川秋望寄右军王特进】

高骈

长川终日碧潺湲，知道天河与地连。  
凭寄两行朝阙泪，愿随流入御沟泉。

卷 598\_25 【山亭夏日】

高骈

绿树阴浓夏日长，楼台倒影入池塘。  
水精帘动微风起，满架蔷薇一院香。

卷 598\_26 【蜀路感怀】

高骈

蜀山苍翠陇云愁，銮驾西巡陷几州。  
唯有萦回深涧水，潺湲不改旧时流。

卷 598\_27 【残春遣兴】

高骈

画舸轻桡柳色新，摩诃池上醉青春。  
不辞不为青春醉，只恐莺花也怪人。

卷 598\_28 【春日招宾】

高骈

花枝如火酒如觞，正好狂歌醉复醒。  
对酒看花何处好，延和阁下碧筠亭。

卷 598\_29 【过天威径】

高骈

豺狼坑尽却朝天，战马休嘶瘴岭烟。  
归路嶮巇今坦荡，一条千里直如弦。

卷 598\_30 【对花呈幕中】

高骈

海棠初发去春枝，首唱曾题七字诗。  
今日能来花下饮，不辞频把使头旗。

卷 598\_31 【寄题罗浮别业】

高骈

不将真性染埃尘，为有烟霞伴此身。  
带日长江好归信，博罗山下碧桃春。

卷 598\_32 【塞上曲二首】

高骈

二年边戍绝烟尘，一曲河湾万恨新。  
从此凤林关外事，不知谁是苦心人。

陇上征夫陇下魂，死生同恨汉将军。  
不知万里沙场苦，空举平安火入云。

卷 598\_33 【广陵宴次戏简幕宾】

高骈

一曲狂歌酒百分，蛾眉画出月争新。  
将军醉罢无余事，乱把花枝折赠人。

卷 598\_34 【安南送曹别敕归朝】

高骈

云水苍茫日欲收，野烟深处鹧鸪愁。  
知君万里朝天去，为说征南已五秋。

卷 598\_35 【对雪】

高骈

六出飞花入户时，坐看青竹变琼枝。  
如今好上高楼望，盖尽人间恶路岐。

卷 598\_36 【访隐者不遇】

高骈

落花流水认天台，半醉闲吟独自来。  
惆怅仙翁何处去，满庭红杏碧桃开。

卷 598\_37 【赴西川途经虢县作】

高骈

亚夫重过柳营门，路指岷峨隔暮云。  
红额少年遮道拜，殷勤认得旧将军。

卷 598\_38 【锦城写望】

高骈

蜀江波影碧悠悠，四望烟花匝郡楼。  
不会人家多少锦，春来尽挂树梢头。

卷 598\_39 【太公庙】

高骈

青山长在境长新，寂寞持竿一水滨。  
及得王师身已老，不知辛苦为何人。

卷 598\_40 【边方春兴】

高骈

草色青青柳色浓，玉壶倾酒满金钟。  
笙歌嘹亮随风去，知尽关山第几重。



卷 598\_41 【塞上寄家兄】

高骈

棣萼分张信使希，几多乡泪湿征衣。  
笳声未断肠先断，万里胡天鸟不飞。

卷 598\_42 【写怀二首】

高骈

渔竿消日酒消愁，一醉忘情万事休。  
却恨韩彭兴汉室，功成不向五湖游。

花满西园月满池，笙歌摇曳画船移。  
如今暗与心相约，不动征旗动酒旗。

卷 598\_43 【池上送春】

高骈

持竿闲坐思沉吟，钓得江鳞出碧浔。  
回首看花花欲尽，可怜寥落送春心。

卷 598\_44 【南征叙怀】

高骈

万里驱兵过海门，此生今日报君恩。  
回期直待烽烟静，不遣征衣有泪痕。

卷 598\_45 【风筝（一作题风筝寄意）】

高骈

夜静弦声响碧空，宫商信任往来风。  
依稀似曲才堪听，又被移将别调中。

卷 598\_46 【平流园席上】

高骈

画舸摇烟水满塘，柳丝轻软小桃香。  
却缘龙节为萦绊，好是狂时不得狂。

卷 598\_47 【闻河中王铎加都统】

高骈

炼汞烧铅四十年，至今犹在药炉前。  
不知子晋缘何事，只学吹箫便得仙。

卷 598\_48 【句】

高骈

人间无限伤心事，不得尊前折一枝。  
满宫多少承恩者，似有容华妾也无。  
满身珠翠将何用，唯与豪家拂象床。  
何人种得西施花，千古春风开不尽。

## 第五百九十九卷

### 卷 599\_1 【青楼曲】

于湊

青楼临大道，一上一回老。所思终不来，极目伤春草。

### 卷 599\_2 【塞下曲】

于湊

紫塞晓屯兵，黄沙披甲卧。战鼓声未齐，乌鸢已相贺。  
燕然山上云，半是离乡魂。卫霍待富贵，岂能无乾坤。

### 卷 599\_3 【山村晓思】

于湊

开门省禾黍，邻翁水头住。今朝南涧波，昨夜西川雨。  
牧童披短蓑，腰笛期烟渚。不问水边人，骑牛傍山去。

卷 599\_4 【马嵬驿】

于湊

常经马嵬驿，见说坡前客。一从屠贵妃，生女愁倾国。  
是日芙蓉花，不如秋草色。当时嫁匹夫，不妨得头白。

卷 599\_5 【苦辛（一作辛苦）吟】

于湊

垄上扶犁儿，手种腹长饥。窗下抛梭女，手织身无衣。  
我愿燕赵姝，化为嫫母姿。一笑不值钱，自然家国肥。

卷 599\_6 【野蚕】

于湊

野蚕食青桑，吐丝亦成茧。无功及生人，何异偷饱暖。  
我愿均尔丝，化为寒者衣。

卷 599\_7 【秦原览古】

于湊

耕者戮力地，龙虎曾角逐。火德道将亨，夜逢蛇母哭。  
昔日望夷宫，是处寻桑谷。汉祖竟为龙，赵高徒指鹿。  
当时行路人，已合伤心目。汉祚又千年，秦原草还绿。

卷 599\_8 【古宴曲】

于湊

雉扇合蓬莱，朝车回紫陌。重门集嘶马，言宴金张宅。  
燕娥奉卮酒，低鬟若无力。十户手胼胝，凤凰钗一只。  
高楼齐下视，日照罗衣色。笑指负薪人，不信生中国。

卷 599\_9 【南越谣】

于湊

迢迢东南天，巨浸无津壖。雄风卷昏雾，干戈满楼船。  
此时尉佗心，儿童待幽燕。三寸陆贾舌，万里汉山川。  
若令交趾货，尽生虞芮田。天意苟如此，遐人谁肯怜？

卷 599\_10 【述己叹】

于漬

不长不成人，及长老逼身。履善本求乐，及善尤苦辛。  
如何幽并儿，一箭取功勋。

卷 599\_11 【辽阳行】

于漬

辽阳在何处，妾欲随君去。义合齐死生，本不夸机杼。  
谁能守空闺，虚问辽阳路。

卷 599\_12 【旅馆秋思】

于漬

旅馆坐孤寂，出门成苦吟。何事觉归晚，黄花秋意深。  
寒蝶恋衰草，轸我离乡心。更见庭前树，南枝巢宿禽。

卷 599\_13 【长城】

于湊

秦皇岂无德，蒙氏非不武。岂将版筑功，万里遮胡虏。  
团沙世所难，作垒明知苦。死者倍堪伤，僵尸犹抱杵。  
十年居上郡，四海谁为主。纵使骨为尘，冤名不入土。

卷 599\_14 【田翁叹（一本下有桑字）】

于湊

手植千树桑，文杏作中梁。频年徭役重，尽属富家郎。  
富家田业广，用此买金章。昨日门前过，轩车满垂杨。  
归来说向家，儿孙竟咨嗟。不见千树桑，一浦芙蓉花。

卷 599\_15 【沙场夜】

于湊

城上更声发，城下杵声歇。征人烧断蓬，对泣沙中月。  
耕牛朝挽甲，战马夜衔铁。士卒浣戎衣，交河水为血。  
轻裘两都客，洞房愁宿别。何况远辞家，生死犹未决。



卷 599\_16 【里中女】

于湊

吾闻池中鱼，不识海水深。吾闻桑下女，不识华堂阴。  
贫窗苦机杼，富家鸣杵砧。天与双明眸，只教识蒿簪。  
徒惜越娃貌，亦蕴韩娥音。珠玉不到眼，遂无奢侈心。  
岂知赵飞燕，满髻钗黄金。

卷 599\_17 【寒食】

于湊

二月野中芳，凡花亦能香。素娥哭新冢，樵柯鸣柔桑。  
田父引黄犬，寻狐上高冈。坟前呼犬归，不知头似霜。

卷 599\_18 【边游录戍卒言】

于湊

二十属卢龙，三十防沙漠。平生爱功业，不觉从军恶。  
今来客鬓改，知学弯弓错。赤肉痛金疮，他人成卫霍。  
目断望君门，君门苦寥廓。

卷 599\_19 【古征战】

于濇

高峰凌青冥，深穴万丈坑。皇天自山谷，焉得人心平。  
齐鲁足兵甲，燕赵多娉婷。仍闻丽水中，日日黄金生。  
苟非夷齐心，岂得无战争。

卷 599\_20 【山村叟】

于濇

古凿岩居人，一廛称有产。虽沾巾覆形，不及贵门犬。  
驱牛耕白石，课女经黄茧。岁暮霜霰浓，画楼人饱暖。

卷 599\_21 【戍客南归】

于濇

北别黄榆塞，南归白云乡。孤舟下彭蠡，楚月沈沧浪。  
为子惜功业，满身刀箭疮。莫渡汨罗水，回君忠孝肠。

卷 599\_22 【经馆娃宫】

于湊

馆娃宫畔顾，国变生娇妒。勾践胆未尝，夫差心已误。  
吴亡甘已矣，越胜今何处。当时二国君，一种江边墓。

卷 599\_23 【村居晏起】

于湊

村舍少闻事，日高犹闭关。起来花满地，戴胜鸣桑间。  
居安即永业，何者为故山？朱门与蓬户，六十头尽斑。

卷 599\_24 【感怀】

于湊

采薇易为山，何必登首阳。濯纓易为水，何必泛沧浪。  
贵崇已难慕，谄笑何所长。东堂桂欲空，犹有收萤光。

卷 599\_25 【金谷感怀（一作怀古）】

于湊

黄金骄石崇，与晋争国力。更欲住人间，一日买不得。  
行为忠信主，身是文章宅。四者俱不闻，空传堕楼客。

卷 599\_26 【恨从军】

于湊

不嫁白衫儿，爱君新紫衣。早知遽相别，何用假光辉。  
已闻都万骑，又道出重围。一轴金装字，致君终不归。

卷 599\_27 【烧金曲】

于湊

天寿畏不永，烧金希长年。积土培枯根，自谓松柏坚。  
南陌试腰褱，西楼歌婣娟。岂知蔓草中，日日开夜泉。

卷 599\_28 【子从军】

于湊

男作乡中丁，女作乡男妇。南村与北里，日日见父母。  
岂似从军儿，一去便白首。何当铸剑戟，尽得丁男力。

卷 599\_29 【越溪女】

于湊

会稽山上云，化作越溪人。枉破吴王国，徒为西子身。  
江边浣纱伴，黄金扼双腕。倏忽不相期，思倾赵飞燕。  
妾家基业薄，空有如花面。嫁尽绿窗人，独自盘金线。

卷 599\_30 【巫山高】

于湊

何山无朝云，彼云亦悠扬。何山无暮雨，彼雨亦苍茫。  
宋玉恃才者，恁虚构高唐。自垂文赋名，荒淫归楚襄。  
峨峨十二峰，永作妖鬼乡。

卷 599\_31 【织素谣】

于湊

贫女苦筋力，缲丝夜夜织。万梭为一素，世重韩娥色。  
五侯初买笑，建章方落籍。一曲古凉州，六亲长血食。  
劝尔画长眉，学歌饱亲戚。

卷 599\_32 【拟古讽】

于湊

洛阳大道傍，甲第何深邃。南亩无一廛，东园有余地。  
春溪化桃李，秋沼生荷芰。草木本无情，此时如有为。  
旱苗当垄死，流水资嘉致。余心甘至愚，不会皇天意。

卷 599\_33 【赠太行开路者】

于湊

手劬太行山，心齐太行巅。劬尽太行险，君心更摩天。  
何如回苦辛，自凿东皋田。

卷 599\_34 【戍卒伤春】

于湊

连年戍边塞，过却芳菲节。东风气力尽，不减阴山雪。  
萧条柳一株，南枝叶微发。为带故乡情，依依藉攀折。  
晚风吹碛沙，夜泪啼乡月。凌烟阁上人，未必皆忠烈。

卷 599\_35 【富农诗】

于湊

长闻乡人语，此家胜良贾。骨肉化饥魂，仓中有饱鼠。  
青春满桑柘，旦夕鸣机杼。秋风一夜来，累累闻砧杵。  
西邻有原宪，蓬蒿绕环堵。自乐固穷心，天意在何处。  
当门见堆子，已作桑田主。安得四海中，尽为虞芮土。

卷 599\_36 【早发】

于湊

绿野含曙光，东北云如茜。栖鸦林际起，落月水中见。  
此身何自苦，日日凌霜霰。流苏帐里人，犹在阳台畔。

卷 599\_37 【季夏逢朝客】

于湊

浣水桃李熟，杜曲芙蓉老。九天休沐归，腰玉垂杨道。  
避路回绮罗，迎风嘶骹褭。岂知山谷中，日日吹瑶草。

卷 599\_38 【陇头水（一作吟）】

于湊

行人何彷徨，陇头水呜咽。寒沙战鬼愁，白骨风霜切。  
薄日朦胧秋，怨气阴云结。杀成边将名，名著生灵灭。

卷 599\_39 【古别离】

于湊

入室少情意，出门多路岐。黄鹤有归日，荡子无还时。  
人谁无分命，妾身何太奇。君为东南风，妾作西北枝。  
青楼邻里妇，终年画长眉。自倚对良匹，笑妾空罗帏。

郎本东家儿，妾本西家女。对门中道间，终谓无离阻。  
岂知中道间，遣作空闺主。自是爱封侯，非关备胡虏。



知子去从军，何处无良人。

卷 599\_40 【拟古意】

于湊

白玉若无玷，花颜须及时。国色久在室，良媒亦生疑。  
鸦鬟未成髻，鸾镜徒相知。翻惭效顰者，却笑从人迟。

卷 599\_41 【陇头吟（一作水）】

于湊

借问陇头水，终年恨何事。深疑呜咽声，中有征人泪。  
自古蕴长策，况我非才智。无计谢潺湲，一宵空不寐。

卷 599\_42 【思归引】

于湊

不耕南亩田，为爱东堂桂。身同树上花，一落又经岁。  
交亲日相薄，知己恩潜替。日开十二门，自是无归计。

卷 599\_43 【秦富人】

于湊

高高起华堂，远远引流水。粪土视金珍，犹嫌未奢侈。  
陋巷满蓬蒿，谁怜有颜子。

卷 599\_44 【对花（一作赋穠诗，题云感事）】

于湊

花开蝶满枝，花落蝶还稀。惟有旧巢燕，主人贫亦归。

卷 599\_45 【宫怨】

于湊

妾家望江口，少年家财厚。临江起珠楼，不卖文君酒。  
当年乐贞独，巢燕时为友。父兄未许人，畏妾事姑舅。  
西墙邻宋玉，窥见妾眉宇。一旦及天聪，恩光生户牖。  
谓言入汉宫，富贵可长久。君王纵有情，不奈陈皇后。  
谁怜颊似桃，孰知腰胜柳？今日在长门，从来不如丑。

## 第六百卷

### 卷 600\_1 【登越王楼即事】

牛徵

危楼送远目，信美奈乡情。转岸孤舟疾，衔山落照明。  
萧条看草色，惆怅认江声。谁会登临恨，从军白发生。

### 卷 600\_2 【及第后寄梁烛处士】

伊璠

绣毂寻芳许史家，独将羈事达江沙。十年辛苦一枝桂，  
二月艳阳千树花。鹏化四溟归碧落，鹤栖三岛接青霞。  
同袍不得同游玩，今对春风日又斜。

### 卷 600\_3 【春诗】

萧遘

南国韶光早，春风送腊来。水堤烟报柳，山寺雪惊梅。

练色铺江晚，潮声逐渚回。青旗问沽酒，何处拨寒醅？

卷 600\_4 【和王侍中谒张恶子庙】

萧遘

青骨祀吴谁让德，紫华居越亦知名。未闻一剑传唐主，  
长拥千山护蜀城。斩马威棱应扫荡，截蛟锋刃俟升平。  
鄮侯为国亲箫鼓，堂上神筹更布兵。

卷 600\_5 【成都】

萧遘

月晓已开花市合，江平偏见竹篱多。  
好教载取芳菲树，剩照岷天瑟瑟波。

卷 600\_6 【句】

萧遘

吾家九叶相，尽继明时出。

卷 600\_7 【策试夜潜纪长句于都堂西南隅】

韦承贺

褰衣博带满尘埃，独自都堂纳卷回。蓬巷几时闻吉语，  
棘篱何日免重来。三条烛尽钟初动，九转丹成鼎未开。  
残月渐低人扰扰，不知谁是谪仙才？

白莲千朵照廊明，一片升平雅颂声。  
才唱第三条烛尽，南宫风月画难成。

卷 600\_8 【诏放云南子弟还国】

郑洪业

德被陪臣子，仁垂圣主恩。雕题辞凤阙，丹服出金门。  
有泽沾殊俗，无征及犷猥。铜梁分汉土，玉垒驾鸾轩。  
瘴岭蚕丛盛，巴江越巂垠。万方同感化，岂独自南蕃。

卷 600\_9 【中秋夜思郑延美有作】

孙纬

中秋中夜月，世说慑妖精。顾兔云初蔽，长蛇谁与勍。

未追良友玩，安用玉轮盈。此意人谁喻，裁诗穿禁城。

卷 600\_10 【清晓卷帘】

欧阳玘

清晓意未惬，卷帘时一吟。槛虚花气密，地暖竹声深。  
秀色还朝暮，浮云自古今。石泉惊已跃，会可洗幽心。

卷 600\_11 【巴陵】

欧阳玘

孤城向夕原，春入景初暄。绿树低官舍，青山在县门。  
楼台疑结蜃，枕席更闻猿。客路何曾定，栖迟欲断魂。

卷 600\_12 【榆溪道上】

欧阳玘

初日在斜溪，山云片片低。乡愁梦里失，马色望中迷。  
涧底凄泉气，岩前遍绿萋。非关秦塞去，无事候晨鸡。

卷 600\_13 【新岭临眺寄连总进士】

欧阳玘

关势遥临海，峰峦半入云。烟中独鸟下，潭上杂花熏。  
寄远悲春草，登临忆使君。此时还极目，离思更纷纷。

卷 600\_14 【幽轩】

欧阳玘

幽轩斜映山，空涧复潺潺。重叠岩峦趣，遥来窗户间。  
桃花飘岫幌，燕子语松关。衣桁侵池翠，阶痕露藓斑。  
临风清瑟奏，对客白云闲。眷恋青春色，含毫俯碧湾。

卷 600\_15 【社日村居（一作王驾诗）】

张演

鹅湖山下稻粱肥，豚阱鸡栖对掩扉。  
桑柘影斜春社散，家家扶得醉人归。

卷 600\_16 【吊孟昌图】

裴澈

一章何罪死何名，投水惟君与屈平。  
从此蜀江烟月夜，杜鹃应作两般声。

卷 600\_17 【婕妤怨】

翁绶

谗谤潜来起百忧，朝承恩宠暮仇雠。火烧白玉非因玷，  
霜翦红兰不待秋。花落昭阳谁共辇，月明长信独登楼。  
繁华事逐东流水，团扇悲歌万古愁。

卷 600\_18 【陇头吟】

翁绶

陇水潺湲陇树黄，征人陇上尽思乡。马嘶斜日朔风急，  
雁过寒云边思长。残月出林明剑戟，平沙隔水见牛羊。  
横行俱是封侯者，谁斩楼兰献未央。



卷 600\_19 【关山月】

翁绶

裴回汉月满边州，照尽天涯到陇头。影转银河寰海静，  
光分玉塞古今愁。笳吹远戍孤烽灭，雁下平沙万里秋。  
况是故园摇落夜，那堪少妇独登楼。

卷 600\_20 【雨雪曲】

翁绶

边声四合殷河流，雨雪飞来遍陇头。铁岭探人迷鸟道，  
阴山飞将湿貂裘。斜飘旌旆过戎帐，半杂风沙入戍楼。  
一自塞垣无李蔡，何人为解北门忧。

卷 600\_21 【行路难】

翁绶

行路艰难不复歌，故人荣达我蹉跎。双轮晚上铜台雪，  
一叶春浮瘴海波。自古要津皆若此，方今失路欲如何。  
君看西汉翟丞相，凤沼朝辞暮雀罗。

卷 600\_22 【折杨柳】

翁绶

紫陌金堤映绮罗，游人处处动离歌。阴移古戍迷芳草，  
花带残阳落远波。台上少年吹白雪，楼中思妇敛青蛾。  
殷勤攀折赠行客，此去关山雨雪多。

卷 600\_23 【咏酒】

翁绶

逃暑迎春复送秋，无非绿蚁满杯浮。百年莫惜千回醉，  
一盏能消万古愁。几为芳菲眠细草，曾因雨雪上高楼。  
平生名利关身者，不识狂歌到白头。

卷 600\_24 【白马】

翁绶

渥洼龙种雪霜同，毛骨天生胆气雄。金埒乍调光照地，  
玉关初别远嘶风。花明锦檐垂杨下，露湿朱缨细草中。  
一夜羽书催转战，紫髯骑出佩驂弓。

卷 600\_25 【句】

翁绶

海国欧乡浙水东，暂烦良守此凭熊。

卷 600\_26 【中秋月】

潘纬

古今逢此夜，共冀浹<sub>1</sub>明。岂是月华别，只应秋气清。  
影当中土正，轮对八荒平。寻客徒留望，璇玑自有程。

卷 600\_27 【琴】

潘纬

客来鸣素琴，惆怅对遗音。一曲起于古，几人听到今。  
尽含风霭远，自泛月烟深。风续水山操，坐生方外心。

卷 600\_28 【句】

潘纬

篆经千古涩，影泻一堂寒。

卷 600\_29 【九日卫使君筵上作】

武瓘

佳晨登赏喜还乡，谢宇开筵晚兴长。满眼黄花初泛酒，  
隔烟红树欲迎霜。千家万户笙歌发，十里江山白鸟翔。  
共贺安人丰乐岁，幸陪珠履侍银章。

卷 600\_30 【劝酒】

武瓘

劝君金屈卮，满酌不须辞。花发多风雨，人生足别离。

卷 600\_31【感事（一作于漬诗，题云对花）】

武瓘

花开蝶满枝，花谢蝶还稀。惟有旧巢燕，主人贫亦归。

卷 600\_32【重归宜春偶成十六韵寄朝中知己】

袁皓

水香甘似醴，知是入袁溪。黄竹成丛密，青萝夹岸低。  
暖流鸕鶿戏，深树鹧鸪啼。黄犬惊迎客，青牛困卧泥。  
有村皆绩纺，无地不耕犁。乡曲多耆旧，逢迎尽杖藜。  
殷勤倾白酒，相劝有黄鸡。归老官知忝，还乡路不迷。  
直言干忌讳，权路耻依栖。拙学趋时态，闲思与牧齐。  
稻粮饶燕雀，江海溢鳬鷖。昔共逢离乱，今来息鼓鼙。  
恩仁沾品物，教化及雕题。上贡贞元禄，曾叨宠记批。  
何须归紫禁，便是到丹梯。珍重长安道，从今息马嘶。

卷 600\_33【及第后作】

袁皓

金榜高悬姓字真，分明折得一枝春。蓬瀛乍接神仙侣，

江海回思耕钓人。九万抟扶排羽翼，十年辛苦涉风尘。  
升平时节逢公道，不觉龙门是嶮津。

卷 600\_34 【重归宜春经过萍川题梵林寺】

袁皓

梵林遗址在松萝，四十年来两度过。泸水东奔彭蠡浪，  
萍川西注洞庭波。村烟不改居人换，官路无穷行客多。  
拖紫腰金成底事，凭阑惆怅欲如何。

卷 600\_35 【寄岳阳严使君】

袁皓

得意东归过岳阳，桂枝香惹蕊珠香。也知暮雨生巫峡，  
争奈朝云属楚王。万恨只凭期克手，寸心唯系别离肠。  
南亭宴罢笙歌散，回首烟波路渺茫。

卷 600\_36 【赋得郎官上应列宿】

公乘亿

北极伫文昌，南宫晓拜郎。紫泥乘帝泽，银印佩天光。

纬结三台侧，钩连四辅旁。佐商依传说，仕汉笑冯唐。  
委佩摇秋色，峨冠带晚霜。自然符列象，千古耀岩廊。

卷 600\_37 【春风扇微和】

公乘亿

丽日催迟景，和风扇早春。暖浮丹凤阙，韶媚黑龙津。  
澹荡迎仙杖，霏微送画轮。绿摇宫柳散，红待禁花新。  
舞席潜回雪，歌筵暗起尘。幸当阳候律，一顾及佳晨。

卷 600\_38 【赋得秋菊有佳色】

公乘亿

陶令篱边菊，秋来色转佳。翠攒千片叶，金剪一枝花。  
蕊逐蜂须乱，英随蝶翅斜。带香飘绿绮，和酒上乌纱。  
散漫摇霜彩，娇妍漏日华。芳菲彭泽见，更称在谁家。

卷 600\_39 【赋得临江迟来客】

公乘亿

江上晚沈沈，烟波一望深。向来殊未至，何处拟相寻。

柳结重重眼，萍翻寸寸心。暮山期共眺，寒渚待同临。  
北去鱼无信，南飞雁绝音。思君不可见，使我独愁吟。

卷 600\_40 【句】

公乘亿

十上十年皆落第，一家一半已成尘。

卷 600\_41 【九华山谣】

王季文

九华峥嵘占南陆，莲花擢本山半腹。翠屏横截万里天，  
瀑水落深千丈玉。云梯石磴入杳冥，俯看四极如中庭。  
丹崖压下庐霍势，白日隐出牛斗星。杉松一岁抽数尺，  
琼草夤缘秀层壁。南风拂晓烟雾开，满山葱蒨铺鲜碧。  
雷霆往往从地发，龙卧豹藏安可别。峻极遥看戛昊苍，  
挺生岂得无才杰。神仙惮险莫敢登，驭风驾鹤循丘陵。  
阳乌不见峰顶树，大火尚结岩中冰。灵光爽气曛复旭，  
晴天倒影西江绿。具区彭蠡夹两旁，正可别作当少阳。



卷 600\_42 【青出蓝】

王季文

芳蓝滋匹帛，人力半天经。浸润加新气，光辉胜本青。  
还同冰出水，不共草为萤。翻覆依襟上，偏知造化灵。

卷 600\_43 【题青龙精舍】

卢骈

寿夭虽云命，荣枯亦大偏。不知雷氏剑，何处更冲天。

卷 600\_44 【感事】

王镣

击石易得火，扣人难动心。今日朱门者，曾恨朱门深。

卷 600\_45 【退朝望终南山】

李拯

紫宸朝罢缀鸳鸾，丹凤楼前驻马看。

惟有终南山色在，晴明依旧满长安。

卷 600\_46 【月中桂树】

顾封人

芬馥天边桂，扶疏在月中。能齐大椿长，不与小山同。  
皎皎舒华色，亭亭丽碧空。亏盈宁委露，摇落不关风。  
岁晚花应发，春余质讵丰。无因遂攀赏，徒欲望青葱。

卷 600\_47 【和陆鲁望白菊】

司马都

耻共金英一例开，素芳须待早霜催。绕篱看见成瑶圃，  
泛酒须迷傍玉杯。映水好将蘋作伴，犯寒疑与雪为媒。  
夫君每尚风流事，应为徐妃致此栽。

卷 600\_48 【送羊振文先辈往桂阳归觐】

司马都

此去欢荣冠士林，离筵休恨酒杯深。云梯万仞初高步，  
月桂余香尚满襟。鸣棹晓冲苍霭发，落帆寒动白华吟。  
君家祖德惟清苦，却笑当时问绢心。

## 第六百零一卷

### 卷 601\_1 【书边事（一作书边行事，一作塞上行）】

李昌符

朔野烟尘起，天军又举戈。阴风向晚急，杀气入秋多。  
树尽禽栖草，冰坚路在河。汾阳无继者，羌虏肯先和。

### 卷 601\_2 【远归别墅（一作秋晚归故居）】

李昌符

马省曾行处，连嘶渡晚河。忽惊乡树出，渐识路人多。  
细径穿禾黍，颓垣压薜萝。乍归犹似客，邻叟亦相过。

### 卷 601\_3 【题友人屋】

李昌符

松底诗人宅，闲门远岫孤。数家分小径，一水截平芜。

竹节偶相对，鸟名多自呼。爱君真静者，欲去又踟蹰。

卷 601\_4 【赠同游】

李昌符

此来风雨后，已觉减年华。若待皆无事，应难更有花。  
管弦临夜急，榆柳向江斜。且莫看归路，同须醉酒家。

卷 601\_5 【送人出塞】

李昌符

北风吹雨雪，举目已凄凄。战鬼秋频哭，征鸿夜不栖。  
沙平关路直，碛广郡楼低。此去非东鲁，人多事鼓鼙。

卷 601\_6 【寻僧元皎因赠】

李昌符

此生迷有著，因病得寻师。话尽山中事，归当月上时。  
高松连寺影，亚竹入窗枝。闲忆草堂路，相逢非素期。

卷 601\_7 【下第后蒙侍郎示意指于新先辈宣恩感谢】

李昌符

才薄命如此，自嗟兼自疑。遭逢好文日，黜落至公时。  
倚玉甘无路，穿杨却未期。更惭君侍坐，问许可言诗。

卷 601\_8 【夜泊渭津】

李昌符

飘飘东去客，一宿渭城边。远处星垂岸，中流月满船。  
凉归夜深簟，秋入雨余天。渐觉家山小，残程尚几年。

卷 601\_9 【晚夏逢友人】

李昌符

一别同袍友，相思已十年。长安多在客，久病忽闻蝉。  
骤雨才沾地，阴云不遍天。微凉堪话旧，移榻晚风前。

卷 601\_10 【秋中夜坐】

李昌符

空庭吟坐久，爽气入荷衣。病叶先秋落，惊禽背月飞。  
瘴云晴未散，戍客老将依。为应金门策，多应说战机。

卷 601\_11 【旅游伤春】

李昌符

酒醒乡关远，迢迢听漏终。曙分林影外，春尽雨声中。  
鸟思江村路，花残野岸风。十年成底事，羸马倦西东。

卷 601\_12 【得远书】

李昌符

故人居谪宦，今日一书来。良久惊兼喜，殷勤卷更开。  
瘴云沉去雁，江雨促新梅。满纸殊乡泪，非冤不可哀。

卷 601\_13 【赠同席】

李昌符

四座列吾友，满园花照衣。一生知几度，后到拟先归。  
急管侵诸乐，严城送落晖。当欢莫离席，离席却欢稀。

卷 601\_14 【赠供奉僧玄观】

李昌符

自得曹溪法，诸经更不看。已降禅侣久，兼作帝师难。  
夜木侵檐黑，秋灯照雨寒。如何嫌有著，一念在林峦。

卷 601\_15 【送琴客】

李昌符

楚客抱离思，蜀琴留恨声。坐来新月上，听久觉秋生。  
夜静骚人语，天高别鹤鸣。因君兴一叹，竟夕意难平。

卷 601\_16 【别谪者】

李昌符

此地闻犹恶，人言是所之。一家书绝久，孤驿梦成迟。  
八月三湘道，闻猿冒雨时。不须祠楚相，臣节转堪疑。

卷 601\_17 【行思】

李昌符

千里岂云去，欲归如路穷。人间无暇日，马上又秋风。  
破月衔高岳，流星拂晓空。此时皆在梦，行色独匆匆。

卷 601\_18 【感怀题从舅宅】

李昌符

郗家庭树下，几度醉春风。今日花还发，当时事不同。  
流言应未息，直道竟难通。徒遣相思者，悲歌向暮空。



卷 601\_19 【与友人会】

李昌符

蝉吟槐蕊落，的的是愁端。病觉离家远，贫知处事难。  
真交无所隐，深语有余欢。未必闻歌吹，羁心得暂宽。

卷 601\_20 【赠春游侣】

李昌符

密林多暗香，轻吹送余芳。啼鸟愁春尽，游人喜日长。  
浮云横暮色，新雨洗韶光。欲散垂□恨，应须入醉乡。

卷 601\_21 【送人游边】

李昌符

愁指萧关外，风沙入远程。马行初有迹，雨落竟无声。  
地理全归汉，天威不在兵。西京逢故老，暗喜复时平。

卷 601\_22 【寄栖白上人】

李昌符

剪发兼成隐，将心更属文。无嫌对豪客，不拜谒吾君。  
画壁惟泉石，经窗半典坟。归林幽鸟狎，乞食病僧分。  
默坐终清夜，凝思念碧云。相逢应未卜，余正走嚣氛。

卷 601\_23 【送人入新罗使】

李昌符

鸡林君欲去，立册付星轺。越海程难计，征帆影自飘。  
望乡当落日，怀阙羨回潮。宿雾蒙青嶂，惊波荡碧霄。  
春生阳气早，天接祖州遥。愁约三年外，相迎上石桥。

卷 601\_24 【咏铁马鞭】

李昌符

汉将临流得铁鞭，鄂侯名字旧雕镌。须为圣代无双物，  
肯逐将军卧九泉。汗马不侵诛虏血，神功今见补亡篇。  
时来终荐明君用，莫叹沉埋二百年。

卷 601\_25 【送友人】

李昌符

举世谁能与事期，解携多是正欢时。人间不遣有名利，  
陌上始应无别离。晚渡待船愁立久，乱山投店独行迟。  
我今漂泊还如此，江剑相逢亦未知。

卷 601\_26 【南潭】

李昌符

匝岸青芜掩古苔，面山亭树枕潭开。有时弦管收筵促，  
无数凫鹥逆浪来。路入龙祠群木老，风惊渔艇一声回。  
人传郭恽多游此，谁见当初泛玉杯。

卷 601\_27 【秋夜作】

李昌符

数亩池塘近杜陵，秋天寂寞夜云凝。芙蓉叶上三更雨，  
蟋蟀声中一点灯。迹避险巇翻失路，心归闲淡不因僧。  
既逢上国陈诗日，长守林泉亦未能。

卷 601\_28 【客恨】

李昌符

古原南北旧萧疏，高木风多小雪余。半夜病吟人寝后，  
百年闲事酒醒初。频招兄弟同佳节，已有兵戈隔远书。  
肥马王孙定相笑，不知岐路厌樵渔。

卷 601\_29 【三月尽日】

李昌符

江头从此管弦稀，散尽游人独未归。  
落日已将春色去，残花应逐夜风飞。

卷 601\_30 【绿珠咏】

李昌符

洛阳佳丽与芳华，金谷园中见百花。  
谁遣当年坠楼死，无人巧笑破孙家。

卷 601\_31 【赠别】

李昌符

又将书剑出孤舟，尽日停桡结远愁。  
莫道江波话离别，江波一去不回流。

卷 601\_32 【闷书】

李昌符

病来难处早秋天，一径无人树有蝉。  
归计未成书半卷，中宵多梦昼多眠。

卷 601\_33 【伤春】

李昌符

即是春风尽，仍沾夜雨归。明朝更来此，兼恐落花稀。

卷 601\_34 【登临洮望萧关】

李昌符

渐觉风沙暗，萧关欲到时。儿童能探火，妇女解缝旗。

· 全唐诗 ·

---

川少衔鱼鹭，林多带箭麋。暂来戎马地，不敢苦吟诗。

## 第六百零二卷

### 卷 602\_1 【彭泽】

汪遵

鹤爱孤松云爱山，宦情微禄免相关。  
栽成五柳吟归去，漉酒巾边伴菊闲。

### 卷 602\_2 【杜邮馆】

汪遵

杀尽降兵热血流，一心犹自逞戈矛。  
功成若解求身退，岂得将军死杜邮。

### 卷 602\_3 【细腰宫】

汪遵

鼓声连日烛连宵，贪向春风舞细腰。

争奈君王正沈醉，秦兵江上促征桡。

卷 602\_4 【瑶台】

汪遵

仙梦香魂不久留，满川云雨满宫愁。  
直须待得荆王死，始向瑶台一处游。

卷 602\_5 【吴坂】

汪遵

蹉跎盐车万里蹄，忽逢良鉴始能嘶。  
不缘伯乐称奇骨，几与驽骀价一齐。

卷 602\_6 【箕山】

汪遵

薄世临流洗耳尘，便归云洞任天真。  
一瓢风入犹嫌闹，何况人间万种人。



卷 602\_7 【息国】

汪遵

家国兴亡身独存，玉容还受楚王恩。  
衔冤只合甘先死，何待花间不肯言。

卷 602\_8 【梁寺】

汪遵

立国从来为战功，一朝何事却谈空。  
台城兵匝无人敌，闲卧高僧满梵宫。

卷 602\_9 【南阳】

汪遵

陆困泥蟠未适从，岂妨耕稼隐高踪。  
若非先主垂三顾，谁识茅庐一卧龙。

卷 602\_10 【杞梁墓】

汪遵

一叫长城万仞摧，杞梁遗骨逐妻回。  
南邻北里皆孀妇，谁解坚心继此来。

卷 602\_11 【夷门】

汪遵

晋鄙兵回为重难，秦师收旆亦西还。  
今来不是无朱亥，谁降轩车问抱关。

卷 602\_12 【汴河】

汪遵

隋皇意欲泛龙舟，千里昆仑水别流。  
还待春风锦帆暖，柳阴相送到迷楼。

卷 602\_13 【燕台】

汪遵

礼士招贤万古名，高台依旧对燕城。  
如今寂寞无人上，春去秋来草自生。

卷 602\_14 【聊城】

汪遵

刃血攻聊已越年，竟凭儒术罢戈鋌。  
田单漫逞烧牛计，一箭终输鲁仲连。

卷 602\_15 【西河】

汪遵

花貌年年溺水滨，俗传河伯娶生人。  
自从明宰投巫后，直至如今鬼不神。

卷 602\_16 【密县】

汪遵

百里能将济猛宽，飞蝗不到邑人安。  
至今闾里逢灾沴，犹祝当时卓长官。

卷 602\_17 【升仙桥】

汪遵

题桥贵欲露先诚，此日人皆笑率情。  
应讶临邛沽酒客，逢时还作汉公卿。

卷 602\_18 【破陈】

汪遵

猎猎朱旗映彩霞，纷纷白刃入陈家。  
看看打破东平苑，犹舞庭前玉树花。

卷 602\_19 【白头吟】

汪遵

失却青丝素发生，合欢罗带意全轻。  
古今人事皆如此，不独文君与马卿。

卷 602\_20 【短歌吟】

汪遵

箭飞乌兔竞东西，贵贱贤愚不梦齐。  
匣里有琴樽有酒，人间便是武陵溪。

卷 602\_21 【晋河】

汪遵

风引征帆管吹高，晋君张宴俟雄豪。  
舟人笑指千余客，谁是烟霄六翮毛。

卷 602\_22 【干将墓】

汪遵

橐籥冰霜万古闻，拍灰松地见余坟。  
应缘神剑飞扬久，水水山山尽是云。

卷 602\_23 【金谷】

汪遵

晋臣荣盛更谁过，常向阶前舞翠娥。  
香散艳消如一梦，但留风月伴烟萝。

卷 602\_24 【三闾庙】

汪遵

为嫌朝野尽陶陶，不觉官高怨亦高。  
憔悴莫酬渔父笑，浪交千载咏离骚。

卷 602\_25 【易水】

汪遵

匕首空磨事不成，误留龙袂待琴声。  
斯须却作秦中鬼，青史徒标烈士名。

卷 602\_26 【严陵台】

汪遵

一钓凄凉在杳冥，故人飞诏入山扃。  
终将宠辱轻轩冕，高卧五云为客星。

卷 602\_27 【淮阴】

汪遵

秦季贤愚混不分，只应漂母识王孙。  
归荣便累千金赠，为报当时一饭恩。

卷 602\_28 【鸡鸣曲】

汪遵

金距花冠傍舍栖，清晨相叫一声齐。  
开关自有冯生计，不必天明待汝啼。

卷 602\_29 【采桑妇】

汪遵

为报踟蹰陌上郎，蚕饥日晚妾心忙。  
本来若爱黄金好，不肯携笼更采桑。

卷 602\_30 【渔父】

汪遵

棹月眠流处处通，绿蓑苇带混元风。  
灵均说尽孤高事，全与逍遥意不同。



卷 602\_31 【越女】

汪遵

玉貌何曾为浣沙，只图勾践献夫差。  
苏台日夜唯歌舞，不觉干戈犯翠华。

卷 602\_32 【望思台】

汪遵

不忧家国任奸臣，骨肉翻为募路人。  
巫蛊事行冤莫雪，九层徒筑见无因。

卷 602\_33 【比干墓】

汪遵

国乱时危道不行，忠贤谏死胜谋生。  
一沉冤骨千年后，垄水虽平恨未平。

卷 602\_34 【郢中】

汪遵

莫言白雪少人听，高调都难称俗情。  
不是楚词询宋玉，巴歌犹掩绕梁声。

卷 602\_35 【北海】

汪遵

汉臣曾此作縲囚，茹血衣毛十九秋。  
鹤发半垂龙节在，不闻青史说封侯。

卷 602\_36 【招屈亭】

汪遵

三闾溺处杀怀王，感得荆人尽缞裳。  
招屈亭边两重恨，远天秋色暮苍苍。

卷 602\_37 【屈祠】

汪遵

不肯迂回入醉乡，乍吞忠梗没沧浪。  
至今祠畔猿啼月，了了犹疑恨楚王。

卷 602\_38 【铜雀台】

汪遵

铜雀台成玉座空，短歌长袖尽悲风。  
不知仙驾归何处，徒遣颦眉望汉宫。

卷 602\_39 【斑竹祠】

汪遵

九处烟霞九处昏，一回延首一销魂。  
因凭直节流红泪，图得千秋见血痕。

卷 602\_40 【题李太尉平泉庄】

汪遵

水泉花木好高眠，嵩少纵横满目前。  
惆怅人间不平事，今朝身在海南边。

卷 602\_41 【战城南】

汪遵

风沙刮地塞云愁，平旦交锋晚未休。  
白骨又沾新战血，青天犹列旧旄头。

卷 602\_42 【延平津】

汪遵

三尺晶荧射斗牛，岂随凡手报冤雠。  
延平一旦为龙处，看取风云布九州。

卷 602\_43 【项亭】

汪遵

不修仁德合文明，天道如何拟力争。  
隔岸故乡归不得，十年空负拔山名。

卷 602\_44 【乌江】

汪遵

兵散弓残挫虎威，单枪匹马突重围。  
英雄去尽羞容在，看却江东不得归。

卷 602\_45 【绿珠】

汪遵

大抵花颜最怕秋，南家歌歇北家愁。  
从来几许如君貌，不肯如君坠玉楼。

卷 602\_46 【升仙桥】

汪遵

汉朝卿相尽风云，司马题桥众又闻。  
何事不如杨得意，解搜贤哲荐明君。

卷 602\_47 【隋柳】

汪遵

夹浪分堤万树余，为迎龙舸到江都。  
君看靖节高眠处，只向衡门种五株。

卷 602\_48 【杨柳】

汪遵

亚夫营畔柳濛濛，隋主堤边四路通。  
攀折赠君还有意，翠眉轻嫩怕春风。

卷 602\_49 【桐江】

汪遵

光武重兴四海宁，汉臣无不受浮荣。  
严陵何事轻轩冕，独向桐江钓月明。

卷 602\_50 【招隐】

汪遵

罢听泉声看鹿群，丈夫才策合匡君。  
早携书剑离岩谷，莫待蒲轮辗白云。

卷 602\_51 【陈宫】

汪遵

椒宫荒宴竟无疑，倏忽山河尽入隋。  
留得后庭亡国曲，至今犹与酒家吹。

卷 602\_52 【樊将军庙】

汪遵

玉辇曾经陷楚营，汉皇心怯拟休兵。  
当时不得将军力，日月须分一半明。

卷 602\_53 【东海】

汪遵

漾舟雪浪映花颜，徐福携将竟不还。  
同作危时避秦客，此行何似武陵滩。

卷 602\_54 【昭君】

汪遵

汉家天子镇寰瀛，塞北羌胡未罢兵。  
猛将谋臣徒自贵，蛾眉一笑塞尘清。



卷 602\_55 【五湖】

汪遵

已立平吴霸越功，片帆高扬五湖风。  
不知战国官荣者，谁似陶朱得始终。

卷 602\_56 【浣池】

汪遵

西秦北赵各称高，池上张筵列我曹。  
何事君王亲击缶，相如有剑可吹毛。

卷 602\_57 【函谷关】

汪遵

脱祸东奔壮气摧，马如飞电毂如雷。  
当时若不听弹铗，那得关门半夜开。

卷 602\_58 【咏酒二首】

汪遵

九酝松醪一曲歌，本图闲放养天和。  
后人不识前贤意，破国亡家事甚多。

万事销沈向一杯，竹门哑轧为风开。  
秋宵睡足芭蕉雨，又是江湖入梦来。

卷 602\_59 【苍颉台】

汪遵

观迹成文代结绳，皇风儒教浩然兴。  
几人从此休耕钓，吟对长安雪夜灯。

卷 602\_60 【长城】

汪遵

秦筑长城比铁牢，蕃戎不敢过临洮。  
虽然万里连云际，争及尧阶三尺高。

## 第六百零三卷

### 卷 603\_1 【过洞庭湖】

许棠

惊波常不定，半日鬓堪斑。四顾疑无地，中流忽有山。  
鸟高恒畏坠，帆远却如闲。渔父闲相引，时歌浩渺间。

### 卷 603\_2 【登渭南县楼】

许棠

近甸名偏著，登城景又宽。半空分太华，极目是长安。  
雪助河流涨，人耕烧色残。闲来时甚少，欲下重凭栏。

### 卷 603\_3 【送李频之南陵主簿】

许棠

赴县是还乡，途程岂觉长。听莺离灞岸，荡桨入陵阳。

野蕨生公署，闲云拂印床。晴天调膳外，垂钓有池塘。

卷 603\_4 【写怀】

许棠

汨没与辛勤，全钟在此身。半生为下客，终老托何人。  
两鬓关中改，千岩海上春。青云知有路，自是致无因。

卷 603\_5 【过中条山】

许棠

徒为经异岳，不得访灵踪。日尽行难尽，千重复万重。  
云垂多作雨，雷动半和钟。孤竹人藏处，无因认本峰。

卷 603\_6 【早发洛中】

许棠

半夜发清洛，不知过石桥。云增中岳大，树隐上阳遥。  
蜃黑初沉月，河明欲认潮。孤村人尚梦，无处暂停桡。

卷 603\_7 【汝州郡楼望嵩山】

许棠

不共众山同，峩峩出迥空。几层高鸟外，万仞一楼中。  
水落难归地，云篱便逐风。唯应霄汉客，绝顶路方通。

卷 603\_8 【将归江南留别友人】

许棠

连春不得意，所业已疑非。旧国乱离后，新年惆怅归。  
雪开还楚地，花惹别秦衣。江徼多留滞，高秋会恐违。

卷 603\_9 【塞外书事】

许棠

征路出穷边，孤吟傍戍烟。河光深荡塞，碛色迥连天。  
残日沉雕外，惊蓬到马前。空怀钓鱼所，未定卜归年。

卷 603\_10 【日暮江上】

许棠

孤帆收广岸，落照在遥峰。南北渡人少，高低归鸟重。  
潮回沙出树，雨过浦沉钟。渔父虽相问，那能话所从。

卷 603\_11 【客行】

许棠

旅食唯草草，此生谁我同。故园魂梦外，长路别离中。  
人事萍随水，年光鸟过空。欲吟先落泪，多是怨途穷。

卷 603\_12 【送李员外知扬子州留务（一作后）】

许棠

帝命分留务，东南向楚天。几程回送骑，中路见迎船。  
冶例开山铸，民多酌海煎。青云名素重，此去岂经年。

卷 603\_13 【春暮途次华山下】

许棠

他皆宴牡丹，独又出长安。远道行非易，无图住自难。  
离城风已暖，近岳雨翻寒。此去知谁顾，闲吟只自宽。

卷 603\_14 【旅次滑台投献陆侍御】

许棠

已是鸿来日，堪惊却背秦。天遥三楚树，路远两河人。  
旅梦难归隐，吟魂不在身。霜台歆冠豸，赖许往来频。

卷 603\_15 【重归江南】

许棠

无成归故里，不似在他乡。岁月逐流水，山川空夕阳。  
回潮迷古渡，进竹过邻墙。耆旧休存省，胡为止泪行。

卷 603\_16 【寄黔南李校书】

许棠

从戎巫峡外，吟兴更应多。郡响蛮江涨，山昏蜀雨过。  
公筵饶越味，俗土尚巴歌。中夜怀吴梦，知经滟滪波。

卷 603\_17 【东归留辞沈侍郎】

许棠

一第久乖期，深心已自疑。沧江归恨远，紫阁别愁迟。  
稽古成何事，龙钟负已知。依门非近日，不虑旧恩移。

卷 603\_18 【题开明里友人居】

许棠

城中尘外住，入望是田家。井出深山水，阑藏异国花。  
风巢和鸟动，雪竹向人斜。来往唯君熟，乡园共海涯。



卷 603\_19 【遣怀】

许棠

此生何处遂，屑屑复悠悠。旧国归无计，他乡梦亦愁。  
飞尘长满眼，衰发暗添头。章句非经济，终难动五侯。

卷 603\_20 【送龙州樊使君】

许棠

曾见邛人说，龙州地未深。碧溪飞白鸟，红旆映青林。  
土产唯宜药，王租只贡金。政成开宴日，谁伴使君吟。

卷 603\_21 【寄盩厔薛能少府】

许棠

满县唯云水，何曾似近畿。晓庭猿集惯，寒署吏衙稀。  
冰色封深涧，樵声出紫微。时闻迎隐者，依旧著山衣。

卷 603\_22 【送李左丞巡边】

许棠

狂戎侵内地，左辖去萧关。走马冲边雪，鸣鞞动塞山。  
风收枯草定，月满广沙闲。西绕河兰匝，应多隔岁还。

卷 603\_23 【题青山馆（即谢公旧居）】

许棠

境概殊诸处，依然是谢家。遗文齐日月，旧井照烟霞。  
水隔平芜远，山横度鸟斜。无人能此隐，来往谩兴嗟。

卷 603\_24 【雁门关野望】

许棠

高关闭独望，望久转愁人。紫塞唯多雪，胡山不尽春。  
河遥分断野，树乱起飞尘。时见东来骑，心知近别秦。

卷 603\_25 【五原书事】

许棠

西出黄云外，东怀白浪遥。星河愁立夜，雷电独行朝。  
磧迴人防寇，天空雁避雕。如何非战卒，弓箭不离腰。

卷 603\_26 【送从弟归泉州】

许棠

问省归南服，悬帆任北风。何山犹见雪，半路已无鸿。  
瘴杂春云重，星垂夜海空。往来如不住，亦是一年中。

卷 603\_27 【留别故人】

许棠

殊立本不偶，非唯今所难。无门闲共老，尽日泣相看。  
鸟畏闻鶗鴂，花惭背牡丹。何人知此计，复议出长安。

卷 603\_28 【塞下二首】

许棠

胡虏偏狂悍，边兵不敢闲。防秋朝伏弩，纵火夜搜山。  
雁逆风鼙振，沙飞猎骑还。安西虽有路，难更出阳关。

征役已不定，又缘无定河。塞深烽砦密，山乱犬羊多。  
汉卒闻笳泣，胡儿击剑歌。番情终未测，今昔谩言和。

卷 603\_29 【题张乔升平里居】

许棠

下马似无人，开门只一身。心同孤鹤静，行过老僧真。  
乱水藏幽径，高原隔远津。匡庐曾共隐，相见自相亲。

卷 603\_30 【题郑拾遗南斋】

许棠

明时无事谏，岂是隐明君。每值离丹陛，多陪宴白云。  
门连萧洞僻，地与曲江分。满院皆怪竹，期栖鸾鹤群。

卷 603\_31 【渭上送人南归】

许棠

远役与归愁，同来渭水头。南浮应到海，北去阻无州。  
楚雨天连地，胡风夏甚秋。江人如见问，为话复贫游。

卷 603\_32 【寄睦州陆（一作侯）郎中（一作寄陆睦州）】

许棠

下国多高趣，终年半是吟。海涛通越分，部伍杂闽音。  
晓郭云藏市，春山鸟护林。东浮虽未遂，日日至中心。

卷 603\_33 【投徐端公】

许棠

无谋寻旧友，强喜亦如愁。丹桂阻丹恳，白衣成白头。  
穷吴迷钓业，大汉事贫游。霄汉期提引，龙钟未拟休。

卷 603\_34 【出塞门】

许棠

步步经戎虏，防兵不离身。山多曾战处，路断野行人。  
暴雨声同瀑，奔沙势异尘。片时怀万虑，白发数茎新。

卷 603\_35 【新年呈友】

许棠

一月月相似，一年年不同。清晨窥古镜，旅貌近衰翁。  
处世闲难得，关身事半空。浮生能几许，莫惜醉春风。

卷 603\_36 【银州北书事】

许棠

南辞采石远，北背乞银深。磧路虽多险，江人不废吟。  
雕依孤堠立，鸥向迥沙沈。因共边人熟，行行起战心。

卷 603\_37 【寄赵能卿】

许棠

我命同君命，君诗似我诗。俱无中道计，各失半生期。  
素业沧江远，清时白发垂。蹉跎一如此，何处卜栖迟。

卷 603\_38 【夏州道中】

许棠

茫茫沙漠广，渐远赫连城。堡迥烽相见，河移浪旋生。  
无蝉嘶折柳，有寇似防兵。不耐饥寒迫，终谁至此行。

卷 603\_39 【经故杨太尉旧居】

许棠

在汉信垂功，于唐道更隆。一川留古迹，多代仰高风。  
树折巢堕鸟，阶荒草覆虫。行人过岂少，独驻夕阳中。

卷 603\_40 【东归次采石江】

许棠

东下经牛渚，依然是故关。客程临岸尽，乡思入鸥闲。  
雨涨巴来浪，云增楚际山。渔翁知未达，相顾不开颜。

卷 603\_41 【陇上书事】

许棠

城叠连云壑，人家似隐居。树飞鹦鹉众，川下鹧鸪疏。  
滴梦关山雨，资餐陇水鱼。谁知江徼客，此景倍相于。

卷 603\_42 【陈情献江西李常侍五首】

许棠

二十二三年，游秦复滞燕。徒陪群彦后，自苦此生前。  
径折啼猿树，岩荒喷月泉。东堂曾受荐，垂白志犹坚。

淅淅复栖栖，人间只自迷。终年愁远道，到老去何蹊。  
始见红叶落，又闻黄鸟啼。不因趋大旆，谁肯暂提携。



童蒙即苦辛，未识杏园春。谩倚无为日，还成不偶人。  
乡程长恨远，旅梦亦愁贫。天地虽云广，殊难寄此身。

春闱久已滞，秋赋又逢停。选士疑长阻，伤时自不宁。  
秦城还逐梦，楚徼影随形。此去吟虽苦，何人更肯听。

孤立时全塞，求名势转难。身多离下国，分合阻长安。  
越鸟啼春早，蛮花送雨寒。丘门沾顾重，未别欲阑干。

卷 603\_43 【经八合坂】

许棠

蹊险入高空，初疑势不穷。又缘千嶂尽，还共七盘同。  
下辨东流水，平随北去鸿。天然无此道，应免患穷通。

卷 603\_44 【送友人北游】

许棠

北出阴关去，何人肯待君。无青山拥晋，半浊水通汾。  
雁塞虽多雁，云州却少云。兹游殊不恶，莫恨暂离群。

卷 603\_45 【登凌歊台】

许棠

平芜望已极，况复倚凌歊。江截吴山断，天临楚泽遥。  
云帆高出树，水市迥分桥。立久斜阳尽，无言似寂寥。

卷 603\_46 【曲江三月三日】

许棠

满国赏芳辰，飞蹄复走轮。好花皆折尽，明日恐无春。  
鸟避连云幄，鱼惊远浪尘。如何当此节，独自作愁人。

卷 603\_47 【赠栖白上人】

许棠

闲身却不闲，日日对天颜。已住城中寺，难归海上山。  
诗传华夏外，偈布市朝间。欲问空门事，空门岂有关。

卷 603\_48 【野步】

许棠

闲赏步易远，野吟声自高。路无人到迹，林有鹤遗毛。  
物外趣都别，尘中心枉劳。沿溪收堕果，坐石唤饥猱。

卷 603\_49 【过湍沟（一作浦）谷】

许棠

西去穷胡处，岩崖境不常。石形相对耸，天势一条长。  
栈底鸣流水，林端敛夕阳。虽随兵马至，未免畏豺狼。

卷 603\_50 【送友人游蜀（一本无友字）】

许棠

巴兴千万寻，此去若为心。蟋蟀既将定，弥猴应正吟。  
剑门秋断雁，褒谷夜多砧。自古西南路，艰难直至今。

卷 603\_51 【题秦州城】

许棠

圣泽滋遐徼，河堤四向通。大荒收虏帐，遗土复秦风。  
乱烧迷归路，遥山似梦中。此时怀感切，极目思无穷。

卷 603\_52 【寄敬亭山清越上人】

许棠

南朝山半寺，谢朓故乡邻。岭上非无主，秋诗复有人。  
高禅星月近，野火虎狼驯。旧许陪闲社，终应待此身。

卷 603\_53 【秋江霁望】

许棠

高秋偏入望，霁景倍关情。落木满江水，离人怀渭城。  
山高孤戍断，野极暮天平。渔父时相问，羞真道姓名。

卷 603\_54 【陇州旅中（一作舍）书事寄李中丞】

许棠

三伏客吟过，长安未拟还。蛩声秋不动，燕别思仍闲。  
乱叶随寒雨，孤蟾起暮关。经时高岭外，来往旆旌间。

卷 603\_55 【秋日归旧山】

许棠

山云蝉满树，欲住更何安。上国回将晚，孤峰别自难。  
磧遥鸿未到，江近夜先寒。泉石虽堪恋，行人不愿看。

卷 603\_56 【下黄耳盘】

许棠

独下黄盘路，多虞部落连。云晴仍著地，树古自参天。  
乱鸟飞人上，惊麋起马前。行行无郡邑，唯见虎狼烟。

卷 603\_57 【旅怀】

许棠

终年唯旅舍，只似已无家。白发除还出，丹青去转赊。  
夏游穷塞路，春醉负秦花。应是穹苍意，空教老若耶。

卷 603\_58 【题金山寺】

许棠

四面波涛匝，中楼日月邻。上穷如出世，下瞰忽惊神。  
刹碍长空鸟，船通外国人。房房皆叠石，风扫永无尘。

卷 603\_59 【送王侍御（一作郎）赴宣城】

许棠

朝回离九陌，岛外赏残春。经宿留闲客，看云作主人。  
时清难议隐，位重亦甘贫。岩洞真仙境，应休别卧邻。

卷 603\_60 【题汧湖二首】

许棠

偶得湖中趣，都忘陇坻愁。边声风下雁，楚思浪移舟。  
静极亭连寺，凉多岛近楼。吟游终不厌，还似曲江头。

陇首时无事，湖边日纵吟。游鱼来复去，浴鸟出还沉。  
蜃气藏孤屿，波光到远林。无人见垂钓，暗起洞庭心。

卷 603\_61 【宿青山馆】

许棠

下马青山下，无言有所思。云藏李白墓，苔暗谢公诗。  
烈烧飞荒野，栖鳧宿广陂。东来与西去，皆是不闲时。

卷 603\_62 【宿同州厉评事旧业寄华下】

许棠

从戎依远地，无日见家山。地近风沙处，城当甸服间。  
阻河通渭水，曲苑带秦关。待月登楼夜，何人相伴闲。

卷 603\_63 【闻蝉十二韵】

许棠

造化生微物，常能应候鸣。初离何处树，又发去年声。  
未蜕唯愁动，才飞似解惊。闻来邻海徼，恨起过边城。  
骚屑随风远，悠扬类雪轻。报秋凉渐至，嘶月思偏清。  
互默疑相答，微摇似欲行。繁音人已厌，朽壳蚁犹争。  
朝士严冠饰，宫嫔逞鬓名。乱依西日噪，多引北归情。  
筱露凝潜吸，蛛丝忽进萦。此时吟立者，不觉万愁生。

卷 603\_64 【冬杪归陵阳别业五首】

许棠

无媒归别业，所向自乖心。闾里故人少，田园荒草深。  
浪翻全失岸，竹迸别成林。鸥鸟犹相识，时来听苦吟。

眠云终未遂，策马暂休期。上国劳魂梦，中心甚别离。  
冰封岩溜断，雪压砌松欹。骨肉嗟名晚，看归却泪垂。

学剑虽无术，吟诗似有魔。已贫甘事晚，临老爱闲多。  
鸡犬唯随鹿，儿童只衣蓑。时因寻野叟，狂醉复狂歌。

乡国乱离后，交亲半旅游。远闻诚可念，归见岂无愁。



败苇迷荒径，寒蓑没坏舟。衡门终不掩，倚杖看波流。

游秦复滞燕，不觉近衰年。旅貌同柴毁，行衣对骨穿。  
篱寒多啄雀，木落断浮烟。楚夜闻鸣雁，犹疑在塞天。

卷 603\_65 【送王侍御赴宣城】

许棠

戴豸却驱鸡，东南上句溪。路过金谷口，帆转石城西。  
水树连天暗，山禽绕郡啼。江人谙旧化，那复俟招携。

卷 603\_66 【春日乌延道中】

许棠

边穷厄未穷，复此逐归鸿。去路多相似，行人半不同。  
山川藏北狄，草木背东风。虚负男儿志，无因立战功。

卷 603\_67 【寄华阴刘拾遗】

许棠

坚心持谏诤，自古亦艰难。寄邑虽行化，眠云似去官。

河分中野断，岳入半天寒。瀑布冰成日，谁陪吟复看。

卷 603\_68 【忆江南】

许棠

南楚西秦远，名迟别岁深。欲归难遂去，闲忆自成吟。  
雷电闲倾雨，猿猱斗堕林。眠云机尚在，未忍负初心。

## 第六百零四卷

### 卷 604\_1 【送前汝州李侍御罢归宣城】

许棠

吟诗早得名，戴豸又加荣。下国闲归去，他人少此情。  
云移寒峤出，烧夹夜江明。重引池塘思，还登谢朓城。

### 卷 604\_2 【失题（一作送前汝州李侍御罢归宣城第二首，一作塞下曲）】

许棠

独夜长城下，孤吟近北辰。半天初去雁，穷磧远来人。  
月黯氛埃积，风膺帐幕邻。惟闻防虏寇，不语暗伤神。

### 卷 604\_3 【送裴拾遗宰下邳（一作赴畿令）】

许棠

受谪因廷谏，兹行不出关。直庐辞玉陛，上马向仙山。

地古桑麻广，城偏仆御闲。县斋高枕卧，犹梦犯天颜。

卷 604\_4 【隗嚣宫晚望】

许棠

西顾伊兰近，方惊滞极边。水随空谷转，山向夕阳偏。  
磧鸟多依地，胡云不满天。秋风动衰草，只觉犬羊膻。

卷 604\_5 【江上行】

许棠

片席随高鸟，连天积浪间。苇宽云不匝，风广雨无闲。  
戍影临孤浦，潮痕在半山。东原归未得，荏苒滞江关。

卷 604\_6 【登山】

许棠

信步上鸟道，不知身忽高。近空无世界，当楚见波涛。  
顶峭松多瘦，崖悬石尽牢。猕猴呼独散，隔水向人号。

卷 604\_7【哭宣城元征君（一作士）】

许棠

高眠终不起，远趣固难知。琴剑今无主，园林旧许谁？  
苔封僧坐石，苇涨鹤翘池。后代传青史，方钦道德垂。

卷 604\_8【寄建州姚员外】

许棠

诬谮遭遇谪，明君即自知。乡遥辞剑外，身独向天涯。  
岭堠蛮云积，闽空瘴雨垂。南来终不遂，日探北归期。

卷 604\_9【送厉校书从事凤翔】

许棠

赴辟依丞相，超荣事岂同。城池当陇右，山水是关中。  
日有来巴使，秋高出塞鸿。旬休随大旆，应到九成宫。

卷 604\_10 【春夜同厉文学先辈会宿】

许棠

江汉久分路，京关重聚吟。更为他夜约，方尽昔年心。  
月隔明河远，花藏宿鸟深。无眠将及曙，多是说山阴。

卷 604\_11 【长安书情】

许棠

疏散过闲人，同人不在秦。近来惊白发，方解惜青春。  
僻寺居将遍，权门到绝因。行藏如此辈，何以谓谋身？

卷 604\_12 【过故洛城】

许棠

七百数还穷，城池一旦空。夕阳唯照草，危堞不胜风。  
岸断河声别，田荒野色同。去来皆过客，何处问遗宫。

卷 604\_13 【寄庐山贾处士】

许棠

时泰亦高眠，人皆谓不然。穷经休望辟，饵术止期仙。  
彭蠡波涵月，炉峰雪照天。常闻风雨夜，到晓在渔船。

卷 604\_14 【下第东归留别郑侍郎】

许棠

无才副至公，岂是命难通？分合吟诗老，家宜逐浪空。  
别心悬阙下，归念极吴东。唯畏重回日，初情恐不同。

卷 604\_15 【泗上早发】

许棠

独起无人见，长河夜泛时。平芜疑自动，落月似相随。  
楚外离空早，关西去已迟。渔歌闻不绝，却軫洞庭思。

卷 604\_16 【赠天台僧】

许棠

赤城霞外寺，不忘旧登年。石上吟分海，楼中语近天。  
重游空有梦，再隐定无缘。独夜休行道，星辰静照禅。

卷 604\_17 【冬夜与友人会宿】

许棠

君初离雁塞，我久滞雕阴。隔闰俱劳梦，通宵各话心。  
禁风吹漏出，原树映星沉。白昼常多事，无妨到晓吟。

卷 604\_18 【送元遂上人归吴中】

许棠

落发在王畿，承恩著紫衣。印心谁受请，讲疏自携归。  
泛浦龙惊锡，禅云虎绕扉。吴中知久别，庵树想成围。



卷 604\_19 【赠志空上人】

许棠

了了在心中，南宗与北宗。行高无外染，骨瘦是真容。  
饭野盂埋雪，禅云杖倚松。常修不住性，必拟老何峰。

卷 604\_20 【边城晚望】

许棠

广漠杳无穷，孤城四面空。马行高碛上，日堕迥沙中。  
逼晓人移帐，当川树列风。迢迢河外路，知直去崆峒。

卷 604\_21 【汴上暮秋】

许棠

独立长堤上，西风满客衣。日临秋草广，山接远天微。  
岸叶随波尽，沙云与鸟飞。秦人宁有素，去意自知归。

卷 604\_22 【春日言怀】

许棠

东风万物新，独未到幽人。赋命自多蹇，阳和非不均。  
五陵三月暮，百越一家贫。早误闲眠处，无愁异此身。

卷 604\_23 【奉天寒食书事】

许棠

处处无烟火，人家似暂空。晓林花落雨，寒谷鸟啼风。  
故里芳洲外，残春甸服中。谁知独西去，步步泣途穷。

卷 604\_24 【长安寓居】

许棠

贫寄帝城居，交朋日自疏。愁迎离碛雁，梦逐出关书。  
经雨蝉声尽，兼风杵韵余。谁知江徼塞，所忆在樵渔。

卷 604\_25 【写怀】

许棠

此生居此世，堪笑复堪悲。在处有岐路，何人无别离？  
长当多难日，愁过少年时。穷达都判了，休闲镊白髭。

卷 604\_26 【白菊】

许棠

所尚雪霜姿，非关落帽期。香飘风外别，影到月中疑。  
发在林凋后，繁当露冷时。人间稀有此，自古乃无诗。

卷 604\_27 【中秋夜对月】

许棠

月月势皆圆，中秋朗最偏。万方期一夕，到晓是经年。  
影蔽星芒尽，光分物状全。惟应苦吟者，目断向遥天。

卷 604\_28 【陪郢州张员外宴白雪楼】

许棠

高情日日闲，多宴雪楼间。洒槛江干雨，当筵天际山。  
带帆分浪色，驻乐话朝班。岂料羈浮者，樽前得解颜。

卷 604\_29 【和（一作同）薛侍御题兴善寺松】

许棠

何年剏到城，满国响高名。半寺阴常匝，邻坊景亦清。  
代多无朽势，风定有余声。自得天然状，非同涧底生。

卷 604\_30 【题郑侍郎岩隐（一作隐岩）十韵】

许棠

朝退常归隐，真修大隐情。园林应得趣，岩谷自为名。  
野步难寻寺，闲吟少在城。树藏幽洞黑，花照远村明。  
海石分湖路，风泉递雨声。性高怜散逸，官达厌公卿。  
架引藤重长，阶延笋迸生。青门无到客，紫阁有来莺。  
物外身虽隐，区中望本清。终难依此境，坐卧避钧衡。

卷 604\_31 【宿灵兰若】

许棠

江心天半寺，一夕万缘空。地出浮云上，星摇积浪中。  
滴沔垂阁雨，吹桧送帆风。旦夕闻清磬，唯应是钓翁。

卷 604\_32 【亲仁里双鹭】

许棠

双去双来日已频，只应知我是江人。对欹雪顶思寻水，  
更振霜翎恐染尘。三楚几时初失侣，五陵何树又栖身。  
天然不与凡禽类，傍砌听吟性自驯。

卷 604\_33 【成纪书事二首】

许棠

东吴远别客西秦，怀旧伤时暗洒巾。满野多成无主冢，  
防边半是异乡人。山河再阔千余里，城市曾经一百春。  
闲与将军议戎事，伊兰犹未绝胡尘。

蹉跎远入犬羊中，荏苒将成白首翁。三楚田园归未得，

五原岐路去无穷。天垂大野雕盘草，月落孤城角啸风。  
难问开元向前事，依稀犹认隗嚣宫。

卷 604\_34 【秦中遇友人】

许棠

半生南走复西驰，愁过杨朱罢泣岐。远梦亦羞归海徼，  
贫游多是滞边陲。胡云不聚风无定，陇路难行栈更危。  
旦暮唯闻语征战，看看已欲废吟诗。

卷 604\_35 【过分水岭】

许棠

陇山高共鸟行齐，瞰险盘空甚蹊梯。云势崩腾时向背，  
水声呜咽若东西。风兼雨气吹人面，石带冰棱碍马蹄。  
此去秦川无别路，隔崖穷谷却难迷。

卷 604\_36 【讲德陈情上淮南李仆射八首】

许棠

天降贤人佐圣时，自然声教满华夷。英明不独中朝仰，

清重兼闻外国知。凉夜酒醒多对月，晓庭公退半吟诗。  
梁城东下虽经战，风俗犹传守旧规。

多朝轩冕冠乾坤，四海皆推圣最尊。楚玉已曾分卞玉，  
膺门依旧是龙门。筵开乐振高云动，城掩鞞收落日昏。  
尝念苍生如赤子，九州无处不沾恩。

未领春闱望早清，况联戎阃控强兵。风威遍布江山静，  
教化高同日月明。九郡竞歌兼煮海，四方皆得共和羹。  
东南自此全无事，只为期年政已成。

帝念淮壖疫疹频，牢笼山海委名臣。古来比德由无侣，  
当代同途岂有人。夜宴独吟梁苑月，朝游重见广陵春。  
多年疲瘵全苏息，须到讴谣日满秦。

三纪吟诗望一名，丹青待得白头成。已期到老还沾禄，  
无复偷闲却养生。当宴每垂听乐泪，望云长起忆山情。  
朱门旧是登龙客，初脱鱼鳞胆尚惊。

东来淮海拜旌旗，不把公卿一字书。曾侍晚斋吟对雪，  
又容华馆食兼鱼。孤微自省恩非次，际会谁知分有余。  
唯耻旧桥题处在，荣归无计似相如。

平生南北逐蓬飘，待得名成鬓已凋。寒浦一从抛钓艇，  
旧林无处认风飙。程途虽喜关河尽，时节犹惊骨肉遥。  
愁策羸蹄更归去，乱山流水满翻潮。

丹霄空把桂枝归，白首依前着布衣。当路公卿谁见待，  
故乡亲爱自疑非。东风乍喜还沧海，栖旅终愁出翠微。  
应念无媒居选限，二年须更守渔矶。

卷 604\_37 【献独孤尚书】

许棠

虚抛南楚滞西秦，白首依前衣白身。退鹬已经三十载，  
登龙曾见一千人。魂离为役诗篇苦，泪竭缘嗟骨相贫。  
今日鞠躬高旆下，欲倾肝胆杳无因。

卷 604\_38 【将过单于】

许棠

荒磧连天堡戍稀，日忧蕃寇却忘机。江山不到处皆到，  
陇雁已归时未归。行李亦须携战器，趋迎当便著戎衣。  
并州去路殊迢递，风雨何当达近畿。

卷 604\_39 【贞女祠】

许棠

何穴藏贞骨，荒祠见旧颜。精灵应自在，云雨不相关。



落石泉多咽，无风树尽闲。唯疑千古后，为瑞向人间。

卷 604\_40 【宿华山】

许棠

异境良难测，非仙岂合游。星辰方满岳，风雨忽移舟。  
喷月泉垂壁，栖松鹤在楼。因知修养处，不必在嵩丘。

卷 604\_41 【送张员外西川从事】

许棠

为郎不入朝，自是赴嘉招。豸角初离首，金章已在腰。  
剑横阴绿野，栈响近丹霄。迎驿应相续，悬愁去路遥。

卷 604\_42 【题慈恩寺元遂上人院】

许棠

竹槛匝回廊，城中似外方。月云开作片，枝鸟立成行。  
径接河源润，庭容塔影凉。天台频去说，谁占最高房。

卷 604\_43 【送杜仓曹往沧洲舘叔常侍】

许棠

浮阳横巨浸，南巷拥旌旆。别带秦城雨，行闻魏国蝉。  
磧鸿来每后，朝日见常先。东鄙云霞广，高林间水天。

卷 604\_44 【雕阴道中作】

许棠

五月绥州北，途程少郁蒸。马依膾草聚，人抱浊河澄。  
迹固长城垒，冤深太子陵。往来经此地，悲苦有谁能。

卷 604\_45 【留别从弟郴（一作琳）】

许棠

同承太岳胤，俱值太平时。丹陛怀趋计，沧洲负去期。  
久贫成蹭蹬，多病惜支离。宗分兼交分，吾知汝亦知。

卷 604\_46 【寻山】

许棠

蹑履复支筇，深山草木中。隔溪遥避虎，当坞忽闻钟。  
落叶多相似，幽禽半不同。群獠呼却散，如此异林翁。

卷 604\_47 【送徐侍御充南诏判官】

许棠

西去安夷落，乘轺从节行。彤庭传圣旨，异域化戎情。  
瘴路穷巴徼，蛮川过峽城。地偏风自杂，天漏月稀明。  
危栈连空动，长江到底清。笑宜防拂拂，言好听猩猩。  
抚论如敦行，归情自合盟。回期佩印绶，何更见新正。

卷 604\_48 【送省玄上人归江东】

许棠

释律周儒礼，严持用戒身。安禅思剌石，留偈别都人。  
雨合吴江黑，潮移海路新。瓶盂自此去，应不更还秦。

卷 604\_49 【送刘校书游东鲁】

许棠

内阁劳雠校，东邦忽纵游。才偏精二雅，分合遇诸侯。  
暗海龟蒙雨，连空赵魏秋。如经麟见处，驻马瞰荒丘。

卷 604\_50 【送金吾侍御奉使日东】

许棠

还乡兼作使，到日倍荣亲。向化虽多国，如公有几人。  
孤山无返照，积水合苍旻。膝下知难住，金章已系身。

卷 604\_51 【题甘露寺】

许棠

丹槛拂丹霄，人寰下瞰遥。何年增造化，万古出尘嚣。  
地势盘三楚，江声换几朝。满栏皆异药，到顶尽飞桥。  
泽广方云梦，山孤数沃焦。中宵霞始散，经腊木稀凋。  
铎动天风度，窗明海气消。带鰲分迴堞，当日辨翻潮。  
鸟去沉葭蒹，帆来映沆寥。浮生自多事，无计免回镳。

卷 604\_52 【冬夜怀真里友人会宿】

许棠

静语与高吟，搜神又爽心。各来依帝里，相对似山阴。  
漏永星河没，堂寒月彩深。从容不易到，莫惜曙钟侵。

卷 604\_53 【陪（一作同）友人夏夜对月】

许棠

后伏中宵月，高秋满魄齐。轮移仙掌外，影下玉绳西。  
蝉雀飞多误，星萤出自迷。烦蒸惊顿绝，吟玩畏闻鸡。

卷 604\_54 【送从弟筹任告成尉】

许棠

海上从戎罢，嵩阳佐县初。故人皆羨去，吾祖旧曾居。  
地古多生药，溪灵不聚鱼。唯应寻隐者，闲寺讲仙书。

卷 604\_55 【秋日陪陆校书游玉泉】

许棠

共爱泉源异，频来不觉劳。散光垂草细，繁响出风高。  
沫滞潭花片，沙遗浴鸟毛。尘间喧与闷，须向此中逃。

卷 604\_56 【送防州邬员外】

许棠

千溪与万嶂，缭绕复峥嵘。太守劳车马，何从驻旆旌。  
椒香近满郭，漆货远通京。唯涤双尘耳，东南听政声。

卷 604\_57 【过穆陵关】

许棠

荒关无守吏，亦耻白衣过。地广人耕绝，天寒雁下多。  
东西方自感，雨雪更相和。日暮聊攄思，摇鞭一放歌。

卷 604\_58 【江上遇友人】

许棠

阙下分离日，杏园花半开。江边相值夜，榆塞雁初来。  
坐久河沉斗，吟长月浸杯。鲈鱼非不恋，共有客程催。

卷 604\_59 【忆宛陵旧居】

许棠

旧忆陵阳北，林园近板桥。江晴帆影满，野迥鹤声遥。  
岛径通山市，汀扉上海潮。秦城归去梦，夜夜到渔樵。

卷 604\_60 【题闻琴馆】

许棠

城非宓贱邑，馆亦号闻琴。乃是前贤意，常留化俗心。  
代公存绿绮，谁更寄清音。此迹应无改，寥寥毕古今。

卷 604\_61 【寄江上弟妹】

许棠

无成归未得，不是不谋归。垂老登云路，犹胜守钓矶。  
大荒身去数，穷海信来稀。孤立皆难进，非关命独违。

卷 604\_62 【题李昌符丰乐幽居】

许棠

诗家依阙下，野景似山中。兰菊俱含露，杉梧为奏风。  
破门韦曲对，浅岸御沟通。莫叹连年屈，君须遇至公。

卷 604\_63 【青山晚望】

许棠

昔人怀感处，此地倍魂消。四海经摇落，三吴正寂寥。  
风移残烧远，帆带夕阳遥。欲继前贤迹，谁能似隐招。



卷 604\_64 【宣城送进士郑徽赴举】

许棠

长安去是归，上马肯沾衣。水国车通少，秦人楚荐稀。  
鸿方离北鄙，叶下已西畿。好整丹青步，知音在紫微。

卷 604\_65 【言怀】

许棠

万事不关心，终朝但苦吟。久贫惭负债，渐老爱山深。  
日月销天外，帆樯弃海阴。荣枯应已定，无复系浮沉。

卷 604\_66 【汴河十二韵】

许棠

昔年开汴水，元应别有由。或兼通楚塞，宁独为扬州。  
直断平芜色，横分积石流。所思千里便，岂计万方忧。  
首甚资功济，终难弭宴游。空怀龙舸下，不见锦帆收。  
浪倒长汀柳，风欹远岸楼。奔逾怀许竭，澄彻洒滨休。  
路要多行客，鱼稀少钓舟。日开天际晚，雁合碛西秋。  
一派注沧海，几人生白头。常期身事毕，于此泳东浮。

卷 604\_67 【旅中送人归九华】

许棠

分与仙山背，多年负翠微。无因随鹿去，只是送人归。  
顶木晴摩日，根岚晓润衣。会于猿鸟外，相对掩高扉。

卷 604\_68 【送友人归江南】

许棠

皇州五更鼓，月落西南维。此时有行客，别我孤舟归。  
上国身无主，下第诚可悲。

卷 604\_69 【洞庭湖】

许棠

空江浩荡景萧然，尽日菰蒲泊钓船。青草浪高三月渡，  
绿杨花扑一溪烟。情多莫举伤春目，愁极兼无买酒钱。  
犹有渔人数家住，不成村落夕阳边。

卷 604\_70 【句】

许棠

晓嶂猿开户，寒湫鹿舐冰。

当空吟待月，到晚坐看山。

一年三领郡，领郡管仙山。

## 卷六零零五

### 卷 605\_1 【放歌行】

邵谒

龟为秉灵亡，鱼为弄珠死。心中自有贼，莫怨任公子。  
屈原若不贤，焉得沉湘水。

### 卷 605\_2 【长安寒食】

邵谒

春日照九衢，春风媚罗绮。万骑出都门，拥在香尘里。  
莫辞吊枯骨，千载长如此。安知今日身，不是昔时鬼。  
但看平地游，亦见摧轂死。

### 卷 605\_3 【贞女墓】

邵谒

生持节操心，死作坚贞鬼。至今坟上春，草木无花卉。

卷 605\_4 【自叹】

邵谒

春蚕未成茧，已贺箱笼实。蟪蛄徒有丝，终年不成匹。  
每念古人言，有得则有失。我命独如何，憔悴长如一。  
白日九衢中，幽独暗如漆。流泉有枯时，穷贱无尽日。  
惆怅复惆怅，几回新月出。

卷 605\_5 【送徐群宰望江】

邵谒

古人力文学，所务安疲甿。今人力文学，所务惟公卿。  
大贤重邦本，屈迹官武城。劝民勤机杼，自然国用并。  
但见富贵者，知食不知耕。忽尔秋不熟，储廩焉得盈。  
贡艺既精苦，用心必公平。吾道不遗贤，霄汉期芳馨。  
一夫若有德，千古称其英。陶潜虽理邑，崔烈徒台衡。  
浊者必恶清，瞽者必恶明。孤松自有色，岂夺众草荣。  
为刀若不利，焉得宰牛名。为丝若不直，焉得琴上声。  
好去立高节，重来振羽翎。

卷 605\_6 【秋夕】

邵谒

万里凭梦归，骨肉皆在眼。觉来益惆怅，不信长安远。  
人人但为农，我独常逢旱。恶命如漏卮，滴滴添不满。  
天未雁来时，一叫一肠断。

卷 605\_7 【览孟东野集】

邵谒

蚌死留夜光，剑折留锋铓。哲人归大夜，千古传珪璋。  
珪璋遍四海，人伦多变改。题花花已无，玩月月犹在。  
不知天地间，白日几时昧。

卷 605\_8 【送友人江行】

邵谒

送君若浪水，叠叠愁思起。梦魂如月明，相送秋江里。

卷 605\_9 【下第有感】

邵谒

古人有遗言，天地如掌阔。我行三十载，青云路未达。  
尝闻读书者，所贵免征伐。谁知失意时，痛于刃伤骨。  
身如石上草，根蒂浅难活。人人皆爱春，我独愁花发。  
如何归故山，相携采薇蕨。

卷 605\_10 【论政】

邵谒

贤哉三握发，为有天下忧。孙弘不开阁，丙吉宁问牛。  
内政由股肱，外政由诸侯。股肱政若行，诸侯政自修。  
一物不得所，蚁穴满山丘。莫言万木死，不因一叶秋。  
朱云若不直，汉帝终自由。子婴一失国，渭水东悠悠。

卷 605\_11 【战城南】

邵谒

武皇重征伐，战士轻生死。朝争刃上功，暮作泉下鬼。  
悲风吊枯骨，明月照荒垒。千载留长声，呜咽城南水。

卷 605\_12 【赠郑殷处士】

邵谒

善琴不得听，嘉玉不得名。知音既已死，良匠亦未生。  
退居一河湄，山中物景清。鱼沉池水碧，鹤去松枝轻。  
长材靡入用，大厦失巨楹。颜子不得禄，谁谓天道平。

卷 605\_13 【古乐府】

邵谒

对酒弹古琴，弦中发新音。新音不可辨，十指幽怨深。  
妾颜不自保，四时如车轮。不知今夜月，曾照几时人。  
露滴芙蓉香，香销心亦死。良时无可留，残红谢池水。

卷 605\_14 【经安容先生旧居】

邵谒

羽化留遗踪，千载踪难没。一泉岩下水，几度换明月。  
松老不改柯，龙久皆变骨。云雨有归时，鸡犬无还日。  
至今青山中，寂寞桃花发。



卷 605\_15 【望行人】

邵谒

登楼恐不高，及高君已远。云行郎即行，云归郎不返。  
嗟为楼上人，望望不相近。若作辙中泥，不放郎车转。  
白日下西山，望尽妾肠断。

卷 605\_16 【岁丰】

邵谒

皇天降丰年，本忧贫士食。贫士无良畴，安能得稼穡。  
工佣输富家，日落长叹息。为供豪者粮，役尽匹夫力。  
天地莫施恩，施恩强者得。

卷 605\_17 【金谷园怀古】

邵谒

在富莫骄奢，骄奢多自亡。为女莫骋容，骋容多自伤。  
如何金谷园，郁郁椒兰房。昨夜绮罗列，今日池馆荒。  
竹死不变节，花落有馀香。美人抱义死，千载名犹彰。  
娇歌无遗音，明月留清光。浮云易改色，衰草难重芳。

不学韩侯妇，衔冤报宋王。

卷 605\_18 【春日有感】

邵谒

我心如蘂苦，他见如荠甘。火未到身者，痛楚难共谖。  
但言贫者拙，不言富者贪。谁知苦寒女，力尽为桑蚕。

卷 605\_19 【学仙词】

邵谒

上仙传秘诀，澹薄与无营。炼药□□□，变姓不变形。  
三尸既无累，百虑自不生。是知寸心中，有路通上清。  
祖龙好仙术，烧却黄金精。

卷 605\_20 【妓女】

邵谒

天若许人登，青山高不止。地若许人穷，黄泉深无水。  
量诸造化情，物成皆有以。如何上青冥，视之平若砥。  
日下骋琅玕，空中无罗绮。但见势腾腾，将为长如此。

炫耀一时间，逡巡九泉里。一种为埃尘，不学堕楼死。

卷 605\_21 【寒女行】

邵谒

寒女命自薄，生来多贱微。家贫人不聘，一身无所归。  
养蚕多苦心，茧熟他人丝。织素徒苦力，素成他人衣。  
青楼富家女，才生便有主。终日著罗绮，何曾识机杼。  
清夜闻歌声，听之泪如雨。他人如何欢，我意又何苦。  
所以问皇天，皇天竟无语。

卷 605\_22 【览镜】

邵谒

一照一回悲，再照颜色衰。日月自流水，不知身老时。  
昨日照红颜，今朝照白丝。白丝与红颜，相去咫尺间。

卷 605\_23 【轻薄行】

邵谒

轻薄身上衣，轻轻浮云质。长安一花开，九陌马蹄疾。

谁言公子车，不是天上力。

卷 605\_24 【苦别离】

邵谒

十五为君婚，二十入君门。自从入户后，见君长出门。  
朝看相送人，暮看相送人。若遣折杨柳，此地树无根。  
愿为陌上土，得作马蹄尘。愿为曲木枝，得作双车轮。  
安得太行山，移来君马前。

卷 605\_25 【览张骞传】

邵谒

采药不得根，寻河不得源。此时虚白首，徒感武皇恩。  
桑田未闻改，日月曾几昏。仙骨若求得，垄头无新坟。  
不见杜陵草，至今空自繁。

卷 605\_26 【白头吟】

邵谒

汉家天宇阔，日月不暂闲。常将古今骨，裨作北邙山。

山高势已极，犹自凋朱颜。

卷 605\_27 【瞽者叹】

邵谒

我心岂不平，我目自不明。徒云备双足，天下何由行。

卷 605\_28 【送从弟长安下第南归觐亲】

邵谒

白日不得照，戴天如戴盆。青云未见路，丹车劳出门。  
采薇秦山镇，养亲湘水源。心中岂不切，其如行路难。  
为文清益峻，为心直且安。芝兰未入用，馨香志独存。  
他门种桃李，犹能荫子孙。我家有棠阴，枝叶竟不繁。  
心醉岂因酒，愁多徒见萱。征徒忽告归，执袂殷勤论。  
在鸟终为凤，为鱼须化鲲。富贵岂长守，贫贱宁有根。  
丈夫志不大，何以佐乾坤。昼短疾于箭，早来献天言。  
莫恋苍梧畔，野烟横破村。

卷 605\_29 【少年行】

邵谒

丈夫十八九，胆气欺韩彭。报仇不用剑，辅国不用兵。  
以目为水鉴，以心作权衡。愿君似尧舜，能使天下平。  
何必走马夸弓矢，然后致得人心争。

卷 605\_30 【汉宫井】

邵谒

辘轳声绝离宫静，班姬几度照金井。  
梧桐老去残花开，犹似当时美人影。

卷 605\_31 【显茂楼】

邵谒

秦山渭水尚悠悠，如何草树迷宫阙。  
繁华朱翠尽东流，唯有望楼对明月。

卷 605\_32 【紫阁峰】

邵谒

壮国山河倚空碧，迥拔烟霞侵太白。  
绿崖下视千万寻，青天只据百馀尺。

## 第六百零六卷

### 卷 606\_1 【送李员外频之建州】

林宽

勾践江头月，客星台畔松。为郎久不见，出守暂相逢。  
鸟泊牵滩索，花空押号钟。远人思化切，休上武夷峰。

### 卷 606\_2 【送许棠先辈归宣州】

林宽

发枯穷律韵，字字合埙篪。日月所到处，姓名无不知。  
莺啼谢守垒，苔老谪仙碑。诗道丧来久，东归为吊之。

### 卷 606\_3 【穷冬太学】

林宽

投迹依槐馆，荒亭草合时。雪深鸢啸急，薪湿鼎吟迟。



默坐同谁话，非僧不我知。匡庐瀑布畔，何日副心期。

卷 606\_4 【陪郑諫郎中假日省中寓直】

林宽

宪厅名最重，假日许从容。床满诸司印，庭高五粒松。  
井寻芸吏汲，茶拆岳僧封。鸟度帘旌暮，犹吟隔苑钟。

卷 606\_5 【送谢石先辈归宣州】

林宽

名随春色远，湖外已先知。花尽方辞醉，莺残是放时。  
天寒千尺岳，颧白半联诗。笋蕨犹堪采，荣归及养期。

卷 606\_6 【下第寄欧阳瓚】

林宽

诗人道僻命多奇，更值干戈乱起时。  
莫作江宁王少府，一生吟苦竟谁知。

卷 606\_7 【寄何绍余】

林宽

雁过君犹未入城，清贤门下旧知名。风波冻马遥逢见，  
革橐饥僮尚挈行。住在闲坊无辙迹，别来何寺有泉声。  
芙蓉苑北曲江岸，期看终南新雪晴。

卷 606\_8 【送人宰浦城】

林宽

东南犹阻寇，梨岭更谁登。作宰应无俸，归船必有僧。  
滩平眠獭石，烧断饮猿藤。岁尽校殊最，方当见异能。

卷 606\_9 【省试腊后望春宫】

林宽

皇都初度腊，凤辇出深宫。高凭楼台上，遥瞻灞浐中。  
仗凝霜彩白，袍映日华红。柳眼方开冻，莺声渐转风。  
御沟穿断霭，骊岫照斜空。时见宸游兴，因观稼穡功。

卷 606\_10 【寄省中知己】

林宽

门掩清曹晚，静将乌府邻。花开封印早，雪下典衣频。  
怪木风吹阁，废巢时落薪。每怜吾道苦，长说向同人。

卷 606\_11 【朱坡】

林宽

朱坡坡上望，不似在秦京。渐觉溪山秀，更高鱼鸟情。  
夜吟禅子室，晓爨猎人铛。恃此偷佳赏，九衢蛩未鸣。

卷 606\_12 【酬陈樵见寄】

林宽

失意闲眠起更迟，又将羈薄谢深知。囊书旋入酒家尽，  
纱帽长依僧壁垂。待月句新遭鬼哭，寻山貌古被猿窥。  
元和才子多如此，除却清吟何所为。

卷 606\_13 【华清宫】

林宽

殿角钟残立宿鸦，朝元归驾望无涯。  
香泉空浸宫前草，未到春时争发花。

卷 606\_14 【终南山】

林宽

标奇耸峻壮长安，影入千门万户寒。  
徒自倚天生气色，尘中谁为举头看？

卷 606\_15 【歌风台】

林宽

蒿棘空存百尺基，酒酣曾唱大风词。  
莫言马上得天下，自古英雄尽解诗。

卷 606\_16 【送人归日东】

林宽

沧溟西畔望，一望一心摧。地即同正朔，天教阻往来。  
波翻夜作电，鲸吼昼为雷。门外人参径，到时花几开。

卷 606\_17 【寓兴】

林宽

西母一杯酒，空言浩劫春。英雄归厚土，日月照闲人。  
衰草珠玑冢，冷灰龙凤身。茂陵骊岫晚，过者暗伤神。

卷 606\_18 【少年行】

林宽

柳烟侵御道，门映夹城开。白日莫空过，青春不再来。  
报仇冲雪去，乘醉臂鹰回。看取歌钟地，残阳满坏台。

卷 606\_19 【塞上还答友人】

林宽

无端游绝塞，归鬓已苍然。戎羯围中过，风沙马上眠。  
草衰频过烧，耳冷不闻蝉。从此甘贫坐，休言更到边。

卷 606\_20 【哭栖白供奉】

林宽

侍辇才难得，三朝有上人。琢诗方到骨，至死不离贫。  
风帐孤萤入，霜阶积叶频。夕阳门半掩，过此亦无因。

卷 606\_21 【送升道靖恭相公分司】

林宽

东风时不遇，果见致君难。海岳影犹动，鹖鹞势未安。  
星沉关锁冷，鸡唱驿灯残。谁似二宾客，门闲嵩洛寒。

卷 606\_22 【关下早行】

林宽

轧轧推危辙，听鸡独早行。风吹宿霭散，月照华山明。  
白首东西客，黄河昼夜清。相逢皆有事，唯我是闲情。

卷 606\_23 【曲江】

林宽

曲江初碧草初青，万毂千蹄匝岸行。倾国妖姬云鬓重，  
薄徒公子雪衫轻。琼觞拂拭绕觥舞，金蹙辟邪擎拨鸣。  
柳絮杏花留不得，随风处处逐歌声。

卷 606\_24 【长安遣怀】

林宽

醉下高楼醒复登，任从浮薄笑才能。  
青龙寺里三门上，立为南山不为僧。

卷 606\_25 【送僧游太白峰】

林宽

云深游太白，莫惜遍探奇。顶上多灵迹，尘中少客知。  
悬崖倚冻瀑，飞狖过孤枝。出定更何事，相逢必有诗。

卷 606\_26 【哭造微禅师】

林宽

神迁不火葬，新塔露疏桎。是物皆磨灭，唯师出死生。  
虚堂散钓叟，怪木哭山精。林下路长在，无因更此行。

卷 606\_27 【献同年孔郎中】

林宽

炊琼爇桂帝关居，卖尽寒衣典尽书。驱马每寻霜影里，  
到门常在鼓声初。蟾枝交彩清兰署，鸾佩排光映玉除。  
一顾深恩身未杀，争期皎日负吹嘘。



卷 606\_28 【闻雁】

林宽

接影横空背雪飞，声声寒出玉关迟。  
上阳宫里三千梦，月冷风清闻过时。

卷 606\_29 【送惠补阙】

林宽

诏下搜岩野，高人入竹林。长因抗疏日，便作去官心。  
清俸供僧尽，沧洲寄迹深。东门有归路，徒自弃华簪。

卷 606\_30 【和友人贼后】

林宽

带号乞兵急，英雄陷贼围。江山犹未静，鱼鸟欲何归。  
城露桑榆尽，时平老幼稀。书从战后得，读彻血盈衣。

卷 606\_31 【长安即事】

林宽

暝鼓才终复晓鸡，九门何计出沉迷，樵童乱打金吾鼓，  
豪马争奔丞相堤。翡翠鬟欹钗上燕，麒麟衫束海中犀。  
须知不是诗人事，空忆泉声菊畔畦。

卷 606\_32 【和周繇校书先辈省中寓直】

林宽

古木重门掩，幽深只欠溪。此中真吏隐，何必更岩栖。  
名姓镌幢记，经书逐库题。字随飞蠹缺，阶与落星齐。  
伴直僧谈静，侵霜蛩韵低。粘尘贺草没，剥粉薛禽迷。  
衰藓墙千堵，微阳菊半畦。鼓残鸦去北，漏在月沉西。  
每忆终南雪，几登云阁梯。时因搜句次，那惜一招携。

卷 606\_33 【苦雨】

林宽

霖霖翳日月，穷巷变沟坑。骤洒纤枝折，奔倾坏堵平。  
蒙簷来客绝，跃瓮噪蛙狞。败屐阴苔积，摧檐湿菌生。

· 全唐诗 ·

---

斜飞穿裂瓦，迸落打空铛。叶底迟归蝶，林中滞出莺。  
润侵书缝黑，冷浸鬓丝明。牖暗参差影，阶寒断续声。  
尺薪功比桂，寸粒价高琼。遥想管弦里，无因识此情。

## 第六百零七卷

### 卷 607\_1 【翰林作】

刘邺

曾是江波垂钓人，自怜深厌九衢尘。浮生渐老年随水，  
往事曾闻泪满巾。已觉远天秋色动，不堪闲夜雨声频。  
多惭不是相如笔，虚直金銮接待臣。

### 卷 607\_2 【待漏院吟】

刘邺

玉堂帘外独迟迟，明月初沉勘契时。  
闲听景阳钟尽后，两莺飞上万年枝。

### 卷 607\_3 【慧山寺肄业送怀坦上人】

李骞

流水何山分，浮云空中遇。我生无根株，聚散亦难固。

忆昨斗龙春，岩栖侣高步。清怀去羁束，幽境无滓污。  
日落九峰明，烟生万华暮。兹欢未云隔，前笑倏已故。  
四时难信留，百草换霜露。离襟一成解，怅抱将何谕？  
惊泉有余哀，永日谁与度？缅思孤帆影，再往重江路。  
去去忽凄悲，因风暂回顾。

卷 607\_4 【读惠山若冰师集因题故院三首】

李骥

五天何处望，心念起皆知。化塔留今日，泉鸣自昔时。  
古苔生石静，秋草满山悲。莫道声容远，长歌白雪词。

高怀逢异境，佳句想吟频。月冷松溪夜，烟浓草寺春。  
浮云将世远，清听与名新。不见开岩日，空为拜影人。

景物搜求歇，山云放纵飞。树寒烟鹤去，池静水龙归。  
暗榻尘飘满，阴檐月到稀。何年灯焰尽，风动影堂扉。

卷 607\_5 【自惠山至吴下寄酬南徐从事】

李骥

不接芳晨游，独此长洲苑。风颜一成阻，翰墨劳空返。  
悠悠汀渚长，杳杳蘋花晚。如何西府欢，尚念东吴远。

瑶音动清韵，兰思芬盈畹。犹及九峰春，归吟白云巘。

卷 607\_6 【中秋夜戏酬顾道流】

孙蜀

不那此身偏爱月，等闲看月即更深。  
仙翁每被嫦娥使，一度逢圆一度吟。

卷 607\_7 【咏燕上主司郑愚】

欧阳澥

翩翩双燕画堂开，送古迎今几万回。  
长向春秋社前后，为谁归去为谁来。

卷 607\_8 【句】

欧阳澥

黄菊离家十四年。

离家已是梦松年。

落日望乡处，何人知客情？

卷 607\_9 【自咏豆花】

陈黯

玳瑁应难比，斑犀定不加。天嫌未端正，满面与妆花。

卷 607\_10 【雪诗】

张孜

长安大雪天，鸟雀难相觅。其中豪贵家，捣椒泥四壁。  
到处爇红炉，周回下罗幕。暖手调金丝，蘸甲斟琼液。  
醉唱玉尘飞，困融香汗滴。岂知饥寒人，手脚生皴劈。

卷 607\_11 【句】

张孜

著牙卖朱紫，断钱賒举选。

华山秀作英雄骨，黄河泻出纵横才。

梦破青霄春，烟霞无去尘。若夸郭璞五色笔，  
江淹却是寻常人。

卷 607\_12 【赠妓仙哥】

郑仁表

严吹如何下太清，玉肌无疹六铢轻。  
自知不是流霞酌，愿听云和瑟一声。

卷 607\_13 【赠妓命洛真】

郑仁表

巧制新章拍拍新，金罍巡举助精神。  
时时欲得横波眄，又怕回筹错指人。

卷 607\_14 【句】

郑仁表

文章世上争开路，阊阖山东拄破天。



卷 607\_15 【杜甫同谷茅茨】

赵鸿

工部栖迟后，邻家大半无。青羌迷道路，白社寄杯盂。  
大雅何人继，全生此地孤。孤云飞鸟什，空勒旧山隅。

卷 607\_16 【栗亭】

赵鸿

杜甫栗亭诗，诗人多在口。悠悠二甲子，题纪今何有？

卷 607\_17 【泥功山】

赵鸿

立石泥功状，天然诡怪形。未尝私祸福，终不费丹青。

卷 607\_18 【昆明池织女石】

童翰卿

一片昆明石，千秋织女名。见人虚脉脉，临水更盈盈。

苔作轻衣色，波为促杼声。岸云连鬓湿，沙月对眉生。  
有脸莲同笑，无心鸟不惊。还如朝镜里，形影两分明。

卷 607\_19【绝句】

童翰卿

大朴逐物尽，哀我天地功。争得荣辱心，洒然归西风。

## 第六百零八卷

### 卷 608\_1【补周礼九夏系文·九夏歌九篇】

皮日休

燿燿皎日，欵丽于天。厥明御舒，如王出焉。  
燿燿皎日，欵入于地。厥晦厥贞，如王入焉。  
出有龙旂，入有珩珮。勿驱勿驰，惟慎惟戒。  
出有嘉谋，入有内则。繄彼臣庶，钦王之式。

愔愔清庙，仪仪象服。我尸出矣，迎神之谷。  
杳杳阴竹，坎坎路鼓。我尸入矣，得神之祜。

有郁其鬯，有俨其彝。九变未作，全乘来之。  
既醕既酢，爰棘爰舞。象物既降，全乘之去。

麟之仪仪，不絜不维。乐德而至，如宾之嬉。  
凤之愉愉，不簫不箛。乐德而至，如宾之娛。  
自筐及筥，我有牢醕。自筐及筐，我有货币。  
我牢不愆，我货不匱。硕硕其才，有乐而止。

王有虎臣，锡之鉶钺。征彼不慝，一扑而灭。

王有虎臣，锡之圭瓚。征彼不享，一烘而泮。  
王有掌讶，侦尔疆理。王有掌客，饗尔饗飫。  
何以乐之，金石九奏。何以锡之，龙旂九旒。

玲玲衡笋，翬衣榆翟。自内而祭，为君之则。

洪源谁孕，疏为江河。大块孰埏，播为山阿。  
厥流浩漾，厥势嵯峨。今君之酌，慰我实多。

礼酒既酌，嘉宾既厚，腠为之奏。  
礼酒既竭，嘉宾既悦，应为之节。  
礼酒既罄，嘉宾既醒，雅为之行。

桓桓其珪，衮衮其衣。出作二伯，天子是毗。  
桓桓其珪，衮衮其服。入作三孤，国人是福。

## 卷 608\_2 【三羞诗三首】

皮日休

吾闻古君子，介介励其节。入门疑储宫，抚己思鉞钺。  
志者若不退，佞者何由达。君臣一轂膳，家国共残杀。  
此道见于今，永思心若裂。王臣方謇謇，佐我无玷缺。  
如何以谋计，中道生芽蘖。宪司遵故典，分道播南越。  
苍惶出班行，家室不容别。玄鬓行为霜，清泪立成血。  
乘遽剧飞鸟，就传过风发。嗟吾何为者，叨在造士列。

献文不上第，归于淮之汭。蹇蹄可再奔，退羽可后歇。  
利则侣轩裳，塞则友松月。而于方寸内，未有是愁结。  
未为禄食仕，俯不愧梁粝。未为冠冕人，死不慚忠烈。  
如何有是心，不能叩丹阙。赫赫负君归，南山采芝蕨。

南荒不择吏，致我交趾覆。绵联三四年，流为中夏辱。  
懦者斗即退，武者兵则黜。军庸满天下，战将多金玉。  
刮则齐民痛，分为猛士禄。雄健许昌师，忠武冠其族。  
去为万骑风，住作一川肉。昨朝残卒回，千门万户哭。  
哀声动闾里，怨气成山谷。谁能听昼鼙，不忍看金镞。  
吾有制胜术，不奈贱碌碌。贮之胸臆间，惭见许师属。  
自嗟胡为者，得蹶前修躅。家不出军租，身不识部曲。  
亦衣许师衣，亦食许师粟。方知古人道，荫我已为足。  
念此向谁羞，悠悠颍川绿。

天子丙戌年，淮右民多饥。就中颍之汭，转徙何累累。  
夫妇相顾亡，弃却抱中儿。兄弟各自散，出门如大痴。  
一金易芦卜，一缗换鳧茈。荒村墓鸟树，空屋野花篱。  
儿童啮草根，倚桑空羸羸。斑白死路傍，枕土皆离离。  
方知圣人教，于民良在斯。厉能去人爱，荒能夺人慈。  
如何司牧者，有术皆在兹。粤吾何为人，数亩清溪湄。  
一写落第文，一家欢复嬉。朝食有麦饘，晨起有布衣。  
一身既饱暖，一家无怨咨。家虽有吠亩，手不秉锄基。  
岁虽有札瘥，庖不废晨炊。何道以致是，我有明公知。  
食之以侯食，衣之以侯衣。归时恤金帛，使我奉庭闈。  
抚己愧颍民，奚不进德为。因兹感知己，尽日空涕洟。

卷 608\_3 【七爱诗·房杜二相国（玄龄、如晦）】

皮日休

吾爱房与杜，贫贱共联步。脱身抛乱世，策杖归真主。  
纵横握中算，左右天下务。肮脏无敌才，磊落不世遇。  
美矣名公卿，魁然真宰辅。黄阁三十年，清风一万古。  
巨业照国史，大勋镇王府。遂使后世民，至今受陶铸。  
粤吾少有志，敢蹑前贤路。苟得同其时，愿为执鞭竖。

卷 608\_4 【七爱诗·李太尉（晟）】

皮日休

吾爱李太尉，崛起定中原。骁雄十万兵，四面围国门。  
一战取王畿，一叱散妖氛。乘舆既反正，凶竖争亡魂。  
巍巍柱天功，荡荡盖世勋。仁于曹孟德，勇过霍将军。  
丹券入帑藏，青史传子孙。所谓大丈夫，动合惊乾坤。  
所谓圣天子，难得忠贞臣。下以契鱼水，上以合风云。  
百世必一乱，千年方一人。吾虽翰墨子，气概敢不群。  
愿以太平颂，题向甘泉春。

卷 608\_5 【七爱诗·卢徵君（鸿）】

皮日休

吾爱卢征君，高卧嵩山里。百辟未一顾，三征方暂起。  
坦腹对宰相，岸帻揖天子。建礼门前吟，金銮殿里醉。  
天下皆铺糟，征君独洁己。天下皆乐闻，征君独洗耳。  
天下皆怀羞，征君独多耻。银黄不妨悬，赤绂不妨被。  
而于心抱中，独作羲皇地。篮舆一云返，泥诏褒不已。  
再看缙山云，重酌嵩阳水。放旷书里终，逍遥醉中死。  
吾谓伊与周，不若征君贵。吾谓巢与许，不若征君义。  
高名无阶级，逸迹绝涯涘。万世唐书中，逸名不可比。  
粤吾慕真隐，强以骨肉累。如教不为名，敢有征君志。

卷 608\_6 【七爱诗·元鲁山（德秀）】

皮日休

吾爱元紫芝，清介如伯夷。辇母远之官，宰邑无玷疵。  
三年鲁山民，丰稔不暂饥。三年鲁山吏，清慎各自持。  
只饮鲁山泉，只采鲁山薇。一室冰檠苦，四远声光飞。  
退归旧隐来，斗酒入茅茨。鸡黍匪家畜，琴尊常自怡。  
尽日一菜食，穷年一布衣。清似匣中镜，直如琴上丝。  
世无用贤人，青山生白髭。既卧黔娄衾，空立陈寔碑。  
吾无鲁山道，空有鲁山辞。所恨不相识，援毫空涕垂。

卷 608\_7【七爱诗·李翰林（白）】

皮日休

吾爱李太白，身是酒星魄。口吐天上文，迹作人间客。  
礧礧千丈林，澄澈万寻碧。醉中草乐府，十幅笔一息。  
召见承明庐，天子亲赐食。醉曾吐御床，傲几触天泽。  
权臣妒逸才，心如斗筭窄。失恩出内署，海岳甘自适。  
刺谒戴接䍦，赴宴著縠屐。诸侯百步迎，明君九天忆。  
竟遭腐胁疾，醉魄归八极。大鹏不可笼，大椿不可植。  
蓬壶不可见，姑射不可识。五岳为辞锋，四溟作胸臆。  
惜哉千万年，此俊不可得。

卷 608\_9【七爱诗·白太傅（居易）】

皮日休

吾爱白乐天，逸才生自然。谁谓辞翰器，乃是经纶贤。  
歛从浮艳诗，作得典诰篇。立身百行足，为文六艺全。  
清望逸内署，直声惊谏垣。所刺必有思，所临必可传。  
忘形任诗酒，寄傲遍林泉。所望标文柄，所希持化权。  
何期遇訾毁，中道多左迁。天下皆汲汲，乐天独怡然。  
天下皆闷闷，乐天独舍旃。高吟辞两掖，清啸罢三川。  
处世似孤鹤，遗荣同脱蝉。仕若不得志，可为龟镜焉。



卷 608\_10 【正乐府十篇·卒妻怨】

皮日休

河湟戍卒去，一半多不回。家有半菽食，身为一囊灰。  
官吏按其籍，伍中斥其妻。处处鲁人髻，家家杞妇哀。  
少者任所归，老者无所携。况当札瘥年，米粒如琼瑰。  
累累作饿殍，见之心若摧。其夫死锋刃，其室委尘埃。  
其命即用矣，其赏安在哉。岂无黔敖恩，救此穷饿骸。  
谁知白屋士，念此翻欷歔。

卷 608\_11 【正乐府十篇·橡媪叹】

皮日休

秋深橡子熟，散落榛芜冈。伛偻黄发媪，拾之践晨霜。  
移时始盈掬，尽日方满筐。几曝复几蒸，用作三冬粮。  
山前有熟稻，紫穗袭人香。细获又精舂，粒粒如玉珰。  
持之纳于官，私室无仓箱。如何一石余，只作五斗量。  
狡吏不畏刑，贪官不避赃。农时作私债，农毕归官仓。  
自冬及于春，橡实诳饥肠。吾闻田成子，诈仁犹自王。  
吁嗟逢橡媪，不觉泪沾裳。

卷 608\_12 【正乐府十篇·贪官怨】

皮日休

国家省闾吏，赏之皆与位。素来不知书，岂能精吏理。  
大者或宰邑，小者皆尉史。愚者若混沌，毒者如雄虺。  
伤哉尧舜民，肉袒受鞭箠。吾闻古圣王，天下无遗士。  
朝廷及下邑，治者皆仁义。国家选贤良，定制兼拘忌。  
所以用此徒，令之充禄仕。何不广取人，何不广历试。  
下位既贤哉，上位何如矣。胥徒赏以财，俊造悉为吏。  
天下若不平，吾当甘弃市。

卷 608\_13 【正乐府十篇·农父谣】

皮日休

农父冤辛苦，向我述其情。难将一人农，可备十人征。  
如何江淮粟，挽漕输咸京。黄河水如电，一半沈与倾。  
均输利其事，职司安敢评。三川岂不农，三辅岂不耕。  
奚不车其粟，用以供天兵。美哉农父言，何计达王程。

卷 608\_14 【正乐府十篇·路臣恨】

皮日休

路臣何方来，去马真如龙。行骄不动尘，满辔金珑璁。

有人自天来，将避荆棘丛。狞呼不觉止，推下苍黄中。  
十夫掣鞭策，御之如惊鸿。日行六七邮，瞥若鹰无踪。  
路臣慎勿愬，愬则刑尔躬。军期方似雨，天命正如风。  
七雄战争时，宾旅犹自通。如何太平世，动步却途穷。

卷 608\_15【正乐府十篇·贱贡士】

皮日休

南越贡珠玑，西蜀进罗绮。到京未晨旦，一一见天子。  
如何贤与俊，为贡贱如此。所知不可求，敢望前席事。  
吾闻古圣人，射宫亲选士。不肖尽屏迹，贤能皆得位。  
所以谓得人，所以称多士。叹息几编书，时哉又何异。

卷 608\_16【正乐府十篇·颂夷臣】

皮日休

夷师本学外，仍善唐文字。吾人本尚舍，何况夷臣事。  
所以不学者，反为夷臣戏。所以尸禄人，反为夷臣忌。  
吁嗟华风衰，何尝不由是。

卷 608\_17【正乐府十篇·惜义鸟】

皮日休

商颜多义鸟，义鸟实可嗟。危巢未累累，隐在栲木花。  
他巢若有雏，乳之如一家。他巢若遭捕，投之同一罗。  
商人每秋贡，所贵复如何。饱以稻粱滋，饰以组绣华。  
惜哉仁义禽，委戏于宫娥。吾闻凤之贵，仁义亦足夸。  
所以不遭捕，盖缘生不多。

卷 608\_18【正乐府十篇·销虚器】

皮日休

襄阳作髹器，中有库露真。持以遗北虏，给云生有神。  
每岁走其使，所费如云屯。吾闻古圣王，修德来远人。  
未闻作巧诈，用欺禽兽君。吾道尚如此，戎心安足云。  
如何汉宣帝，却得呼韩臣。

卷 608\_19【正乐府十篇·哀陇民】

皮日休

陇山千万仞，鹦鹉巢其巅。穷危又极峻，其山犹不全。

蚩蚩陇之民，悬度如登天。空中觐其巢，堕者争纷然。  
百禽不得一，十人九死焉。陇川有戍卒，戍卒亦不闲。  
将命提雕笼，直到金台前。彼毛不自珍，彼舌不自言。  
胡为轻人命，奉此玩好端。吾闻古圣王，珍禽皆舍旃。  
今此陇民属，每岁啼涟涟。

卷 608\_20 【奉献致政裴秘监】

皮日休

何胤本征士，高情动天地。既无闾阖门，常嫌冠冕累。  
宰邑著嘉政，为郡留高致。移官在书府，方乐鸳池贵。  
玉季牧江西，泣之不忍离。舍杖随之去，天下钦高义。  
乌帽白絺裘，篮舆竹如意。黄菊陶潜酒，青山谢公妓。  
月榭咏诗情，花溪钓鱼戏。钟陵既方舟，魏阙将结驷。  
甘求白首闲，不为苍生起。优诏加大监，所以符公议。  
既为逍遥公，又作鸱夷子。安车悬不出，驷马闲无事。  
微雨汉陂舟，残日终南骑。富贵尽凌云，何人能至此？  
猜祸皆及身，何复至如是。贤哉此丈夫，百世一人矣。

卷 608\_21 【秋夜有怀】

皮日休

梦里忧身泣，觉来衣尚湿。骨肉煎我心，不是谋生急。

如何欲佐主，功名未成立。处世既孤特，传家无承袭。  
明朝走梁楚，步步出门涩。如何一寸心，千愁万愁入。

卷 608\_22 【喜鹊】

皮日休

弃臙在庭际，双鹊来摇尾。欲啄怕人惊，喜语晴光里。  
何况佞幸人，微禽解如此。

卷 608\_23 【蚊子】

皮日休

隐隐聚若雷，嗜肤不知足。皇天若不平，微物教食肉。  
贫士无绌纱，忍苦卧茅屋。何事觅膏腴，腹无太仓粟。

卷 608\_24 【鹿门夏日】

皮日休

满院松桂阴，日午却不知。山人睡一觉，庭鹊立未移。  
出檐趁云去，忘戴白接蓐。书眼若薄雾，酒肠如漏卮。  
身外所劳者，饮食须自持。何如便绝粒，直使身无为。

卷 608\_21 【偶书】

皮日休

女娲掉绳索，絙泥成下人。至今顽愚者，生如土偶身。  
云物养吾道，天爵高我贫。大笑猗氏辈，为富皆不仁。

卷 608\_22 【读书】

皮日休

家资是何物，积帙列梁梠。高斋晓开卷，独共圣人语。  
英贤虽异世，自古心相许。案头见蠹鱼，犹胜凡俦侣。

卷 608\_23 【贫居秋日】

皮日休

亭午头未冠，端坐独愁予。贫家烟爨稀，灶底阴虫语。  
门小愧车马，廩空惭雀鼠。尽室未寒衣，机声羨邻女。

## 第六百零九卷

卷 609\_1 【鲁望读襄阳耆旧传见赠五百言过褒庸材靡有称是…  
次韵】

皮日休

汉水碧于天，南荆廓然秀。庠罗遵古俗，鄢郢迷昔囿。  
幽奇无得状，嶮绝不能究。兴替忽矣新，山川悄然旧。  
斑斑生造士，一一应玄宿。巴庸乃嶮岨，屈景实豪右。  
是非既自分，泾渭不相就。粤自灵均来，清才若天漱。  
伟哉沅上隐，卓尔隆中耨。始将麋鹿狎，遂与麒麟斗。  
万乘不可谒，千钟固非茂。爰从景升死，境上多兵候。  
檀溪试戈船，岷岭屯贝冑。寂寞数百年，质唯包砾琇。  
上玄赏唐德，生贤命之授。是为汉阳王，帝曰俞尔奏。  
巨德耸神鬼，宏才轶前后。势端唯金茎，质古乃玉豆。  
行叶荫大椿，词源吐洪溜。六成清庙音，一柱明堂构。  
在昔房陵迁，圆穹正中漏。繄王揭然出，上下拓宇宙。  
俯视三事者，駸駸若童幼。低摧护中兴，若凤视其馘。  
遇险必伸足，逢诛将引脰。既正北极尊，遂治众星谬。  
重闻章陵幸，再见岐阳狩。日似新刮膜，天如重熨绉。  
易政疾似欬，求贤甚于购。化之未期年，民安而国富。  
翼卫两舜趋，钩陈十尧骤。忽然遗相印，如羿卸其馘。



奸幸却乘衅，播迁遂终寿。遗庙屹峰嵒，功名纷组绣。  
开元文物盛，孟子生荆岫。斯文纵奇巧，秦玺新雕镂。  
甘穷卧牛衣，受辱对狗窦。思变如易爻，才通似玄首。  
秘于龙宫室，怪于天篆籀。知者竞欲戴，嫉者或将诟。  
任达且百觚，遂为当时陋。既作才鬼终，恐为仙籍售。  
予生二贤末，得作升木猱。兼济与独善，俱敢怀其臭。  
江汉称炳灵，克明嗣清昼。继彼欲为三，如醕如醇酎。  
既见陆夫子，弩心却伏厩。结彼世外交，遇之于邂逅。  
两鹤思竞闲，双松格争瘦。唯恐别仙才，涟涟涕襟袖。

卷 609\_2 【鲁望昨以五百言见贻过有褒美内揣庸陋弥增愧悚…  
微旨也】

皮日休

三辰至精气，生自苍颉前。粤从有文字，精气铄于绵。  
所以杨墨后，文词纵横颠。元狩富材术，建安俨英贤。  
厥祀四百余，作者如排穿。五马渡江日，群鱼食蒲年。  
大风荡天地，万阵黄须膺。纵有命世才，不如一空拳。  
后至陈隋世，得之拘且纆。太浮如激滟，太细如蜚蜊。  
太乱如靡靡，太轻如芊芊。流之为酌□，变之为游畋。  
百足虽云众，不救杀马蚘。君臣作降虏，北走如獬豸。  
所以文字妖，致其国朝迁。吾唐革其弊，取士将科县。  
文星下为人，洪秀密于纆。大开紫宸扉，来者皆详延。  
日晏朝不罢，龙姿欢鞚鞚。于焉周道反，由是秦法悛。  
射洪陈子昂，其声亦喧阗。惜哉不得时，将奋犹拘挛。

玉垒李太白，铜堤孟浩然。李宽包堪輿，孟澹拟漪涟。  
埋骨采石圻，留神鹿门埏。俾其羁旅死，实觉天地孱。  
猗与子美思，不尽如转铨。纵为三十车，一字不可捐。  
既作风雅主，遂司歌咏权。谁知耒阳土，埋却真神仙。  
当于李杜际，名辈或溯沿。良御非异马，由弓非他弦。  
其物无同异，其人有媿妍。自开元至今，宗社纷如烟。  
爽若沆瀣英，高如昆仑巅。百家器浮说，诸子率寓言。  
筑之为京观，解之为牲牷。各持天地维，率意东西牵。  
竞抵元化首，争扼真宰咽。或作制诰藪，或为宫体渊。  
或堪被金石，或可投花钿。或为輿隶唱，或被儿童怜。  
乌垒虏亦写，鸡林夷争传。披揭覆载枢，捭阖神异键。  
力掀尾闾立，思轧大块旋。降气或若虹，耀影或如残。  
万象疮复痍，百灵瘖且□。谓乎数十公，笔若明堂椽。  
其中有拟者，不绝当如縑。齐驱不让策，并驾或争骈。  
所以吾唐风，直将三代甄。被此文物盛，由乎声诗宣。  
采彼风人谣，輶轩轻似鸢。丽者固不舍，鄙者亦为铨。  
其中有鉴戒，一一堪雕镌。乙夜以观之，吾君无释焉。  
遂命大司乐，度之如星躔。播于乐府中，俾为万代蠲。  
吹彼圆丘竹，诵兹清庙弦。不惟娱列祖，兼可格上玄。  
粤予何为者，生自江海壖。駸駸自总角，不甘耕一廛。  
诸昆指仓库，谓我死道边。何为不力农，稽古真可嚬。  
遂与褊褊著，兼之笞笠全。风吹蔓草花，飒飒盈荒田。  
老牛瞪不行，力弱谁能鞭？乃将耒与耜，并换槌与铅。  
阅彼图籍肆，致之千百编。携将入苏岭，不就无出缘。  
堆书塞低屋，添砚涸小泉。对灯任髻熟，凭案从肘研。  
苟无切玉刀，难除指上胼。尔来五寒暑，试艺称精专。  
昌黎道未著，文教如欲骞。其中有声病，于我如聾聵。

是敢驱颓波，归之于大川。其文如可用，不敢佞与便。  
明水在稿秸，太羹临豆筵。将来示时人，楔黷垂馋涎。  
亦或尚华缟，亦曾为便嬛。亦能制灏灏，亦解攻翩翩。  
唯思逢阵敌，与彼争后先。避兵入句吴，穷悴只自跼。  
平原陆夫子，投刺来翩跹。开卷读数行，为之加敬虔。  
忽穷一两首，反顾唯曲拳。始来遗巾幘，乃敢排戈鋌。  
或为拔帜走，或遭劓垒还。不能收乱辙，岂暇重为算。  
虽然未三北，亦可输千镳。向来说文字，尔汝名可联。  
圣人病殁世，不患穷而蹶。我未九品位，君无一囊钱。  
相逢得何事，两笼酬戏笺。无颜解媮合，底事居冗员。  
方知万钟禄，不博五湖船。夷险但明月，死生应白莲。  
吟余凭几饮，钓罢偃蓑眠。终抛岷山业，相共此留连。

卷 609\_3 【吴中苦雨因书一百韵寄鲁望】

皮日休

全吴临巨溟，百里到沪渎。海物竞骈罗，水怪争渗漉。  
狂蜃吐其气，千寻勃然蹙。一刷半天墨，架为欹危屋。  
怒鲸瞪相向，吹浪山毂毂。倏忽腥杳冥，须臾坼崖谷。  
帝命有严程，慈物敢潜伏。嘘之为玄云，弥亘千万幅。  
直拔倚天剑，又建横海纛。化之为暴雨，潏潏射平陆。  
如将月窟写，似把天河扑。著树胜戟支，中人过箭簇。  
龙光倏闪照，虬角搗琤触。此时一千里，平下天台瀑。  
雷公恣其志，□磳裂电目。蹋破霹雳车，折却三四辐。  
雨工避罪者，必在蚊睫宿。狂发铿訇音，不得懈怠僇。

顷刻势稍止，尚自倾蔌蔌。不敢履洿处，恐蹋烂地轴。  
自尔凡十日，茫然晦林麓。只是遇滂沱，少曾逢霖霖。  
伊余之靡宇，古制拙卜筑。颓檐倒菌黄，破砌顽莎绿。  
只有方丈居，其中踣且跼。朽处或似醉，漏时又如沃。  
阶前平泛滥，墙下起趑趄。唯堪著笞笠，复可乘艖宿。  
鸡犬并淋漓，儿童但咿噢。勃勃生湿气，人人牢于鍬。  
须眉渍将断，肝膈蒸欲熟。当庭死兰芷，四垣盛蕪蓂。  
解帙展断书，拂床安坏椳。跳梁老蛙黾，直向床前浴。  
蹲前但相聒，似把白丁辱。空厨方欲炊，渍米未离奥。  
薪蒸湿不著，白昼须然烛。污莱既已泞，买鱼不获鲙。  
竟未成麦饘，安能得粱肉。更有陆先生，荒林抱穷蹙。  
坏宅四五舍，病筱三两束。盖檐低碍首，藓地滑遘足。  
注欲透承尘，湿难庇厨簏。低摧在圭窦，索漠抛偏袂。  
手指既已胼，肌肤亦将瘃。一苞势欲侈，将撑乏寸木。  
尽日欠束薪，经时无寸粟。□螽将入甑，蜚蜚已临鍬。  
娇儿未十岁，枵然自啼哭。一钱买粳粒，数里走病仆。  
破碎旧鹤笼，狼藉晚蚕簇。千卷素书外，此外无余蓄。  
著处纈衣裂，戴次纱帽醺。恶阴潜过午，未及烹葵菽。  
吴中铜臭户，七万沸如臛。嗇止甘蟹螯，侈唯僭车服。  
皆希尉吏旨，尽怕里胥录。低眉事庸奴，开颜纳金玉。  
唯到陆先生，不能分一斛。先生之志气，薄汉如鸿鹄。  
遇善必攀跂，见才辄驰逐。廉不受一芥，其余安可黷。  
如何乡里辈，见之乃猬缩。粤予苦心者，师仰但踖踖。  
受易既可注，请玄又堪卜。百家皆搜荡，六艺尽翻覆。  
似馁见太牢，如迷遇华烛。半年得酬唱，一日屡往复。  
三秀间粮莠，九成杂巴濮。奔命既不暇，乞降但相续。  
吟诗口吻喁，把笔指节痠。君才既不穷，吾道由是笃。

所益谅弘多，厥交过亲族。相逢似丹漆，相望如肺腑。  
论业敢并驱，量分合继躅。相违始两日，忡忡想华缙。  
出门泥漫漈，恨无直辕輶。十钱赁一轮，逢上鸣斛觮。  
赤脚枕书帙，访予穿诘曲。入门且抵掌，大噓时碌碌。  
兹淋既浹旬，无乃害九谷。予惟饿不死，得非道之福。  
手中捉诗卷，语快还共读。解带似归来，脱巾若沐浴。  
疏如松间簟，野甚麋对鹿。行谭弄书签，卧话枕棋局。  
呼童具盘餐，扞衣换鸡鹜。或蒸一升麻，或爇两把菊。  
用以阅幽奇，岂能资口腹。十分煎皋卢，半榼挽醪醕。  
高谈繁无尽，昼漏何太促。我公大司谏，一切从民欲。  
梅润侵束杖，和气生空狱。而民当斯时，不觉有烦溽。  
念涝为之灾，拜神再三告。太阴霍然收，天地一澄肃。  
燔炙既芬芬，威仪乃翼翼。须权元化柄，用拯中夏酷。  
我愿荐先生，左右辅司牧。兹雨何足云，唯思举颜歔。

卷 609\_13 【初夏即事寄鲁望】

皮日休

夏景恬且旷，远人疾初平。黄鸟语方熟，紫桐阴正清。  
廨宇有幽处，私游无定程。归来闭双关，亦忘枯与荣。  
土室作深谷，藓垣为干城。頽杉突桄桷，迸笋支檐楹。  
片石共坐稳，病鹤同喜晴。瘿木四五器，筇杖一两茎。  
泉为葛天味，松作羲皇声。或看名画彻，或吟闲诗成。  
忽枕素琴睡，时把仙书行。自然寡俦侣，莫说更纷争。  
具区包地髓，震泽含天英。粤从三让来，俊造纷然生。

顾予客兹地，薄我皆为伦。唯有陆夫子，尽力提客卿。  
各负出俗才，俱怀超世情。驻我一栈车，啜君数藜羹。  
敲门若我访，倒屣欣逢迎。胡饼蒸甚熟，貊盘举尤轻。  
茗脆不禁炙，酒肥或难倾。扫除就藤下，移榻寻虚明。  
唯共陆夫子，醉与天壤并。

卷 609\_14 【二游诗·徐诗】

皮日休

东莞为著姓，奕代皆隽哲。强学取科第，名声尽孤揭。  
自为方州来，清操称凛冽。唯写坟籍多，必云清俸绝。  
宣毫利若风，剡纸光与月。札吏指欲胼，万通排未阕。  
楼船若夏屋，欲载如垤土。转徙入吴都，纵横碍门闼。  
縹囊轻似雾，緌帙殷于血。以此为基础，将斯用贻厥。  
重于通侯印，贵却全师节。我爱参卿道，承家能介洁。  
潮田五万步，草屋十余窠。微官不能去，归来坐如刳。  
保兹万卷书，守慎如羈縻。念我曾苦心，相逢无间别。  
引之看秘宝，任得穷披阅。轴闲翠钿剥，签古红牙折。  
帙解带芸香，卷开和桂屑。枕兼石锋刃，榻共松疮疖。  
一卧寂无喧，数编看尽彻。或携归廨宇，或把穿林樾。  
挈过太湖风，抱宿支硎雪。如斯未星纪，悉得分毫末。  
翦除幽僻藪，涤荡玄微窟。学海正狂波，予头向中颔。  
圣人患不学，垂诫尤为切。苟昧古与今，何殊暗共阕。  
昔之慕经史，有以佣笔札。何况遇斯文，借之不曾辍。  
吾衣任縠纁，吾食某糠粝。其道苟可光，斯文那自伐。

何竹青堪杀，何蒲重好截？如能盈兼两，便足酬饥渴。  
有此竞苟荣，闻之兼可哂。东皋耨烟雨，南岭提薇蕨。  
何以谢徐君，公车不闻设。

卷 609\_15 【二游诗·任诗】

皮日休

任君恣高放，斯道能寡合。一宅闲林泉，终身远嚣杂。  
尝闻佐浩穰，散性多儻傖。欵尔解其绶，遗之如弃鞞。  
归来乡党内，却与亲朋洽。开溪未让丁，列第方称甲。  
入门约百步，古木声嚶嚶。广槛小山欹，斜廊怪石夹。  
白莲倚阑楯，翠鸟缘帘押。地势似五泻，岩形若三峡。  
猿眠但葐葐，鳧食时唼唼。拨荇下文竿，结藤萦桂楫。  
门留医树客，壁倚栽花锸。度岁止褐衣，经旬唯白巾。  
多君方闭户，顾我能倒屣。请题在茅栋，留坐于石榻。  
魂从清景遯，衣任烟霞褭。阶墀龟任上，枕席鸥方狎。  
沼似颇黎镜，当中见鱼眨。杯杓悉杉瘤，盘筵尽荷叶。  
闲斟不置罚，闲弈无争劫。闲日不整冠，闲风无用箠。  
以斯为思虑，吾道宁疲茶。衮衣竞璀璨，鼓吹争鞞鞞。  
欲者解挤排，诟者能訾议。权豪暂翻覆，刑祸相填压。  
此时一圭窻，不肯饶闾闾。有第可栖息，有书可渔猎。  
吾欲与任君，终身以斯惬。

卷 609\_16 【追和虎丘寺清远道士诗】

皮日休

成道自衰周，避世穷炎汉。荆杞虽云梗，烟霞尚容窄。  
兹岑信灵异，吾怀惬流玩。石涩古铁铉，岚重轻埃漫。  
松膏膩幽径，蘋沫著孤岸。诸萝幄幕暗，众鸟陶匏乱。  
岩罅地中心，海光天一半。玄猿行列归，白云次第散。  
蟾蜍生夕景，沆瀣余清旦。风日采幽什，墨客学灵翰。  
嗟予慕斯文，一咏复三叹。显晦虽不同，兹吟粗堪赞。

卷 609\_17 【追和幽独君诗次韵】

皮日休

念尔风雅魄，幽咽犹能文。空令伤魂鸟，啼破山边坟。  
恨剧但埋土，声幽难放哀。坟古春自晚，愁绪空崔嵬。  
白杨老无花，枯根侵夜台。天高有时裂，川去何时回？  
双睫不能濡，六藏无可摧。不闻攀蓬事，何必深悲哉！

卷 609\_18 【奉和鲁望读阴符经见寄】

皮日休

三百八十言，出自伊祁氏。上以生神仙，次云立仁义。



玄机一以发，五贼纷然起。结为日月精，融作天地髓。  
不测似阴阳，难名若神鬼。得之升高天，失之沈厚地。  
具茨云木老，大块烟霞委。自颡项以降，贼为圣人轨。  
尧乃一庶人，得之贼帝摯。摯见其德尊，脱身授其位。  
舜唯一鰥民，冗冗作什器。得之贼帝尧，白丁作天子。  
禹本刑人后，以功继其嗣。得之贼帝舜，用以平泽水。  
自禹及文武，天机□然弛。姬公树其纲，贼之为圣智。  
声诗川竞大，礼乐山争峙。爰从幽厉余，宸极若孩稚。  
九伯真犬彘，诸侯实虎兕。五星合其耀，白日下阙里。  
由是圣人生，于焉当乱纪。黄帝之五贼，拾之若青紫。  
高挥春秋笔，不可刊一字。贼子虐甚斨，奸臣痛于箠。  
至今千余年，蚩蚩受其赐。时代更复改，刑政崩且侈。  
予将贼其道，所动多訾毁。叔孙与臧仓，贤圣多如此。  
如何黄帝机，吾得多坎蹶。纵失生前禄，亦多身后利。  
我欲贼其名，垂之千万祀。

卷 609\_19【初夏游楞伽精舍】

皮日休

越舫轻似萍，漾漾出烟郭。人声渐疏旷，天气忽寥廓。  
伊予惬斯志，有似劓□瘻。遇胜即夷犹，逢幽且淹泊。  
俄然棹深处，虚无倚岩崿。霜毫一道人，引我登龙阁。  
当中见寿象，欲礼光纷箔。珠幡时相铿，恐是诸天乐。  
树杪见觚棱，林端逢赭垓。千寻井犹在，万祀灵不涸。  
下通蛟人道，水色黠而恶。欲照六藏惊，将窥百骸愕。

竭去山南岭，其险如邛笮。悠然放吾兴，欲把青天摸。  
紫藤垂鬬珥，红荔悬纓络。藓厚滑似𦨇，峰尖利如铍。  
斯须到绝顶，似愈渐离燿。一片太湖光，只惊天汉落。  
梅风脱纶帽，乳水透芒屩。岚姿与波彩，不动浑相著。  
既不暇供应，将何以酬酢。却来穿竹径，似入青油幕。  
穴恐水君开，龕如鬼工凿。穷幽入兹院，前楯临巨壑。  
遗画龙奴狞，残香虫篆薄。褫魂窥玉镜，澄虑闻金铎。  
云态共萦留，鸟言相许诺。古木势如虺，近之恐相蠹。  
怒泉声似激，闻之意争博。时禽倏已嘿，众籁萧然作。  
遂令不羁性，恋此如缠缚。念彼上人者，将生付寂寞。  
曾无肤挠事，肯把心源度。胡为儒家流，没齿勤且恪。  
沐猴本不冠，未是谋生错。言行既异调，栖迟亦同托。  
愿力傥不遗，请作华林鹤。

卷 609\_21 【公斋四咏·小松】

皮日休

婆娑只三尺，移来白云径。亭亭向空意，已解凌辽夐。  
叶健似虬须，枝脆如鹤胫。清音犹未成，绀彩空不定。  
阴圆小芝盖，鳞涩修荷柄。先愁被鶡抢，预恐遭蜗病。  
结根幸得地，且免离离映。礧礧不难遇，在保晚成性。  
一日造明堂，为君当毕命。

卷 609\_22 【公斋四咏·小桂】

皮日休

一子落天上，生此青壁枝。歛从山之幽，剏断云根移。  
劲挺隐珪质，盘珊缙油姿。叶彩碧髓融，花状白毫蕤。  
棱层立翠节，偃蹇樛青螭。影淡雪霁后，香泛风和时。  
吾祖在月窟，孤贞能见怡。愿老君子地，不敢辞喧卑。

卷 609\_23 【公斋四咏·新竹】

皮日休

笠泽多异竹，移之植后楹。一架三百本，绿沈森冥冥。  
圆紧珊瑚节，钎利翡翠翎。俨若青帝仗，矗如紫姑屏。  
槭槭微风度，漠漠轻霭生。如神语钧天，似乐奏洞庭。  
一玩九藏冷，再闻百骸醒。有根可以执，有蕝可以馨。  
愿禀君子操，不敢先凋零。

卷 609\_24 【公斋四咏·鹤屏】

皮日休

三幅吹空縠，孰写仙禽状。骀耳侧以听，赤精旷如望。

引吭看云势，翘足临池样。颇似近蓐席，还如入方丈。  
尽日空不鸣，穷年但相向。未许子晋乘，难教道林放。  
貌既合羽仪，骨亦符法相。愿升君子堂，不必思昆阆。

卷 609\_25 【奉酬崔璐进士见寄次韵】

皮日休

伊余幼且贱，所禀自以殊。弱岁谬知道，有心匡皇符。  
意超海上鹰，运踔辕下驹。纵性作古文，所为皆自如。  
但恐才格劣，敢夸词彩敷。句句考事实，篇篇穷玄虚。  
谁能变羊质，竟不获骊珠。粤有造化手，曾开天地炉。  
文章邺下秀，气貌淹中儒。展我此志业，期君持中枢。  
苍生眼穿望，勿作磻谿谟。

## 第六百一十卷

### 卷 610\_1 【太湖诗·初入太湖】

皮日休

闻有太湖名，十年未曾识。今朝得游泛，大笑称平昔。  
一舍行胥塘，尽日到震泽。三万六千顷，千顷颇黎色。  
连空淡无颣，照野平绝隙。好放青翰舟，堪弄白玉笛。  
疏岑七十二，山巘露矛戟。悠然啸傲去，天上摇画舫。  
西风乍猎猎，惊波灞涵碧。倏忽雷阵吼，须臾玉崖坼。  
树动为蜃尾，山浮似鳌脊。落照射鸿溶，清辉荡抛擻。  
云轻似可染，霞烂如堪摘。渐暝无处泊，挽帆从所适。  
枕下闻澎湃，肌上生<sup>□</sup>疹。讨异足<sup>□</sup>遭回，寻幽多阻隔。  
愿风与良便，吹入神仙宅。甘将一<sup>□</sup>蕴书，永事嵩山伯。

### 卷 610\_2 【太湖诗·晓次神景宫】

皮日休

夜半幽梦中，扁舟似鳧跃。晓来到何许，俄倚包山脚。  
三百六十丈，攒空利如削。遐瞻但徙倚，欲上先矍铄。

浓露湿莎裳，浅泉渐草屨。行行未一里，节境转寂寞。  
静径侵沆寥，仙扉傍岩嶠。松声正清绝，海日方照灼。  
欵临幽虚天，万想皆摆落。坛灵有芝菌，殿圣无鸟雀。  
琼帙自回旋，锦旌空粲错。鼎气为龙虎，香烟混丹雘。  
凝看出次云，默听语时鹤。绿书不可注，云笈应无钥。  
晴来鸟思喜，崦里花光弱。天籁如击琴，泉声似搥铎。  
清斋洞前院，敢负玄科约。空中悉羽章，地上皆灵药。  
金醴可酣畅，玉豉堪咀嚼。存心服燕胎，叩齿读龙蹠。  
福地七十二，兹焉永堪托。在兽乏虎貔，于虫不毒蠹。  
尝闻择骨录，仙志非可作。绿肠既朱髓，青肝复紫络。  
伊余乏此相，天与形貌恶。每嗟原宪瘠，常苦齐侯疟。  
终然合委顿，刚亦慕寥廓。三茅亦常住，竟与珪组薄。  
欲问包山神，来赊少岩壑。

卷 610\_3 【太湖诗·入林屋洞】

皮日休

斋心已三日，筋骨如烟轻。腰下佩金兽，手中持火铃。  
幽塘四百里，中有日月精。连亘三十六，各各为玉京。  
自非心至诚，必被神物烹。顾余慕大道，不能惜微生。  
遂招放旷侣，同作幽忧行。其门才函丈，初若盘薄硎。  
洞气黑眊眊，苔发红髭髭。试足值坎窞，低头避峥嵘。  
攀缘不知倦，怪异焉敢惊。匍匐一百步，稍稍策可横。  
忽然白蝙蝠，来扑松炬明。人语散湏洞，石响高玲玎。  
脚底龙蛇气，头上波涛声。有时若服匿，偃仄如见绷。

俄尔造平淡，豁然逢光晶。金堂似镌出，玉座如琢成。  
前有方丈沼，凝碧融人睛。云浆湛不动，璫露涵而馨。  
漱之恐减算，酌之必延龄。愁为三官责，不敢携一瓢。  
昔云夏后氏，于此藏真经。刻之以紫琳，秘之以丹琼。  
期之以万祀，守之以百灵。焉得彼丈人，窃之不加刑。  
石匱一以出，左神俄不扃。禹书既云得，吴国由是倾。  
藓缝才半尺，中有怪物腥。欲去既嚙眊，将回又伶俜。  
却遵旧时道，半日出杳冥。履泥惹石髓，衣湿沾云英。  
玄篆乏仙骨，青文无绛名。虽然入阴宫，不得朝上清。  
对彼神仙窟，自厌浊俗形。却憎造物者，遣我骑文星。

卷 610\_4 【太湖诗·雨中游包山精舍】

皮日休

松门亘五里，彩碧高下绚。幽人共跻攀，胜事颇清便。  
翼翼林上雨，隐隐湖中电。薜带轻束腰，荷笠低遮面。  
湿屣黏烟雾，穿衣落霜霰。笑次度岩壑，困中遇台殿。  
老僧三四人，梵字十数卷。施稀无夏屋，境僻乏朝膳。  
散发抵泉流，支颐数云片。坐石忽忘起，扪萝不知倦。  
异蝶时似锦，幽禽或如钿。策筇还戛刃，耕桐自摇扇。  
俗态既斗薊，野情空眷恋。道人摘芝菌，为予备午馔。  
渴兴石榴羹，饥惬胡麻饭。如何事于役，兹游急于传。  
却将尘土衣，一任瀑丝溅。

卷 610\_5 【太湖诗 · 游毛公坛】

皮日休

却上南山路，松行俨如庑。松根碍幽径，孱颜不能斧。  
摆履跨乱云，侧巾蹲怪树。三休且半日，始到毛公坞。  
两水合一涧，潏崖却为浦。相敌百千戟，共搥十万鼓。  
喷散日月精，射破神仙府。唯愁绝地脉，又恐折天柱。  
一窥耳目眩，再听云发竖。次到炼丹井，井干翳宿莽。  
下有蕊刚丹，勺之百疾愈。凝于白獭髓，湛似桐马乳。  
黄露醒齿牙，碧黏甘肺腑。桧异松复怪，枯疏互撑拄。  
乾蛟一百丈，髁然半天舞。下有毛公坛，坛方不盈亩。  
当时云龙篆，一片苔藓古。时时仙禽来，忽忽祥烟聚。  
我爱周息元，忽起应明主。三谏却归来，回头唾圭组。  
伊余何不幸，斯人不复睹。如何大开口，与世争枯腐。  
将山待夸娥，以肉投饕餮。欻坐侵桂阴，不知巳与午。  
兹地足灵境，他年终结宇。敢道万石君，轻于一丝缕。

卷 610\_6 【太湖诗 · 三宿神景宫】

皮日休

古观岑且寂，幽人情自怡。一来包山下，三宿湖之湄。  
况此深夏夕，不逢清月姿。玉泉浣衣后，金殿添香时。  
客省高且敞，客床蟠复奇。石枕冷入脑，笋席寒侵肌。



气清寐不著，起坐临阶墀。松阴忽微照，独见萤火芝。  
素鹤警微露，白莲明暗池。窗棂带乳藓，壁缝含云蕤。  
闻磬走魍魎，见烛奔羈雌。沆瀣欲滴沥，芭蕉未离披。  
五更山蝉响，醒发如吹篴。杉风忽然起，飘破步虚词。  
道客巾履样，上清朝礼仪。明发作此事，岂复甘趋驰。

卷 610\_7 【太湖诗·以毛公泉一瓶献上谏议因寄】

皮日休

刘根昔成道，兹坞四百年。氤氲被其体，号为绿毛仙。  
因思清泠汲，凿彼岵客巖。五色既炼矣，一勺方铿然。  
既用文武火，俄穷雌雄篇。赤盐扑红雾，白华飞素烟。  
服之生羽翼，倏尔冲玄天。真隐尚有迹，厥祀将近千。  
我来讨灵胜，到此期终焉。滴苦破窞净，藓深余蹙圆。  
澄如玉髓洁，泛若金精鲜。颜色半带乳，气味全和铅。  
饮之融痞蹇，濯之伸拘挛。有时玩者触，倏忽风雷颠。  
素绠丝不短，越罌腹甚便。汲时月液动，担处玉浆旋。  
敢献大司谏，置之铃阁前。清如介洁性，涤比扫荡权。  
炙背野人兴，亦思侯伯怜。也知饮冰苦，愿受一瓶泉。

卷 610\_8 【太湖诗·缥缈峰】

皮日休

头戴华阳帽，手拄大夏筇。清晨陪道侣，来上缥缈峰。

带露嗅药蔓，和云寻鹿踪。时惊鼯鼯鼠，飞上千丈松。  
翠壁内有室，叩之虚<sup>隆</sup>磬。古穴下彻海，视之寒鸿濛。  
遇歇有佳思，缘危无倦容。须臾到绝顶，似鸟穿樊笼。  
恐足蹈海日，疑身凌天风。众岫点巨浸，四方接圆穹。  
似将青螺髻，撒在明月中。片白作越分，孤岚为吴宫。  
一阵<sup>暖</sup>颺气，隐隐生湖东。激雷与波起，狂电将日红。  
霅霅雨点大，金鶒轰下空。暴光隔云闪，仿佛亘天龙。  
连拳百丈尾，下拔湖之洪。猝为一雪山，欲与昭回通。  
移时却<sup>攏</sup>下，细碎衡与嵩。神物谅不测，绝景尤难穷。  
杖策下返照，渐闻仙观钟。烟波<sup>澹</sup>肌骨，云壑<sup>真</sup>心胸。  
竟死爱未足，当生且欢逢。不然把天爵，自拜太湖公。

卷 610\_9 【太湖诗 · 桃花坞】

皮日休

黄缘度南岭，尽日穿林樾。穷深到兹坞，逸兴转超忽。  
坞名虽然在，不见桃花发。恐是武陵溪，自闭仙日月。  
倚峰小精舍，当岭残耕垆。将洞任回环，把云恣披拂。  
闲禽啼叫窅，险狖眠碑<sup>砢</sup>。微风吹重岚，碧埃轻勃勃。  
清阴减鹤睡，秀色治人渴。敲竹斗争<sup>攄</sup>，弄泉争咽<sup>嚙</sup>。  
空斋蒸柏叶，野饭调石发。空羡坞中人，终身无履<sup>屐</sup>。

卷 610\_10 【太湖诗·明月湾】

皮日休

晓景澹无际，孤舟恣回环。试问最幽处，号为明月湾。  
半岩翡翠巢，望见不可攀。柳弱下丝网，藤深垂花鬋。  
松癭忽似狖，石文或如黥。钓坛两三处，苔老腥黦斑。  
沙雨几处霁，水禽相向闲。野人波涛上，白屋幽深间。  
晓培橘栽去，暮作鱼梁还。清泉出石砌，好树临柴关。  
对此老且死，不知忧与患。好境无处住，好处无境删。  
赧然不自适，脉脉当湖山。

卷 610\_11 【太湖诗·练渚（吴王所开）】

皮日休

吴王厌得国，所玩终不足。一上姑苏台，犹自嫌局促。  
舳舻六宫闹，艨冲后军肃。一阵水麝风，空中荡平渌。  
鸟困避锦帆，龙跼防铁轴。流苏惹烟浪，羽葆飘岩谷。  
灵境太蹂践，因兹塞林屋。空阔嫌太湖，崎岖开练渚。  
三寻鬻石齿，数里穿山腹。底静似金膏，砾碎如丹粟。  
波殿郑妲醉，蟾阁西施宿。几转含烟舟，一唱来云曲。  
不知阑楯上，夜有越人铍。君王掩面死，嫔御不敢哭。  
艳魄逐波涛，荒宫养麋鹿。国破沟亦浅，代变草空绿。  
白鸟都不知，朝眠还暮浴。

卷 610\_12 【太湖诗·投龙潭（在龟山）】

皮日休

龟山下最深，恶气何洋溢？涎水瀑龙巢，腥风卷蛟室。  
晓来林岑静，狞色如怒日。气涌扑炆煤，波澄扫纯漆。  
下水君府，贝阙光比栉。左右列介臣，纵横守鳞卒。  
月中珠母见，烟际枫人出。生犀不敢烧，水怪恐摧捽。  
时有慕道者，作彼投龙术。端严持碧简，斋戒挥紫笔。  
兼以金蜿蜒，投之光燖律。琴高坐赤鲤，何许纵仙逸。  
我愿与之游，兹焉托灵质。

卷 610\_13 【太湖诗·孤园寺（梁散骑常侍吴猛宅）】

皮日休

艇子小且兀，缘湖荡白芷。萦纡泊一碕，宛到孤园寺。  
萝岛凝清阴，松门湛虚翠。寒泉飞碧螭，古木斗苍兕。  
钟梵在水魄，楼台入云肆。岩边足鸣<sup>钱</sup>蛭，树杪多飞鸚。  
香莎满院落，风泛金<sup>霞</sup>靡。静鹤啄柏<sup>蠹</sup>，闲獐弄<sup>搗</sup>蛭。  
小殿熏陆香，古经贝多纸。老僧方瞑坐，见客还强起。  
指兹正险绝，何以来到此。先言洞壑数，次话真如理。  
磬韵醒闲心，茶香凝皓齿。巾之劫贝布，馔以栴檀餌。  
数刻得清静，终身欲依止。可怜陶侍读，身列丹台位。  
雅号曰胜力，亦闻师佛氏。今日到孤园，何妨称弟子。

卷 610\_14 【太湖诗 · 上真观】

皮日休

径盘在山肋，缭绕穷云端。摘菌杖头紫，缘崖屐齿刓。  
半日到上真，洞宫知造难。双户启真景，斋心方可观。  
天钧鸣响亮，天禄行蹒跚。琪树夹一径，万条青琅玕。  
两松峙庭际，怪状吁可叹。大螭腾共结，修蛇飞相盘。  
皮肤坼甲冑，枝节擒羆豻。罅处似天裂，朽中如井眚。  
褰褊风声癯，跣跣地方疹。根上露钳鋏，空中狂波澜。  
合时若莽苍，辟处如轳辘。俨对无霸阵，静问严陵滩。  
灵飞一以护，山都焉敢干？两廊洁寂历，中殿高巘岏。  
静架九色节，闲悬十绝幡。微风时一吹，百宝清阑珊。  
昔有叶道士，位当升灵官。欲笺紫微志，唯食虹影丹。  
既逐隐龙去，道风由此残。犹闻绛目草，往往生空坛。  
羽客两三人，石上谭泥丸。谓我或龙胃，粲然与之欢。  
衣巾紫华冷，食次白芝寒。自觉有真气，恐随风力抃。  
明朝若更住，必拟隳儒冠。

卷 610\_15 【太湖诗 · 销夏湾】

皮日休

太湖有曲处，其门为两崖。当中数十顷，别如一天池。  
号为销夏湾，此名无所私。赤日莫斜照，清风多遥吹。

沙屿扫粉墨，松竹调埙篪。山果红鞮鞢，水苔青髻髻。  
木阴厚若瓦，岩磴滑如飴。我来此游息，夏景方赫曦。  
一坐盘石上，肃肃寒生肌。小艇或可泛，短策或可支。  
行惊翠羽起，坐见白莲披。敛袖弄轻浪，解巾敌凉飈。  
但有水云见，更余沙禽知。京洛往来客，喝死缘奔驰。  
此中便可老，焉用名利为。

卷 610\_16 【太湖诗·包山祠】

皮日休

白云最深处，像设盈岩堂。村祭足茗糗，水奠多桃浆。  
篴竿突古砌，薜荔绷颓墙。炉灰寂不然，风送杉桂香。  
积雨晦州里，流波漂稻粱。恭惟大司谏，悯此如发狂。  
命予传明祷，祇事实不遑。一奠若肸蚺，再祝如激扬。  
出庙未半日，隔云逢澹光。山雙山雙雨点少，渐收羽林枪。  
忽然山家犬，起吠白日傍。公心与神志，相向如玄黄。  
我愿作一疏，奏之于穹苍。留神千万祀，永福吴封疆。

卷 610\_17 【太湖诗·圣姑庙（在大姑山。晋王彪二女）】

皮日休

洛神有灵逸，古庙临空渚。暴雨驳丹青，荒萝绕梁梠。  
野风旋芝盖，饥乌衔椒糗。寂寂落枫花，时时斗鼯鼠。

常云三五夕，尽会妍神侣。月下留紫姑，霜中召青女。  
俄然响环佩，倏尔鸣机杼。乐至有闻时，香来无定处。  
目瞪如有待，魂断空无语。云雨竟不生，留情在何处。

卷 610\_18 【太湖诗·太湖石（在鼇头山）】

皮日休

兹山有石岸，抵浪如受屠。雪阵千万战，藓岩高下剝。  
乃是天诡怪，信非人功夫。白丁一云取，难甚网珊瑚。  
厥状复若何，鬼工不可图。或拳若虺蜴，或蹲如虎貔。  
连络若钩锁，重叠如萼跗。或若巨人骼，或如太帝符。  
降肛笏筓笋，格磔琅玕株。断处露海眼，移来和沙须。  
求之烦耄倪，载之劳舳舻。通侯一以眄，贵却骊龙珠。  
厚赐以睢盱，远去穷京都。五侯土山下，要尔添岩嵒。  
赏玩若称意，爵禄行斯须。苟有王佐士，崛起于太湖。  
试问欲西笑，得如兹石无。

卷 610\_19 【太湖诗·崦里（傍龟山下有良田二十顷）】

皮日休

崦里何幽奇，膏腴二十顷。风吹稻花香，直过龟山顶。  
青苗细腻卧，白羽悠溶静。塍畔起鵙鹑，田中通舴艋。  
几家傍潭洞，孤戍当林岭。罢钓时煮菱，停缲或焙茗。

峭然八十翁，生计于此永。苦力供征赋，怡颜过朝暝。  
洞庭取异事，包山极幽景。念尔饱得知，亦是遗民幸。

卷 610\_20 【太湖诗·石板（在石公山前）】

皮日休

翠石数百步，如板漂不流。空疑水妃意，浮出青玉洲。  
中若莹龙剑，外唯叠蛇矛。狂波忽然死，浩气清且浮。  
似将翠黛色，抹破太湖秋。安得三五夕，携酒棹扁舟。  
召取月夫人，啸歌于上头。又恐霄景阔，虚皇拜仙侯。  
欲建九锡碑，当立十二楼。琼文忽然下，石板谁能留？  
此事少知者，唯应波上鸥。



## 第六百一十一卷

### 卷 611\_1 【奉和鲁望渔具十五咏·网】

皮日休

晚挂溪上网，映空如雾縠。闲来发其机，旋旋沈平绿。  
下处若烟雨，牵时似崖谷。必若遇鲲鲕，从教通一目。

### 卷 611\_2 【奉和鲁望渔具十五咏·罩】

皮日休

芒鞋下葑中，步步沈轻罩。既为菱浪飏，亦为莲泥胶。  
人立独无声，鱼烦似相抄。满手搦霜鳞，思归举轻棹。

### 卷 611\_3 【奉和鲁望渔具十五咏·罟】

皮日休

烟雨晚来好，东塘下罟去。网小正星□，舟轻欲腾翥。

谁知苒苒后，恰值鱼多处。浦口更有人，停桡一延伫。

卷 611\_4 【奉和鲁望渔具十五咏·钓筒】

皮日休

笊籬截数尺，标置能幽绝。从浮笠泽烟，任卧桐江月。  
丝随碧波漫，饵逐清滩发。好是趁筒时，秋声正清越。

卷 611\_5 【奉和鲁望渔具十五咏·钓车】

皮日休

得乐湖海志，不厌华輶小。月中抛一声，惊起滩上鸟。  
心将潭底测，手把波文袅。何处觅奔车，平波今渺渺。

卷 611\_6 【奉和鲁望渔具十五咏·渔梁】

皮日休

波际插翠筠，离离似清簪。游鳞到溪口，入此无逃所。  
斜临杨柳津，静下鸕鶿侣。编此欲何之，终焉富春渚。

卷 611\_7 【奉和鲁望渔具十五咏·叉鱼】

皮日休

列炬春溪口，平潭如不流。照见游泳鱼，一一如清昼。  
中目碎琼碧，毁鳞殷组绣。乐此何太荒，居然愧川后。

卷 611\_8 【奉和鲁望渔具十五咏·射鱼】

皮日休

注矢寂不动，澄潭晴转烘。下窥见鱼乐，悦若翔在空。  
惊羽决凝碧，伤鳞浮殷红。堪将指杯术，授与太湖公。

卷 611\_9 【奉和鲁望渔具十五咏·鸣榔】

皮日休

尽日平湖上，鸣榔仍动桨。丁丁入波心，澄澈和清响。  
鹭听独寂寞，鱼惊味来往。尽水无所逃，川中有钩党。

卷 611\_10 【奉和鲁望渔具十五咏·沪】

皮日休

波中植甚固，磔磔如虾须。涛头倏尔过，数顷跳𩚰𩚰。  
不是细罗密，自为朝夕驱。空怜指鱼命，遣出海边租。

卷 611\_11 【奉和鲁望渔具十五咏·矰】

皮日休

伐彼槎蘂枝，放于冰雪浦。游鱼趁暖处，忽尔来相聚。  
徒为栖托心，不问底庥主。一旦悬鼎鑊，祸机真自取。

卷 611\_12 【奉和鲁望渔具十五咏·种鱼】

皮日休

移土湖岸边，一半和鱼子。池中得春雨，点点活如蚁。  
一月便翠鳞，终年必赭尾。借问两绶人，谁知种鱼利。

卷 611\_13 【奉和鲁望渔具十五咏·药鱼】

皮日休

吾无竭泽心，何用药鱼药。见说放溪上，点点波光恶。  
食时竞夷犹，死者争纷泊。何必重伤鱼，毒泾犹可作。

卷 611\_14 【奉和鲁望渔具十五咏·舴艋】

皮日休

阔处只三尺，脩然足吾事。低篷挂钓车，枯蚌盛鱼饵。  
只好携桡坐，唯堪盖蓑睡。若遣遂平生，舴艋不如是。

卷 611\_15 【奉和鲁望渔具十五咏·箬簑】

皮日休

朝空箬簑去，暮实箬簑归。归来倒却鱼，挂在幽窗扉。  
但闻虾蚬气，欲生蘋藻衣。十年佩此处，烟雨苦霏霏。

卷 611\_16 【添鱼具诗·鱼庵】

皮日休

庵中只方丈，恰称幽人住。枕上悉渔经，门前空钓具。  
束竿时倚壁，晒网还侵户。上洞有杨颢，须留往来路。

卷 611\_17 【添鱼具诗·钓矶】

皮日休

盘滩一片石，置我山居足。洼处著筍簞，窍中维船舶。  
多逢沙鸟污，爱彼潭云触。狂奴卧此多，所以蹋帝腹。

卷 611\_18 【添鱼具诗·蓑衣】

皮日休

一领蓑正新，著来沙坞中。隔溪遥望见，疑是绿毛翁。  
襟色裛靛霭，袖香褊褊风。前头不施袞，何以为三公？

卷 611\_19 【添鱼具诗·箸笠】

皮日休

圆似写月魂，轻如织烟翠。洿洿向上雨，不乱窥鱼思。  
携来沙日微，挂处江风起。纵带二梁冠，终身不忘尔。

卷 611\_20 【添鱼具诗·背篷】

皮日休

依家背篷样，似个大龟甲。雨中踟躅时，一向听霎霎。  
甘从鱼不见，亦任鸥相狎。深拥竟无言，空成睡齁齁。

卷 611\_21 【奉和鲁望樵人十咏·樵谿】

皮日休

何时有此谿，应便生幽木。橡实养山禽，藤花蒙涧鹿。  
不止产蒸薪，愿当歌棫朴。君知天意无，以此安吾族。

卷 611\_22 【奉和鲁望樵人十咏·樵家】

皮日休

空山最深处，太古两三家。云萝共夙世，猿鸟同生涯。  
衣服濯春泉，盘餐烹野花。居兹老复老，不解叹年华。

卷 611\_23 【奉和鲁望樵人十咏·樵叟】

皮日休

不曾照青镜，岂解伤华发。至老未息肩，至今无病骨。  
家风是林岭，世禄为薇蕨。所以两大夫，天年自为伐。

卷 611\_24 【奉和鲁望樵人十咏·樵子】

皮日休

相约晚樵去，跳踉上山路。将花饵鹿麋，以果投猿父。  
束薪白云湿，负担春日暮。何不寿童乌，果为玄所误。



卷 611\_25 【奉和鲁望樵人十咏·樵径】

皮日休

蒙茏中一径，绕在千峰里。歇处遇松根，危中值石齿。  
花穿棠衣落，云拂芒鞋起。自古行此途，不闻颠与坠。

卷 611\_26 【奉和鲁望樵人十咏·樵斧】

皮日休

腰间插大柯，直入深谿里。空林伐一声，幽鸟相呼起。  
倒树去李父，倾巢啼木魅。不知仗钺者，除害谁如此？

卷 611\_27 【奉和鲁望樵人十咏·樵担】

皮日休

不敢量樵重，唯知益薪束。轧轧下山时，弯弯向身曲。  
清泉洗得洁，翠靄侵来绿。看取荷戈人，谁能似吾属？

卷 611\_28 【奉和鲁望樵人十咏·樵风】

皮日休

野船渡樵客，来往平波中。纵横清飙吹，旦暮归期同。  
蘋光惹衣白，莲影涵薪红。吾当请封尔，直作镜湖公。

卷 611\_29 【奉和鲁望樵人十咏·樵火】

皮日休

山客地炉里，然薪如阳辉。松膏作滫飴，杉子为珠玑。  
响误击刺闹，焰疑彗孛飞。傍边暖白酒，不觉瀑冰垂。

卷 611\_30 【奉和鲁望樵人十咏·樵歌】

皮日休

此曲太古音，由来无管奏。多云采樵乐，或说林泉候。  
一唱凝闲云，再谣悲顾兽。若遇采诗人，无辞收鄙陋。

卷 611\_31 【酒中十咏 · 酒星】

皮日休

谁遣酒旗耀，天文列其位。彩微尝似酣，芒弱偏如醉。  
唯忧犯帝座，只恐骑天驷。若遇卷舌星，谗君应堕地。

卷 611\_32 【酒中十咏 · 酒泉】

皮日休

羲皇有玄酒，滋味何太薄。玉液是浇漓，金沙乃糟粕。  
春从野鸟沽，昼仍闲猿酌。我愿葬兹泉，醉魂似鳬跃。

卷 611\_33 【酒中十咏 · 酒箴】

皮日休

翠箴初织来，或如古鱼器。新从山下买，静向甌中试。  
轻可网金醅，疏能容玉蚁。自此好成功，无贻我罍耻。

卷 611\_34 【酒中十咏 · 酒床】

皮日休

糟床带松节，酒腻肥如豨。滴滴连有声，空疑杜康语。  
开眉既压后，染指偷尝处。自此得公田，不过浑种黍。

卷 611\_35 【酒中十咏 · 酒垆】

皮日休

红垆高几尺，颇称幽人意。火作缥醪香，灰为冬醴气。  
有枪尽龙头，有主皆犊鼻。倘得作杜根，佣保何足愧。

卷 611\_36 【酒中十咏 · 酒楼】

皮日休

钩楯跨通衢，喧闹当九市。金罍潋滟后，玉笋纷纶起。  
舞蝶傍应酣，啼莺闻亦醉。野客莫登临，相饯多失意。

卷 611\_37 【酒中十咏·酒旗】

皮日休

青帜阔数尺，悬于往来道。多为风所飏，时见酒名号。  
拂拂野桥幽，翻翻江市好。双眸复何事，终竟望君老。

卷 611\_38 【酒中十咏·酒樽】

皮日休

牺樽一何古，我抱期幽客。少恐消醍醐，满拟烘琥珀。  
猿窥曾扑泻，鸟蹋经欹仄。度度醒来看，皆如死生隔。

卷 611\_39 【酒中十咏·酒城】

皮日休

万仞峻为城，沈酣浸其俗。香侵井干过，味染濠波渌。  
朝倾逾百榼，暮压几千斛。吾将隶此中，但为阍者足。

卷 611\_40 【酒中十咏·酒乡】

皮日休

何人置此乡，杳在天皇外。有事忘哀乐，有时忘显晦。  
如寻罔象归，似与希夷会。从此共君游，无烦用冠带。

卷 611\_41 【奉和添酒中六咏·酒池】

皮日休

八齐竞奔注，不知深几丈。竹叶岛纡徐，凫花波荡漾。  
醺应烂地轴，浸可柔天壤。以此献吾君，愿铭于几杖。

卷 611\_42 【奉和添酒中六咏·酒龙】

皮日休

铜为蚺蜺鳞，铸作虺蜺角。吐处百里雷，泻时千丈壑。  
初疑潜苑囿，忽似挈寥廓。遂使铜雀台，香消野花落。

卷 611\_43 【奉和添酒中六咏 · 酒瓮】

皮日休

坚净不苦窳，陶于醉封疆。临溪刷旧痕，隔屋闻新香。  
移来近麴室，倒处临糟床。所嗟无比邻，余亦能偷尝。

卷 611\_44 【奉和添酒中六咏 · 酒船】

皮日休

剡桂复剡兰，陶陶任行乐。但知涵泳好，不计风涛恶。  
尝行麴封内，稍系糟丘泊。东海如可倾，乘之就斟酌。

卷 611\_45 【奉和添酒中六咏 · 酒枪】

皮日休

象鼎格仍高，其中不烹饪。唯将煮浊醪，用以资酣饮。  
偏宜旋樵火，稍近余醒枕。若得伴琴书，吾将著闲品。

卷 611\_46 【奉和添酒中六咏 · 酒杯】

皮日休

昔有嵇氏子，龙章而凤姿。手挥五弦罢，聊复一樽持。  
但取性淡泊，不知味醇醪。兹器不复见，家家唯玉卮。

卷 611\_47 【茶中杂咏 · 茶坞】

皮日休

闲寻尧氏山，遂入深深坞。种笋已成园，栽葭宁记亩。  
石洼泉似掬，岩罅云如缕。好是夏初时，白花满烟雨。

卷 611\_48 【茶中杂咏 · 茶人】

皮日休

生于顾渚山，老在漫石坞。语气为茶荈，衣香是烟雾。  
庭从櫺子遮，果任孺师虏。日晚相笑归，腰间佩轻篓。



卷 611\_49 【茶中杂咏·茶笋】

皮日休

褒然三五寸，生必依岩洞。寒恐结红铅，暖疑销紫汞。  
圆如玉轴光，脆似琼英冻。每为遇之疏，南山挂幽梦。

卷 611\_50 【茶中杂咏·茶籩】

皮日休

笈筲晓携去，蓦个山桑坞。开时送紫茗，负处沾清露。  
歇把傍云泉，归将挂烟树。满此是生涯，黄金何足数。

卷 611\_51 【茶中杂咏·茶舍】

皮日休

阳崖枕白屋，几口嬉嬉活。棚上汲红泉，焙前蒸紫蕨。  
乃翁研茗后，中妇拍茶歇。相向掩柴扉，清香满山月。

卷 611\_52 【茶中杂咏·茶灶】

皮日休

南山茶事动，灶起岩根傍。水煮石发气，薪然杉脂香。  
青琼蒸后凝，绿髓炊来光。如何重辛苦，一一输膏粱。

卷 611\_53 【茶中杂咏·茶焙】

皮日休

凿彼碧岩下，恰应深二尺。泥易带云根，烧难碍石脉。  
初能燥金饼，渐见干琼液。九里共杉林，相望在山侧。

卷 611\_54 【茶中杂咏·茶鼎】

皮日休

龙舒有良匠，铸此佳样成。立作菌蠢势，煎为潺湲声。  
草堂暮云阴，松窗残雪明。此时勺复茗，野语知逾清。

卷 611\_55 【茶中杂咏·茶瓯】

皮日休

邢客与越人，皆能造兹器。圆似月魂堕，轻如云魄起。  
枣花势旋眼，蘋沫香沾齿。松下时一看，支公亦如此。

卷 611\_56 【茶中杂咏·煮茶】

皮日休

香泉一合乳，煎作连珠沸。时看蟹目溅，乍见鱼鳞起。  
声疑松带雨，饽恐生烟翠。尚把沥中山，必无千日醉。

卷 611\_57 【石榴歌】

皮日休

蝉噪秋枝槐叶黄，石榴香老愁寒霜。流霞包染紫鹦粟，  
黄蜡纸裹红瓠房。玉刻冰壶含露湿，斓斑似带湘娥泣。  
萧娘初嫁嗜甘酸，嚼破水精千万粒。

## 第六百一十二卷

### 卷 612\_1【奉和鲁望四明山九题·石窗】

皮日休

窗开自真宰，四达见苍涯。苔染浑成绮，云漫便当纱。  
棂中空吐月，扉际不扃霞。未会通何处，应怜玉女家。

### 卷 612\_2【奉和鲁望四明山九题·过云】

皮日休

粉洞二十里，当中幽客行。片时迷鹿迹，寸步隔人声。  
以杖探虚翠，将襟惹薄明。经时未过得，恐是入层城。

### 卷 612\_3【奉和鲁望四明山九题·云南】

皮日休

云南背一川，无雁到峰前。墟里生红药，人家发白泉。

儿童皆似古，婚嫁尽如仙。共作真官户，无由税石田。

卷 612\_4【奉和鲁望四明山九题·云北】

皮日休

云北昼冥冥，空疑背寿星。犬能谙药气，人解写芝形。  
野歇遇松盖，醉书逢石屏。焚香住此地，应得入金庭。

卷 612\_5【奉和鲁望四明山九题·鹿亭】

皮日休

鹿群多此住，因构白云楣。待侣傍花久，引麋穿竹迟。  
经时培玉润，尽日嗅金芝。为在石窗下，成仙自不知。

卷 612\_6【奉和鲁望四明山九题·樊榭】

皮日休

主人成列仙，故榭独依然。石洞哄人笑，松声惊鹿眠。  
井香为大药，鹤语是灵篇。欲买重栖隐，云峰不售钱。

卷 612\_7 【奉和鲁望四明山九题·潺湲洞】

皮日休

阴宫何处渊，到此洞潺湲。敲碎一轮月，熔销半段天。  
响高吹谷动，势急喷云旋。料得深秋夜，临流尽古仙。

卷 612\_8 【奉和鲁望四明山九题·青棂子】

皮日休

山风熟异果，应是供真仙。味似云腴美，形如玉脑圆。  
衔来多野鹤，落处半灵泉。必共玄都奈，花开不记年。

卷 612\_9 【奉和鲁望四明山九题·鞠侯】

皮日休

堪羨鞠侯国，碧岩千万重。烟萝为印绶，云壑是堤封。  
泉遣狙公护，果教猱子供。尔徒如不死，应得蹶玄踪。

卷 612\_10 【五贶诗·五泻舟】

皮日休

何事有青钱，因人买钓船。阔容兼饵坐，深许共蓑眠。  
短好随朱鹭，轻堪倚白莲。自知无用处，却寄五湖仙。

卷 612\_11 【五贶诗·华顶杖】

皮日休

金庭仙树枝，道客自携持。探洞求丹粟，挑云觅白芝。  
量泉将濯足，阑鹤把支颐。以此将为赠，惟君尽得知。

卷 612\_12 【五贶诗·太湖砚】

皮日休

求于花石间，怪状乃天然。中莹五寸剑，外差千叠莲。  
月融还似洗，云湿便堪研。寄与先生后，应添内外篇。

卷 612\_13 【五贖詩 · 烏龍養和】

皮日休

壽木拳數尺，天生形狀幽。把疑傷虺節，用恐破蛇瘤。  
置合月觀內，買須云肆頭。料君携去處，烟雨太湖舟。

卷 612\_14 【五贖詩 · 訶陵樽】

皮日休

一片蜃魚壳，其中生翠波。買須能紫貝，用合對紅螺。  
盡瀉判狂藥，禁敲任浩歌。明朝與君后，爭那玉山何。

卷 612\_15 【早春病中書事寄魯望】

皮日休

眼暈見云母，耳虛聞海濤。惜春狂似蝶，養病躁于猱。  
案靜方書古，堂空藥氣高。可憐真宰意，偏解困吾曹。



卷 612\_16 【又寄次前韵】

皮日休

病根冬养得，春到一时生。眼暗怜晨惨，心寒怯夜清。  
妻仍嫌酒癖，医只禁诗情。应被高人笑，忧身不似名。

卷 612\_17 【秋晚留题鲁望郊居二首】

皮日休

竹树冷篸落，入门神已清。寒蛩傍枕响，秋菜上墙生。  
黄犬病仍吠，白驴饥不鸣。唯将一杯酒，尽日慰刘桢。

冷卧空斋内，余醒夕未消。秋花如有恨，寒蝶似无憀。  
檐上落斗雀，篱根生晚潮。若轮羁旅事，犹自胜皋桥。

卷 612\_18 【初冬章上人院】

皮日休

寒到无妨睡，僧吟不废禅。尚关经病鹤，犹滤欲枯泉。  
静案贝多纸，闲炉波律烟。清谭两三句，相向自翛然。

卷 612\_19 【临顿为吴中偏胜之地陆鲁望居之不出郭郭旷若…  
奉题屋壁】

皮日休

一方萧洒地，之子独深居。绕屋亲栽竹，堆床手写书。  
高风翔砌鸟，暴雨失池鱼。暗识归山计，村边买鹿车。

篱疏从绿槿，檐乱任黄茅。压酒移谿石，煎茶拾野巢。  
静窗悬雨笠，闲壁挂烟蓑。支遁今无骨，谁为世外交。

茧稀初上簇，醅尽未干床。尽日留蚕母，移时祭麹王。  
趁泉浇竹急，候雨种莲忙。更葺园中景，应为顾辟疆。

静僻无人到，幽深每自知。鹤来添口数，琴到益家资。  
坏堑生鱼沫，颓檐落燕儿。空将绿蕉叶，来往寄闲诗。

夏过无担石，日高开板扉。僧虽与筒簟，人不典蕉衣。  
鹤静共眠觉，鹭驯同钓归。生公石上月，何夕约谭微。

经岁岸乌纱，读书三十车。水痕侵病竹，蛛网上衰花。  
诗任传渔客，衣从递酒家。知君秋晚事，白帻刈胡麻。

寂历秋怀动，萧条夏思残。久贫空酒库，多病束鱼竿。  
玄想凝鹤扇，清斋拂鹿冠。梦魂无俗事，夜夜到金坛。

闭门无一事，安稳卧凉天。砌下翘饥鹤，庭阴落病蝉。  
倚杉闲把易，烧朮静论玄。赖有包山客，时时寄紫泉。

病起扶灵寿，憊然强到门。与杉除败叶，为石整危根。  
薜蔓任遮壁，莲茎卧枕盆。明朝有忙事，召客斫桐孙。

缓颊称无利，低眉号不能。世情都太薄，俗意就中憎。  
云态不知骤，鹤情非会徵。画臣谁奉诏，来此写姜肱。

#### 卷 612\_20 【游栖霞寺】

皮日休

不见明居士，空山但寂寥。白莲吟次缺，青霭坐来销。  
泉冷无三伏，松枯有六朝。何时石上月，相对论逍遥。

#### 卷 612\_21 【旅舍除夜】

皮日休

永夜谁能守，羈心不放眠。挑灯犹故岁，听角已新年。  
出谷空嗟晚，衔杯尚愧先。晚来辞逆旅，雪涕野槐天。

卷 612\_22 【鲁望示广文先生吴门二章情格高散可醒俗态…  
鲁望之命也】

皮日休

我见先生道，休思郑广文。鹤翻希作伴，鸥却觅为群。  
逸好冠清月，高宜著白云。朝廷未无事，争任醉醺醺。

能谙肉芝样，解讲隐书文。终古神仙窟，穷年麋鹿群。  
行厨煮白石，卧具拂青云。应在雷平上，支颐复半醺。

卷 612\_23 【虎丘寺殿前有古杉一本形状丑怪图之不尽…三百  
言以见志】

皮日休

种日应逢晋，枯来必自隋。鳄狂将立处，螭斗未开时。  
卓荦掷枪干，叉牙束戟枝。初惊蟊篆活，复讶獠狂痴。  
劲质如尧瘦，贞容学舜黹。势能獠士伯，丑可骇山祇。  
虎爪擎岩稳，虬身脱浪欹。槎头秃似刷，桡背利于锥。  
突兀方相胫，鳞皴夏氏胝。根应藏鬼血，柯欲漏龙髯。  
拗似神荼怒，呀如獬豸饥。朽痛难可吮，枯瘠不堪治。  
一炷玄云拔，三寻黑稍奇。狼头亭宰竖，蝮尾掘拳垂。  
目燥那逢燿，心开岂中铍。任苔为疥癣，从蠹作疮痍。  
品格齐辽鹤，年龄等宝龟。将怀宿地力，欲负拔山姿。

未倒防风骨，初僵负贰尸。漆书明古本，铁室抗全师。  
礧礧还无极，伶俜又莫持。坚应敌骏骨，文定写赭皮。  
蟠屈愁凌刹，腾骧恐攫池。抢烟寒嶮嶮，披萼静褰褰。  
威仰诚难识，句芒恐不知。好烧胡律看，堪共达多期。  
寡色诸芳笑，无声众籁疑。终添八柱位，未要一绳维。  
尽日来唯我，当春玩更谁。他年如入用，直构太平基。

卷 612\_24 【新秋言怀寄鲁望三十韵】

皮日休

新秋入破宅，疏散若平郊。户牖深如窟，诗书乱似巢。  
移床惊蟋蟀，拂匣动蟪蛄。静把泉华掬，闲拈乳管敲。  
桧身浑个矮，石面得能皴。小桂如拳叶，新松似手梢。  
鹤鸣转清角，鹧下扑金鶮。合药还慵服，为文亦懒抄。  
烦心入夜醒，疾首带凉抓。杉叶尖如簇，藤丝韧似鞘。  
债田含紫芋，低蔓隐青匏。老柏浑如疥，阴苔忽似胶。  
王余落败堑，胡孟入空庖。度日忘冠带，经时忆酒肴。  
有心同木偶，无舌并金铄。兴欲添玄测，狂将换易爻。  
达人唯落落，俗士自譊譊。底力将排难，何颜用解嘲。  
欲销毁后骨，空转坐来胞。犹豫应难抱，狐疑不易包。  
等闲逢毒蠱，容易遇咆哮。时事方千蝎，公途正二嶠。  
名微甘世弃，性拙任时抛。白日须投分，青云合定交。  
仕应同五柳，归莫舍三茅。涧鹿从来去，烟萝任溷殽。  
狙公闹后戏，云母病来攲。从此居方丈，终非竞斗筭。  
道穷应鬼遣，性拙必天教。无限疏慵事，凭君解一爬。

卷 612\_25 【奉和鲁望秋日遣怀次韵】

皮日休

高蹈为时背，幽怀是事兼。神仙君可致，江海我能淹。  
共守庚申夜，同看乙巳占。药囊除紫蠹，丹灶拂红盐。  
与物深无竞，于生亦太廉。鸿灾因足警，鱼祸为稀潜。  
笔砚秋光洗，衣巾夏藓沾。酒甌香竹院，鱼笼挂茅檐。  
琴忘因抛谱，诗存为致签。茶旗经雨展，石笋带云尖。  
鹤共心情慢，乌同面色黔。向阳裁白帟，终岁忆貂檐。  
取岭为山障，将泉作水帘。溪晴多晚鹭，池废足秋蟾。  
破衲虽云补，闲斋未办苫。共君还有役，竟夕得厌厌。

卷 612\_26 【江南书情二十韵寄秘阁韦校书贻之商洛宋先辈  
垂文二同年】

皮日休

四载加前字，今来未改衔。君批凤尾诏，我住虎头岩。  
季氏唯谋逐，臧仓只拟谗。时讹轻五羖，俗浅重三缄。  
瘦去形如鹤，忧来态似獐。才非师赵壹，直欲效陈咸。  
孤竹宁收笛，黄琮未作瑱。作羊宁免狠，为兔即须髭。  
枕户槐从亚，侵阶草懒芟。壅泉教咽咽，垒石放巉巉。  
掣钓随心动，抽书任意欹。茶教弩父摘，酒遣僮童监。  
默坐看山困，清斋饮水严。藓生天竺屐，烟外洞庭帆。

病久新乌帽，闲多著白衫。药苞陈雨匱，诗草蠹云函。  
遣客呼林狢，辞人寄海嫌。室唯搜古器，钱只买秋杉。  
寡合无深契，相期有至誠。他年如访问，烟萼暗髟髟。

卷 612\_27 【忆洞庭观步十韵】

皮日休

前时登观步，暑雨正铮摐。上戍看绵蕞，登村度石矼。  
崦花时有簇，溪鸟不成双。远树点黑槩，遥峰露碧幢。  
岩根瘦似壳，杉破腹如腔。校了渔人服，符簷野店窗。  
多携白木锺，爱买紫泉缸。仙犬声音古，遗民意绪厖。  
何文堪纬地，底策可经邦。自此将妻子，归山不姓庞。

卷 612\_28 【谏议以罢郡将归以六韵赐示，因伫酬献】

皮日休

欲下持衡诏，先容解印归。露浓春后泽，霜薄霁来威。  
旧化堪治疾，余恩可疗饥。隔花攀去棹，穿柳挽行衣。  
佐理能无取，酬知力甚微。空将千感泪，异日拜黄扉。

## 第六百一十三卷

### 卷 613\_1 【过云居院玄福上人旧居】

皮日休

重到云居独悄然，隔窗窥影尚疑禅。不逢野老来听法，  
犹见邻僧为引泉。龕上已生新石耳，壁间空带旧茶烟。  
南宗弟子时时到，泣把山花奠几筵。

### 卷 613\_2 【陪江西裴公游襄州延庆寺】

皮日休

丹青路上歇征轮，胜地偷闲一日身。不署前驱惊野鸟，  
唯将后乘载诗人。岩边候吏云遮却，竹下朝衣露滴新。  
更向碧山深处问，不妨犹有草茅臣。



卷 613\_3 【西塞山泊渔家】

皮日休

白纶巾下发如丝，静倚枫根坐钓矶。中妇桑村挑叶去，  
小儿沙市买蓑归。雨来莼菜流船滑，春后鲈鱼坠钓肥。  
西塞山前终日客，隔波相羨尽依依。

卷 613\_4 【襄州春游】

皮日休

信马腾腾触处行，春风相引与诗情。等闲遇事成歌咏，  
取次冲筵隐姓名。映柳认人多错误，透花窥鸟最分明。  
岑牟单绞何曾著，莫道猖狂似祢衡。

卷 613\_5 【送从弟皮崇归复州】

皮日休

羡尔优游正少年，竟陵烟月似吴天。车螯近岸无妨取，  
舴艋随风不费牵。处处路傍千顷稻，家家门外一渠莲。  
殷勤莫笑襄阳住，为爱南溪缩项鳊。

卷 613\_6 【题潼关兰若】

皮日休

潼津罢警有招提，近百年无战马嘶。壮士不言三尺剑，  
谋臣休道一丸泥。昔时驰道洪波上，今日宸居紫气西。  
关吏不劳重借问，弃繻生拟入耶溪。

卷 613\_7 【襄阳闲居与友生夜会】

皮日休

习隐悠悠世不知，林园幽事递相期。旧丝再上琴调晚，  
坏叶重烧酒暖迟。三径引时寒步月，四邻偷得夜吟诗。  
草玄寂淡无人爱，不遇刘歆更语谁。

卷 613\_8 【习池晨起】

皮日休

清曙萧森载酒来，凉风相引绕亭台。数声翡翠背人去，  
一番芙蓉含日开。菱叶深深埋钓艇，鱼儿漾漾逐流杯。  
竹屏风下登山屐，十宿高阳忘却回。

卷 613\_9 【秋晚自洞庭湖别业寄穆秀才】

皮日休

破村寥落过重阳，独自撸宁葺草房。风捲红蕉仍换叶，  
雨淋黄菊不成香。野猿偷栗重窥户，落雁疑人更绕塘。  
他日若修耆旧传，为予添取此书堂。

卷 613\_10 【华山李炼师所居】

皮日休

麻姑古貌上仙才，谪向莲峰管玉台。瑞气染衣金液后，  
香烟映面紫文开。孤云尽日方离洞，双鹤移时只有苔。  
深夜寂寥存想歇，月天时下草堂来。

卷 613\_11 【宏词下第感恩献兵部侍郎】

皮日休

分明仙籍列清虚，自是还丹九转疏。画虎已成翻类狗，  
登龙才变即为鱼。空惭季布千金诺，但负刘弘一纸书。  
犹有报恩方寸在，不知通塞竟何如。

卷 613\_12 【襄州汉阳王故宅】

皮日休

碑字依稀庙已荒，犹闻耆旧忆贤王。园林一半为他主，  
山水虚言是故乡。戟户野蒿生翠瓦，舞楼栖鸽污雕梁。  
柱天功业缘何事，不得终身似霍光。

卷 613\_13 【伤卢献秀才】

皮日休

愍征新价欲凌空，一首堪欺左太冲。只为白衣声过重，  
且非青汉路难通。贵侯待写过门下，词客偷名入卷中。  
手弄桂枝嫌不折，直教身歿负春风。

卷 613\_14 【南阳】

皮日休

昆阳王气已萧疏，依旧山河捧帝居。废路塌平残瓦砾，  
破坟耕出烂图书。绿莎满县年荒后，白鸟盈溪雨霁初。  
二百年来霸王业，可知今日是丘墟。

卷 613\_15 【秋晚访李处士所居】

皮日休

门前襄水碧潺潺，静钓归来不掩关。书阁鼠穿厨簾破，  
竹园霜后桔槔闲。儿童不许惊幽鸟，药草须教上假山。  
莫为爱诗偏念我，访君多得醉中还。

卷 613\_16 【李处士郊居】

皮日休

石衣如发小溪清，溪上柴门架树成。园里水流浇竹响，  
窗中人静下棋声。几多狎鸟皆谙性，无限幽花未得名。  
满引红螺诗一首，刘桢失却病心情。

卷 613\_17 【送令狐补阙归朝】

皮日休

文如日月气如虹，举国重生正始风。且愿仲山居左掖，  
只忧徐邈入南宫。朝衣正在天香里，谏草应焚禁漏中。  
为说明年今日事，晋廷新拜黑头公。

卷 613\_18 【洛中寒食二首】

皮日休

千门万户掩斜晖，绣幰金衔晚未归。击鞠王孙如锦地，  
斗鸡公子似花衣。嵩云静对行台起，洛鸟闲穿上苑飞。  
唯有路傍无意者，献书未纳问淮肥。

远近垂杨映钿车，天津桥影压神霞。弄春公子正回首，  
趁节行人不到家。洛水万年云母竹，汉陵千载野棠花。  
欲知豪贵堪愁处，请看邙山晚照斜。

卷 613\_19 【登第后寒食杏园有宴，因寄录事宋垂文同年】

皮日休

雨洗清明万象鲜，满城车马簇红筵。恩荣虽得陪高会，  
科禁惟忧犯列仙。当醉不知开火日，正贫那似看花年。  
纵来恐被青娥笑，未纳春风一宴钱。

卷 613\_20 【陈先辈故居】

皮日休

杉桂交阴一里余，逢人浑似洞天居。千株橘树唯沽酒，

十顷莲塘不买鱼。藜杖闲来侵径竹，角巾端坐满楼书。  
襄阳无限烟霞地，难觅幽奇似此殊。

卷 613\_21 【奉和鲁望寒夜访寂上人韵】

皮日休

院寒青霭正沈沈，霜栈干鸣入古林。数叶贝书松火暗，  
一声金磬桧烟深。陶潜见社无妨醉，殷浩谭经不废吟。  
何事欲攀尘外契，除君皆有利名心。

卷 613\_22 【江南道中怀茅山广文南阳博士三首】

皮日休

寒岚依约认华阳，遥想高人卧草堂。半日始斋青餽饭，  
移时空印白檀香。鹤雏入夜归云屋，乳管逢春落石床。  
谁道夫君无伴侣，不离窗下见羲皇。

住在华阳第八天，望君唯欲结良缘。堂扃洞里千秋燕，  
厨盖岩根数斗泉。坛上古松疑度世，观中幽鸟恐成仙。  
不知何事迎新岁，乌纳裘中一觉眠。

五色香烟惹内文，石饴初熟酒初醺。将开丹灶那防鹤，  
欲算棋图却望云。海气平生当洞见，瀑冰初坼隔山闻。

如何世外无交者，一卧金坛只有君。

卷 613\_43 【奉和鲁望早春雪中作吴体见寄】

皮日休

威仰噤死不敢语，琼花云魄清珊珊。溪光冷射触鹳鸕，  
柳带冻脆攒栏杆。竹根乍烧玉节快，酒面新泼金膏寒。  
全吴缥瓦十万户，惟君与我如袁安。

卷 613\_44 【吴中言情寄鲁望】

皮日休

古来伧父爱吴乡，一上胥台不可忘。爱酒有情如手足，  
除诗无计似膏肓。宴时不辍琅书味，斋日难判玉鲙香。  
为说松江堪老处，满船烟月湿莎裳。

卷 613\_45 【行次野梅】

皮日休

萼拂萝梢一树梅，玉妃无侣独裴回。好临王母瑶池发，  
合傍萧家粉水开。共月已为迷眼伴，与春先作断肠媒。



不堪便向多情道，万片霜华雨损来。

卷 613\_46 【扬州看辛夷花】

皮日休

腊前千朵亚芳丛，细腻偏胜素柰功。螭首不言披晓雪，  
麝脐无主任春风。一枝拂地成瑶圃，数树参庭是蕊宫。  
应为当时天女服，至今犹未放全红。

卷 613\_47 【暇日独处寄鲁望】

皮日休

幽慵不觉耗年光，犀柄金徽乱一床。野客共为赊酒计，  
家人同作借书忙。园蔬预遣分僧料，廩粟先教算鹤粮。  
无限高情好风月，不妨犹得事吾王。

卷 613\_48 【屣步访鲁望不遇】

皮日休

雪晴墟里竹欹斜，蜡屐徐吟到陆家。荒径扫稀堆柏子，  
破扉开涩染苔花。壁闲定欲图双桧，厨静空如饭一麻。

拟受太玄今不遇，可怜遗恨似侯芭。

卷 613\_49 【开元寺客省早景即事】

皮日休

客省萧条柿叶红，楼台如画倚霜空。铜池数滴桂上雨，  
金铎一声松杪风。鹤静时来珠像侧，鸽驯多在宝幡中。  
如何尘外虚为契，不得支公此会同。

卷 613\_50 【奉和鲁望独夜有怀吴体见寄】

皮日休

病鹤带雾傍独屋，破巢含雪倾孤梧。濯足将加汉光腹，  
抵掌欲捋梁武须。隐几清吟谁敢敌，枕琴高卧真堪图。  
此时枉欠高散物，楠瘤作樽石作垆。

卷 613\_51 【病中有人惠海蟹转寄鲁望】

皮日休

紺甲青筐染落衣，岛夷初寄北人时。离居定有石帆觉，  
失伴唯应海月知。族类分明连琐珞，形容好个似蟛蜞。

病中无用霜螯处，寄与夫君左手持。

卷 613\_52 【病中美景颇阻追游因寄鲁望】

皮日休

癯床闲卧昼迢迢，唯把真如慰寂寥。南国不须收薏苡，  
百年终竟是芭蕉。药前美禄应难断，枕上芳辰岂易销。  
看取病来多少日，早梅零落玉华焦。

卷 613\_53 【鲁望以花翁之什见招因次韵酬之】

皮日休

九十携锄伕僂翁，小园幽事尽能通。鬪烟栽药为身计，  
负水浇花是世功。婚嫁定期杉叶紫，盖藏应待桂枝红。  
不知家道能多少，只在句芒一夜风。

卷 613\_54 【病中庭际海石榴花盛发，感而有寄】

皮日休

一夜春光绽绛囊，碧油枝上昼煌煌。风匀只似调红露，  
日暖唯忧化赤霜。火齐满枝烧夜月，金津含蕊滴朝阳。

不知桂树知情否，无限同游阻陆郎。

卷 613\_55 【早春以橘子寄鲁望】

皮日休

个个和枝叶捧鲜，彩凝犹带洞庭烟。不为韩嫣金丸重，  
直是周王玉果圆。剖似日魂初破后，弄如星髓未销前。  
知君多病仍中圣，尽送寒苞向枕边。

卷 613\_56 【病中书情寄上崔谏议】

皮日休

十日来来旷奉公，闭门无事忌春风。虫丝度日萦琴荐，  
蛀粉经时落酒筒。马足歇从残漏外，鱼须抛在乱书中。  
殷勤莫怪求医切，只为山樱欲放红。

卷 613\_57 【病孔雀】

皮日休

烟花虽媚思沈冥，犹自抬头护翠翎。强听紫箫如欲舞，  
困眠红树似依屏。因思桂蠹伤肌骨，为忆松鹅损性灵。

尽日春风吹不起，钿毫金缕一星星。

卷 613\_58 【奉和鲁望上元日道室焚修】

皮日休

明真台上下仙官，玄藻初吟万籁寒。飙御有声时杳杳，  
宝衣无影自珊珊。蕊书乞见斋心易，玉籍求添拜首难。  
端简不知清景暮，灵芜香烬落金坛。

卷 613\_59 【奉酬鲁望惜春见寄】

皮日休

十五日中春日好，可怜沉痾冷如灰。以前虽被愁将去，  
向后须教醉领来。梅片尽飘轻粉靥，柳芽初吐烂金醅。  
病中无限花番次，为约东风且住开。

卷 613\_60 【闻鲁望游颜家林园病中有寄】

皮日休

一夜韶姿著水光，谢家春草满池塘。细挑泉眼寻新脉，  
轻把花枝嗅宿香。蝶欲试飞犹护粉，莺初学啭尚羞簧。

分明不得同君赏，尽日倾心羨索郎。

卷 613\_61 【奉和鲁望春雨即事次韵】

皮日休

织恨凝愁映鸟飞，半旬飘洒掩韶晖。山容洗得如烟瘦，  
地脉流来似乳肥。野客正闲移竹远，幽人多病探花稀。  
何年细湿华阳道，两乘巾车相并归。

卷 613\_62 【鲁望春日多寻野景日休抱疾杜门因有是寄】

皮日休

野侣相逢不待期，半缘幽事半缘诗。乌纱任岸穿筋竹，  
白袷从披趁肉芝。数卷蠹书棋处展，几升菰米钓前炊。  
病中不用君相忆，折取山樱寄一枝。

卷 613\_63 【鲁望以躬掇野蔬兼示雅什，用以酬谢】

皮日休

杖藜春烟暖向阳，烦君为我致盈筐。深挑乍见牛唇液，  
细掐徐闻鼠耳香。紫甲采从泉脉畔，翠牙搜自石根傍。

雕胡饭熟餽餲软，不是高人不合尝。

卷 613\_64 【卧病感春寄鲁望】

皮日休

乌皮几上困腾腾，玉柄清羸愧不能。昨夜眠时稀似鹤，  
今朝餐数减于僧。药销美禄应天折，医过芳辰定鬼憎。  
任是雨多游未得，也须收在探花朋。

卷 613\_65 【奉和鲁望徐方平后闻赦次韵】

皮日休

金鸡烟外上临轩，紫诰新垂作解恩。涿鹿未销初败血，  
新安顿雪已坑魂。空林叶尽蝗来郡，腐骨花生战后村。  
未遣蒲车问幽隐，共君应老抱桐孙。

卷 613\_66 【奉酬鲁望见答鱼笺之什】

皮日休

轻如隐起腻如飴，除却鲛工解制稀。欲写恐成河伯诏，  
试裁疑是水仙衣。毫端白獭脂犹湿，指下冰蚕子欲飞。

若用莫将闲处去，好题春思赠江妃。

卷 613\_67 【病后春思】

皮日休

连钱锦暗麝氛氲，荆思多才咏鄂君。孔雀钿寒窥沼见，  
石榴红重堕阶闻。牢愁有度应如月，春梦无心只似云。  
应笑病来惭满愿，花笺好作断肠文。

卷 613\_68 【偶成小酌招鲁望不至，以诗为解，因次韵酬之】

皮日休

醉侣相邀爱早阳，小筵催办不胜忙。冲深柳驻吴娃幃，  
倚短花排羯鼓床。金凤欲为莺引去，钿蝉疑被蝶勾将。  
如何共是忘形者，不见渔阳掺一场。

卷 613\_69 【以纱巾寄鲁望因而有作】

皮日休

周家新样替三梁。裹发偏宜白面郎。掩敛乍疑裁黑雾，  
轻明浑似戴玄霜。今朝定见看花昃，明日应闻漉酒香。



更有一般君未识，虎文巾在绛霄房。

卷 613\_70 【临顿宅将有归于之日鲁望以诗见贶，因抒怀酬之】

皮日休

共老林泉忍暂分，此生应不识回文。几枚竹笥送德曜，  
一乘柴车迎少君。举案品多缘涧药，承家事少为谿云。  
居然自是幽人事，辄莫教他孙寿闻。

卷 613\_71 【奉和鲁望谢惠巨鱼之半】

皮日休

钓公来信自松江，三尺春鱼拨刺霜。腹内旧钩苔染涩，  
腮中新饵藻和香。冷鳞中断榆钱破，寒骨平分玉箸光。  
何事祝君偏得所，只缘同是越航郎。

卷 613\_72 【馆娃宫怀古】

皮日休

艳骨已成兰麝土，宫墙依旧压层崖。弩台雨坏逢金镞，

香径泥销露玉钗。砚沼只留溪鸟浴，屣廊空信野花埋。  
姑苏麋鹿真闲事，须为当时一怆怀。

卷 613\_73 【以紫石砚寄鲁望兼酬见赠】

皮日休

样如金蹙小能轻，微润将融紫玉英。石墨一研为凤尾，  
寒泉半勺是龙睛。骚人白芷伤心暗，狎客红筵夺眼明。  
两地有期皆好用，不须空把洗溪声。

卷 613\_74 【奉和鲁望同游北禅院】

皮日休

戚历杉阴入草堂，老僧相见似相忘。吟多几转莲花漏，  
坐久重焚柏子香。鱼惯斋时分净食，鸽能闲处傍禅床。  
云林满眼空羈滞，欲对弥天却自伤。

卷 613\_75 【孙发百篇将游天台请诗赠行，因以送之】

皮日休

孙子荆家思有余，元戎曾荐入公车。百篇宫体喧金屋，

一日官衙下玉除。紫府近通斋后梦，赤城新有寄来书。  
因逢二老如相问，正滞江南为鲋鱼。

卷 613\_76 【奉和鲁望蔷薇次韵】

皮日休

谁绣连延满户陈，暂应遮得陆郎贫。红芳掩敛将迷蝶，  
翠蔓飘飘欲挂人。低拂地时如堕马，高临墙处似窥邻。  
只应是董双成戏，剪得神霞寸寸新。

卷 613\_77 【闻开元寺开笋园寄章上人】

皮日休

园锁开声骇鹿群，满林鲜笋水犀文。森森竞泫林梢雨，  
櫨櫨争穿石上云。并出亦如鹅管合，各生还似犬牙分。  
折烟束露如相遗，何胤明朝不茹荤。

卷 613\_78 【开元寺佛钵诗】

皮日休

帝青石作绿冰姿，曾得金人手自持。拘律树边斋散后，

提罗花下洗来时。乳麝味断中天觉，麦麝香消大劫知。  
从此共君新顶戴，斜风应不等闲吹。

卷 613\_79 【夏首病愈因招鲁望】

皮日休

晓入清和尚衲衣，夏阴初合掩双扉。一声拨谷桑柘晚，  
数点春锄烟雨微。贫养山禽能个瘦，病关芳草就中肥。  
明朝早起非无事，买得莼丝待陆机。

卷 613\_80 【奉和鲁望新夏东郊闲泛（一本此下有见怀次韵四字）】

皮日休

水物轻明淡似秋，多情才子倚兰舟。碧莎裳下携诗草，  
黄篾楼中挂酒篳。莲叶蘸波初转棹，鱼儿簇饵未谙钩。  
共君莫问当时事，一点沙禽胜五侯。

卷 613\_81 【奉和鲁望四月十五日道室书事】

皮日休

望朝斋戒是寻常，静后金根第几章。竹叶饮为甘露色，

莲花鲊作肉芝香。松膏背日凝云磴，丹粉经年染石床。  
剩欲与君终此志，顽仙唯恐鬓成霜。

卷 613\_82 【奉和鲁望看压新醅（一本此下有次韵二字）】

皮日休

一簣松花细有声，旋将渠碗撇寒清。秦吴只恐筭来近，  
刘项真能酿得平。酒德有神多客颂，醉乡无货没人争。  
五湖烟水郎山月，合向樽前问底名。

卷 613\_83 【登初阳楼寄怀北平郎中】

皮日休

危楼新制号初阳，白粉青蕤射沼光。避酒几浮轻舴艋，  
下棋曾觉睡鸳鸯。投钩列坐围华烛，格簋分朋占靓妆。  
莫怪重登频有恨，二年曾侍旧吴王。

卷 613\_84 【夏初访鲁望偶题小斋】

皮日休

半里芳阴到陆家，藜床相劝饭胡麻。林间度宿抛棋局，

壁上经旬挂钓车。野客病时分竹米，邻翁斋日乞藤花。  
踟蹰未放闲人去，半岸纱幮待月华。

卷 613\_85 【所居首夏，水木尤清，适然有作】

皮日休

病来无事草堂空，昼水休闻十二筒。桂静似逢青眼客，  
松闲如见绿毛翁。潮期暗动庭泉碧，梅信微侵地障红。  
尽日枕书慵起得，被君犹自笑从公。

卷 613\_86 【重玄寺元达年逾八十，好种名药，凡所…余奇  
而访之因题二章】

皮日休

雨涤烟锄偃僂赍，绀牙红甲两三畦。药名却笑桐君少，  
年纪翻嫌竹祖低。白石静敲蒸朮火，清泉闲洗种花泥。  
怪来昨日休持钵，一尺雕胡似掌齐。

香蔓蒙茏覆昔邪，桂烟杉露湿袈裟。石盆换水捞松叶，  
竹径穿床避笋芽。藜杖移时挑细药，铜瓶尽日灌幽花。  
支公谩道怜神骏，不及今朝种一麻。

## 第六百十四卷

### 卷 614\_1 【怀华阳润卿博士三首】

皮日休

先生一向事虚皇，天市坛西与世忘。环堵养龟看气诀，  
刀圭饵犬试仙方。静探石脑衣裾润，闲炼松脂院落香。  
闻道征贤须有诏，不知何日到良常。

冥心唯事白英君，不问人间爵与勋。林下醉眠仙鹿见，  
洞中闲话隐芝闻。石床卧苦浑无藓，藤筐开稀恐有云。  
料得虚皇新诏样，青琼板上绿为文。

凤骨轻来称瘦容，华阳馆主未成翁。数行玉札存心久，  
一掬云浆漱齿空。白石煮多熏屋黑，丹砂埋久染泉红。  
他年欲事先生去，十赆须加陆逸冲。

### 卷 614\_2 【鲁望以竹夹膝见寄，因次韵酬谢】

皮日休

圆于玉柱滑于龙，来自衡阳彩翠中。拂润恐飞清夏雨，

叩虚疑贮碧湘风。大胜书客裁成束，颇赛谿翁截作筒。  
从此角巾因尔戴，俗人相访若为通。

卷 614\_3 【夏景无事因怀章来二上人二首】

皮日休

澹景微阴正送梅，幽人逃暑瘦楠杯。水花移得和鱼子，  
山蕨收时带竹胎。啸馆大都偏见月，醉乡终竟不闻雷。  
更无一事唯留客，却被高僧怕不来。

佳树盘珊枕草堂，此中随分亦闲忙。平铺风簟寻琴谱，  
静扫烟窗著药方。幽鸟见贫留好语，白莲知卧送清香。  
从今有计消闲日，更为支公置一床。

卷 614\_4 【寄琼州杨舍人】

皮日休

德星芒彩瘴天涯，酒树堪消谪宦嗟。行遇竹王因设奠，  
居逢木客又迁家。清斋净漉桃榔面，远信闲封豆蔻花。  
清切会须归有日，莫贪句漏足丹砂。



卷 614\_5 【鲁望以轮钩相示，缅怀高致，因作三篇】

皮日休

角柄孤轮细腻轻，翠篷十载伴君行。撚时解转蟾蜍魄，  
抛处能啼络纬声。七里滩波喧一舍，五云溪月静三更。  
牛衣鲊足和蓑睡，谁信人间有利名。

一线飘然下碧塘，溪翁无语远相望。蓑衣旧去烟披重，  
箬笠新来雨打香。白鸟白莲为梦寐，清风清月是家乡。  
明朝有物充君信，樗酒三瓶寄夜航。

尽日悠然舴艋轻，小轮声细雨冥冥。三寻丝带桐江烂，  
一寸钩含笠泽腥。用近詹何传钓法，收和范蠡养鱼经。  
孤篷半夜无余事，应被严滩聒酒醒。

卷 614\_6 【吴中书事寄汉南裴尚书】

皮日休

万家无事锁兰桡，乡味腥多厌紫蕲。水似棋文交度郭，  
柳如行障俨遮桥。青梅蒂重初迎雨，白鸟群高欲避潮。  
唯望旧知怜此意，得为伧鬼也逍遥。

卷 614\_7 【夏景冲澹偶然作二首】

皮日休

祗隈蒲褥岸乌纱，味道澄怀景便斜。红印寄泉惭郡守，  
青筐与笋愧僧家。茗炉尽日烧松子，书案经时剥瓦花。  
园吏暂栖君莫笑，不妨犹更著南华。

一室无喧事事幽，还如贞白在高楼。天台画得千回看，  
湖目芳来百度游。无限世机吟处息，几多身计钓前休。  
他年谒帝言何事，请赠刘伶作醉侯。

卷 614\_8 【送李明府之任海南】

皮日休

五羊城在蜃楼边，墨绶垂腰正少年。山静不应闻屈鸟，  
草深从使翳贪泉。蟹奴晴上临潮槛，燕婢秋随过海船。  
一事与君消远宦，乳蕉花发讼庭前。

卷 614\_9 【寄题罗浮轩辕先生所居】

皮日休

乱峰四百三十二，欲问征君何处寻。红翠数声瑶室响，

真檀一炷石楼深。山都遣负沽来酒，樵客容看化后金。  
从此谒师知不远，求官先有葛洪心。

卷 614\_10 【宿报恩寺水阁】

皮日休

寺锁双峰寂不开，幽人中夜独裴回。池文带月铺金簟，  
莲朵含风动玉杯。往往竹梢摇翡翠，时时杉子掷莓苔。  
可怜此际谁曾见，唯有支公尽看来。

卷 614\_11 【醉中偶作呈鲁望】

皮日休

谿云涧鸟本吾侪，刚为浮名事事乖。十里寻山为思役，  
五更看月是情差。分将吟咏华双鬓，力以壶觞固百骸。  
争得草堂归卧去，共君同作太常斋。

卷 614\_12 【寄滑州李副使员外】

皮日休

兵绕临淮数十重，铁衣才子正从公。军前草奏旄头下，

城上封书箭箠中。围合只应闻晓雁，血腥何处避春风。  
故人勋重金章贵，犹在江湖积剑功。

卷 614\_13 【伤史拱山人】

皮日休

一缄幽信自襄阳，上报先生去岁亡。山客为医翻赏药，  
野僧因吊却焚香。峰头孤冢为云穴，松下灵筵是石床。  
宗炳死来君又去，终身不复到柴桑。

卷 614\_14 【吴中言怀寄南海二同年】

皮日休

曲水分飞岁已赊，东南为客各天涯。退公只傍苏劳竹，  
移宴多随末利花。铜鼓夜敲溪上月，布帆晴照海边霞。  
三年谩被鲈鱼累，不得横经侍绛纱。

卷 614\_15 【奉和鲁望白鸥诗】

皮日休

雪羽褰褰半惹泥，海云深处旧巢迷。池无飞浪争教舞，

洲少轻沙若遣栖。烟外失群惭雁鹭，波中得志羨鳬鹭。  
主人恩重真难遇，莫为心孤忆旧溪。

卷 614\_16 【奉和鲁望怀杨台文杨鼎文二秀才】

皮日休

羊昙留我昔经春，各以篇章斗五云。宾草每容闲处见，  
击琴多任醉中闻。钓前青翰交加倚，醉后红鱼取次分。  
为说风标曾入梦，上仙初著翠霞裙。

卷 614\_17 【友人以人参见惠因以诗谢之】

皮日休

神草延年出道家，是谁披露记三桮。开时的定涵云液，  
鬪后还应带石花。名士寄来消酒渴，野人煎处撒泉华。  
从今汤剂如相续，不用金山焙上茶。

卷 614\_18 【伤进士严子重诗】

皮日休

十哭都门榜上尘，盖棺终是五湖人。生前有敌唯丹桂，

没后无家只白蘋。箬下斩新醒处月，江南依旧咏来春。  
知君精爽应无尽，必在酆都颂帝晨。

卷 614\_19 【奉和鲁望早秋吴体次韵】

皮日休

书淫传癖穷欲死，諛諛何必频相仍。日干阴藓厚堪剥，  
藤把欹松牢似绳。捣药香侵白袷袖，穿云润破乌纱棱。  
安得瑶池饮残酒，半醉骑下垂天鹏。

卷 614\_20 【奉和鲁望秋赋有期次韵】

皮日休

十载江湖尽是闲，客儿诗句满人间。郡侯闻誉亲邀得，  
乡老知名不放还。应带瓦花经汴水，更携云实出包山。  
太微宫里环冈树，无限瑶枝待尔攀。

卷 614\_21 【奉和鲁望病中秋怀次韵】

皮日休

贫病于君亦太兼，才高应亦被天嫌。因分鹤料家资减，

为置僧餐口数添。静里改诗空凭几，寒中注易不开帘。  
清词一一侵真宰，甘取穷愁不用占。

卷 614\_22 【新秋即事三首】

皮日休

痴号多于顾恺之，更无余事可从知。酒坊吏到常先见，  
鹤料符来每探支。凉后每谋清月社，晚来专赴白莲期。  
共君无事堪相贺，又到金齏玉鲙时。

堪笑高阳病酒徒，幅巾潇洒在东吴。秋期净扫云根瘦，  
山信回缄乳管粗。白月半窗抄朮序，清泉一器授芝图。  
乞求待得西风起，尽挽烟帆入太湖。

露槿风杉满曲除，高秋无事似云庐。醉多已任家人厌，  
病久还甘吏道疏。青桂巾箱时寄药，白纶卧具半抛书。  
君卿唇舌非吾事，且向江南问鰕鱼。

卷 614\_23 【南阳润卿将归雷平因而有赠】

皮日休

借问山中许道士，此回归去复何如。竹屏风扇抄遗事，  
柘步舆竿系隐书。绛树实多分紫鹿，丹沙泉浅种红鱼。

东卿旒节看看至，静启茅斋慎扫除。

卷 614\_24 【访寂上人遇】

皮日休

何处寻云暂废禅，客来还寄草堂眠。桂寒自落翻经案，  
石冷空消洗钵泉。炉里尚飘残玉篆，龕中仍锁小金仙。  
须将二百签回去，得得支公恐隔年。

卷 614\_25 【顾道士亡弟子以束帛乞铭于余鲁望因赋戏赠日  
休奉和】

皮日休

师去东华却炼形，门人求我志金庭。大椿枯后新为记，  
仙鹤亡来始有铭。琼板欲刊知不朽，冰纨将受恐通灵。  
君才莫叹无兹分，合注神玄剑解经。

卷 614\_26 【秋夕文宴得遥字】

皮日休

啼蜩衰叶共萧萧，文宴无喧夜转遥。高韵最宜题雪赞，



逸才偏称和云谣。风吹翠蜡应难刻，月照清香太易消。  
无限玄言一杯酒，可能容得盖宽饶。

卷 614\_27 【南阳广文欲于荆襄卜居因而有赠】

皮日休

地脉从来是福乡，广文高致更无双。青精饭熟云侵灶，  
白朮裘成雪溅窗。度日竹书千万字，经冬朮煎两三缸。  
鲈鱼自是君家味，莫背松江忆汉江。

卷 614\_28 【寄毗陵魏处士朴】

皮日休

文籍先生不肯官，絮巾冲雪把鱼竿。一堆方册为侯印，  
三级幽岩是将坛。醉少最因吟月冷，瘦多偏为卧云寒。  
兔皮衾暖篷舟稳，欲共谁游七里滩。

卷 614\_29 【初冬偶作寄南阳润卿】

皮日休

寓居无事入清冬，虽设樽罍酒半空。白菊为霜翻带紫，

苍苔因雨却成红。迎潮预遣收鱼笱，防雪先教盖鹤笼。  
唯待支硎最寒夜，共君披氅访林公。

卷 614\_30 【冬晓章上人院】

皮日休

山堂冬晓寂无闻，一句清言忆领军。琥珀珠黏行处雪，  
棕榈帚扫卧来云。松扉欲启如鸣鹤，石鼎初煎若聚蚊。  
不是恋师终去晚，陆机茸内足毛群。

卷 614\_31 【寄题镜岩周尊师所居】

皮日休

八十余年住镜岩，鹿皮巾下雪髭髭。床寒不奈云萦枕，  
经润何妨雨滴函。饮涧猿回窥绝洞，缘梯人歇倚危杉。  
如何计吏穷于鸟，欲望仙都举一帆。

卷 614\_32 【寒夜文宴得泉字】

皮日休

分明竞鬣七香笺，王朗风姿尽列仙。盈箧共开华顶药，

满瓶同坼惠山泉。蟹因霜重金膏溢，橘为风多玉脑鲜。  
吟罢不知诗首数，隔林明月过中天。

卷 614\_33 【庚寅岁十一月新罗弘惠上人与本国同书请日休…  
以诗送之】

皮日休

三十麻衣弄渚禽，岂知名字彻鸡林。勒铭虽即多遗草，  
越海还能抵万金。鲸鬣晓掀峰正烧，鳌睛夜没岛还阴，  
二千余字终天别，东望辰韩泪洒襟。

卷 614\_34 【送润卿博士还华阳】

皮日休

雪打篷舟离酒旗，华阳居士半酣归。逍遥只恐逢雪将，  
恬淡真应降月妃。仙市鹿胎如锦嫩，阴宫燕肉似酥肥。  
公车草合蒲轮坏，争不教他白日飞。

卷 614\_35 【寒日书斋即事三首】

皮日休

参佐三间似草堂，恬然无事可成忙。移时寂历烧松子，

尽日殷勤拂乳床。将近道斋先衣褐，欲清诗思更焚香。  
空庭好待中宵月，独礼星辰学步罡。

不知何事有生涯，皮褐亲裁学道家。深夜数瓯唯柏叶，  
清晨一器是云华。盆池有鹭窥蘋沫，石版无人扫桂花。  
江汉欲归应未得，夜来频梦赤城霞。

方朔家贫未有车，肯从荣利舍樵渔。从公未怪多侵酒，  
见客唯求转借书。暂听松风生意足，偶看溪月世情疏。  
如钩得贵非吾事，合向烟波为五鱼。

卷 614\_36 【腊后送内大德从勔游天台】

皮日休

讲散重云下九天，大君恩赐许随缘。霜中一钵无辞乞，  
湖上孤舟不废禅。梦入琼楼寒有月，行过石树冻无烟。  
他时瓜镜知何用，吴越风光满御筵。

卷 614\_37 【寄题玉霄峰叶涵象尊师所居】

皮日休

青冥向上玉霄峰，元始先生戴紫蓉。晓案琼文光洞壑，  
夜坛香气惹杉松。闲迎仙客来为鹤，静噉灵符去是龙。

子细扪心无偃骨，欲随师去肯相容。

卷 614\_38 【奉和鲁望寄南阳广文次韵】

皮日休

春彩融融释冻塘，日精闲咽坐岩房。琼函静后从猿觑，  
金液初开与鹤尝。八会旧文多搭写，七真遗语剩思量。  
不知梦到为何处，红药满山烟月香。

卷 614\_39 【题支山南峰僧】

皮日休

云侵坏衲重隈肩，不下南峰不记年。池里群鱼曾受戒，  
林间孤鹤欲参禅。鸡头竹上开危径，鸭脚花中擗废泉。  
无限吴都堪赏事，何如来此看师眠。

卷 614\_40 【送董少卿游茅山】

皮日休

名卿风度足杓斜，一舸闲寻二许家。天影晓通金井水，  
山灵深护玉门沙。空坛礼后销香母，阴洞缘时触乳花。

尽待于公作廷尉，不须从此便餐霞。

卷 614\_41 【酬鲁望见迎绿罽次韵】

皮日休

轻裁鸭绿任金刀，不怕西风断野蒿。酬赠既无青玉案，  
纤华犹欠赤霜袍。烟披怪石难同逸，竹映仙禽未胜高。  
成后料君无别事，只应酣饮咏离骚。

卷 614\_42 【寄怀南阳润卿】

皮日休

鹿门山下捕鱼郎，今向江南作渴羌。无事只陪看藕样，  
有钱唯欲买湖光。醉来浑忘移花处，病起空闻焙药香。  
何事对君犹有愧，一篷冲雪返华阳。

卷 614\_43 【鲁望悯承吉之孤为诗序邀予属和欲用予道振其孤…良友】

皮日休

先生清骨葬烟霞，业破孤存孰为嗟。几箧诗编分贵位，

一林石笋散豪家。儿过旧宅啼枫影，姬绕荒田泣稗花。  
唯我共君堪便戒，莫将文誉作生涯。

卷 614\_44 【寄润卿博士】

皮日休

高眠可为要玄纁，鹄尾金炉一世焚。尘外乡人为许掾，  
山中地主是茅君。将收芝菌唯防雪，欲晒图书不奈云。  
若使华阳终卧去，汉家封禅用谁文。

卷 614\_45 【奉和鲁望白菊】

皮日休

已过重阳半月天，琅华千点照寒烟。蕊香亦似浮金靛，  
花样还如镂玉钱。玩影冯妃堪比艳，炼形萧史好争妍。  
无由撚向牙箱里，飞上方诸赠列仙。

卷 614\_46 【华亭鹤闻之旧矣及来吴中以钱半千得一只养之…  
请垂见和】

皮日休

池上低摧病不行，谁教仙魄反层城。阴苔尚有前朝迹，

皎月新无昨夜声。菰米正残三日料，筠笼休碍九霄程。  
不知此恨何时尽，遇著云泉即怆情。

卷 614\_47 【伤开元观顾道士】

皮日休

协晨宫上启金扉，诏使先生坐蛻归。鹤有一声应是哭，  
丹无余粒恐潜飞。烟凄玉笥封云篆，月惨琪花葬羽衣。  
肠断雷平旧游处，五芝无影草微微。

卷 614\_48 【醉中即席赠润卿博士】

皮日休

适越游吴一散仙，银瓶玉柄两翛然。茅山顶上携书麓，  
笠泽心中漾酒船。桐木布温吟倦后，桃花饭熟醉醒前。  
谢安四十余方起，犹自高闲得数年。

卷 614\_49 【偶留羊振文先辈及一二文友小饮日休以眼病…因成四韵】

皮日休

谢庄初起恰花晴，强侍红筵不避觥。久断杯盂华盖喜，



忽闻歌吹谷神惊。襦褌正重新开柳，咕嗫难通乍啭莺。  
犹有僧虔多蜜炬，不辞相伴到天明。

卷 614\_50 【奉送浙东德师侍御罢府西归】

皮日休

建安才子太微仙，暂上金台许二年。形影欲归温室树，  
梦魂犹傍越溪莲。空将海月为京信，尚使樵风送酒船。  
从此受恩知有处，免为伧鬼恨吴天。

卷 614\_51 【送羊振文先辈往桂阳归覲】

皮日休

桂阳新命下彤墀，彩服行当欲雪时。登第已闻传祢赋，  
问安犹听讲韩诗。竹人临水迎符节，风母连云避信旗。  
无限湘中悼骚恨，凭君此去谢江蓠。

卷 614\_52 【褚家林亭】

皮日休

广亭遥对旧娃宫，竹岛萝溪委曲通。茂苑楼台低槛外，

太湖鱼鸟彻池中。萧疏桂影移茶具，狼藉蘋花上钓筒。  
争得共君来此住，便披鹤氅对清风。

卷 614\_53 【送圆载上人归日本国】

皮日休

讲殿谈余著赐衣，椰帆却返旧禅扉。贝多纸上经文动，  
如意瓶中佛爪飞。飓母影边持戒宿，波神宫里受斋归。  
家山到日将何入，白象新秋十二围。

卷 614\_54 【重送】

皮日休

云涛万里最东头，射马台深玉署秋。无限属城为裸国，  
几多分界是亶州。取经海底开龙藏，诵咒空中散蜃楼。  
不奈此时贫且病，乘桴直欲伴师游。

卷 614\_55 【润卿遗青餠饭兼之一绝，聊用答谢】

皮日休

传得三元餠饭名，大宛闻说有仙卿。分泉过屋春青稻，

拂雾影衣折紫茎，蒸处不教双鹤见，服来唯怕五云生。  
草堂空坐无饥色，时把金津漱一声。

卷 614\_9 【鸳鸯二首】

皮日休

双丝绢上为新样，连理枝头是故园。翠浪万回同过影，  
玉沙千处共栖痕。若非足恨佳人魄，即是多情年少魂。  
应念孤飞争别宿，芦花萧瑟雨黄昏。

钿钿雕镂费深功，舞妓衣边绣莫穷。无日不来湘渚上，  
有时还在镜湖中。烟浓共拂芭蕉雨，浪细双游菡萏风。  
应笑豪家鹦鹉伴，年年徒被锁金笼。

## 第六百一十五卷

### 卷 615\_1 【伤小女】

皮日休

一岁犹未满，九泉何太深。唯余卷书草，相对共伤心。

### 卷 615\_2 【秋（一作汉）江晓望】

皮日休

万顷湖天碧，一星飞鹭白。此时放怀望，不厌为浮客。

### 卷 615\_3 【闲夜酒醒】

皮日休

醒来山月高，孤枕群书里。酒渴漫思茶，山童呼不起。

卷 615\_4 【和鲁望风人诗三首】

皮日休

刻石书离恨，因成别后悲。莫言春茧薄，犹有万重思。

镂出容刀饰，亲逢巧笑难。日中骚客佩，争奈即阑干。

江上秋声起，从来浪得名。逆风犹挂席，若不会凡情。

卷 615\_5 【古函关】

皮日休

破落古关城，犹能扼帝京。今朝行客过，不待晓鸡鸣。

卷 615\_6 【聪明泉】

皮日休

一勺如琼液，将愚拟望贤。欲知心不变，还似饮贪泉。

卷 615\_7 【史处士】

皮日休

山期须早赴，世累莫迟留。忽遇狂风起，闲心不自由。

卷 615\_8 【芳草渡】

皮日休

溪南越乡音，古柳渡江深。日晚无来客，闲船系绿阴。

卷 615\_9 【古宫词三首】

皮日休

楼殿倚明月，参差如乱峰。宫花半夜发，不待景阳钟。

闲骑小步马，独绕万年枝。尽日看花足，君王自不知。

玉枕寐不足，宫花空触檐。梁间燕不睡，应怪夜明帘。

卷 615\_10 【春日陪崔谏议樱桃园宴】

皮日休

万树香飘水麝风，蜡熏花雪尽成红。  
夜深欢态状不得，醉客图开明月中。

卷 615\_11 【松江早春】

皮日休

松陵清净雪消初，见底新安恐未如。  
稳凭船舷无一事，分明数得鲈残鱼。

卷 615\_12 【女坟湖（即吴王葬女之所）】

皮日休

万贵千奢已寂寥，可怜幽愤为谁娇。  
须知韩重相思骨，直在芙蓉向下消。

卷 615\_13 【泰伯庙】

皮日休

一庙争祠两让君，几千年后转清芬。  
当时尽解称高义，谁敢教他葬卓闻？

卷 615\_14 【宿木兰院】

皮日休

木兰院里双栖鹤，长被金钲聒不眠。  
今夜宿来还似尔，到明无计梦云泉。

卷 615\_15 【重题蔷薇】

皮日休

浓似猩猩初染素，轻如燕燕欲凌空。  
可怜细丽难胜日，照得深红作浅红。



卷 615\_16 【春夕酒醒】

皮日休

四弦才罢醉蛮奴，醺醺余香在翠炉。  
夜半醒来红蜡短，一枝寒泪作珊瑚。

卷 615\_17 【青门闲泛】

皮日休

青翰虚徐夏思清，愁烟漠漠荇花平。  
醉来欲把田田叶，尽裹当时醒酒鲭。

卷 615\_18 【木兰后池三咏·重台莲花】

皮日休

欹红矮绿力难任，每叶头边半米金。  
可得教他水妃见，两重元是一重心。

卷 615\_19 【木兰后池三咏·浮萍】

皮日休

嫩似金脂颭似烟，多情浑欲拥红莲。  
明朝拟附南风信，寄与湘妃作翠钿。

卷 615\_20 【木兰后池三咏·白莲】

皮日休

但恐醍醐难并洁，只应薝蔔可齐香。  
半垂金粉知何似，静婉临溪照额黄。

卷 615\_21 【重题后池】

皮日休

细雨阑珊眠鹭觉，钿波悠漾并鸳娇。  
适来会得荆王意，只为莲茎重细腰。

卷 615\_22 【庭中初植松桂，鲁望偶题，奉和次韵】

皮日休

毵毵绿发垂轻露，猎猎丹华动细风。  
恰似青童君欲会，俨然相向立庭中。

卷 615\_23 【鲁望戏题书印囊奉和次韵】

皮日休

金篆方圆一寸余，可怜银艾未思渠。  
不知夫子将心印，印破人间万卷书。

卷 615\_24 【馆娃宫怀古五绝】

皮日休

绮阁飘香下太湖，乱兵侵晓上姑苏。  
越王大有堪羞处，只把西施赚得吴。

郑妲无言下玉墀，夜来飞箭满罽毳。  
越王定指高台笑，却见当时金缕眉。

半夜娃宫作战场，血腥犹杂宴时香。  
西施不及烧残蜡，犹为君王泣数行。

素袜虽遮未掩羞，越兵犹怕伍员头。  
吴王恨魄今如在，只合西施濑上游。

响屐廊中金玉步，采蘋山上绮罗身。  
不知水葬今何处，溪月弯弯欲效颦。

卷 615\_25 【虎丘寺西小溪闲泛三绝】

皮日休

鼓子花明白石岸，桃枝竹覆翠岚溪。  
分明似对天台洞，应厌顽仙不肯迷。

绝壑只怜白羽傲，穷溪唯觉锦鳞痴。  
更深尚有通樵处，或是秦人未可知。

高下不惊红翡翠，浅深还碍白蔷薇。  
船头系个松根上，欲待逢仙不拟归。

卷 615\_26 【天竺寺八月十五日夜桂子】

皮日休

玉颗珊珊下月轮，殿前拾得露华新。

至今不会天中事，应是嫦娥掷与人。

卷 615\_27 【钓侣二章】

皮日休

趁眠无事避风涛，一斗霜鳞换浊醪。  
惊怪儿童呼不得，尽冲烟雨漉车螯。

严陵滩势似云崩，钓具归来放石层。  
烟浪溅篷寒不睡，更将枯蚌点渔灯。

卷 615\_28 【寄同年韦校书】

皮日休

二年疏放饱江潭，水物山容尽足耽。  
唯有故人怜未替，欲封干鲙寄终南。

卷 615\_29 【初冬偶作】

皮日休

豹皮茵下百余钱，刘堕闲沽尽醉眠。

酒病校来无一事，鹤亡松老似经年。

卷 615\_30 【醉中寄鲁望一壶并一绝】

皮日休

门巷寥寥空紫苔，先生应渴解醒杯。  
醉中不得亲相倚，故遣青州从事来。

卷 615\_31 【更次来韵寄鲁望】

皮日休

萧萧红叶掷苍苔，玄晏先生欠一杯。  
从此问君还酒债，颜延之送几钱来。

卷 615\_32 【重玄寺双矮桧】

皮日休

扑地枝回是翠钿，碧丝笼细不成烟。  
应如天竺难陀寺，一对狻猊相枕眠。

卷 615\_33 【奉酬鲁望醉中戏赠】

皮日休

秦吴风俗昔难同，唯有才情事事通。  
刚恋水云归不得，前身应是太湖公。

卷 615\_34 【皋桥】

皮日休

皋桥依旧绿杨中，闾里犹生隐士风。  
唯我到来居上馆，不知何道胜梁鸿。

卷 615\_35 【军事院霜菊盛开，因书一绝寄上谏议】

皮日休

金华千点晓霜凝，独对壶觞又不能。  
已过重阳三十日，至今犹自待王弘。

卷 615\_36 【悼鹤】

皮日休

莫怪朝来泪满衣，坠毛犹傍水花飞。  
辽东旧事今千古，却向人间葬令威。

卷 615\_37 【醉中先起李穀戏赠走笔奉酬】

皮日休

麝烟冉冉生银兔，蜡泪涓涓滴绣闺。  
舞袖莫欺先醉去，醒来还解验金泥。

卷 615\_38 【奉和鲁望招润卿博士辞以道侣将至之作】

皮日休

瘦木樽前地肺图，为君偏辍俗功夫。  
灵真散尽光来此，莫恋安妃在后无。



卷 615\_39 【奉和再招】

皮日休

飘御已应归杳眇，博山犹自对氛氲。  
不知入夜能来否，红蜡先教刻五分。

卷 615\_40 【酒病偶作】

皮日休

郁林步障昼遮明，一炷浓香养病醒。  
何事晚来还欲饮，隔墙闻卖蛤蜊声。

卷 615\_41 【润卿鲁望寒夜见访，各惜其志，遂成一绝】

皮日休

世外为交不是亲，醉吟俱岸白纶巾。  
清风月白更三点，未放华阳鹤上人。

卷 615\_42 【奉和鲁望玩金鸂鶒戏赠】

皮日休

镂羽雕毛迥出群，温磨飘出麝脐熏。  
夜来曾吐红茵畔，犹似溪边睡不闻。

卷 615\_43 【友人许惠酒以诗征之】

皮日休

野客萧然访我家，霜威白菊两三花。  
子山病起无余事，只望蒲台酒一车。

卷 615\_44 【寒夜文宴润卿有期不至】

皮日休

草堂虚洒待高真，不意清斋避世尘。  
料得焚香无别事，存心应降月夫人。

卷 615\_45 【汴河怀古二首】

皮日休

万艘龙舸绿丝间，载到扬州尽不还。  
应是天教开汴水，一千余里地无山。

尽道隋亡为此河，至今千里赖通波。  
若无水殿龙舟事，共禹论功不较多。

卷 615\_46 【寄题天台国清寺齐梁体】

皮日休

十里松门国清路，饭猿台上菩提树。  
怪来烟雨落晴天，元是海风吹瀑布。

卷 615\_47 【咏蟹】

皮日休

未游沧海早知名，有骨还从肉上生。  
莫道无心畏雷电，海龙王处也横行。

卷 615\_48 【金钱花】

皮日休

阴阳为炭地为炉，铸出金钱不用模。  
莫向人间逞颜色，不知还解济贫无。

卷 615\_49 【惠山听松庵】

皮日休

千叶莲花旧有香，半山金刹照方塘。  
殿前日暮高风起，松子声声打石床。

## 第六百一十六卷

### 卷 616\_1 【苦雨杂言寄鲁望】

皮日休

吴中十日涔涔雨，歔蒸庖下豪家苦。可怜临顿陆先生，  
独自翛然守环堵。儿饥仆病漏空厨，无人肯典破衣裾。  
蜾蠃时时上几案，蛙黾往往跳琴书。桃花米斗半百钱，  
枯荒湿坏炊不然。两床苴席一素几，仰卧高声吟太玄。  
知君志气如铁石，瓯冶虽神销不得。乃知苦雨不复侵，  
枉费毕星无限力。鹿门人作州从事，周章似鼠唯知醉。  
府金廩粟虚请来，忆著先生便知愧。愧多馈少真徒然，  
相见唯知携酒钱。豪华满眼语不信，不如直上天公笺。  
天公笺，方修次，且榜鸣篷来一醉。

### 卷 616\_2 【奉和鲁望齐梁怨别次韵】

皮日休

芙蓉泣恨红铅落，一朵别时烟似幕。  
鸳鸯刚解恼离心，夜夜飞来棹边泊。

卷 616\_3 【奉和鲁望晓起回文】

皮日休

孤烟晓起初原曲，碎树微分半浪中。湖后钓筒移夜雨，  
竹傍眠几侧晨风。图梅带润轻沾墨，画藓经蒸半失红。  
无事有杯持永日，共君惟好隐墙东。

卷 616\_4 【奉酬鲁望夏日四声四首·平声】

皮日休

塘平芙蓉低，庭闲梧桐高。清烟埋阳乌，蓝空含秋毫。  
冠倾慵移簪，杯干将餽糟。翛然非随时，夫君真吾曹。

卷 616\_5 【奉酬鲁望夏日四声四首·平上声】

皮日休

沟渠通疏荷，浦屿隐浅筱。舟闲攒轻蘋，桨动起静鸟。  
阴稀余桑闲，缕尽晚茧小。吾徒当斯时，此道可以了。

卷 616\_6 【奉酬鲁望夏日四声四首 · 平去声】

皮日休

怡神时高吟，快意乍四顾。村深啼愁鹃，浪霁醒睡鹭。  
书疲行终朝，罩困卧至暮。吁嗟当今交，暂贵便异路。

卷 616\_7 【奉酬鲁望夏日四声四首 · 平入声】

皮日休

先生何违时，一室习寂历。松声将飘堂，岳色欲压席。  
弹琴奔玄云，劖药折白石。如教题君诗，若得札玉册。

卷 616\_8 【苦雨中又作四声诗寄鲁望 · 平声】

皮日休

涔涔将经旬，昏昏空迷天。鸬鹚成群嬉，芙蓉相偎眠。  
鱼通蓑衣城，帆过菱花田。秋收吾无望，悲之真徒然。

卷 616\_9 【苦雨中又作四声诗寄鲁望 · 平上声】

皮日休

河平州桥危，垒晚水鸟上。冲崖搜松根，点沼写茭响。  
舟轻通綵纆，栈堕阻指掌。携桡将寻君，渚满坐可往。

卷 616\_10 【苦雨中又作四声诗寄鲁望 · 平去声】

皮日休

狂霖昏悲吟，瘦桂对病卧。檐虚能影斜，舍蠹易漏破。  
宵愁将琴攻，昼闷用睡过。堆书仍倾觞，富贵未换个。

卷 616\_11 【苦雨中又作四声诗寄鲁望 · 平入声】

皮日休

羈栖愁霖中，缺宅屋木恶。荷倾还惊鱼，竹滴复触鹤。  
闲僧千声琴，宿客一笈药。悠然思夫君，忽忆蜡屐著。



卷 616\_12 【奉和鲁望叠韵双声二首 · 叠韵山中吟】

皮日休

穿烟泉潺湲，触竹犊馥馥。荒篁香墙匡，熟鹿伏屋曲。

卷 616\_13 【奉和鲁望叠韵双声二首 · 双声溪上思】

皮日休

疏杉低通滩，冷鹭立乱浪。草彩欲夷犹，云容空淡荡。

卷 616\_14 【奉和鲁望叠韵吴宫词二首】

皮日休

侵深寻嶽岑，势厉卫睥睨。荒王将乡亡，细丽蔽袂逝。

朽桢替制曳，康庄伤荒凉。主虏部伍苦，嬖亡房廊香。

卷 616\_15 【奉和鲁望闲居杂题五首 · 晚秋吟】

皮日休

东皋烟雨归耕日，免去玄冠手刈禾。  
火满酒炉诗在口，今人无计奈依何。

卷 616\_16 【奉和鲁望闲居杂题五首 · 好诗景】

皮日休

青盘香露倾荷女，子墨风流更不言。  
寺寺云萝堪度日，京尘到死扑侯门。

卷 616\_17 【奉和鲁望闲居杂题五首 · 醒闻桧】

皮日休

解洗余醒晨半酉，星星仙吹起云门。  
耳根无厌听佳木，会尽山中寂静源。

卷 616\_18 【奉和鲁望闲居杂题五首·寺钟暝】

皮日休

百缘斗薊无尘土，寸地章煌欲布金。  
重击蒲牢唵山日，冥冥烟树睹栖禽。

卷 616\_19 【奉和鲁望闲居杂题五首·砌思步】

皮日休

襴襴古薛绷危石，切切阴蛩应晚田。  
心事万端何处止，少夷峰下旧云泉。

卷 616\_20 【奉和鲁望药名离合夏月即事三首】

皮日休

季春人病抛芳杜，仲夏溪波绕坏垣。  
衣典浊醪身倚桂，心中无事到云昏。

数曲急溪冲细竹，叶舟来往尽能通。  
草香石冷无辞远，志在天台一遇中。

桂叶似茸含露紫，葛花如绶蘸溪黄。  
连云更入幽深地，骨录闲携相猎郎。

卷 616\_21 【怀锡山药名离合二首】

皮日休

暗窦养泉容决决，明园护桂放亭亭。  
历山居处当天半，夏里松风尽足听。

晓景半和山气白，薇香清净杂纤云。  
实头自是眠平石，脑侧空林看虎群。

卷 616\_22 【怀鹿门县名离合二首】

皮日休

山瘦更培秋后桂，溪澄闲数晚来鱼。  
台前过雁盈千百，泉石无情不寄书。

十里松萝阴乱石，门前幽事雨来新。  
野霜浓处怜残菊，潭上花开不见人。

卷 616\_23 【奉和鲁望寒日古人名一绝】

皮日休

北顾欢游悲沈宋，南徐陵寝叹齐梁。  
水边韶景无穷柳，寒被江淹一半黄。

卷 616\_24 【胥口即事六言二首】

皮日休

波光杳杳不极，霁景澹澹初斜。黑蛱蝶粘莲蕊，  
红蜻蜓袅菱花。鸳鸯一处两处，舴艋三家五家。  
会把酒船偎荻，共君作个生涯。

拂钓清风细丽，飘蓑暑雨霏微。湖云欲散未散，  
屿鸟将飞不飞。换酒帟头把看，载莲艇子撑归。  
斯人到死还乐，谁道刚须用机？

卷 616\_25 【夜会问答十】

皮日休

寒夜清，帘外迢迢星斗明。况有萧闲洞中客，

吟为紫凤呼凰声。

瘦木杯，杉赭楠瘤削得来。莫怪家人畔边笑，  
渠心只爱黄金罍。

落霞琴，寥寥山水扬清音。玉皇仙驭碧云远，  
空使松风终日吟。

莲花烛，亭亭嫩蕊生红玉。不知含泪怨何人，  
欲问无由得心曲。

金火障，红兽飞来射罗幌。夜来斜展掩深炉，  
半睡芙蓉香荡漾。

忆山月，前溪后溪清复绝。看看又及桂花时，  
空寄子规啼处血。

锦鲸荐，碧香红腻承君宴。几度闲眠却觉来，  
彩鳞飞出云涛面。

怀溪云，漠漠闲笼鸥鹭群。有时日暮碧将合，  
还被鱼舟来触分。

霜中笛，落梅一曲瑶华滴。不知青女是何人，  
三奏未终头已白。

月下桥，风外拂残衰柳条。倚栏杆处独自立，

· 全唐诗 ·

---

青翰何人吹玉箫？

## 第六百一十七卷

卷 617\_1 【读襄阳耆旧传，因作诗五百言寄皮袭美】

陆龟蒙

汉皋古来雄，山水天下秀。高当轸翼分，化作英髦囿。  
暴秦之前人，灰灭不可究。自从宋生贤，特立冠耆旧。  
离骚既日月，九辩即列宿。卓哉悲秋辞，合在风雅右。  
庞公乐幽隐，辟聘无所就。只爱鹿门泉，泠泠倚岩漱。  
孔明卧龙者，潜伏躬耕耨。忽遭玄德云，遂起鳞角斗。  
三胡皆皆峻，二习名亦茂。其余文武家，相望如斥堠。  
缅思齐梁降，寂寞寡清胄。凝融为漪澜，复结作莹琇。  
不知粹和气，有得方大受。将生皮夫子，上帝可其奏。  
并包数公才，用以殿厥后。尝闻儿童岁，嬉戏陈俎豆。  
积渐开词源，一派分万溜。先崇丘旦室，大惧隳结构。  
次补荀孟垣，所贵亡罅漏。仰瞻三皇道，虬虱在宇宙。  
却视五霸图，股掌弄孩幼。或能醢醢脾，或与翼雏馐。  
或喜掉直舌，或乐斩邪脰。或耨鉏翳荟，或整理错谬。  
或如百千骑，合沓原野狩。又如晓江平，风死波不皱。  
幽埋力须掘，遗落贗必购。乃于文学中，十倍猗顿富。  
囊乏向咸镐，马重迟步骤。专场射策时，缚虎当羿馐。  
归来把通籍，且作高堂寿。未足逞戈矛，谁云被文绣？



从知偶东下，帆影拂吴岫。物象悉摧藏，精灵畏雕镂。  
伊余抱沈疾，憔悴守圭窦。方推洪范畴，更念大玄首。  
陈诗采风俗，学古穷篆籀。朝朝赏薪米，往往逢责诟。  
既被邻里轻，亦为妻子陋。持冠适瓯越，敢怨不得售。  
窘若晒沙鱼，悲如哭霜狖。唯君枉车辙，以逐海上臭。  
披襟两相对，半夜忽白昼。执热濯清风，忘忧饮醇酎。  
驱为文翰侣，驾皂参骥廐。有时谐宫商，自喜真邂逅。  
道孤情易苦，语直诗还瘦。藻匠如见酬，终身致怀袖。

卷 617\_2 【袭美先辈以龟蒙所献五百言既蒙见和复示荣唱…  
用伸酬谢】

陆龟蒙

洪范分九畴，转成天下规。河图孕八卦，焕作玄中奇。  
先开否臧源，次筑经纬基。粤若鲁圣出，正当周德衰。  
越疆必载质，历国将扶危。诸侯恣崛起，王室方陵迟。  
歌凤时不偶，获麟心益悲。始嗟吾道穷，竟使空言垂。  
首赞五十易，又删三百诗。遂令篇籍光，可并日月姿。  
向非笔削功，未必无瑕疵。迨至夫子没，微言散如枝。  
所宗既不同，所得亦异宜。名法在深刻，虚玄至希夷。  
自从战伐来，一派纵横驰。寒谷生艳木，沸潭结流澌。  
惊奔失壮士，好恶随纤儿。嬴氏并六合，势尊丞相斯。  
加于挟书律，尽取坑焚之。南勒会稽颂，北恢胡亥阨。  
犹怀徇巡狩，不暇亲维持。及汉文景后，鸿生方振搦。  
簸扬尧舜风，反作三代吹。飘飘四百载，左右为藩篱。

邺下曹父子，猎贤甚熊羆。发论若霞驳，裁诗如锦摛。  
徐王应刘辈，头角咸相衰。或有妙绝赏，或为独步推。  
或许润色美，或嫌诋诃痴。倏以中利病，且非混醇醪。  
雅当乎魏文，丽矣哉陈思。不肯少选妄，恐贻后世嗤。  
吾祖仗才力，革车蒙虎皮。手持一白旄，直向文场麾。  
轻若脱钳鋏，豁如抽屣屨。精钢不足利，腰裹何劳追。  
大可罩山岳，微堪析毫厘。十体免负赘，百家咸起痿。  
争入鬼神奥，不容天地私。一篇迈华藻，万古无子遗。  
刻鹄尚未已，雕龙奋而为。刘生吐英辩，上下穷高卑。  
下臻宋与齐，上指轩从羲。岂但标八索，殆将包两仪。  
人谣洞野老，骚怨明湘累。立本以致诘，驱宏来抵牾。  
清如朔雪严，缓若春烟羸。或欲开户牖，或将饰缨綈。  
虽非倚天剑，亦是囊中锥。皆由内史意，致得东莞词。  
梁元尽索虏，后主终亡隋。哀音但浮脆，岂望分雄雌。  
吾唐揖让初，陛列森咎夔。作颂媲吉甫，直言过祖伊。  
明皇践中日，墨客肩参差。岳净秀擢削，海寒光陆离。  
皆能取穴凤，尽拟乘云螭。迺来二十祀，俊造相追随。  
余生落其下，亦值文明时。少小不好弄，逡巡奉弓箕。  
虽然苦贫贱，未省亲嚙齏。秋倚抱风桂，晓烹承露葵。  
穷年只败袍，积日无晨炊。远访卖药客，闲寻捕鱼师。  
归来蠹编上，得以含情窥。抗韵吟比雅，覃思念柅摛。  
因知昭明前，剖石呈清琪。又嗟昭明后，败叶埋芳蕤。  
纵有月旦评，未能天下知。徒为强貔豹，不免参狐狸。  
谁蹇行地足，谁抽刺天髻。谁作河畔草，谁为洞中芝？  
谁若灵囿鹿，谁犹清庙牺？谁轻如鸿毛，谁密如凝脂？  
谁比蜀严静，谁方巴賁贲？谁能钓抃螯，谁能灼神龟？  
谁背如水火，谁同若埙篪？谁可作梁栋，谁敢驱谷蠡？

用此常不快，无人动交铍。空消病里骨，枉白愁中髭。  
鹿门先生才，大小无不怡。就彼六籍内，说诗直解颐。  
顾我迷未远，开怀溃其疑。初开凿本源，渐乃疏旁支。  
邃古派泛滥，皇朝光赫曦。揣摩是非际，一一如襟期。  
李杜气不易，孟陈节难移。信知君子言，可并神明蓍。  
枯腐尚求律，膏肓犹谒医。况将太牢味，见啖逋悬饥。  
今来置家地，正枕吴江湄。饵薄钩不曲，跼然守空坻。  
嘿坐无影响，唯君款茅茨。抽书乱签帙，酌茗烦瓯栖。  
或伴补缺砌，或偕诣荒祠。孤筇倚烟蔓，细木横风漪。  
触雨妨扉屐，临流泥江蓠。既狎野人调，甘为豪士訾。  
不敢负建鼓，唯忧掉降旗。希君念余勇，挽袖登文陴。

卷 617\_3 【奉酬袭美先辈吴中苦雨一百韵】

陆龟蒙

微生参最灵，天与意绪拙。人皆机巧求，百径无一达。  
家为唐臣来，奕世唯稷卨。只垂青白风，凛凛自贻厥。  
犹残赐书在，编简苦断绝。其间忠孝字，万古光不灭。  
孱孙诚瞽昧，有志常搢搢。敢云嗣良弓，但欲终守节。  
喧哗不入耳，谗佞不挂舌。仰咏尧舜言，俯遵周孔辙。  
所贪既仁义，岂暇理生活。纵有旧田园，抛来亦芜没。  
因之成否塞，十载真契阔。冻肝一檐榆，饥肠少糠粃。  
甘心付天壤，委分任回斡。笠泽卧孤云，桐江钓明月。  
盈筐盛苋苡，满釜煮鲈鳢。酒帜风外頫，茶枪露中擿。  
歌谣非大雅，摺摭为小说。上可补熏莖，傍堪跖芽蘖。

方当卖簪罩，尽以易纸札。踪迹尚吴门，梦魂先魏阙。  
寻闻天子诏，赫怒诛叛卒。宵旰悯烝黎，谟明问征伐。  
王师虽继下，贼垒未即拔。此时淮海波，半是生人血。  
霜戈驱少壮，败屋弃羸耄。践蹋比尘埃，焚烧同稿秸。  
吾皇自神圣，执事皆间杰。射策亦何为，春卿遂聊辍。  
伊余将贡技，未有耻可刷。却问渔樵津，重耕烟雨垞。  
诸侯急兵食，冗剩方翦截。不可抱词章，巡门事干谒。  
归来阖蓬櫜，壁立空竖褐。暖手抱孤烟，披书向残雪。  
幽忧和愤懣，忽愁自惊蹶。文兮乏寸毫，武也无尺铁。  
平生所韬蓄，到死不开豁。念此令人悲，翕然生内热。  
加之被鞮鞶，况复久藜粝。既为霜露侵，一卧增百疾。  
筋骸将束缚，腠理如箠撻。初谓抵狂羆，又如当毒蝎。  
江南多事鬼，巫覡连瓯粤。可口是妖讹，恣情专赏罚。  
良医只备位，药肆或虚设。而我正萎痿，安能致诃咄。  
椒兰任芳芷，精糲从罗列。醢醢既屡倾，钱刀亦随爇。  
兼之渎财贿，不止行盗窃。天地如有知，微妖岂逃杀。  
其时心力愤，益使气息辍。永夜更呻吟，空床但皮骨。  
君来赞贤牧，野鹤聊簪笏。谓我同光尘，心中有溟渤。  
轮蹄相压至，问遗无虚月。首到春鸿濛，犹残病根茇。  
看花虽眼晕，见酒忘肺渴。隐几还自怡，蓬卢亦争喝。  
抽毫更唱和，剑戟相磨戛。何大不包罗，何微不挑刮。  
今来值霖雨，昼夜无暂歇。杂若碎渊沦，高如破鞞鞞。  
何劳鼉虺岸，讵要鸛鸣垓。只意江海翻，更愁山岳裂。  
初惊蚩尤阵，虎豹争搏噬。又疑伍胥涛，蛟蜃相蹙拶。  
千家濛瀑练，忽似好披拂。万瓦垂玉绳，如堪取萦结。  
况余居低下，本是蛙蚓窟。迺来增号呼，得以恣唐突。  
先夸屋舍好，又恃头角凸。厚地虽直方，身能遍穿穴。

常参庄辩里，亦造扬玄末。偃仰纵无机，形容且相忽。  
低头增叹咤，到口复嗢咽。沮洳渍琴书，莓苔染巾袜。  
解衣换仓粟，秕稗犹未脱。饥鸟屡窥临，泥僮苦春臼。  
或闻秋稼穡，大半沈彭沱。耕父蠹齐民，农夫思旱魃。  
吾观天之意，未必洪水割。且要虐飞龙，又图滋跛鳖。  
三吴明太守，左右皆儒哲。有力即扶危，怀仁过救渴。  
鹿门皮夫子，气调真俊逸。截海上云鹰，横空下霜鹘。  
文坛如命将，可以持玉钺。不独展羲轩，便当城老佛。  
顾余为山者，所得才簞撮。譬如饰箭材，尚欠鏃与筈。  
闲将歛儿唱，强倚帝子瑟。幸得远潇湘，不然嗟贾屈。  
开缄窥宝肆，玕贝光比栉。朗咏冲乐悬，陶匏响铿搥。  
古来愁霖赋，不是不清越。非君顿挫才，沴气难摧折。  
驰情扣虚寂，力尽无所掇。不足谢徽音，只令凋鬓发。

卷 617\_4 【奉酬袭美先辈初夏见寄次韵】

陆龟蒙

积雨晦皋圃，门前烟水平。蘋蘩增遥吹，枕席分余清。  
村旆诧酒美，赊来满涪程。未必减宣子，何羨谢公荣。  
借宅去人远，败墙连古城。愁鸱占枯枿，野鼠趋前楹。  
昨日云破损，晚林先觉晴。幽篁倚微照，碧粉含疏茎。  
蠹简有遗字，先琴无泛声。蚕寒茧尚薄，燕喜雏新成。  
览物正摇思，得君初夏行。诚明复散诞，化匠安能争！  
海浪刷三岛，天风吹六英。洪崖领玉节，坐使虚音生。  
吾祖傲洛客，因言几为伧。末裔实渔者，敢怀干墨卿。

唯思钓璜老，遂得持竿情。何须乞鹅炙，岂在斟羊羹。  
畦蔬与瓮醪，便可相携迎。蟠木几甚曲，笋皮冠且轻。  
闲心放羁勒，醉脚从欹倾。一径有余远，一窗有余明。  
秦皇苦不达，天下何足并。

卷 617\_5 【奉和袭美二游诗·徐诗】

陆龟蒙

尝闻四书曰，经史子集焉。苟非天禄中，此事无由全。  
自从秦火来，历代逢迍邐。汉祖入关日，萧何为政年。  
尽力取图籍，遂持天下权。中兴熹平时，教化还相宣。  
立石刻五经，置于太学前。贼卓乱王室，君臣如转圜。  
洛阳且煨烬，载籍宜为烟。逮晋武革命，生民才息肩。  
惠怀亟寡昧，戎羯俄腥膻。已觉天地闭，竞为东南迁。  
日既不暇给，坟索何由专？尔后国脆弱，人多尚虚玄。  
任学者得谤，清言者为贤。直至沈范辈，始家藏简编。  
御府有不足，仍令就之传。梁元渚宫日，尽取如蜚蜚。  
兵威忽破碎，焚爇无遗篇。近者隋后主，搜罗势骈阗。  
宝函映玉轴，彩翠明霞鲜。伊唐受命初，载史声连延。  
砥柱不我助，惊波涌沦涟。遂令因去书，半在余浮泉。  
贞观购亡逸，蓬瀛渐周旋。灵然东壁光，与月争流天。  
伟矣开元中，王道真平平。八万五千卷，一一皆涂铅。  
人间盛传写，海内奔穷研。目云西斋书，有过东皋田。  
吾闻徐氏子，奕世皆才贤。因知遗孙谋，不在黄金钱。  
插架几万轴，森森若戈鋌。风吹签牌声，满室铿锵然。

佳哉鹿门子，好问如除□。倏来参卿处，遂得参卿怜。  
开怀展橱簏，唯在性所便。素业已千仞，今为峻云巅。  
雄才旧百派，相近浮日川。君抱王佐图，纵步凌陶甄。  
他时若报德，谁在参卿先？

卷 617\_6 【奉和袭美二游诗·任诗】

陆龟蒙

吴之辟疆园，在昔胜概敌。前闻富修竹，后说纷怪石。  
风烟惨无主，载祀将六百。草色与行人，谁能问遗迹？  
不知清景在，尽付任君宅。却是五湖光，偷来傍檐隙。  
出门向城路，车马声躏跖。入门望亭隈，水木气岑寂。  
犖墙绕曲岸，势似行无极。十步一危梁，乍疑当绝壁。  
池容澹而古，树意苍然僻。鱼惊尾半红，鸟下衣全碧。  
斜来岛屿隐，恍若潇湘隔。雨静持残丝，烟消有余脉。  
竭来任公子，摆落名利役。虽将禄代耕，颇爱巾随策。  
秋笼支遁鹤，夜榻戴颙客。说史足为师，谭禅差作伯。  
君多鹿门思，到此情便适。偶荫桂堪帷，纵吟苔可席。  
顾余真任诞，雅遂中心获。但知醉还醒，岂知玄尚曰？  
甘闲在鸡口，不贵封龙额。即此自怡神，何劳谢公屐！

卷 617\_7 【次追和清远道士诗韵】

陆龟蒙

一代先后贤，声容剧河汉。况兹迈古士，复历苍崖窞。  
辰经几十万，邈与灵寿玩。海岳尚推移，都鄙固芜漫。  
羸僧下高阁，独鸟没远岸。啸初风雨来，吟余钟呗乱。  
如何炼精魄，万祀忽欲半。宁为断臂忧，肯作秋柏散。  
吾闻酆宫内，日月自昏旦。左右修文郎，纵横洒篇翰。  
斯人久冥漠，得不垂慨叹。庶或有神交，相从重兴赞。

卷 617\_8 【补沈恭子诗】

陆龟蒙

灵质贯轩昊，遐年越商周。自然失远裔，安得怨寡俦。  
我亦小国胤，易名惭见优。虽非放旷怀，雅奉逍遥游。  
携手桂枝下，属词山之幽。风雨一以过，林麓飒然秋。  
落日倚石壁，天寒登古丘。荒泉已无夕，败叶翳不流。  
乱翠缺月隐，衰红清露愁。览物性未逸，反为情所囚。  
异才偶绝境，佳藻穷冥搜。虚倾寂寞音，敢作杂佩酬。



## 第六百一十八卷

### 卷 618\_1 【读《阴符经》寄鹿门子】

陆龟蒙

清晨整冠坐，朗咏三百言。备识天地意，献词犯乾坤。  
何事不隐德，降灵生轩辕。口衔造化斧，凿破机关门。  
五贼忽进逸，万物争崩奔。虚施神仙要，莫救华池源。  
但学战胜术，相高甲兵屯。龙蛇竞起陆，斗血浮中原。  
成汤与周武，反覆更为尊。下及秦汉得，黷弄兵亦烦。  
奸强自林据，仁弱无枝蹲。狂喉恣吞噬，逆翼争飞翻。  
家家伺天发，不肯匡淫昏。生民坠涂炭，比屋为冤魂。  
只为读此书，大朴难久存。微臣与轩辕，亦是万世孙。  
未能穷意义，岂敢求瑕疵。曾亦爱两句，可与贤达论。  
生者死之根，死者生之根。方寸了十字，万化皆胚腠。  
身外更何事，眼前徒自喧。黄河但东注，不见归昆仑。  
昼短苦夜永，劝君倾一尊。

卷 618\_2 【奉和袭美初夏游楞伽精舍次韵】

陆龟蒙

吴都涵汀洲，碧液浸郡郭。微雨荡春醉，上下一清廓。  
奇踪欲探讨，灵物先療瘼。飘然兰叶舟，旋倚烟霞泊。  
吟谭乱篙舻，梦寐杂巘嶂。纤情不可逃，洪笔难暂阁。  
岂知楞伽会，乃在山水箔。金仙著书日，世界名极乐。  
薝卜冠诸香，琉璃代华垩。禽言经不辍，象口川宁涸。  
万善峻为城，巉巖扞群恶。清晨欲登造，安得无自愕。  
险穴骇坤牢，高萝挂天笏。池容淡相向，蛟怪如可摸。  
苔蔽石髓根，蒲差水心铎。岚侵答摩髻，日照狻猊络。  
仰首乍眩施，回眸更辉霍。檐端凝飞羽，磴外浮碧落。  
到回解风襟，临幽濯云屩。尘机性非便，静境心所著。  
自取海鸥知，何烦尸祝酢。峰围震泽岸，翠浪舞绡幕。  
潏潏岂尧遭，巉巖非禹凿。潜听钟梵处，别有松桂壑。  
霭重灯不光，泉寒网犹薄。僮能蹑孤刹，鸟惯亲搥铎。  
服道身可遗，乞闲心已诺。人间亦何事，万态相毒蠱。  
战垒竞高深，儒衣谩褒博。宣尼名位达，未必春秋作。  
管氏包霸图，须人解其缚。伊余采樵者，蓬藿方索寞。  
近得风雅情，聊将圣贤度。多君富適采，识度两清恪。  
诟宠生灭词，肯教夷夏错。未为尧舜用，且向烟霞托。  
我亦摆尘埃，他年附鸿鹤。

卷 618\_3 【奉和袭美公斋四咏次韵·小松】

陆龟蒙

擢秀逋客岩，遗根飞鸟径。因求饰清闕，遂得辞危簷。  
贞同柏有心，立若珠无胫。枝形短未怪，鬣数差难定。  
况密三天风，方遵四时柄。那兴培塿叹，免答邻里病。  
微霜静可分，片月疏堪映。奇当虎头笔，韵叶通明性。  
会拂阳乌胸，抡才膺帝命。

卷 618\_4 【奉和袭美公斋四咏次韵·小桂】

陆龟蒙

讽赋轻八植，擅名方一枝。才高不满意，更自寒山移。  
宛宛别云态，苍苍出尘姿。烟归助华杪，雪点迎芳蕤。  
青条坐可结，白日如奔螭。谅无萤翦忧，即是萧森时。  
洛浦虽有荫，骚人聊自怡。终为济川楫，岂在论高卑。

卷 618\_5 【奉和袭美公斋四咏次韵·新竹】

陆龟蒙

别坞破苔藓，严城树轩楹。恭闻稟璇玑，化质离青冥。

色可定鸡颈，实堪招凤翎。立窥五岭秀，坐对三都屏。  
晴月窈窕入，曙烟霏微生。昔者尚借宅，况来处宾庭。  
金罍纵倾倒，碧露还鲜醒。若非抱苦节，何以偶惟馨。  
徐观稚龙出，更赋锦苞零。

卷 618\_6 【奉和袭美公斋四咏次韵·鹤屏】

陆龟蒙

时人重花屏，独即胎化状。丛毛练分彩，疏节筇相望。  
曾无氄氄态，颇得连轩样。势拟抢高寻，身犹在函丈。  
如忧鸡鹜斗，似忆烟霞向。尘世任纵横，霜襟自闲放。  
空资明远思，不待浮丘相。何由振玉衣，一举栖瀛阆。

卷 618\_7 【奉和袭美酬前进士崔潞盛制见寄因赠至一百四十言】

陆龟蒙

孔圣铸颜事，垂之千载余。其间王道乖，化作荆榛墟。  
天必授贤哲，为时攻翦除。轲雄骨已朽，百代徒赳赳。  
近者韩文公，首为闲辟锄。夫子又继起，阴霾终廓如。  
搜得万古遗，裁成十编书。南山盛云雨，东序堆琼琚。  
偶此真籍客，悠扬两情摅。清词忽窈窕，雅韵何虚徐。  
唱既野芳坼，酬还天籁疏。轻波掠翡翠，晓露披芙渠。

俚曲信寡和，末流难嗣初。空持一竿饵，有意渔鲸鱼。

卷 618\_8 【奉和袭美太湖诗二十首·初入太湖】

陆龟蒙

东南具区雄，天水合为一。高帆大弓满，羿射争箭疾。  
时当暑雨后，气象仍郁密。乍如开雕笳，耸翅忽飞出。  
行将十洲近，坐觉八极溢。耳目骇鸿濛，精神寒怳栗。  
坑来斗呀豁，涌处惊嵯峩。嶮异拔龙湫，喧如破蛟室。  
斯须风妥帖，若受命平秩。微茫诚端倪，远峩疑格笔。  
嶮嶮见铜阙，左右皆辅弼。盘空俨相趋，去势犹横逸。  
尝闻咸池气，下注作清质。至今涵赤霄，尚且浴白日。  
又云构浮玉，宛与昆阆匹。肃为灵官家，此事难致诘。  
才迎沙屿好，指顾俄已失。山川互蔽亏，鱼鸟空聒聒。  
何当授真检，得召天吴术。一一问朝宗，方应可谭悉。

卷 618\_9 【奉和袭美太湖诗二十首·晓次神景宫】

陆龟蒙

晓帆逗碕岸，高步入神景。洒洒襟袖清，如临蕊珠屏。  
虽然群动息，此地常寂静。翠镊有寒锵，碧花无定影。  
凭轩羽人傲，夹户天兽猛。稽首朝元君，褰衣就虚省。  
呀空雪牙利，嗽水石齿冷。香母未垂婴，芝田不论顷。

遥通河汉口，近抚松桂顶。饭荐七白蔬，杯酹九光杏。  
人间附尘躅，固陋真钳颈。肯信扑螯倾，犹疑夏虫永。  
玄津荡琼垄，紫汞啼金鼎。尽出冰霜书，期君一披省。

卷 618\_10 【奉和袭美太湖诗二十首·入林屋洞】

陆龟蒙

知名十小天，林屋当第九。题之为左神，理之以天后。  
魁堆辟邪辈，左右专备守。自非方瞳人，不敢窥洞口。  
唯君好奇士，复啸忘情友。致伞在风林，低冠入云窦。  
中深剧苔井，傍坎才药臼。石角忽支颐，藤根时束肘。  
初为大幽怖，渐见微明诱。屹若造灵封，森如达仙薮。  
尝闻白芝秀，状与琅花偶。又坐紫泉光，甘如酌天酒。  
何人能挹嚼，饵以代浆糗。却笑探五符，徒劳步双斗。  
真君不可见，焚盥空迟久。眷恋玉碣文，行行但回首。

卷 618\_11 【奉和袭美太湖诗二十首·雨中游包山精舍】

陆龟蒙

包山信神仙，主者上真职。及栖钟梵侣，又是清凉域。  
乃知烟霞地，绝俗无不得。岩开一径分，柏拥深殿黑。  
僧闲若图画，像古非雕刻。海客施明珠，湘蕤料净食。  
有鱼皆玉尾，有鸟尽金臆。手携鞞铎佉，若在中印国。

千峰残雨过，万籁清且极。此时空寂心，可以遗智识。  
知君战未胜，尚倚功名力。却下听经徒，孤帆有行色。

卷 618\_12 【奉和袭美太湖诗二十首·毛公坛】

陆龟蒙

古有韩终道，授之刘先生。身如碧凤凰，羽翼披轻轻。  
先生盛驱役，臣伏甲与丁。势可倒五岳，不唯鞭群灵。  
飘飘驾翔螭，白日朝太清。空遗古坛在，稠叠烟萝屏。  
远怀步罡夕，列宿森然明。四角镇露兽，三层差羽婴。  
回眸盼七炁，运足驰疏星。象外真既感，区中道俄成。  
迩来向千祀，云峤空峥嵘。石上橘花落，石根瑶草青。  
时时白鹿下，此外无人行。我访岑寂境，自言斋戒精。  
如今君安死，魂魄犹膺膺。有笈皆绿字，有芝皆紫茎。  
相将望瀛岛，浩荡凌沧溟。

卷 618\_13 【奉和袭美太湖诗二十首·三宿神景宫】

陆龟蒙

灵踪未遍寻，不觉溪色暝。回头问栖所，稍下杉萝径。  
岩居更幽绝，涧户相隐映。过此即神宫，虚堂惬云性。  
四轩尽疏达，一榻何清零。仿佛闻玉笙，鼓铎动凉磬。  
风凝古松粒，露压修荷柄。万籁既无声，澄明但心听。

希微辨真语，若授虚皇命。尺宅按来平，华池漱余净。  
频窥宿羽丽，三吸晨霞盛。岂独冷衣襟，便堪遗造请。  
徒深物外趣，未脱尘中病。举首谢灵峰，徜徉事归榜。

卷 618\_14 【奉和袭美太湖诗二十首·以毛公泉献大谏清河公】

陆龟蒙

先生炼飞精，羽化成翩翩。荒坛与古磬，隐轸清冷存。  
四面蹙山骨，中心含月魂。除非紫水脉，即是金沙源。  
香实洒桂蕊，甘惟渍云根。向来探幽人，酌罢祛蒙昏。  
况公珪璋质，近处谏诤垣。又闻虚静姿，早挂冰雪痕。  
君对瑶华味，重献兰薰言。当应涤烦暑，朗咏翬飞轩。  
我愿得一掬，攀天叫重阍。霏霏散为雨，用以移焦原。

卷 618\_15 【奉和袭美太湖诗二十首·缥缈峰】

陆龟蒙

左右皆跳岑，孤峰挺然起。因思缥缈称，乃在虚无里。  
清晨跻磴道，便是孱颜始。据石即更歌，遇泉还徙倚。  
花奇忽如荐，树曲浑成几。乐静烟霭知，忘机猿狖喜。  
频攀峻过斗，未造平如砥。举首閤青冥，回眸聊下视。  
高帆大于鸟，广壘才类蚁。就此微茫中，争先未尝已。  
葛洪话刚气，去地四千里。苟能乘之游，止若道路耳。



吾将自峰顶，便可朝帝宸。尽欲活群生，不唯私一己。  
超骑明月蜃，复弄华星蕊。却下蓬莱巅，重窥清浅水。  
身为大块客，自号天随子。他日向华阳，敲云问名氏。

卷 618\_16 【奉和袭美太湖诗二十首·桃花坞】

陆龟蒙

行行问绝境，贵与名相亲。空经桃花坞，不见秦时人。  
愿此为东风，吹起枝上春。愿此作流水，潜浮蕊中尘。  
愿此为好鸟，得栖花际邻。愿此作幽蝶，得随花下宾。  
朝为照花日，暮作涵花津。试为探花士，作此偷桃臣。  
桃源不我弃，庶可全天真。

卷 618\_17 【奉和袭美太湖诗二十首·明月湾】

陆龟蒙

昔闻明月观，只伤荒野基。今逢明月湾，不值三五时。  
择此二明月，洞庭看最奇。连山忽中断，远树分毫厘。  
周回二十里，一片澄风漪。见说秋半夜，净无云物欺。  
兼之星斗藏，独有神仙期。初闻锵镣跳，积渐调参差。  
空中卓羽卫，波上停龙螭。踪舞玉烟节，高歌碧霜词。  
清光悄不动，万象寒咿咿。此会非俗致，无由得旁窥。  
但当乘扁舟，酒翁仍相随。或彻三弄笛，或成数联诗。

自然莹心骨，何用神仙为。

卷 618\_18 【奉和袭美太湖诗二十首·练渚（云吴王开以练兵）】

陆龟蒙

越恃君子众，大将压全吴。吴将派天泽，以练舟师徒。  
一镜止千里，支流忽然迂。苍奭束洪波，坐似冯夷躯。  
战舰百万辈，浮宫三十余。平川盛丁宁，绝岛分储胥。  
凤押半鹤膝，锦杠杂肥胡。香烟与杀气，浩浩随风驱。  
弹射尽高鸟，杯觥醉潜鱼。山灵恐见鞭，水府愁为墟。  
兵利德日削，反为雠国屠。至今钩鏃残，尚与泥沙俱。  
照此月倍苦，来兹烟亦孤。丁魂尚有泪，合洒青枫枯。

卷 618\_19 【奉和袭美太湖诗二十首·投龙潭】

陆龟蒙

名山潭洞中，自古多秘邃。君将接神物，聊用申祀事。  
熔金象牙角，尺木无不备。亦既奉真官，因之徇前志。  
持来展明诰，敬以投嘉瑞。鳞光焕水容，目色烧山翠。  
吾皇病秦汉，岂独探幽异。所贵风雨时，民皆受其赐。  
良田为巨浸，污泽成赤地。掌职一不行，精灵又何寄。  
唯贪血食饱，但据骊珠睡。何必费黄金，年年授星使。

卷 618\_20 【奉和袭美太湖诗二十首·孤园寺】

陆龟蒙

浮屠从西来，事者极梁武。岩幽与水曲，结构无遗土。  
穷山林干尽，竭海珠玃聚。况即侍从臣，敢爱烟波坞。  
幡条玉龙扣，殿角金虬舞。释子厌楼台，生人露风雨。  
今来四百载，像设藏云浦。轻鸽乱驯鸥，鸣钟和朝櫓。  
庭蕉裂旗旆，野蔓差纓组。石上解空人，窗前听经虎。  
林虚叶如织，水净沙堪数。遍问得中天，归修释迦谱。

卷 618\_21 【奉和袭美太湖诗二十首·上真观】

陆龟蒙

尝闻升三清，真有上中下。官居乘佩服，一一自相亚。  
霄裙或霞粲，侍女忽玉姹。坐进金碧腴，去驰飙歎驾。  
今来上真观，恍若心灵讶。只恐暂神游，又疑新羽化。  
风余撼朱草，云破生瑶榭。望极觉波平，行虚信烟藉。  
闲开飞龟帙，静倚宿凤架。俗状既能遗，尘冠聊以卸。  
人间方大火，此境无朱夏。松盖荫日车，泉绅垂天罅。  
穷幽不知倦，复息芝园舍。锵佩引凉姿，焚香礼遥夜。  
无情走声利，有志依闲暇。何处好迎僧，希将石楼借。

卷 618\_22 【奉和袭美太湖诗二十首·销夏湾】

陆龟蒙

霞岛焰难泊，云峰奇未收。萧条千里湾，独自清如秋。  
古岸过新雨，高萝荫横流。遥风吹蒹葭，折处鸣飕飕。  
昔予守圭窦，过于回禄囚。日为簫笛徒，分作祗裯讎。  
愿狎寒水怪，不封朱毂侯。岂知烟浪涯，坐可思重裘。  
健若数尺鲤，泛然双白鸥。不识号火井，孰问名焦丘。  
我真鱼鸟家，尽室营扁舟。遗名复避世，消夏还消忧。

卷 618\_23 【奉和袭美太湖诗二十首·包山祠】

陆龟蒙

静境林麓好，古祠烟霭浓。自非通灵才，敢陟群仙峰。  
百里波浪沓，中坐箫鼓重。真君具琼舆，仿佛来相从。  
清露濯巢鸟，阴云生昼龙。风飘橘柚香，日动幡盖容。  
将命礼且洁，所祈年不凶。终当以疏闻，特用诸侯封。

卷 618\_24 【奉和袭美太湖诗二十首·圣姑庙】

陆龟蒙

渺渺洞庭水，盈盈芳屿神。因知古佳丽，不独湘夫人。

流苏荡遥吹，斜领生轻尘。蜀彩驳霞碎，吴绡盘雾匀。  
可怜飞燕姿，合是乘鸾宾。坐想烟雨夕，兼知花草春。  
空登油壁车，窈窕谁相亲。好赠玉条脱，堪携紫纶巾。  
殷勤拨香池，重荐汀洲蘋。明朝动兰楫，不翅星河津。

卷 618\_25 【奉和袭美太湖诗二十首·太湖石】

陆龟蒙

他山岂无石，厥状皆可荐。端然遇良工，坐使天质变。  
或裁基栋宇，礧礧成广殿。或剖出温瑜，精光具华瑱。  
或将破仇敌，百炮资苦战。或用镜功名，万古如会面。  
今之洞庭者，一以非此选。槎牙真不才，反作天下彦。  
所奇者嵌崆，所尚者葱蒨。旁穿参洞穴，内窍均环钏。  
刻削九琳窗，玲珑五明扇。新雕碧霞段，旋破秋天片。  
无力置池塘，临风只流眄。

卷 618\_26 【奉和袭美太湖诗二十首·崦里】

陆龟蒙

山横路若绝，转楫逢平川。川中水木幽，高下兼良田。  
沟塍堕微溜，桑柘含疏烟。处处倚蚕箔，家家下鱼筌。  
駉犊卧新苜，野禽争折莲。试招搔首翁，共语残阳边。  
今来九州内，未得皆恬然。贼阵始吉语，狂波又凶年。

吾翁欲何道，守此常安眠。笑我掉头去，芦中闻刺船。  
余知隐地术，可以齐真仙。终当从之游，庶复全于天。

卷 618\_27 【奉和袭美太湖诗二十首·石板】

陆龟蒙

一片倒山屏，何时隳洞门。屹然空阔中，万古波涛痕。  
我意上帝命，持来压泉源。恐为庚辰官，囚怪力所掀。  
又疑广袤次，零落潜惊奔。不然遭霹雳，强半沈无垠。  
如何造化首，便截秋云根。往事不足问，奇踪安可论。  
吾今病烦暑，据簟常昏昏。欲从石公乞，莹理平如璠。  
前后植桂桧，东西置琴尊。尽携天壤徒，浩唱羲皇言。

## 第六百一十九卷

### 卷 619\_1【杂讽九首】

陆龟蒙

红蚕缘枯桑，青茧大如盆。人争捩其臂，羿矢亦不中。  
微微待贤禄，一一希入梦。纵操上古言，口噤难即贡。  
蛟龙在怒水，拔取牙角弄。丹穴如可游，家家畜孤凤。  
凶门尚儿戏，战血波湏溶。社鬼苟有灵，谁能遏秋恫。

童麋来触犀，德力不相及。伊无愜心事，只有碎首泣。  
况将鹏虱校，数又百与十。攻如饿鸱叫，势若脱兔急。  
斯为朽关键，怒萃抉以入。年来横干戈，未见拔城邑。  
得非佐饔者，齿齿待啜汁。羁维豪杰辈，四骇方少繫。  
此皆乘时利，纵舍在呼吸。吾欲斧其吭，无雷动幽蛰。

駟鹅惨于冰，陆立怀所适。斯人道仍闕，不得不呜呃。  
当时布衣士，亦作天子客。至今东方生，满口自夸白。  
终为万乘交，谈笑无所隔。致君非有书，乃是尧舜画。  
只今侯门峻，日扫贫贱迹。朝趋九韶音，暮列五鼎食。  
如闻恭俭语，謦謦事夕惕。可拍伊牧肩，功名被金石。

赤舌可烧城，谗邪易为伍。诗人疾之甚，取俾投豺虎。  
长风吹谿木，始有音韵吐。无木亦无风，笙簧由喜怒。  
女娲炼五石，天缺犹可补。当其利口衔，罅漏不复数。  
元精遗万类，双目如牖户。非是既相参，重瞳亦为瞽。

东南有狂兕，猎者西北矢。利尘白冥冥，独此清夜止。  
无人语其事，偶坐窥天纪。安得东壁明，洪洪用坟史。  
搜扬好古士，一以罄云水。流堪洒菁英，风足去稗秕。  
如能出奇计，坐可平贼垒。徐陈羲皇道，高驾太平轨。  
攫疏成特雄，濯垢为具美。贡贤当上赏，景福视所履。  
永播南熏音，垂之万年耳。

有槩何青青，空城雪霜里。千林尽枯槁，苦节独不死。  
他遭匠石顾，总入牺黄美。遂得保天年，私心未为耻。  
高从宿臬怪，下亦容蝼蚁。大厦若抡材，亭亭托君子。

左右佩剑者，彼此亦相笑。趋时与闭门，喧寂不同调。  
潜机取声利，自许臻乎妙。志士以神窥，惭然真可吊。  
天之发遐籁，大小随万窍。魁其垆冶姿，形质惟所召。  
鼗笙磬竽瑟，是必登清庙。伊圣不可欺，谁能守蓬藿？

横笛喝秋风，清商入疏越。君居不夜城，肯怨孤戍月。  
吴兵甚犀利，太白光突兀。日已费千金，廛闻侵一拨。  
岂无恶年少，纵酒游侠窟。募为敢死军，去以梟叛卒。  
岂无中林士，贯穿学问骨。兵法五十家，浩荡如溟渤。  
高悬鹿皮睡，清涧时依樾。分已诺烟霞，全遗事干谒。  
既非格猛兽，未可轻华发。北面师其谋，几能止征伐。



何妨秦堇勇，又有曹刿说。尧舜尚询刍，公乎听无忽。

朝为壮士歌，暮为壮士歌。壮士心独苦，傍人谓之何。  
古铁久不快，倚天无处磨。将来易水上，犹足生寒波。  
捷可搏飞狻，健能超橐驼。群儿被坚利，索手安冯河。  
惊飙扫长林，直木谢桷科。严霜冻大泽，僵龙不如蛇。  
昔者天血碧，吾徒安叹嗟。

### 卷 619\_2 【美人】

陆龟蒙

美人抱瑶瑟，哀怨弹别鹤。雌雄南北飞，一旦异栖托。  
谅非金石性，安得宛如昨。生为并蒂花，亦有先后落。  
秋林对斜日，光景自相薄。犹欲悟君心，朝朝佩兰若。

### 卷 619\_3 【感事】

陆龟蒙

将军被蛟函，只畏金石鏃。岂知谗箭利，一中成赤族。  
古来信簧舌，巧韵凄锵曲。君闻悦耳音，尽日听不足。  
初因起毫发，渐可离骨肉。所以贤达心，求人须任目。

卷 619\_4 【素丝】

陆龟蒙

园客丽独茧，诗人吟五纆。如何墨子泪，反以悲途穷。  
我意岂如是，愿参天地功。为线补君袞，为弦系君桐。  
左右修阙职，宫商还古风。端然洁白心，可与神明通。

卷 619\_5 【次幽独君韵】

陆龟蒙

灵气独不死，尚能成绮文。如何孤窆里，犹自读三坟。  
落日送万古，秋声含七哀。枯株不萧瑟，枝干虚崔嵬。  
伊昔临大道，歌钟醉高台。台今已平地，只有春风回。  
明月白草死，积阴荒陇摧。圣贤亦如此，恻绝真悠哉。

卷 619\_6 【赠远】

陆龟蒙

芙蓉匣中镜，欲照心还懒。本是细腰人，别来罗带缓。  
从君出门后，不奏云和管。妾思冷如簪，时时望君暖。

心期梦中见，路永魂梦短。怨坐泣西风，秋窗月华满。

卷 619\_7 【村夜二篇】

陆龟蒙

江上冬日短，裴回草堂暝。鸿当绝塞来，客向孤村病。  
绵绵起归念，咽咽兴微咏。菊径月方高，橘斋霜已并。  
盘餐蔬粟粗，史籍签牌盛。目冷松桂寒，耳喧儿女竞。  
开瓶浮蚁绿，试笔秋毫劲。昼户亦重关，寒屏递相映。  
诗从骚雅得，字向铅槧正。遇敌舞蛇矛，逢谈捉犀柄。  
无名升甲乙，有志扶荀孟。守道希昔贤，为文通古圣。  
幽忧废长剑，憔悴惭清镜。只会鱼鸟情，讵知时俗性。  
浮虚多徇势，老懒图历聘。既不务人知，空余乐天命。  
吾家在田野，家事苦辽复。耕稼一以微，困仓自然罄。  
愁襟风叶乱，独坐灯花迸。明发成浩歌，谁能少倾听？

世既贱文章，归来事耕稼。伊人著农道，我亦赋田舍。  
所悲劳者苦，敢用词为詫。只效刍牧言，谁防轻薄骂。  
嘻今居宠禄，各自矜雄霸。堂上考华钟，门前伫高驾。  
纤洪动丝竹，水陆供鲙炙。小雨静楼台，微风动兰麝。  
吹嘘川可倒，眄睐花争姹。万户膏血穷，一筵歌舞价。  
安知勤播植，卒岁无闲暇。种以春廩初，获从秋隼下。  
专专望穰穗，捐捐条桑柘。日晏腹未充，霜繁体犹裸。  
平生守仁义，所疾唯狙诈。上诵周孔书，沈冥至酣藉。  
岂无致君术，尧舜不上下。岂无活国方，颇牧齐教化。

蛟龙任干死，云雨终不借。羿臂束如囚，徒劳夸善射。  
才能销篡斗，辩可移嵩华。若与毗辈量，饥寒殆相亚。  
长吟倚清瑟，孤愤生遥夜。自古有遗贤，吾容偏称谢。

卷 619\_8 【记事】

陆龟蒙

本作渔钓徒，心将遂疏放。苦为饥寒累，未得恣闲畅。  
去年十二月，身住雪溪上。病里贺丰登，鸡豚聊馈饷。  
巍峨卞山雪，凝冽不可向。瘦骨倍加寒，徒为厚缁纩。  
晴来露青霭，千仞缺寻丈。卧恐玉华销，时时推枕望。  
虽然营卫困，亦觉精神王。把笔强题诗，粗言瑰怪状。  
吴兴郑太守，文律颇清壮。凤尾与鲸牙，纷披落杂唱。  
缄书寄城内，搪突无以况。料峭采莲船，纵横簸天浪。  
方倾谢公酒，忽值庄生丧。默默阻音徽，临风但惆怅。  
春归迨秋末，固自婴微恙。岁晏弗躬亲，何由免欺诳。  
今来观刈获，乃在松江并。门外两潮过，波澜光荡漾。  
都缘新卜筑，是事皆草创。尔后如有年，还应惬微尚。  
天高气候爽，野迥襟怀旷。感物动牢愁，愤时频肮脏。  
平生乐篇翰，至老安敢忘。骏骨正牵盐，玄文终覆酱。  
嗟今多赤舌，见善惟蔽谤。忖度大为防，涵容宽作量。  
图书筐篋外，关眼皆臞长。饿隶亦胜无，薄田家所仰。  
稍离饥寒患，学古真可强。圣道庶经营，世途多踉跄。  
近闻天子诏，复许私酝酿。促使春酒材，呼儿具盆盎。  
宵长拥吟褐，日晏开书幌。我醉卿可还，陶然似元亮。

卷 619\_9 【孤雁】

陆龟蒙

我生天地间，独作南宾雁。哀鸣慕前侣，不免饮啄晏。  
虽蒙小雅咏，未脱鱼网患。况是婚礼须，忧为弋者篡。  
晴鸢争上下，意气苦凌慢。吾常吓鸳雏，尔辈安足讪。  
回头语晴鸢，汝食腐鼠惯。无异鸳骀群，恋短豆皂栈。  
岂知潇湘岸，葭菼蘋萍间。有石形状奇，寒流古来湾。  
闲看麋鹿志，了不忧乌豢。世所重巾冠，何妨野夫舄。  
骚人夸蕙芷，易象取陆苒。漆园逍遥篇，中亦载斥鷃。  
汝惟材性下，嗜好不可谏。身虽慕高翔，粪壤是盼盼。  
或闻通鬼魅，怪崇立可辩。哲族书尚存，宁容恣妖幻。

卷 619\_10 【南泾渔父】

陆龟蒙

予方任疏慵，地僻即所好。江流背村落，偶往心已繆。  
田家相去远，岑寂且纵傲。出户手先筇，见人头未帽。  
南泾有渔父，往往携稚造。问其所以渔，对我真蹈道。  
我初籍鱼鳖，童叟至于耄。窟穴与生成，自然通壑奥。  
孜孜戒吾属，天物不可暴。大小参去留，候其孳养报。  
终朝获鱼利，鱼亦未常耗。同覆天地中，违仁辜覆焘。  
余观为政者，此意谅难到。民皆死搜求，莫肯兴愍悼。

今年川泽旱，前岁山源潦。牒诉已盈庭，闻之类禽噪。  
譬如死鸡鹜，岂不容乳抱。孟子讥宋人，非其擅苗躁。  
吾嘉渔父旨，雅叶贤哲操。倘遇采诗官，斯文诚敢告。

卷 619\_11 【引泉诗】

陆龟蒙

上嗣位六载，吾宗刺桐川。余来拜旌戟，诏下之明年。  
是时春三月，绕郭花蝉联。岚盘百万髻，上插黄金钿。  
授以道士馆，置榻于东偏。满院声碧树，空堂形老仙。  
本性乐凝淡，及来更虚玄。焚香礼真像，盥手披灵编。  
新定山角角，乌龙独巉然。除非净晴日，不见苍崖巅。  
上有擎云峰，下有喷壑泉。泉分数十汉，落处皆峥潺。  
寒声入烂醉，聒破西窗眠。支筇起独寻，只在墙东边。  
呼童具畚鍤，立凿莓苔穿。瀟淙一派堕，练带横斜牵。  
乱石抛落落，寒流响溅溅。狂奴七里濑，缩到疏楹前。  
跳花泼半散，涌沫飞旋圆。势束三峡挂，泻危孤磴悬。  
曾闻瑶池溜，亦灌朱草田。晁伯弄翠蕊，鸾雏舞丹烟。  
凌风振桂柁，隔雾驰犀船。况当玄元家，尝著道德篇。  
上善可比水，斯文参五千。精灵若在此，肯恶微波传。  
不拟争滴沥，还应会沦涟。出门复飞箭，合势浮青天。  
必有学真子，鹿冠秋鹤颜。如能辅余志，日使疏其源。

卷 619\_12 【纪梦游甘露寺（寺在京口北固山上）】

陆龟蒙

昔卧嵩高云，云窗正寒夕。披裘忽生梦，似到空王宅。  
峨天一峰立，栏楯横半壁。级倚绿巖差，关临赤霄辟。  
扪虚陟孤峭，不翅千余尺。叠掌望罽罃，分明袒肩释。  
凌香稽首罢，嘹唳□□□。高户乘北风，声号大波白。  
光中目难送，定验方可覩。树细鸿蒙烟，岛疏零落碧。  
须臾群籁入，空水相喷激。积浪亚寒堆，呀如斗危石。  
跳音簇鞞鼓，溅沫交矛戟。鸟疾帆亦奔，纷纷助劲敌。  
思非水灵怒，即是饥龙擘。怯慑不敢前，荷襟汗沾臆。  
回经定僧处，泉木光相射。岩磴云族栖，栢柯露华适。  
逍遥得真趣，迢迢寻常迹。山腹贮孤亭，岚根四垂帘。  
谁题雪月句，乃是曹刘格。阊阖一枝琼，边楼数声笛。  
吟高鬢然起，若自苍旻掷。短烛堕余花，圆蟾挂斜魄。  
自从神锡境，无处不登陟。忽上南徐山，心期豁而获。  
岂伊烦恼骨，合到清凉域。暗得胡蝶身，幽期尽相识。  
奈何有名氏，未列金闺籍。翻惭邕顶童，得奉真如策。  
云涛触风望，毫管和风掇。聊记梦中游，留之问禅客。

卷 619\_13 【惜花】

陆龟蒙

人寿期满百，花开唯一春。其间风雨至，旦夕旋为尘。

若使花解愁，愁于看花人。

卷 619\_14 【别离】

陆龟蒙

丈夫非无泪，不洒离别间。杖剑对尊酒，耻为游子颜。  
蝮蛇一螫手，壮士即解腕。所志在功名，离别何足叹。

卷 619\_15 【鸣雁行】

陆龟蒙

朔风动地来，吹起沙上声。闺中有边思，玉箸此时横。  
莫怕儿女恨，主人烹不鸣。

卷 619\_16 【短歌行】

陆龟蒙

爪牙在身上，陷阱犹可制。爪牙在胸中，剑戟无所畏。  
人言畏猛虎，谁是撩头弊？只见古来心，奸雄暗相噬。



卷 619\_17 【挟瑟歌】

陆龟蒙

挟瑟为君抚，君嫌声太古。寥寥倚浪系，㠿㠿沈湘语。  
赖有秋风知，清冷吹玉柱。

卷 619\_18 【婕妤怨】

陆龟蒙

妾貌非倾国，君王忽然宠。南山掌上来，下敌新恩重。  
后宫多窃宠，日日学新声。一落君王耳，南山又须轻。

卷 619\_19 【江南曲】

陆龟蒙

为爱江南春，涉江聊采蘋。水深烟浩浩，空对双车轮。  
车轮明月团，车盖浮云盘。云月徒自好，水中行路难。  
遥遥洛阳道，夹道生春草。寄语棹船郎，莫夸风浪好。

## 第六百二十卷

### 卷 620\_1 【渔具诗·网】

陆龟蒙

大罟纲目繁，空江波浪黑。沈沈到波底，恰共波同色。  
牵时万鬐入，已有千钧力。尚悔不横流，恐他人更得。

### 卷 620\_2 【渔具诗·罩】

陆龟蒙

左手揭圆罟，轻桡弄舟子。不知潜鳞处，但去笼烟水。  
时穿紫屏破，忽值朱衣起。贵得不贵名，敢论鲂与鲤。

### 卷 620\_3 【渔具诗·罾】

陆龟蒙

有意烹小鲜，乘流驻孤棹。虽然烦取舍，未肯求津要。

多为虾蚬误，已分鸂鶒笑。寄语龙伯人，荒唐不同调。

卷 620\_4【渔具诗·钓筒】

陆龟蒙

短短截筠光，悠悠卧江色。蓬差櫓相应，雨慢烟交织。  
须臾中芳饵，迅疾如飞翼。彼竭我还浮，君看不争得。

卷 620\_5【渔具诗·钓车】

陆龟蒙

溪上持只轮，溪边指茅屋。闲乘风水便，敢议朱丹毂。  
高多倚衡惧，下有折轴速。曷若载逍遥，归来卧云族。

卷 620\_6【渔具诗·鱼梁】

陆龟蒙

能编似云薄，横绝清川口。缺处欲随波，波中先置笱。  
投身入笼槛，自古难飞走。尽日水滨吟，殷勤谢渔叟。

卷 620\_7 【渔具诗·叉鱼】

陆龟蒙

春溪正含绿，良夜才参半。持矛若羽轻，列烛如星烂。  
伤鳞跳密藻，碎首沈遥岸。尽族染东流，傍人作佳玩。

卷 620\_8 【渔具诗·射鱼】

陆龟蒙

弯弓注碧浔，掉尾行凉沚。青枫下晚照，正在澄明里。  
抨弦断荷扇，溅血殷菱蕊。若使禽荒闻，移之暴雨水。

卷 620\_9 【渔具诗·鸣榔】

陆龟蒙

水浅藻荇涩，钓罩无所及。铿如木铎音，势若金钲急。  
驱之就深处，用以资俯拾。搜罗尔甚微，遁去将何入？

卷 620\_10 【渔具诗·汭（吴人今谓之簑）】

陆龟蒙

万植御洪波，森然倒林薄。千顷咽云上，过半随潮落。  
其间风信背，更值雷声恶。天道亦衰多，吾将移海若。

卷 620\_11 【渔具诗·蓼（吴人今谓之丛）】

陆龟蒙

斩木置水中，枝条互相蔽。寒鱼遂家此，自以为生计。  
春冰忽融化，尽取无遗裔。所托成祸机，临川一凝睇。

卷 620\_12 【渔具诗·种鱼】

陆龟蒙

凿池收赭鳞，疏疏置云屿。还同汗漫游，遂以江湖处。  
如非一神守，潜被蛟龙主。蛟龙若无道，跛鳖亦可御。

卷 620\_13 【渔具诗·药鱼】

陆龟蒙

香饵缀金钩，日中悬者几。盈川是毒流，细大同时死。  
不唯空饲犬，便可将貽蚁。苟负竭泽心，其他尽如此。

卷 620\_14 【渔具诗·舴艋】

陆龟蒙

篷棹两三事，天然相与闲。朝随稚子去，暮唱菱歌还。  
倚石迟后侣，徐桡供远山。君看万斛载，沈溺须臾间。

卷 620\_15 【渔具诗·箬簖】

陆龟蒙

谁谓箬簖小，我谓箬簖大。盛鱼自足餐，寘壁能为害。  
时将刷蘋浪，又取悬藤带。不及腰上金，何劳问蓍蔡。

卷 620\_16 【奉和袭美添渔具五篇·渔庵】

陆龟蒙

结茅次烟水，用以资啸傲。岂谓钓家流，忽同禅室号。  
闲凭山叟占，晚有溪禽嫪。华屋莫相非，各随吾所好。

卷 620\_17 【奉和袭美添渔具五篇·钓矶】

陆龟蒙

拣得白云根，秋潮未曾没。坡陀坐鳌背，散漫垂龙发。  
持竿从掩雾，置酒复待月。即此放神情，何劳适吴越。

卷 620\_18 【奉和袭美添渔具五篇·蓑衣】

陆龟蒙

山前度微雨，不废小涧渔。上有青裌襖，下有新赬疏。  
滴沥珠影泫，离披岚彩虚。君看荷制者，不得安吾庐。

卷 620\_19 【奉和袭美添渔具五篇·箬笠】

陆龟蒙

朝携下枫浦，晚戴出烟艇。冒雪或平檐，听泉时仄顶。  
飙移霭然色，波乱危如影。不识九衢尘，终年居下洞。

卷 620\_20 【奉和袭美添渔具五篇·背蓬】

陆龟蒙

敏手劈江筠，随身织烟壳。沙禽固不知，钓伴犹初觉。  
闲从翠微拂，静唱沧浪濯。见说万山潭，渔童尽能学。

卷 620\_21 【樵人十咏·樵谿】

陆龟蒙

山高谿且深，苍苍但群木。抽条欲千尺，众亦疑朴樕。  
一朝蒙翦伐，万古辞林麓。若遇燎玄穹，微烟出云族。



卷 620\_22 【樵人十咏·樵家】

陆龟蒙

草木黄落时，比邻见相喜。门当清涧尽，屋在寒云里。  
山棚日才下，野灶烟初起。所谓顺天民，唐尧亦如此。

卷 620\_23 【樵人十咏·樵叟】

陆龟蒙

自小即胼胝，至今凋鬓发。所图山褐厚，所爱山炉热。  
不知冠盖好，但信烟霞活。富贵如疾颠，吾从老岩穴。

卷 620\_24 【樵人十咏·樵子】

陆龟蒙

生自苍崖边，能谙白云养。才穿远林去，已在孤峰上。  
薪和野花束，步带山词唱。日暮不归来，柴扉有人望。

卷 620\_25 【樵人十咏·樵径】

陆龟蒙

石脉青霭间，行行自幽绝。方愁山缭绕，更值云遮截。  
争推好林浪，共约归时节。不似名利途，相期覆车辙。

卷 620\_26 【樵人十咏·樵斧】

陆龟蒙

淬砺秋水清，携持远山曙。丁丁在前涧，杳杳无寻处。  
巢倾鸟犹在，树尽猿方去。授钺者何人，吾今易其虑。

卷 620\_27 【樵人十咏·樵担】

陆龟蒙

轻无斗储价，重则筋力绝。欲下半岩时，忧襟两如结。  
风高势还却，雪厚疑中折。负荷诚独难，移之赠来哲。

卷 620\_28 【樵人十咏·樵风】

陆龟蒙

朝随早潮去，暮带残阳返。向背得清飙，相迫无近远。  
采山一何迟，服道常苦蹇。仙术信能为，年华未将晚。

卷 620\_29 【樵人十咏·樵火】

陆龟蒙

积雪抱松坞，蠹根然草堂。深炉与远烧，此夜仍交光。  
或似坐奇兽，或如焚异香。堪嗟宦游子，冻死道路傍。

卷 620\_30 【樵人十咏·樵歌】

陆龟蒙

纵调为野吟，徐徐下云磴。因知负樵乐，不减援琴兴。  
出林方自转，隔水犹相应。但取天壤情，何求郢人称。

卷 620\_31 【奉和袭美酒中十咏·酒星】

陆龟蒙

万古醇酎气，结而成晶荧。降为嵇阮徒，动与尊壘并。  
不独祭天庙，亦应邀客星。何当八月槎，载我游青冥。

卷 620\_32 【奉和袭美酒中十咏·酒泉】

陆龟蒙

初悬碧崖口，渐注青溪腹。味既敌中山，饮宁拘一斛。  
春疑浸花骨，暮若酣云族。此地得封侯，终身持美禄。

卷 620\_33 【奉和袭美酒中十咏·酒籒】

陆龟蒙

山斋酝方熟，野童编近成。持来欢伯内，坐使贤人清。  
不待盘中满，旋供花下倾。汪汪日可挹，未羨黄金罍。

卷 620\_34 【奉和袭美酒中十咏·酒床】

陆龟蒙

六尺样何奇，溪边濯来洁。糟深贮方半，石重流还咽。  
闲移秋病可，偶听寒梦缺。往往枕眠时，自疑陶靖节。

卷 620\_35 【奉和袭美酒中十咏·酒垆】

陆龟蒙

锦里多佳人，当垆自沽酒。高低过反坫，大小随圆瓿。  
数钱红烛下，涤器春江口。若得奉君欢，十千求一斗。

卷 620\_36 【奉和袭美酒中十咏·酒楼】

陆龟蒙

百尺江上起，东风吹酒香。行人落帆上，远树涵残阳。  
凝睇复凝睇，一觞还一觞。须知凭栏客，不醉难为肠。

卷 620\_37 【奉和袭美酒中十咏·酒旗】

陆龟蒙

摇摇倚青岸，远荡游人思。风欹翠竹杠，雨澹香醪字。  
才来隔烟见，已觉临江迟。大旆非不荣，其如有王事。

卷 620\_38 【奉和袭美酒中十咏·酒尊】

陆龟蒙

黄金即为侈，白石又太拙。斫得奇树根，中如老蛟穴。  
时招山下叟，共酌林间月。尽醉两忘言，谁能作天舌？

卷 620\_39 【奉和袭美酒中十咏·酒城】

陆龟蒙

何代驱生灵，筑之为酿地。殊无甲兵守，但有糟浆气。  
雉堞屹如狂，女墙低似醉。必若据而争，先登仪狄氏。

卷 620\_40 【奉和袭美酒中十咏·酒乡】

陆龟蒙

谁知此中路，暗出虚无际。广莫是邻封，华胥为附丽。  
三杯闻古乐，伯雅逢遗裔。自尔等荣枯，何劳问玄弟。

卷 620\_41 【添酒中六咏·酒池】

陆龟蒙

万斛输曲沼，千钟未为多。残霞入醖齐，远岸澄白酤。  
后土亦沈醉，奸臣空浩歌。迩来荒淫君，尚得乘余波。

卷 620\_42 【添酒中六咏·酒龙】

陆龟蒙

铜雀羽仪丽，金龙光彩奇。潜倾邺宫酒，忽作商庭螭。  
若怒鳞甲赤，如酣头角垂。君臣坐相灭，安用骄奢为。

卷 620\_43 【添酒中六咏 · 酒瓮】

陆龟蒙

候暖麴蘖调，覆深苔盖净。溢处每淋漓，沉来还滟滢。  
常闻清凉酎，可养希夷性。盗饮以为名，得非君子病。

卷 620\_44 【添酒中六咏 · 酒船】

陆龟蒙

昔人性何诞，欲载无穷酒。波上任浮身，风来即开口。  
荒唐意难遂，沉湎名不朽。千古如比肩，问君能继不？

卷 620\_45 【添酒中六咏 · 酒枪】

陆龟蒙

景山实名士，所玩垂清尘。尝作酒家语，自言中圣人。  
奇器质含古，挫糟未应醇。唯怀魏公子，即此飞觴频。



卷 620\_46 【添酒中六咏·酒杯】

陆龟蒙

叔夜傲天壤，不将琴酒疏。制为酒中物，恐是琴之余。  
一弄广陵散，又裁绝交书。颓然掷林下，身世俱何如。

卷 620\_47 【奉和袭美茶具十咏·茶坞】

陆龟蒙

茗地曲隈回，野行多缭绕。向阳就中密，背涧差还少。  
遥盘云髻慢，乱簇香篝小。何处好幽期，满岩春露晓。

卷 620\_48 【奉和袭美茶具十咏·茶人】

陆龟蒙

天赋识灵草，自然钟野姿。闲来北山下，似与东风期。  
雨后探芳去，云间幽路危。唯应报春鸟，得共斯人知。

卷 620\_49 【奉和袭美茶具十咏·茶笋】

陆龟蒙

所孕和气深，时抽玉苕短。轻烟渐结华，嫩蕊初成管。  
寻来青霭曙，欲去红云暖。秀色自难逢，倾筐不曾满。

卷 620\_50 【奉和袭美茶具十咏·茶籩】

陆龟蒙

金刀劈翠筠，织似波文斜。制作自野老，携持伴山娃。  
昨日斗烟粒，今朝贮绿华。争歌调笑曲，日暮方还家。

卷 620\_51 【奉和袭美茶具十咏·茶舍】

陆龟蒙

旋取山上材，驾为山下屋。门因水势斜，壁任岩隈曲。  
朝随鸟俱散，暮与云同宿。不憚采掇劳，只忧官未足。

卷 620\_52 【奉和袭美茶具十咏·茶灶】

陆龟蒙

无突抱轻岚，有烟映初旭。盈锅玉泉沸，满甌云芽熟。  
奇香袭春桂，嫩色凌秋菊。炀者若吾徒，年年看不足。

卷 620\_53 【奉和袭美茶具十咏·茶焙】

陆龟蒙

左右捣凝膏，朝昏布烟缕。方圆随样拍，次第依层取。  
山遥纵高下，火候还文武。见说焙前人，时时炙花脯。

卷 620\_54 【奉和袭美茶具十咏·茶鼎】

陆龟蒙

新泉气味良，古铁形状丑。那堪风雪夜，更值烟霞友。  
曾过赧石下，又住清溪口。且共荐皋卢，何劳倾斗酒。

卷 620\_55 【奉和袭美茶具十咏·茶瓯】

陆龟蒙

昔人谢堰埵，徒为妍词饰。岂如珪璧姿，又有烟岚色。  
光参筠席上，韵雅金罍侧。直使于阗君，从来未尝识。

卷 620\_56 【奉和袭美茶具十咏·煮茶】

陆龟蒙

闲来松间坐，看煮松上雪。时于浪花里，并下蓝英末。  
倾余精爽健，忽似氛埃灭。不合别观书，但宜窥玉札。